

MODERN LATIN, LATIN MODERNE, LATINITAS MODERNA, LATIM MODERNO
NUNTII LATINI, NEWS IN LATIN, BY REIJO PITKAERANTA AND TUOMO PEKKANEN
SOURCE. http://yle.fi/radio1/tiede/nuntii_latini/

SAMPLES OF MODERN LATIN BY REIJO PITKAERANTA AND TUOMO PEKKANEN
FROM FINLAND. LATIN NEWS, 2005- 2012, 282 PAGES, COMPILED BY DARCY
CARVALHO, SÃO PAULO, BRAZIL, 2013. LATEST BULLETINS CAN BE DOWNLOADED
FROM THE SOURCE [HTTP://YLE.FI/RADIO1/TIEDE/NUNTII_LATINI/](http://yle.fi/radio1/tiede/nuntii_latini/)

The text of bulletins from 13 May 2005 onwards is given below and audiofiles from September 2006 are saved in the same directory on my home computer and on my school server. An archive of broadcasts from May 2000 is available on-line at <http://www.interrete.de/latein/nuntiiifin.html> (scripts only). German annotation and translation of some reports is provided on a German grammar school's website at: <http://xen.hvvgg.de/index.php?mode=nuntii&navid>. English glosses to some of the words can be found with the Web Reader on the Word Champ site (<http://www.wordchamp.com/lingua2/Splash.do>). They include all words used in the bulletins from 16 February 2007 onwards. There is a description of how to use the Word Champ assistance at <http://www.circe.be/content/view/134/332/lang,en/> and also at <http://linguae.weebly.com/using-nuntii-latini.html>

14.12.2012

Anniversarium independentiae Finnorum

Postridie Nonas Decembres (6.12.) anniversarium independentiae Finnorum nonagesimum quintum a civibus caerimoniis translaticii celebratum est. Praesidens rei publicae Sauli Niinistö cum coniuge Jenni Haukio in castellum praesidentiale circiter mille octingentos hospites invitaverat. Thema festivitatis vespertinae, a praesidente electum, erant opera et labor Finnorum.

Imprimis invitati erant homines, qui suis operibus suoque labore prosperitati patriae profuerant. Idem thema apparuit in programmata musicali et in ministracione ciborum, qui quantum fieri potuit a productioribus patriis empti erant. Emissionem directam ex castello praesidentis duo miliones quadringenta milia hominum per televisionem spectabant. Singulare erat, quod quattuor praesidentes rei publicae cum coniugibus diem independentiae una celebrabant. Aderant scilicet, praeter praesidentem Sauli Niinistö, pristini praesidentes Mauno Koivisto, Martti Ahtisaari, Tarja Halonen. Koivisto, qui hoc anno undenonaginta annos complevit, est inter omnes Finniae praesidentes longaevisimus.

Marius Monti munus depositurus

Marius Monti, primus minister Italiae, munus depositurus est. Praesidenti Georgio Napolitano dixit se, ubi primum nova de dispensacione oeconomica lex in annum proximum a parlamento accepta esset, discessionem confirmaturum esse. Silvius Berlusconi, cui Monti mense Novembri successerat, nuntiavit se munus primi ministri denuo petiturum esse.

Finnis palma de choreographia flamenco

Grex Finnicus de choreographia flamenco palmam maxime insignem obtinuit, cum de opere "Corvus et Horologium" in certamine Matriti facto praemiatus est. Dux gregis Kaari Martin de choreographia solitaria, Roni Martin de optima illius certaminis musica, Erica Turunen de optima vestium designatione primum praemium acceperunt. Victoria fuit insolita, nam in illo certamine, anno millesimo nongentesimo nonagesimo secundo condito, Hispani primos locos obtinere solent. Maior pars ex participibus certaminis Matritensis saltationem flamenco translaticiam confitebantur. Opus Finnorum autem, quod Mariana Collado Hispana saltabat, quiddam medium erat inter flamenco et saltationem hodiernam.

Superficies marium inaequaliter surgit

Investigationes recentes ostendunt superficiem marium propter calefactionem climatis opinione celerius surgere. Maximum periculum inundationum regionibus planioribus terrarum e gentiorum imminet. Ante annum bis millesimum sexagesimum (2060) superficies maris a dimidio metro usque ad metrum surrectura esse aestimatur, ante finem saeculi etiam complura metra. Superficies levatur, quod glacies regionum arcticarum celerius quam ante solvitur et aqua maris calefactione amplificatur. Neque

tamen id eodem modo ubique evenit, nam cursus aquarum marinarum, gradatio salina, variatio caloris, formaeque et metamorphoses crustae terrestres efficiunt, ut mutationes inaequaliter fiant.
(Tuomo Pekkkanen)

7.12.2012

Quid Sauli Niinistö dixerit

Praesidens Finniae Sauli Niinistö, cum Kalendis Decembribus (1.12.) diurnariis colloquium percontativum daret, ait se deliberavisse, quid esset, quod terrae septentrionales in suffragiis apud Nationes Unitas hoc anno factis clades acerbissimas acceperant.

Censuit fieri potuisse, ut Finni et Sueti formas civitatum suarum prosperarum nimis superbe prae se ferrent. Operae pretium esse quaerere, num talis modus vivendi, qui apud populos septentrionales valeret, a peregrinis tanti haberetur, quanti Hyperborae cogitarent.

(Reijo Pitkäranta)

De rebus Proximi Orientis

Coetui generali Nationum Unitarum placuit, ut Palaestineses ad illum ordinem tamquam observatores pro sua civitate agentes admitterentur. Israeliani de ea re certiores facti tantopere irati sunt, ut statim tria milia novarum coloniarum in Ripam occidentalem et Hierosolyma orientalia deducere decernerent. Consilium eorum a Civitatibus Americae Unitis condemnatum est, cum tale inceptum consultationibus pacis in Oriente Proximo continuandis parum utile esset.

(Reijo Pitkäranta)

Conditio Iranianis proposita

Regimen Civitatum Americae Unitarum nuntiavit Iranianos usque ad finem mensis Martii tempus habere ad dicendum, utrum Ordini internationali ab energia atomica (IAEA) re vera cooperari vellent necne. Nisi haec conditio ab eis accepta esset, rem ad Consilium securitatis Nationum Unitarum relatum iri.

(Reijo Pitkäranta)

Pahor praesidens Slovakiae

Praesidens Slovakiae electus est Borut Pahor, pristinus primus minister undequinquaginta annos natus. Conciliavit enim sibi suffragiorum sexaginta septem centesimas (67%), cum Danilo Türk, qui rei publicae hodie praeest, non nisi triginta duas centesimas (32%) votorum adipisceretur. Abhinc unum annum Pahor munus principis ministri propter sententiam de diffidentia relinquere coactus est.

(Reijo Pitkäranta)

Pertussis adhuc grassatur

Pertussis, quae imprimis infantibus periculosissima est, in terras occidentales denuo redire videtur. Hoc morbi genus, quamquam praesertim apud populos egentiores grassatur, etiam in Britannia et in America Septentrionali hoc anno ita increbruit, ut numerus infectionum tantus esset quantus ante quinquaginta annos fuit. Una e causis eius rei existimatur esse, quod multi parentes dubitant, optimumne factu sit an pessimum liberos adversus pertussim vaccinare.

(Reijo Pitkäranta)

Nuntius domus regiae Britanniae

Princeps Britanniae William et coniux eius Cathrine, ducissa Cantabrigiensis, infantem accipient. Talis nuntius die Lunae (3.12.) e domo regia cum magna civium Britannorum laetitia divulgatus est. Quando autem principissa vel princeps hereditarius nasciturus sit, nondum publice constat. Ducissa e nausea gravidarum tantopere laboravisse dicitur, ut in nosocomium deportanda esset.

(Reijo Pitkäranta)

30.11.2012

Separatistae in Catalonia victores

In comitiis Cataloniae partes politicae, quae ad independentiam spectant, maiorem partem delegatorum in parlamentum regionale acceperunt. Nihilo minus separatio Cataloniae non est probabilis, ut factiones principales iam nuntiaverunt. Inopia quaestus et depressio oeconomica usque gravescens voluntatem separationis apud Catalanos auxerunt.

Catalonia ex partibus Hispaniae oeconomiam habet validissimam, sed multi Catalani censent causam difficultatum oeconomicarum, quibus illi quoque gravantur, in eo esse, ut nimia pars pecuniarum

regionis Matritum delabatur. Regimen Hispaniae centrale voluntati separatistarum vehementer resistit et habet proposita ad secessionem spectantia illegalia et constitutioni Hispaniae contraria.

Mursi novus pharao appellatus

Praesidens Aegypti Mohammed Mursi decrevit, ut leges et statuta a se data definitiva essent neque a tribunalibus repudiari possent. Ex quo cives in variis Aegypti regionibus vehementer et violenter reclamaverunt. Mohammed El-Baradei, dux oppositionis, dixit Mursim se novum pharaonem fecisse, cum ita se supra leges et iudicia posuisset.

Arafat exhumatus

Corpus Jasseris Arafat, ducis Palaestinensium, qui anno bis millesimo quarto obiit, exhumatum est. Propositum est investigare, utrum causa mortis fuerit impetus cardiacus, ut officialiter nuntiabatur, an venenum. Investigationes susceptae sunt, cum polonium, venenum radioactivum, in rebus eius personalibus repertum esset. Sumptis probationibus corpus eodem die denuo sepultum est.

Medvedev aurigas ebrios coercet

Primus minister Dmitri Medvedev narravit in paginis regiminis interretiaris duodeviginti milia (28.000) Russorum per calamitates viarias anno proximo vitam amisisse. Ut disciplina in comitatu vehiculari restitueretur, nuntiavit legem latam iri, ex qua autoraedarii vinolenti, qui calamitatum letalium noxii essent, carcere vel quindecim annorum punirentur. Qui nimia velocitate aut contra semaphora rubra vecti essent, Moscuae et Petroburgi quingentis milibus rublorum (12.000 euronum) multati iri. Alibi in Russia multam fore dimidio minorem sive ducentorum quinquaginta milium rublorum.

Tigres pauciores quam umquam ante

Ex relatione, quam Ordo naturae mundi tuendae (WWF) nuper divulgavit, numerus tigrum est hodie in orbe terrarum minor quam umquam ante. In libertate vivunt adhuc tria milia ducentae tigres. His centum annis numerus nonaginta septem centesimis deminutus est. Maximum periculum populationi tigrum recreandae est venatio clandestina.

In Utsjoki sol disparuit

In communi Utsjoki Finniae maxime septentrionalis sol die Lunae (26.11.) post horizontem disparuit non ante quam medio fere mense Ianuario rediturus. Tenebris hiemalibus obortis Finni septentrionales dicere solent solem in nidum suum se recepisse. In regionibus Finniae meridionalibus sol adhuc circiter sex horas supra horizontem manet.
(Tuomo Pekkanen)

23.11.2012

Bellum Proximi Orientis

Die Mercurii (21.11.) vesperi Israeliani et ordo Palaestinsis Hamas post aggressiones mutuas octo dies continuatas de ignistio consenserunt. De re nuntiavit Mohammed Kamel Amr, princeps minister Aegypti, qui munere conciliatoris pacis fungebatur.

Conflictus militaris, quo centum quadraginta septem Palaestinsenses et quinque Israeliani vitam amiserunt, initium ceperat, cum Palaestinsenses missilia e regione Gaza in Israellem emisissent. Quo facto impediri non potuit, quin Israeliani incursioni ictibus aeriis vehementissimis responderent.
(Reijo Pitkäranta)

Novum regimen Sinarum

Res publica Sinarum a collegio septemvirum regi coepta est. Abhinc enim unam septimanam Pekini accidit, ut novi moderatores civitatis in publicum prodirent. Primus ordine dignitatis erat Xi Jinping, praeses factionis communisticae et praesidens Sinarum designatus undeseviginti annorum. Post eum in conspectum venit Li Keqiang, princeps minister quinquaginta septem annos natus. Eos sequebantur reliqui quinque sodales, qui una cum Xi et Li consilium politicum permanens efficiunt, penes quod summa potestas in Sinis his decem annis erit.
(Reijo Pitkäranta)

SAS e periculo servata

Septimana vergente Societas Aeria Scandinava (SAS) in magno periculo erat, ne omnino decoqueret.

Die tamen Lunae (19.11.) ei contigit, ut post longas consultationes concordiam cum omnibus octo consociationibus opificum inveniret, quam ob rem ruina bonorum imminens evitari potuit. Neque hoc factum esset, nisi operarii condiciones sibi admodum incommodas acceperissent.
(Reijo Pitkäranta)

Cura dentium neglecta

Ex studio Americano patet dentes incuratos periculum mortis augere. Investigatores narrant maiorem letalitem imprimis ad eos homines attingere, quorum dentium cura tam graviter neglecta sit, ut nonnullos dentes iam amitterent. Adiciunt tamen hunc nexum statisticum magnam partem discriminibus ordinis et vitae consuetudinibus explicari posse. Eventus investigationis in actis Journal of Epidemiology and Community Health divulgatus est.
(Saara Honkanen)

De venatione luporum

In Finnia ducenti fere lupi versari existimantur. Quibus animalibus tanta tutela adversus venationem lege concessa est, ut nonnisi decem ex iis tempore venandi praesenti occidi sinerentur. Licet tamen venatoribus lupos in eis Lapponiae regionibus libere agitare, ubi tarandri pascuntur. Ita prohibetur, ne domini rangiferorum ex illis feris bestiis damna immoderata capiant.
(Reijo Pitkäranta)

Dies iurum liberorum

Die Martis (20.11.) dies internationalis iurum liberorum celebrabatur. Eius est cives ad colloquia de rebus ad prosperitatem liberorum pertinentibus evocare. In calendarium Finniae hic dies iam abhinc decem annos receptus est.
(Reijo Pitkäranta) occīdī

Pontificia Academia Latinitatis condita

16.11.2012

Summus Pontifex Benedictus XVI die decimo mensis vertentis litteras apostolicas dedit, quibus Pontificiam Academiam Latinitatis condidit.

In his litteris dicit: "Romano Imperio occidentali extincto, Romana Ecclesia non modo lingua Latina uti perrexit, verum etiam quodammodo custos eiusdem et faulrix fuit... Nostris quoque temporibus Latinae linguae et cultus cognitio perquam est necessaria ad fontes vestigandos, ex quibus complures disciplinae ceteroqui hauriunt... In hodierno tamen cultu, humanarum litterarum extenuatis studiis, periculum adest levioris linguae Latinae cognitionis, quae in curriculis philosophicis theologicisque futurorum presbyterorum quoque animadvertitur.... Quapropter necessitas instare videtur, ut linguae Latinae altius cognoscendae eiusque congruenter utendae fulciatur cura, sive in ecclesiali sive in patentiore cultu campo. Ut hic nisus extollatur et evulgetur, consentaneum prorsus est docendi rationes adhibere aptas ad novas condiciones et provehere item necessitudines inter Academicas institutiones et inquisitores, ut copiosum ac multiforme Latini cultus patrimonium efferatur. Ad haec proposita assequenda, Decessorum Nostrorum semitas calcantes, hasce per Litteras Apostolicas Motu Proprio datas hodie Pontificiam Academiam Latinitatis condimus, quae Pontificio Consilio de Cultura erit obnoxia."

Quae sint proposita Academiae

In statuto, eisdem litteris apostolicis adnexo, proposita novae academiae ita definiuntur, ut studia totius Latinitatis ab antiquitate usque ad tempora hodierna provehantur. Quod consilium est laudandum, nam saepe in hodierna quoque institutione Latina tantum auctores classici digni habentur, qui legantur, mediaevales, humanistici recentissimique male negleguntur. (6) Laudamus etiam, quod Latinitas viva in litteris Summi Pontificis extollitur, cum dicit in diversis provinciis usum linguae "sive scribendo sive loquendo" promovendum esse. Salubriter etiam de hodiernis communicationis instrumentis in institutione Latina adhibendis, ut discipuli sermonem Latinum perdiscant, a Papa commonetur.

Quae membra habeat

Pontificia Academia Latinitatis complectitur praesidem, quem Summus Pontifex in quinquennium nominat, et secretarium, consilium academicum ac quinquaginta sodales academicos ordinarios, a secretario status Vaticani nominatos, qui studiosi cultoresque sunt linguae ac litterarum Latinarum.

Praeter sodales ordinarios alii sodales “correspondentes” a praeside nominari possunt.

Opus Fundatum Latinitas exstinctum

In Civitate Vaticana de rebus Latinis hucusque imprimis curavit institutio, "Opus Fundatum Latinitas" appellatum, quod Papa Paulus VI die tricesimo mensis Iunii anno millesimo nongentesimo septuagesimo sexto (30.6.1976) constituit. Benedictus XVI illam institutionem exstinxit et abolevit praecepitque, ut patrimonium et incepta eius in novam Academiam transferrentur.

(Tuomo Pekkanen)

9.11.2012

Obama iterum praesidens

Praesidens Civitatum Americae Unitarum iterum designatus est Barack Obama, quippe qui comitiis die Martis (6.11.) factis amplius trecentos electores sibi conciliaret. Ubi primum eum in iis civitatibus superiorem esse innotuit, in quibus certamen aequissimum esse constabat, omnibus persuasum erat Obamam victoriam de adversario suo republicano Mitt Romney reportaturum esse. Neque Romney diu cunctatus est, quin novo praesidenti gratulatus se cladem in suffragio accepisse publice confiteretur.

(Reijo Pitkäranta)

Unio Europaea gratulabatur

Moderatores Unionis Europaeae de eventu comitiorum Americanorum certiores facti praesidenti Barack Obama omnia bona precati sunt. Censent cooperationem Europae et Americae Obama iterum praesidente artiolem et efficaciorum futuram esse. Existimant enim fieri posse, ut ille non iam solum rebus domesticis curandis operam det, sed animum magis quam ante ad negotia publica externa attendat.

(Reijo Pitkäranta)

Tawadros papa Coptorum

Die Dominico (4.11.) novus papa Coptorum Christianorum Aegypti creatus est Tawadros, episcopus provinciae Beheirae in ostio Nili sitae. Munere accepto ille vir sexaginta annorum ‘papa Alexandriae et antistes sanctae sedis totius Africae’ officialiter appellatur. Electionem fecit puer choralis, qui oculis obligatis e calice unam e tribus tabellis obsignatis temere sustulit eamque praefecto suffragii porrexit.

(Reijo Pitkäranta)

De libertate rei diurnariae

Institutum internationale ab actis diurnis (IPI) sollicitum est de progressu, qui eo tendere videatur, ut libertas rei diurnariae in Europa in periculum vocetur. Quod imprimis ad quattuor civitates valere videtur, quae sunt Belorussia, Ucraina, Hungaria, Turcia. Unum exemplum huiusmodi libertatis coercitae profertur lex in Hungaria perlata, qua magistratibus publicis bona opportunitas censuram agendi data est.

(Reijo Pitkäranta)

Memoria Friderici Magni

Hoc anno trecenti anni acti sunt, cum rex Fridericus II, cognomine Magnus, Berolini natus est. Sceptrum regni Borussiae anno millesimo septingentesimo quadragiesimo (1740) adeptus terminos patriae ita propagare coepit, ut Silesiam in potestatem suam redigeret et bello septem annorum (1756-1763) cum populis Europae validissimis prospera fortuna certaret.

(Reijo Pitkäranta)

De die culturae Sueticae

Dies Martis sive postridie Nonas Novembres (6.11.) in Finnia cultui civili et litteris Sueticis celebrandis dedicatus erat. Primum quidem hoc festum ad memoriam Gustavi Adolphi II, regis Suetorum, agebatur. Is enim eo ipso die anno millesimo sescentesimo tricesimo secundo (1632), cum in Germania bellum gereret, pugna apud vicum nomine Lützen facta interfectus est.

(Reijo Pitkäranta)

2.11.2012

De comitiis Finniae communalibus

In comitiis Finniae communalibus maiore quam ceterae partes politicae gratia valebant Conservativi (21,9%), Democratiae sociales (19,6%), Factio centralis (18,7%). Veri autem victores erant tantum Finni

fundamentales (12,3%), qui post comitia communalia proxime (2008) facta septem centesimis numerum fautorum auxerunt.
Ex civibus suffragium habentibus tantum duodesexaginta centesimae (58,2%) ad urnas venerunt.

Berlusconi in carcerem damnatus

Silvio Berlusconi, pristinus primus minister Italiae, in tribunali Mediolanensi de fraude fiscali in carcerem quattuor annorum damnatus est. Statim postea ex lege, qua numerus carcere clausorum anno bis millesimo sexto restringebatur, illa poena in unum carceris annum deminuta est. Berlusconi culpam infititur. Iudicia in Italia data non sunt valida, antequam in duobus tribunalibus appellationis tractata sunt. Berlusconi antea iam ter damnatus est, sed carcerem evitavit per appellationes aut quia crimina iudiciis in multos annos prolatis obsoleverunt. Mense Novembri anni proximi munus primi ministri deponere coactus est.

Peregrinatores diabolum lapidaverunt

Peregrinatio annualis musulmanorum die Mercurii (24.10.) incohata est. Unusquisque ex musulmanis semel in vita Meccam peregrinari debet, si valetudine et opibus eius fieri potest. Hoc anno duo miliones peregrinatorum Meccam venerunt. Propter turbam hominum periculosissima est lapidatio diaboli, cum lapides contra tres columnas diabolum repraesentantes coniciuntur.

Alcoholum nocivius quam creditum est

Experimenta rattis facta demonstrant alcoholum nocivius esse quam creditur. Nam usus alcoholi vel modicus memoriam et facultatem discendi afficit. Effectus visibilis est in hippocampo cerebri, ubi rattis, qui alcoholum per duas septimanas ceperunt, numerus novarum cellularum quadraginta centesimis (40%) minor est quam aliis, qui nullum alcoholum sumpserunt. In eisdem experimentis notatum est, quod alcoholum rattos mares alio modo afficit quam rattos feminas. Nam mares alcoholi fieri videntur tranquilliores, feminae autem activiores. Utrum res ita se habeat etiam in hominibus, nondum pro certo confirmari potest. Investigatio in actis Neuroscience nuper divulgata est.

Fungus fraxinis imminet

Propter fungum in fraxinis vagantem periculum est, ne silvae fraxinorum Britanniae omnino intereant. Fungus nomine Chalara fraxinea, anno ineunte in Britannia observata, iam in silvas naturales Britanniae transisse confirmata est. Tertia pars silvarum Britanniae ex fraxinis constat. Britanni importationem fraxinorum ex Europa hac septimana vetituri sunt sed forsitan erit sero. In Dania ille fungus iam maiorem partem fraxinorum delevit. Idem etiam in Finnam transiit, sed in Finnia silvae fraxinorum sunt rarissimae et inveniuntur tantum in insulis Alandiae.
(Tuomo Pekkanen)

26.10.2012

Australia et Luxemburg in Consilium securitatis

Finnia in Consilium securitatis Nationum Unitarum non est electa. Ex grege terrarum occidentalium in proximum biennium (2013-14) electae sunt Australia et Luxemburg. Alia membra Consilii mutabilia creata sunt Argentina, Corea Meridiana, Ruanda. Membra perpetua sunt quinque, scilicet Britannia, Francia, Russia, Sinae, USA.

Finnia, quae bis antea (1969-70 et 1989-90) membrum Consilii securitatis fuit, multos annos apud ceteras nationes ambiverat, ut rursus eligeretur, et in antecessum, saltem apud politicos Finnos, a plerisque sustentari videbatur. Sed spe decepta est, nam in suffragio definitivo Luxemburg centum triginta unum vota cepit, Finnia sexaginta duo.

Ecclesia catholica septem novos sanctos accepit

Papa Benedictus XVI die Dominico (21.10.) septem novos homines ad sanctorum ordinem aggregavit. Inter canonizatos est Katerina Tekakwitha, prima sancta indigena Americana, quae saeculo septimo decimo in America septentrionali vixit. Tekakwitha, "Lilium Mohawkorum" appellata, per saecula symbolum spei multis indigenis Americae fuit. Sunt, qui censeant ecclesiam catholicam, hodie multis scandalis implicatam, novis sanctis canonizatis eo spectare, ut gratiam suam decrescentem augeat. In America Meridiana et in Africa ecclesia euangelica gratiam catholicae ecclesiae extenuat, in terris autem occidentalibus religioni immimet saecularizatio.

De iuribus liberorum

Porta interretiararia Children's Rights appellata, cuius est iura liberorum promovere et defendere, civitates mundi in ordinem redegit respiciens condiciones liberorum et modum, quo iura eorum ad effectum perducuntur. In hoc indice Finnia post Suetiam inter Hollandiam et Helvetiam octavo loco posita est. Primae sunt parvae civitates Lichtenstein, San Marino, Andorra, Monaco. Russia inter dictaturas et populos egentiores est loco nonagesimo sexto.

Värttinä praemium WOMEX 2012 accepit

Grex Finnicus Värttinä hornotinum praemium WOMEX (<World Music Expo) accepit, quod praemium musicae mundi amplissimum habetur. Värttinä, cuius nomen colum vel fusum significat, in paroecia Rääkkylä Careliae septentrionalis ante triginta annos ortus est. Radices musicales in traditione Carelica, praecipue in more canendi feminarum et in carminibus popularibus habet. Notissimum est, quod una cum Allah Rakha Rahman ad opus musicale "The Lord of the Rings" cooperatus est. Praemium WOMEX datum est die Dominico Thessalonicae, ubi Värttinä inter caerimonias concentum habuit.

Fossile testudinis antiquissimum

In Polonia meridionali prope urbem Porebam repertum est fossile testudinis, quod omnium antiquissimum habetur. Palaeontologi testudinem ad genus Proterochersis robusta pertinere et duorum milium quindecim milionum annorum esse aestimant. Repertum fossile ideo est insigne, quod de evolutione et origine testudinum novam notitiam dare poterit.

(Tuomo Pekkanen)

19.10.2012

Praemium pacis Unioni Europaeae

Praemium Nobelianum pacis hoc anno Unioni Europaeae datur. Thorbjörn Jagland, praeses collegii electorum, ait Unionem Europaeam his decenniis ad concordiam, democratiam, iura humana provehenda multum contulisse. "Quis est", inquit, "qui hodie cogitet fieri posse, ut inter Germanos et Francogallos, hostes non ita pridem inter se acerrimos, bellum oriatur?"

(Reijo Pitkäranta)

Foedus pacis in Philippinis factum

Regimen Philippinarum et maximus ibidem musulmanorum rebellium grex foedus pacis fecerunt. Id eo spectat, ut conflictui militari, quo his quadraginta annis saltem centum quinquaginta milia hominum occisa sunt, tandem finis fiat. Consensus est de territorio autonomico condendo, quod imprimis ex iis insulae Mindanae partibus constat, ubi cives islamismum confitentes habitant.

(Reijo Pitkäranta)

De sanctionibus Iraniae impositis

Ministri Unionis Europaeae a rebus exteris sanctiones Iraniae impositas duriores reddiderunt. Interdictum enim est, ne ex Irania iam aut petroleum aut gasum importaretur. Huc accedit, quod mensae argentariae et industria technica Iraniae asperioribus coercionibus onerabuntur. Quae quamvis ita sint, moderatores Iraniani recusant, quominus de programme suo nucleari deponendo cum nationibus occidentalibus colloquantur.

(Reijo Pitkäranta)

De peregrinatione Cubanorum

Cubani inde a Kalendis Ianuariis liberius quam ante peregre abire sinuntur. Iis enim per duos annos continuos in terris exteris versari licebit, dummodo syngraphum et visum legale possideant. Quae mutatio rerum ad renovationes a praesidente Raul Castro promissas pertinere videtur.

(Reijo Pitkäranta)

Parlamentum Israelis dimissum

Knesset, parlamentum Israelis, dimissum est, cum regimini civitatis non contigisset, ut de dispensatione oeconomica concordiam inveniret. Princeps minister Benjamin Netanjahu nuntiavit nova comitia parlamentaria die vicesimo secundo mensis Ianuarii (22.1.) institutum iri.

(Reijo Pitkäranta)

Locus Caesaris occisi inventus

Archaeologi Hispani se Romae locum invenisse autumant, ubi C. Iulius Caesar olim occisus est.

Repertum enim est prope aream Argentinam opus ex concreto structum, latitudine trium et altitudine duorum metrorum, quod imperator Augustus in memoriam patris adoptivi in Curia Pompeii posuisse traditur.

(Reijo Pitkäranta)

Res a Baumgartner fortiter gesta

Felix Baumgartner, vir Austriacus quadraginta tres annos natus, ex stratosphaera nulla machina usus in terram desiluit et inter hunc saltum velocitatem soni superavit. Is enim, postquam in altitudinem undequadraginta chiliometrorum sublatus est, in ingens inane se eiecit et deorsum libere devolare coepit. Cum ex terra a sesquichiliometro abesset, umbrella descensoria patefacta in solum Americanum incolumis rediit.

(Reijo Pitkäranta)

12.10.2012

Quid Sergei Lavrov dixerit

In oppido Finniae Vantaa accidit, ut magistratus a re sociali quattuor liberos, quorum mater natione Russa est, in tutelam publicam reciperent. Qua re audita Sergei Lavrov, minister Russiae a rebus exteris, Finnam vehementer reprehendit negans talem actionem civitatibus cultioribus convenientem esse. “Solliciti sumus”, inquit “de inimico animo, quo Finni in infantes Russos sint.” Ministri autem Finni responderunt discordiam illam non nisi e differentiis culturalibus inter utramque terram intercedentibus ortam esse.

(Reijo Pitkäranta)

De inundationibus Finniae

Septimana vergente in partibus Finniae occidentalibus tridui spatio tanti imbres ceciderunt quanti duobus fere mensibus cadere solent. Quo factum est, ut aquae fluminum in regionibus Satagundiae et Ostrobothniae campos inundarent et aliquot vias publicas commeatu intercluderent. Complures familiae domum eluvione autumnali circumdatam relinquere et in locum tutiorem emigrare coactae sunt.

(Reijo Pitkäranta)

Chavez comitiorum victor

Hugo Chavez, qui Venetiola iam paene quattuordecim annos praeest, praesidens civitatis tertium electus est. Comitii enim praesidentialibus die Dominico (8.10.) habitis maiorem sententiarum partem sive quinquaginta quattuor centesimas (54%) sibi conciliavit itaque victoriam admodum manifestam de candidato adversario Henrico Capriles reportavit. Venetiolani frequentissimi ad urnas adierunt, cum amplius octoginta centesimae (81%) civium iure suffragandi utebantur.

(Reijo Pitkäranta)

Nobelistae artis medicinae

Praemium Nobelianum artis medicinae hoc anno duobus cytologis tribuitur. Qui viri docti sunt Shinya Yamanaka Iaponiensis et John Gurdon Britannus. Summa enim laude investigaverunt, quinam esset rerum progressus, cuius beneficio cellulae maturae ad cellulas matrices formandas conferrent. Pecunia, qua Nobelistae hoc autumno honorabuntur, aliquanto minor est quam anno proxime praeterito.

(Reijo Pitkäranta)

Pars frigida planetae Veneris

Planetam Venerem corpus caeleste calidissimum esse constat. Quae quamvis ita sint, in gazosphaera eius stratum invenitur, quo frigidior nulla pars atmosphaerae Telluris est. Videtur enim temperatura illius loci cosmici centum septuaginta quinque gradus infra zerum efficere. Haec res mira ad notitiam astronomorum venit per instrumentum spatiale Europaeum, quod circum Venerem iam sex annos volvitur.

(Reijo Pitkäranta)

Puer in mammothum incurrit

Puer Russus undecim annorum, cum in silvis Sibiriae septentrionalis nuperrime vagaretur, in cadaver mammothi optime conservatum incurrit. Quam bonae condicionis illud animal etiam tum fuerit, eo ipso

apparet, quod pellis, muscoli membraque corporis eius omnino intacta se praeberunt. Zoologi existimant mammothum nunc inventum abhinc triginta fere milia annorum vixisse et quindecim aut sedecim annos natum mortuum esse.

(Reijo Pitkäranta)

5.10.2012

Alveus fluminis in Marte repertus

Vehiculum, quod mense Augusto in Martem descendit, glaream et lapides invenit, quae pristinum flumen in alveo suo portavit. Lapides rotundati ostendunt aquam e longinquo magna vi fluxisse.

Photographemata illius alvei die quinto decimo mensis Septembris in Terram missa sunt.

Neque investigatoribus novum est, quod aqua in Marte olim exstitit, sed nullus fluminis alveus antea repertus est. Propositum maximi momenti est carbonem et signa de condicionibus vitae microbiorum opportunis quaerere, an in Marte umquam fuerint aut adhuc sint.

Cubicularius Papae ante iudices

Iudicium contra Paulum Gabriele, pristinum cubicularium Summi Pontificis, in Civitate Vaticana susceptum est. Ille accusatur, quod documenta reservata furto abstulerit et centum milia euronum Papae assignata interverterit. Cum deprehensus esset, narravit se ita fecisse, quia improbitatem et corruptionem ubique videret. Gabriele confessus est se commercium epistulare Summi Pontificis privatum copiavisse et redactori Iohanni Aloisio (Gianluigi) Nuzzi tradidisse, qui ex eis mense Maio librum divulgavit. Inter alia inde apparet cardinalem Carolum Mariam Vigano fraudes et corruptionem, quae in Civitate Vaticana fierent, detexisse. Gabriele erat famulus Papae proximus, qui illi cibum ministrabat illumque in vestibulis mutandis adiuvabat. Crimina eius pro tribunali trium iudicum aguntur. Maxima poena, quae cubiculario imminet, est carcer quattuor annorum, sed Papa, si voluerit, inter ipsum iudicium aut postea veniam reo concedere poterit.

Impetus cardiaci frigore augentur

Ex investigatione in Norvegia facta apparet impetus cardiacos hieme nivosa et frigida augeri, praesertim apud homines plus sexaginta quinque annorum. Effectus eiusdem generis etiam in Finnia observatus est. Una ex causis esse possit hypertonia sive alta pressio sanguinis, quam tempestates frigidae praesertim apud seniores efficiunt.

Inopia laboris in Eurozona maxima

Mense Augusto inopia laboris in zona euronis non remisit. Erat in medio plus undecim centesimarum (11,4%), nempe duodeviginti miliones hominum labore carebant. In Hispania plus viginti quinque (25,1%), in Finnia paene octo centesimae (7,9%) ex vi operaria erant mense Augusto laboris expertes. Oeconomistae censent deficientiam quaestus illa parsimonia et austeritate augeri, qua civitates consumptionem pecuniae publicae restringere volunt. Sunt quidem etiam oeconomistae, qui credunt renovationibus mercatus laboris in variis partibus Eurozonae brevi futurum esse, ut oeconomia recreetur.

(Tuomo Pekkanen)

28.9.2012

Coetus Nationum Unitarum

Die Martis (25.9.) coetus generalis Nationum Unitarum in urbe New York sessionem inauguralem habuit. Hoc in conventu Barack Obama, praesidens Civitatum Americae Unitarum, orationem fecit, qua cum alias res attigit tum Iranianos hortatus est, ne armis nuclearibus fabricandis operam darent.

"Americani", inquit, "ad omnia facienda parati sunt, ut prohibeant, ne Irania arma atomica sibi comparet. Idem praemonuit Iranianis spatium temporis infinitum non datum iri ad programma nucleare deponendum."

De comitiis Belorussiae

Die Dominico (23.9.) in Belorussia comitia parlamentaria facta sunt. Quod suffragium ab observatoribus Ordinis de securitate et cooperatione Europaea dolosum et fraudulentum describitur. Huc pertinere videtur, quod ne unus quidem candidatus partium regimini oppositarum in parlamentum Belorussiae delectus est.

Populatio piscium deminuetur

Populatio piscium in maribus mundi viventium propter mutationem climaticam valde rarescere periclitatur. Id apparet e relatione, quam Oceana, magnus ordo maribus tuendis, nuper edendam curavit. Inde sequi, ut etiam alimenta hominum, quae in oceanis gignantur, vehementer deminuantur. Condiciones vitae imprimis in terris Proximi Orientis nec non in Libya et Pakistania peiores redditum iri.

De ballaenis captandis

Iaponienses captationem ballaenarum continuaturi sunt, quam ob rem naves suas in Mari Glaciali australi ad eum finem adhibitas renovare decreverunt. Fieri non potuit, quin consilium eorum communitati internationali stomachum moveret.

Hispania viatoribus gaudet

Hispania, quamvis difficultatibus oeconomicis laboret, tamen frequentia viatorum usque delectatur. Mense enim Augusto numerus hominum eo itinerantium quinque centesimis (5%) maior erat quam eodem mense anno proximo. Creberrimi peregrini ex Britannia et Francogallia venerunt, sed etiam multitudo Russorum Hispaniam obeuntium valde crevit.

Memoria Americi Vespucci

Hoc anno quinque saecula praeterierunt, cum Americus Vespucci, explorator Italianus Florentiae natus, in urbe Hispali mortuus est. Constat eum saeculo sexto decimo ineunte quattuor itinera in Mundum novum a Christophoro Columbo aliquot annis ante repertum fecisse. Rebus suis gestis Vespucci tantam sui admirationem in posteris excitavit, ut nova continens ex praenomine eius America nuncuparetur.

Brad de Veluwe equus victor

Septimana vergente in hippodromo urbis Gelsenkirchen certatum est, quis esset velocissimus equus mas quadriennis in Europa. Victorem se praebuit et praemium grande meruit tolutarius Finnicus, cui nomen Brad de Veluwe. Praestatio eius eo pluris aestimatur, quod equis modo inusitato dextrorsum currendum erat.

(Reijo Pitkäranta)

21.9.2012

Manifestationes in mundo crebrae

His diebus cives in compluribus mundi partibus variis causis excitati reclamitaverunt. Brevis pellicula magnetoscopica in interreti divulgata, in qua propheta Mahomed blasphematur, in terris islamicis iram civium in Americanos vertit.

In Aegypto, Tunisia, Libano, Sudania multi vitam amiserunt, cum vigiles impedire conarentur, ne turba tumultuantium in sedes diplomaticas Americanorum penetraret. In Pakistania, Iemenio, Somalia islamistae extremi musulmanos incitaverunt, ut Americanos aggredirentur. Reclamationes in viginti fere terris fuerunt et die Sabbati etiam in Australiam et insulas Maldivenses extendebantur.

Inter Sinenses et Iaponienses vetus de insulis Senkaku sive Diaoyu discordia adeo crebuit, ut manifestationes contra Iaponiam in compluribus urbibus Sinarum exsisterent. Matriti, in capite Hispaniae, complura dena civium milia convenerunt, ut contra consilia regiminis oeconomica reclamarent. Itemque Olisipone Portugalliae, ubi plus centum milia hominum vectigalia aucta et rigorem oeconomiae reprobantes agmine facto incesserunt.

Iaponia ab energia nucleari desistet

Calamitas nuclearis Fukushimae politicam de energia Iaponiensium penitus mutavit. Regimen Iaponiae suadet, ut energia nuclearis ante annum bis millesimum quadragesimum gradatim deponatur. Posthac energia renovabilis et usus energiae parciore maius pondus in Iaponia habebunt. Etiam in Europa consilia de energia nucleari reiciendae capta sunt. Germania nuntiavit septendecim reactiva intra viginti annos clausum iri. In Helvetia quinque reactiva ante annum bis millesimum tricesimum quartum claudentur.

Cellulae vivae mammuthi repertae?

In provincia Iakutia Sibiriae repertae sunt reliquiae mammuthi sive elephantis primigenii, in quibus sunt molles textus musculares et medulla ossium. Investigatores censent cellulas adhuc vivas in his inesse posse, sed accuratiores probationes aliquot menses duraturas esse. Sunt, qui credant animal ante decem milia annorum exstinctum ex vivis cellulis posse clonizari.

Castra Romanorum veterrima in Germania

In oppido Hermeskeil Germaniae occidentalis-septentrionalis sunt ruinae, quae ad castra Romana inter Bellum Gallicum posita pertinere creduntur. Rem nuper confirmaverunt clavi caligarii ibi reperti, qui ex calceamentis militum deciderunt. Etiam vasa fictilia in lucem venerunt, quae eiusdem sunt aetatis. Hermeskeil viginti quinque chiliometra ab urbe Trier sive Augusta Treverorum distat. In Commentariis de Bello Gallico (5,3-4, 53-58) Iulius Caesar narrat partem Treverorum duce Indutiomaro contra Romanos rebellantem a legato suo Labieno devictam esse. Sabine Hornung, archaeologa Universitatis Johannes Gutenberg, censet castra apud Hermeskeil esse primum huius eventus testimonium archaeologicum.

(Tuomo Pekkanen)

14.9.2012

Lex de sulphure emittendo

Lex de emissionibus sulphuris in comitatu maritimo circumscribendis in parlamento Unionis Europaeae perlata est. Legati parlamentares sciverunt, ne copia sulphuris in materia combustibili adhibita decimam unius centesimae partem (0,1%) excederet.

Hoc directivum, quod inde ab anno bismillesimo quinto decimo (2015) valere incipiet, imprimis ad navigationem in Mari Baltico, in Mari Germanico, in Freto Gallico faciendam spectat.

Americani siccitate laborant

Amplae regiones Civitatum Americae Unitarum hac aestate siccitate longinqua laboraverunt, quo factum est, ut complures electricinae nucleares claudendae essent. In causa erat, quod temperatura aquae fluvialis, qua hae officinae in systemate refrigerationis utuntur, nimis crescebat. Etiam eae sedes, quae carbonem ad energiam generandam adhibent, in magnas difficultates vocatae sunt.

Duo diurnarii Sueti liberati

Duo diurnarii Sueti, qui mense Iulio anni proxime praeteriti in Aethiopia capti erant, a magistratibus eiusdem civitatis liberati sunt. Illi viri de terrorismo accusati vinculis undecim annorum condemnati erant. Concedunt se illegaliter in Aethiopiam venisse, sed negant sibi ullum commercium cum motu contra regimen Aethiopiae rebellante habuisse.

Reclamatio Cataloniensium

Die undecimo mensis Septembris (11.9.) Catalonienses diem festum nationalem agere solent. Quae cum ita essent, die Martis multitudo sesquimilionis fere hominum in urbem Barcinonem convenit flagitatum, ut Cataloniae libertas concederetur. Incolas enim eius vectigalium et aliorum onerum a regimine Hispaniae sibi impositorum iam taedere coepit.

Memoria Iohannae ab Arcu

Hoc anno sex saecula elapsa sunt, cum Iohanna ab Arcu (vulgo Jeanne d'Arc), herois nationalis Francogalliae, nata est. Illa puella, cum septimum decimum annum ageret, vocibus caelestibus oboediens exercitui Francogalliae praeesse coepit et inter alia effecit, ut Angli consilio urbis Aureliae oppugnandae desisterent. Anno millesimo nongentesimo vicesimo (1920) a papa Benedicto XV in numerum sanctorum relata est.

Scientia legendi et scribendi

Quintus quoque Europaeus quindecim annos natus neque expedite legere nec probe scribere scit, ut e relatione ab Unione Europaea nuper divulgata apparet. Idem ad homines adultos fere valere existimatur, quamquam res diligenter non investigata est. Apud Finnos scientiam legendi omnium optimam esse constat.

Caput mundi artis designandi

Urbs Helsinki in hunc annum caput mundi artis designandi creata est. Ob eam rem etiam eventus artis formatricis civitatum septentrionalium, qui ibidem hac septimana celebratur, solito maior est et in multis expositionibus internationalibus consistit.

(Reijo Pitkäranta)

7.9.2012

Ecclesiam catholicam duo saecula retro remansisse

Cardinalis Carolus Maria Martini, olim archiepiscopus Mediolanus, qui pridie Kalendas Septembres obiit, in colloquio ante tres septimanas facto et die Sabbati (1.9.) divulgato dixit ecclesiam catholicam duo saecula retro remansisse.

Ecclesiam hortatus est, ut errores confiteretur et mutationes, pontificibus et episcopis inclusis, susciperet. Culturam occidentalem esse inveteratam, ecclesias magnas et vacuas, ritus religiosos pomposos. Cardinalis Martini suasit etiam, ut ecclesia catholica erga homines divortium passos humanius ageret. Neque timebat res difficiles tractare, ut homosexualitatem et caelibatum sacerdotum atque remedia prophylactica, quibus sida prohiberetur.

Britannia marmora Parthenonis non reddit

Britanni negant se de marmoribus Parthenonis in Graeciam reddendis considerare. Graeci diu egerunt, ut ectypa marmorea reciperent, quae Thomas Bruce Britannus (Earl Elgin appellatus) anno millesimo octingentesimo sexto (1806) ex Parthenone deciderat et Museo Britannico Londiniensi (British Museum) venderat. Illa marmora thesaurum musei notissimum faciunt. Dimitris Pantermalis, moderator Novi musei Acropolis Athenarum, nuper dixit de quibusdam marmoribus restituendis iam cum Museo Britannico convenisse, sed Britanni asseverant tantum de illis ad tres menses commodandis actum esse. Censent ectypa Parthenonis esse partem hereditatis mundi culturalis, quam plures homines Londinii quam Athenis videre possint.

Desmond Tutu: Bush et Blair ad iudices

Desmond Tutu, archiepiscopus Africanus Meridianus, qui anno millesimo nongentesimo octogesimo quarto (1984) premium pacis Nobelianum accepit, vult, ut Tony Blair, olim primus minister Britannorum, et George W. Bush, pristinus praesidens Americanorum, in ius vocentur, quod fictis causis de bello Iraquianis inferendo constituerint. De armis internecivis Iraquiae illos mentitos esse, cum re vera Saddamum Hussein deponere vellent. Bello Iraquico centum decem milia Iraquianorum mortuos esse et multas miliones domibus relictis effugisse. Ideo Bush et Blair ad iudicium internationale Hagense adducantur.

Memoria proelii in Borodino facti

Hodie (7.9.2012) ducenti anni acti sunt ex die, quo proelium inter copias Napoleonis et Russorum in vico Borodino factum est. Napoleo centum triginta milia militum habebat, Russi, quibus praeerat Mihail Kutuzov, fere totidem. Postquam aequo Marte diu certatum est, Russi Moscuam se receperunt. Exercitus Napoleonis tertia parte militum amissa Russos insecutus Moscuam occupavit, sed mox defatigatus bellum deponere et in patriam regredi coactus est. In memoriam huius proelii magnificum spectaculum apud Borodinum datum est, in quo paene quattuor milia virorum ex variis orbis terrarum partibus congregati interfuerunt.
(Tuomo Pekkanen)

31.8.2012

De conventu republicanorum

Tampae, in urbe Floridae, conventus factionis republicanorum habitus est. Quo in consessu candidatus praesidentialis illarum partium officialiter nominatus est Mitt Romney, cuius competitores iam antea certamine inferiores discesserant. Demoscopiae monstrant eum apud populum iam tantundem fere gratia valere ac praesidentem hodiernum Barck Obama.
(Reijo Pitkäranta)

Neil Armstrong vita defunctus

Neil Armstrong, astronauta Americanus celeberrimus, diem supremum obiit octoginta duos annos natus. Constat eum primum hominem fuisse, qui in superficie Lunae ambulabat. Hoc factum est die vicesimo primo mensis Iulii anno millesimo nongentesimo undeseptuagesimo (21.7.1969). Barack Obama, praesidens Civitatum Americae Unitarum, ait dubium non esse, quin Armstrong inter maximos heroes Americanos referretur.
(Reijo Pitkäranta)

Breivik vinculis condemnatus

Anders Behring Breivik, occisor Norvegus septuaginta septem hominum, in iudicio regionali Osloensi

vinculis unius et viginti annorum condemnatus est. Consensu enim omnium iudicum ille vir eo tempore, cum stragem edidit, compos mentis fuisse iudicabatur. Breivik, dum causam dicit, a psychiatris bis de sanitate mentis cognitus est. Medici, qui priorem inquisitionem peregerunt, eum insanum esse arbitrabantur.

(Reijo Pitkäranta)

Rerum in Columbia condicio

Inter regimen Columbiae et ordinem bellatorum tectorum nomine Farc de colloquiis pacis incipiendis convenit. De ea re praesidens Juan Manuel Santos publice nuntiavit, quamquam non aperuit, ubi et quo tempore illae consultationes incoharentur. Pugnae rebellium contra imperia et potestates civitatis commissae in Columbia iam inde ab annis sexagesimis continuantur.

(Reijo Pitkäranta)

Zingari Parisiis eiciuntur

Castra zingarorum, quae in suburbio Parisiorum posita erant, a custodibus publicis Francogalliae vacuefacta, et omnino septuaginta homines, inter eos undeviginti infantes, inde eiecti sunt. Id ex causis securitatis et sanitatis factum esse dicitur. In Francogallia quindecim fere milia zingarorum versari existimantur, quorum condiciones vivendi inhumanae describuntur.

(Reijo Pitkäranta)

Novus campus petrolearius

Statoil, societas Norvegica, maximum fontem petrolearium in Mari Germanico prope urbem Stavangeriam invenit. Novus campus tantae magnitudinis est, ut pretium eius etiam in viginti quinque miliarda euronum ascendere videatur. Ille locus non nisi breve spatium ab eo tractu abest, ubi anno proximo magna petrolei copia itidem reperta est.

(Reijo Pitkäranta)

Primae nives in Lapponia

Hac septimana in locis montanis Lapponiae maxime septentrionalis primae nives ceciderunt. Die enim Lunae (27.8.), postquam temperatura in illa regione ad quinque fere gradus descendit, summi montes paroechiae Enontekiö tegimine niveo velati sunt.

(Reijo Pitkäranta)

Russia in WTO

24.8.2012

Ordo mundi commercialis (WTO) Russiam in numerum membrorum recepit. Postquam parlamentum sive дума Russiae et praesidens Vladimir Putin societatem ratificaverunt, Russia die vicesimo secundo mensis currentis (22.8.) in Ordinem officialiter intravit.

Ministerium a rebus exteris Finniae censet societatem Russiae exportationem Finnorum et collocationem pecuniae in Russia expedire.

Iaponia et Sinae de insulis rixantur

Inter Iaponiam et Taiwaniam iacet grex insularum, quem Sinenses Diaoyu, Iaponienses Senkaku appellant. Incolae in illis non sunt, sed commeatus navium prope insulas est frequens, aquae propinquae piscibus abundant atque petroleum in regione inveniri existimatur. Hucusque Iaponienses illas insulas moderantur. Nunc Sinenses Iaponienses hortantur, ut procul se teneant. In Iaponia autem politici flagitaverunt, ut custodia litorum ad insulas defendendas confirmaretur. Rixa inter Iaponiam et Sinas adeo exacerbata est, ut in multis urbibus Sinensium reclamatores cauponas Iaponiensium invaderent, auroraedas in Iaponia factas mulcarent, vexilla Iaponiae concremarent. Rixae ortae sunt tempore anniversarii deditiois Iaponiae, quae facta est die quinto decimo mensis Augusti anno millesimo nongentesimo quadragésimo quinto (15.8.1945). Simul renovata est etiam memoria crudelitatis Iaponiensium erga cives regionum, quas inter secundum bellum mundanum occupabant. Et Sinae et Corea Meridiana excusationem et satisfactionem a Iaponiensibus flagitaverunt.

USA Syriam praemonuit

Praesidens Barack Obama Syriam praemonuit, ne arma chemica in bello civili adhiberet. Id si factum esset, Americanos de interventione militari consideraturos esse. Nam usum armorum internecivorum conflictum Syriacum ita propagaturum esse, ut etiam sociis Americanorum, sicut Israelianis, in illa

regione immineret. Americanos attentissime observaturos esse, quo modo res in Syria progredirentur. Constat Syriam magnam armorum chemicorum et biologicorum copiam habere. Regimen praesidentis Bashar al-Assad antea minatum est se arma chemica adhibiturum esse, si qua natio peregrina conflictui Syriae intervenisset.

Finnia, terra in mundo prosperrima

Ex indice internationali (FSI, Failed States Index), quem ordo independens Americanus (FFP, Fund For Peace) divulgavit, Finnia est inter centum duodeoctoginta terras in mundo prosperrima, cum de stabilitate sociali agitur. Periculum conflictuum et ruinae civitatis est minima in Finnia, maxima in Somalia, Congo, Sudania. Finnam in prosperitate sequuntur Suetia, Dania, Helvetia, Norvegia.

Venatio ursorum incepit

Venatio ursorum die Lunae (20.8.) incepit. Venatoribus Finnis centum triginta sex ursos sternere licet. Venatione ineunte numerus ursorum in tota Finnia erat circiter mille quadringenti, ex quibus maior pars prope confinium Russiae aestatem agit. Autumno haud pauci ex eis in Russiam se recipiunt, ubi somno hiemali sopiuntur.

(Tuomo Pekkanen)

Relatio de stragibus Osloae

17.8.2012

In Norvegia relatio investigatoria divulgata est, in qua aestimatur, quonam modo magistratus Norvegi contra strages Osloae aestate proxima editas egerint. In inquisitione custodes publici reprehenduntur, quod multa omiserint, complures errores fecerint, cunctando effecerint, ut numerus iuvenum in insula Utöya occisorum in tantum cresceret.

(Reijo Pitkäranta)

Quid Muhamed Mursi fecerit

Muhamed Mursi, praesidens Aegypti, se recte et e re publica egisse affirmavit, quod ministrum defensionis Hussein Tantawi et praefectum exercitus Sami Annan a munere amovisset. Quod consilium eius in actis diurnis statalibus, quae al-Akhbar inscribuntur, res omnino nova et inaudita describitur. Neque desunt, qui putent decreta praesidentis Mursi maxime eo tendere, ut omnis potestas in Aegypto ad manus eius ipsius conferatur.

(Reijo Pitkäranta)

Comitia praesidentialia

Mense Novembri in Civitatibus Americae Unitis comitia praesidentialia instituentur, ut quarto quoque anno ibidem fieri solet. Quae cum ita sint, mirum non est populum Americanum iam ab utroque candidato maxime ambiri. Competitores sunt Barack Obama, praesidens hodiernus factionis democraticae, et Mitt Romney, quem suffragatores republicani candidatum suum delegerunt.

(Reijo Pitkäranta)

Gabriele in ius vocatus

Paolo Gabriele, pristinus praefectus aulae papae Benedicti XVI, in ius vocabitur proditoris et peculatus accusatus. Vir ille mense Maio deprehensus est, cum non abesset suspicio, quin documenta Civitatis Vaticanae secreta diurnariis Italianis clam patefecisset. Postea id quoque ei crimini datum est, quod magnam summam pecuniae ad usum proprium intervertisset.

(Reijo Pitkäranta)

Arma chemica Maris Baltici

Civitates Mari Baltico circumiacentes auctoritate Unionis Europaeae cognoscere conatae sunt, quanta armorum chemicorum copia in imum mare abdita esset. Post Unionem Sovieticam collapsam Russi paratiores fuerunt ad detegendum, quibus in locis materia eius generis fere inveniri posset. Existimantur ea venena chemica, quae in fundo maris recondita sunt, imprimis ex yperite sive gaso sinapis constare.

(Reijo Pitkäranta)

De Olympiis Londiniensibus

Die duodecimo huius mensis (12.8.) Olympia Londiniensia ad finem sunt adducta. Maxime in his ludis

eminuerunt athletae Civitatum Americae Unitarum, quippe qui omnino centum quattuor nomismata sibi pararent. Ab iis secundi erant Sinenses octoginta septem nomismata adepti, tertio autem loco positi sunt Britanni, quibus sexaginta quinque praemia delata sunt. Finni successu modesto certaverunt nulla victoria domum reportata. Obtinuerunt quidem unum nomisma argenteum idque in certamine tabulae veliferae, et duo aenea, quorum unum in velificatione, alterum in iaculatione.

(Reijo Pitkäranta)

Mario Monti regimen Finniae reprehendit

10.8.2012

Mario Monti, primus minister Italiae, qui nuper Finnam visit, in diario septimanali Germanico "Der Spiegel" titulado, regimen Finnum durissimis verbis vituperavit, quod parlamento nimis obtemperaret.

Quae verba imprimis ad crisim Europae oeconomicam solvendam spectabant et ad pignora, quae Finnia pro pecunia credita flagitaverat. Moderatores Finni sententiam hospitis Itali mirabantur. Multi commemorabant Silvium Berlusconi, primum primum ministrum Italiae, qui ex Finnia in patriam reversus cibos Finnum vituperaverat. Juha Sipilä, praeses factionis centralis, dixit utilius esse, si Itali potius de sua competitivitate restituenda curarent. In Germania minister Monti accusabatur, quod problemata Italiae sumptibus tributiorum Germanorum solvere conaretur. Alexander Dobrindt, secretarius factionis democraticae Christianae, censebat cupiditatem pecuniae peregrinae effecisse, ut Monti sententias contra democratiam diceret.

Annan abiit, al-Assad interim manet

Kofi Annan, qui delegatus specialis Nationum Unitarum et Confoederationis Arabicae fuit, nuntiavit se munus depositurum esse, quod Consilium securitatis proposita sua ad bellum Syriacum componendum non sustinisset. Praedixit autem futurum esse, ut Bashar al-Assad, praesidens Syriae, serius ocus abire cogeretur.

Ministri Syri ad rebelles transierunt

Riad Hijab, primus minister Syriae, ad partem rebellium transiit. Consilium nationale oppositionis nuntiavit etiam duos alios ministros cum familiaribus et tres officarios exercitus in Iordaniam transisse. Riad Hijab per canalem televisificum al-Jazeera declaravit se regimen, quod terrorismi noxium esset, reliquisse et ad partem oppositionis accessisse.

Curiositas in Martem descendit

Itinere octo mensium confecto Curiositas (Curiosity), vehiculum administrationis spatialis Americanorum, in Martem feliciter descendit et statim prima photographemata de superficie planetae in Terram misit. Sunt in illo vehiculo etiam instrumenta Instituti Meteorologici Finnum, quibus pressio sphaerae gasicae et humiditas Martis explorentur. Propositum est, ut Curiositas, quod est velut laboratorium mobile, signa de condicionibus vitae microbiorum opportunis quaerat, an in Marte umquam exstiterint vel adhuc exsistent. Appellatur etiam "Mars Science Laboratory", est nongenta chiliogrammata pondo et sex rotis movetur. Fungitur energia nucleari.

Marilyn Monroe commemorata

Nonis Augustis (5.8.) quinquaginta anni acti erant ex eo die, quo Marilyn Monroe, actrix cinematographica sexuali attractione et pulchritudine celeberrima, triginta sex annos nata mortua est. Egit partes in plus triginta pelliculis, ex quibus notissima forsitan est "Some Like It Hot" (1959), quae inter optimas comoedias in orbe terrarum numeratur.

(Tuomo Pekkanen)

Olympia Londiniensia

3.8.2012

Die vicesimo septimo mensis Iulii (27.7.) Londinii Olympia aestiva ordine vicesima septima cum spectaculo initiali splendidissimo celebrari coepta sunt. Aderant in stadio Londiniensi octoginta fere milia hominum, et apud televisoria circiter quattuor miliarda spectatorum sedisse existimantur, cum Elisabeth II, regina Britanniae, illos ludos publice inauguravit.

Neque honor ignis Olympici accendendi uni soli athletae, ut antea fieri solebat, concessus est, sed septem iuvenes hanc caerimoniam procurandam sibi susceperunt. Olympia Londiniensia tantae magnitudinis sunt, ut iis amplius decem milia agonistarum e ducentis quattuor nationibus oriundorum

intersint. Certamina usque ad diem duodecimum huius mensis (12.8.) continuabuntur.
(Reijo Pitkäranta)

De bello in Syria civili

In Syria pugnae vehementissimae de urbe Aleppo possidenda inter copias regiminis et bellatores seditiosos usque committuntur. Exercitus Syriae nuntiavit se iam multos vicos in suam potestatem denuo redequisse, sed adversarii id factum esse denegant. Constat condicionem incolarum urbis diem de die in peius mutari, cum eis res fere omnes ad vivendum necessariae iam desint. Etiam valetudinaria et nosocomia plena sunt hominum vulneratorum.

(Reijo Pitkäranta)

Monti in Finniam venit

Die Mercurii (1.8.) Mario Monti, princeps minister Italiae, Helsinki venit a primo ministro Finniae Jyrki Katainen invitatus. Qui viri politici conventu in villa aestiva ministeriali Kesäranta habito de necessitudine mutua utriusque nationis collocuti sunt. Neque fieri potuit, quin eodem tempore una deliberarent, qualis esset condicio rerum oeconomicarum in Unione Europaea.

(Reijo Pitkäranta)

De incendiis silvestribus

Omnes fere orbis terrarum partes hac aestate incendiis terrestribus afflictae sunt et affliguntur. Quae in ora Hispaniae coorta sunt, his triginta annis pessima describuntur. In litore autem Croatiae, ubi secundum Mare Hadriaticum incendia vehementissima conflata erant, complures regiones vacuefactae sunt. Eodem tempore Russia saltem ducentis incendiis silvestribus vastari nuntiatur. Quod ad Civitates Americae Unitas pertinet, in Arizona et Nebraska ictu fulminis effectum est, ut multa loca graminea ignem conciperent.

(Reijo Pitkäranta)

Aestas Finniae pluviosa

Agricolae Finniae sperant fore, ut largi imbres, qui per totam aestatem segetes vexaverunt, tandem aut rarescant aut omnino remittant. Nisi id factum erit, metuendum est, ne proventus frumenti hoc autumno solito minor remaneat. Imprimis cultores agrorum in Ostrobothnia habitantes sollicitudine affecti sunt: ibi enim imbres tam torrentes ceciderunt, ut sationes Solani tuberosi in multis regionibus aquis inundarentur.

(Reijo Pitkäranta)

Bellum domaesticum Syriae

15.6.2012

Syria iam bello domestico ardet, ut ait Hervé Ladsous, subsecretarius Nationum Unitarum a consiliis pacis tuendae. Idem ordo nuperrime relationem divulgavit, qua exercitus Syriae accusatur, quod pueris et puellis clipeo humano adversus seditiosos usus sit.

Itaque Syria in indicem earum civitatum addita est, quae in conflictibus militaribus parvis liberis abutuntur eosdemque non solum cruciant, sed etiam interficiunt.

(Reijo Pitkäranta)

Hispania auxilium petivit

Regimen Hispaniae ab Unione Europaea versuram necessitatis facere constituit, ut argentariis civitatis suae succurreret. Summa pecuniae, qua ad hanc rem opus est, circiter centum miliaria euronum efficere existimatur. Agitur de quarta civitate, cui ad oeconomiam suam stabiliendam ad auxilium Unionis Europaeae confugiendum est. Reliquae tres sunt Graecia, Irlandia, Portugallia.

(Reijo Pitkäranta)

Institutio linguae Curdorum

Moderatores Turciae nuntiaverunt nihil iam impedire, quominus in scholis Turcicis lingua Curdorum disceretur. Recep Erdogan, princeps minister, illud decretum progressum historicum descripsit. Constat Curdos in Turcia habitantes inde ab anno millesimo nongentesimo octogesimo quarto (1984) pro autonomia sua pugnasse.

(Reijo Pitkäranta)

Autonomia Alandiae XC annorum

Die Saturni (9.6.) nonaginta anni acti erant, cum Alandia, provincia insularis Finniae, autonomiam accepit. Die enim nono mensis Iunii anno millesimo nongentesimo vicesimo secundo (9.6.1922) accidit, ut Alandenses primum concilium commune agerent. Iam anno priore Foedus nationum decreverat, ut Alandia ad Finniam pertineret eaque ius haberet et linguam Sueticam conservandi et suis legibus partim utendi.

(Reijo Pitkäranta)

Rubus chamaemorus rarus factus

Proventus Rubi chamaemori duobus autumnis continuus tam exiguus fuit, ut copiae harum bacarum non modo in Finnia verum etiam per totam plagam arctoam proxima hieme exhaurirentur. Haec inopia difficultates fabricandi multis operibus mercatoriis paravit. Magni interest, ut messis huius anni felicius sit. Primas bacas in Lapponia mense Iulio exeunte maturitatem assecuturas creditur.

(Saara Honkanen)

Certamina pedifollica Europaea

Certamina Europaea de principatu pedifollico in Polonia et Ucraina initium ceperunt. Huic magno eventui, qui quarto quoque anno instituitur, omnino sedecim greges nationales intersunt, in iis cohors Hispanorum, quae victoriam prioribus ludis reportatam defendit. Prima dimicatio die Veneris (8.6.) inter Graecos et Polonos commissa incerto eventu finita est.

(Reijo Pitkäranta)

Nuntii Latini ad ferias abeunt

Nuntii Latini ob ferias aestivas ad sex septimanas intermittuntur, quam ob rem proxima emissio non ante quam die tertio mensis Augusti (3.8.) fiet. Restat, ut auscultatoribus nostris gratias quam maximas agamus et iisdem aestatem quam iucundissimam exoptemus.

(Reijo Pitkäranta)

8.6.2012

Nuntii Latini: Generalis Makarov Finnos vituperavit

Nikolai Makarov, summus dux exercituum Russiae, cum Finniam visitaret, orationem habuit, qua Finnos multimodis vituperavit. Cooperationem Finnorum cum Natone securitati Russiae imminere, Finni potius cum Russis solidius collaborarent. Censebat autem cooperationem Russiae et Natonis bene succedere et utrique parti utilem esse.

Finnos accusavit etiam, quod Georgiam ad Ossetiam Meridionalem et Abhasiam recuperandas sustinerent. Praeterea ius Finnorum exercitia militaria in Finnia orientali habendi in dubium vocavit et charta geographica adhibita autumabat Finniam et terras Balticas, sicut inter bellum frigidum, ad orbem pertinere, qui Russiae interesset. Stefan Wallin, minister defensionis Finniae, de oratione generalis Makarov interrogatus respondit Finniam de sua in Natone relatione independenter decernere, sicut securitas et commodum ipsius postularent. Timo Soini, praeses commissionis rerum exterarum parlamenti, monuit Finnos securitati Russiae non imminere sed patriam suam et nunc defendere et temporibus futuris defensuros esse.

Elisabeth II sexaginta annos regina

In Britannia regnum reginae Elisabeth II, quod iam sexaginta annos durat, per quadriduum celebratum est. Rege Georgio VI mortuo Elisabeth mense Februario anni millesimi nongentesimi quinquagesimi secundi (1952) in thronum ascendit et anno sequenti postridie Kalendas Iunias coronata est. Ex monarchis Britanniae tantum regina Victoria diutius regnavit. Eventum anni iubilaei principale fuit agmen mille navium, quod die Dominico per fluvium Tamesim navigavit. Erant in illo agmine naves aut scaphae ex omnibus terris communitatis nationum Britannicae. Inter navigationem undecim chiliometrorum campanae ecclesiarum in ripis fluminis sitarum navem reginae salutabant. Iubilaeum reginae adamantinum vesperi Lunae magno concentu apud palatium Buckingham continuabatur. In suggestum prodiebant Paul McCartney, Elton John, Tom Jones, Kylie Minogue alique artifices celebriores. Carmen sollemne, quod Andrew Lloyd Webber et Gary Barlow reginae composuerant, a coniugibus militum et liberis Africanis cantatum est.

Mubarak carcere perpetuo damnatus

Hosni Mubarak, praesidens Aegypti ex potestate expulsus, in iudicio carcere perpetuo damnatus est,

quod reus esset caedis civium manifestantium. In motu populi octingenti quinquaginta homines vitam amiserant. Eadem poena affectus est Habib al-Adli, minister a rebus internis praesidentis Mubarak. Filii autem praesidentis Gamal et Alaan crimine corruptionis liberati sunt.

Advenit alma hora

Maio mense exeunte finis anni scholastici in scholis Finniae celebratus est. Discipulis diplomata data sunt et hymnus de amoenitate aetatis “Jo joutui armas aika”, Advenit alma hora, in institutis scholasticis cantabatur. Scholam fundamentalem perfecerunt unum et sexaginta milia iuvenum, gymnasium plus triginta milia, scholam professionalem paene septuaginta milia.
(Tuomo Pekkanen)

1.6.2012

Nuntii Latini: Consilium securitatis stragem Hulae damnavit

Regimen Syriae die Veneris (25.5.) carris cataphractis et cannonibus adhibitis in oppido Hula plus centum cives trucidavit, inter quos erant undequinquaginta pueri et triginta quattuor feminae. Consilium securitatis Nationum Unitarum illam stragem damnavit et unanimiter censebat vim diram civibus factam leges internationales violavisse.

De rebus Graecorum pecuniariis

Crisi oeconomica perterriti Graeci pecunias depositas ex argentariis tollere coeperunt. Duobus annis plus septuaginta miliarda euronum sublata sunt, quae pro singulis civibus septena milia faciunt. Pecuniae praesentes domi servantur, nam homines timent, ne pecuniae depositae ab argentariis in drachmas mutatae partem valoris amittant.

Christine Lagarde, directrix Fundi Monetarii Internationalis, dixit se multo magis pro pauperibus Africae quam pro Graecis sollicitari. “Cum de Athenis cogito”, inquit, “de illis omnibus cogito, qui vectigalia evadere conantur.” Fundum Monetarium nulla proposita condiciones Graecis impositas leniendi habere. Nunc esse tempus debita solvendi.

Cubicularius Papae prehensus

Civitas Vaticana confirmavit Paulum Gabriele, cubicularium Summi Pontificis, incarceratum esse, quod documenta reservata apud se haberet. Creditur illo auctore chartas secretas ex Civitate Vaticana exportatas et actis diurnis divulgandas datas esse. Ex his documentis suspensiones de corruptione et certamina interna in Civitate Vaticana palam facta sunt.

Frequentia oribatarum in Monte Everestio

Cum tempestas his septimanis sit opportuna, complures centeni ascensores Montem Everestium, in orbe terrarum altissimum, ascendere conantur. Sed magna ascensorum frequentia affert periculum, cum homines in frigore exspectare cogantur. Mense Maio trecenti quinquaginta ascensores summum cacumen adipisci conati sunt, ex quibus quattuor perierunt. Postquam Sir Edmund Hillary Britannus et Tenzig Norgay, dux eius indigena Himalaianus, anno millesimo nongentesimo quinquagesimo tertio (1953) primi summum cacumen Everestium adepti sunt, decem fere milia hominum idem temptaverunt. Ex his plus ducenti viginti ascensores in itinere perierunt.

Loreen in Eurocantonibus victrix

Certamen hornotinum cantionum Eurovisionis in urbe Baku Azerbaidzaniae (olim Atropatene) factum est. Inter viginti sex nationes, quae ad certamen finale admissae erant, palmam cepit Suetia cantione Euphoria, quam cecinit cantatrix Loreen (Lorine Zineb Noka Talhaoui). Secundo loco posita est Russia, tertio Serbia. Finnia iam in certamine eliminatorio ex finali exclusa est.

Rarissimum in caelo phaenomenon

Postridie Nonas Iunias (6.6.) in caelo rarissimum phaenomenon visibile erit, cum Venus ante Solem transibit. Transitus Veneris his mille annis tantum quindecies visus est et proximus non ante videbitur quam plus centum annis transactis. Die Mercurii phaenomenon observari poterit in regionibus arcticis et in partibus Asiae et Australiae orientalibus.
(Tuomo Pekkanen)

NATO conventum habuit

25.5.2012

Moderatores consociationis NATO conventu in urbe Chicago habito decreverunt, ut copiae internationales ex Afganistania anno proxime futuro reducerentur. Cum hoc factum erit, administratio belli ad Afganos ipsos transferetur.

Pro certo tamen habetur fieri non posse, ut Afganistania omni subsidio externo destituta e difficultatibus suis se expediat. Quam periculosa rerum condicio in finibus eius sit, vel inde apparet, quod ibidem ante paucos dies quinque operarii auxiliarii vi abducti sunt.

(Reijo Pitkäranta)

Italia terrae motu afflicta

Die Dominico (20.5.) partes Italiae septentrionales terrae motu, cuius vis sex magnitudines fecisse nuntiatur, vehementer concussae sunt. Qua calamitate prope Bononiam, Mutinam Ferrariamque facta saltem septem homines vitam amiserunt et quinquaginta fere vulnerati sunt. Huc accedit, quod complures domus privatae, sedes industriales, aedificia publica aut ingentibus rimis dehiscere coeperunt aut omnino collapsa sunt.

(Reijo Pitkäranta)

Res viatoria Syriae laborat

Legatus Syriae apud Nationes Unitas questus est rem viatoriam patriae suae proximis quattuordecim mensibus gravissima damna accepisse. In causa fuisse, quod ministri variarum nationum cives suos hortati essent, ne in Syriam proficiscerentur, quoad res ibi motibus popularibus perturbarentur. Idem addidit penuria clientium effectum esse, ut multa deversoria iam claudi cogerentur.

(Reijo Pitkäranta)

Estelle baptismum accepit

Die Martis (22.5.) Stockholmiae magna sollemnitas acta est, cum Estelle, filia principissae hereditariae Victoriae et principis Danielis, in ecclesia domus regiae baptizata est. Ad hanc caerimoniam celebrandam circiter sescenti hospites illustrissimi invitati erant, inter eos praesidens Finniae Sauli Niinistö et coniux eius Jenni Haukio. Sacramentum baptismatis procuravit Anders Wejryd, archiepiscopus Suetiae.

(Reijo Pitkäranta)

Fax Olympica Britanniam circuit

Die undevicesimo mensis Maii (19.5.) fax Olympica, quae more translaticio e radiis solis in Graecia accensa erat, in Cornubiam Britannorum aeroplano apportata est. Ibi eam legati magnae auctoritatis receperunt, quorum primores erant principissa Anne et Sebastian Coe, praeses collegii Olympiis celebrandis et Boris Johnson, praefectus urbis Londinii. Constat Olympia aestiva Londiniensia die vicesimo septimo mensis Iulii (27.7.) inauguratum iri.

(Reijo Pitkäranta)

Chelsea victoriam reportavit

Die Saturni vesperi (19.5.) in stadio Monacensi certatum est, quis esset optimus in Europa grex pedifollicus inter manipulos victores singularum nationum. Quo in ludo manus Londiniensis nomine Chelsea cohorti Germanicae Bayern München occurrit. Diu ancipiti Marte pugnatum est, donec Chelsea e certamine ictuum poenaliumpunctis quattuor ad tria (4-3) superior discessit.

(Reijo Pitkäranta)

De crisi Graeciae oeconomica

18.5.2012

Erkki Liikanen, moderator Argentariae Finniae, censet causam difficultatum oeconomicarum, quibus Graecia laboret, esse fiscalitatem iniustam. Divites tributa non solvere, illos autem, quorum redditus mediocres aut parvi sint, usque gravioribus tributis vectigalibusque onerari.

Bonum successum, quem factiones extremae in comitiis parlamentariis nuper factis habuerint, indignationem civium ostendisse. Sauli Niinistö, praesidens Finniae, arbitratur crisim in Graecia non esse tantum oeconomica sed potius iam socialem, cum cives fiduciam amiserint. Plus quam dimidia pars investorum internationalium credit crisim politicam, quae ex comitiis Graeciae parlamentariis orta sit, effecturam esse, ut Graeci hoc anno ex zona euronis discedant.

Nova comitia Graecis instant

Post comitia parlamentaria moderatores factionum Graeciae principalium de novo regimine constituendo diu frustra consultaverunt. Alexis Tsipras, moderator Syriza, factionis sinistrae, nuntiavit se non interfuturum esse in regimine, quod programma austeritatis ab Unione Europaea et a Fundo Monetario Internationali Graecis impositum comprobaret. Illud autem programma est condicio sine qua Graecia novum subsidium oeconomicum accipere non potest. In demoscopiis recentibus Syriza gratiam popularem ita auxit, ut circiter viginti quinque centesimae civium illi favere viderentur. Quia concordia de regimine inveniri non potuit, nova comitia parlamentaria mense Iunio fient.

Hispani contra rigorem oeconomiae reclamabant

In multis partibus Hispaniae saltem centum milia hominum contra rigorem oeconomiae et restrictionem servitorum publicorum manifestaverunt. Motus ille populi initium cepit Idibus Maiis anno proximo et postea per totam Hispaniam et Europam diffundebatur. Hoc anno manifestationes in octoginta fere urbibus oppidisve Hispaniae fiebant.

Praesidens Obama matrimonia homosexualium probat

In USA de conubio homosexualium acerrime disputatur. Barack Obama est primus praesidens Americanorum, qui matrimonia inter homines eiusdem sexus iungenda probat. Ita censent etiam vicepraesidens Joe Biden et Arne Dunca, minister institutionis publicae. Sed in triginta fere civitatibus Americae septentrionalis matrimonia homosexualium vetita sunt.

Bellum de drogis in Mexico continuatur

Conflictus crudelissimi inter mercatores drogarum in Mexico continuantur. Una septimana in his conflictibus plus sexaginta homines occisi sunt. Anno bis millesimo sexto praesidens Felipe Calderon bellum consortiis drogas mercantium intulit, quod finem non cepit. His duodecim fere annis circiter quinquaginta milia hominum vi et violentia mortui sunt.

Rariores Finni in Deum credunt

Ex interrogatione, quam Centrum Investigationis Ecclesiasticum faciendam curavit, patet tantum quartam partem Finnum in Deum Christianorum credere. Quinta fere pars respondentium, quod plus est quam umquam ante, nuntiavit se in Deum Christianorum omnino non credere. Ceteri dixerunt se alio modo credere quam ecclesia doceat aut esse in fide sua incertos aut incredulos.
(Tuomo Pekkanen)

Hollande praesidens electus

11.5.2012

Praesidens Francogalliae in quinquennium proxime futurum electus est Francois Hollande, socialista quinquaginta septem annos natus. Altero enim suffragio populi pridie Nonas Maias (6.5.) facto sententiarum paene quinquaginta duas centesimas (51,7%) sibi conciliavit.

Praesidens hodiernus Nicolas Sarkozy, adversarius eius, ubi primum de eventu comitiorum audivit, se cladem accepisse confessus victori publice gratulatus est.

(Reijo Pitkäranta)

Quid Hollande suis dixerit

Francois Hollande, praesidens Francogalliae recens designatus, Tutelae Lemovicum sive Tulle, in patria sua, civibus orationem his fere verbis habuit: “Europa”, inquit, “hodie nos spectat. Fieri non potest, ut disciplina oeconomica una et sola ratio sit, qua cursus Europae ad incrementum oeconomicum vertatur et novae sedes operis creentur. Praesidens totius populi Francogallici futurus sum. Hodie vesperi nonnisi una Francogallia est et unus populus.”

(Reijo Pitkäranta)

Comitia parlamentaria Graeciae

Die Dominico (6.5.) in Graecia comitia parlamentaria instituta sunt. Quorum victoriam manifestam reportaverunt partes regimini hodierno adversantes, quae etiam auxilium pecuniarium internationale Graecis promissum repudiare volunt. Neque mirum est moderatores Unionis Europaeae de hac nova rerum condicione valde sollicitos esse.

(Reijo Pitkäranta)

Putin praesidatum suscepit

Vladimir Putin, praesidens Russiae iam tertium electus, Nonis Maiis (7.5.) ius iurandum officii in Cremlino dedit. Circiter tria milia hospitem ad eam sollemnitatem celebrandam invitata erant. Putin oratione inter caerimoniam facta ait annis proximis definitum iri, qualis sors Russiae futura esset. “In terra”, inquit, “democratica et habitaturi sumus et habitabimus, ubi unusquisque libertatem habebit fructum ex sua indole et labore capiendi.”

(Reijo Pitkäranta)

De feriis Lusitanorum

Lusitani aes alienum suum publicum etiam ita deminuere decreverunt, ut quattuor ferias e calendario abolerent. Haec lex in quinque annos perlata est. E diebus festis religiosis amovenitur Corpus Christi et dies omnium sanctorum, qui Kalendis Novembribus celebrari solet. Etiam dies quintus mensis Octobris (5.10.) et Kalendae Decembres, feriae ad historiam Lusitaniae insignes, in dies profestos mutabuntur.

(Reijo Pitkäranta)

Ver in Finnam iam venit

Ver in Finnia tantos progressus fecit, ut agricolae sementem serere inciperent. In locis Bothniae maxime idoneis sationes vernae iam ante Kalendas Maias fieri coeptae sunt. In alia aestatis appropinquantis signa rettuleris aves migratorias, quarum plurimae, inter eas motacilla et hirundo rustica, e regionibus meridianis in Finnam redierunt. Quod ad herbas terra nascentes pertinet, saltem hepatica et anemone nemorosa iam diu in flore sunt.

(Reijo Pitkäranta)

Praesidentes EU Ukrainam boicotizant/

4.5.2012

Septimana proxima (11.-12.5.) Ialtae, in urbe Ucrainae, erit conventus praesidentium Europae Mediae et Orientalis, sed multi praesidentes Unionis Europaeae non intererunt. Saltem moderatores Germaniae, Austriae, Tzekiae, Italiae, Sloveniae conventum intermittunt. Neque José Manuel Barroso Ucrainam visitabit, quia Julia Timoshenko, olim prima ministra Ucrainae, fictis causis incarcerata est.

Timoshenko captivitatis septem annorum damnata est, quod potestate abusa esset. Alia crimina rerum oeconomiarum illi intenduntur. Timoshenko nuntiavit se a custodibus carceris male tractatam et mulcatam esse. Nationes occidentales censent causam damnationis esse politicam et flagitaverunt, ut Timoshenko ilico liberaretur. Propter iura humana in Ucraina violata multi homines notabiles dubitant obire certamina pedifollis de magistratu Europaeo, in Ucraina et Polonia mense Iunio futura.

Opere carentes mox CC miliones

Ordo a labore Internationalis (ILO) aestimavit exeunte anno praeterito centum nonaginta sex miliones opere carentium in mundo fuisse et numerum anno currente ducentos miliones superaturum esse. In duabus ex tribus terris Europaeis inopiam quaestus crevisse. Castigatione oeconomiae et renovationibus in mercatu laboris impeditum esse, ne novae occupationes crearentur. In Hispania difficultates oeconomicae usque graviores fiunt et numerus opere carentium centenis millenis hominibus singulis mensibus crescit. Primis tribus huius anni mensibus trecenta sexaginta quinque milia (365 000) laborem amiserunt et paene quarta pars (24,5%) virium operariarum quaestu carebat, quae magis est quam in aliis terris industrializatis et nummo eurone utentibus.

Iudicium contra Strauss-Kahn continuatur

Iudex Neo-Eboracensis recusavit, quominus actionem civilem reiceret, qua ancilla deversorii Dominicum Strauss-Kahn, pristinum moderatorem Fundi Monetarii Internationalis (IMF), stupri accusavit. Strauss-Kahn integritatem suam diplomaticam appellare frustra conabatur. Anno praeterito accusator causam agendam non suscepit, quo facto ancilla civilem actionem intendit.

Graecia fraudatores patefacit

Graecia pensiones subventionesque falsis causis solutas exstirpare conatur. Iam ducenta milia hominum repertos esse, qui subsidia sine causa acceperunt. In his esse familias, quae pensiones cepissent, etsi pensionarius ipse iam mortuus esset. Ablatis subsidiis iniustus Graecia singulis annis octingentos miliones euronum servatum iri aestimat.

Quartus quisque Iaponiensis suicidium deliberavit

In Iaponia numerus suicidiorum inter maximos orbis terrarum est. In terra centum duodetriginta milionum incolarum singulis annis plus tricena milia mortium voluntariarum consciscuntur. Ex investigatione recens facta quartus quisque ex Iaponiensibus suicidium deliberavit. Tales deliberationes iuvenibus viginti fere annorum usitatiores sunt quam adultis et senioribus.

(Tuomo Pekkanen)

Hollande et Sarkozy in altera comitia

27.4.2012

In electionibus Franciae praesidentialibus Nicolas Sarkozy et Francois Hollande de praesidentatu certant. Ille in primis comitiis viginti septem (27,2%), hic plus duodetriginta (28,6%) centesimas suffragiorum accepit.

Marine Le Pen, candidata extremae dextrae, duodeviginti centesimas (17,9%) obtinuit. Jean-Luc Menenchon, extremae sinistrae candidatus, undecim centesimas (11,1%) collegit, Francois Bayrou, factionis centralis, novem centesimas (9,1%).

Ad urnas plus octoginta centesimae (80,5%) civium suffragium habentium venerunt. Altera comitia pridie Nonas Maias (6.5.) fient.

Tum suffragantibus eligendum erit, utrum socialistam Hollande an conservativum Sarkozy ex Unione Popolari (Union pour un Mouvement Populaire, UMP) praesidentem rei publicae in proximum quinquennium malint.

Uterque nititur, ut fautores extremarum partium sibi conciliet. Etsi Hollande in demoscopiis praevalere videtur, eventus in dubio manet.

Ille dicit se non tantum Franciam sed totam Europam in viam crescentis oeconomiae et laboris reducturum esse, Sarkozy autem affirmat se quidem propter crisim oeconomicam secundo loco mansisse sed recta medicamenta habere, quibus condiciones meliorentur.

(Tuomo Pekkanen)

Religio in scholas Russiae revertit

Post pausam nonaginta annorum religio in scholas Russiae revertit. Ab anno bis millesimo decimo experimentum institutionis religiosae in multis scholis iam fit sed a mense Septembri anni currentis omnes scholares Russiae aliquam ex quattuor religionibus translaticiis discunt: fidem Christianam orthodoxam, Islamismum, Iudaismum, Buddhismum. Si quis nullam ex his religionibus voluerit, fundamenta culturae religiosae aut ethicam saecularem discere poterit. Unione Sovietica dissoluta ecclesia orthodoxa statum suum ita confirmavit, ut a multis unum ex symbolis Russitatis habeatur.

Ecclesia est firmissima auctoritas moralis et corporatio antiqua, etsi terra est admodum saecularizata.

(Tuomo Pekkanen)

Exercitia belli maritimi Sinensium et Russorum

Sinenses et Russi die Dominico (22.4.) prima exercitia belli maritimi in Mari Flavio una susceperunt.

Intersunt exercitiis sedecim naves bellicae et duae submarinae a parte Sinensium atque quattuor naves longae Russorum. Eodem tempore Americani cum Philippinis communia belli maritimi exercitia habent.

(Tuomo Pekkanen)

Estne Putin in mundo ditissimus?

Societas internationalis diurnalismi investigativi autumat Vladimirim Putin ditissimum in orbe terrarum hominem esse. Specie quidem eum esse modestum sed re vera virum, qui luxum omnibus modis sibi acquirit. Stanislav Belkovsky, investigator Russus politicae, censet possessiones Putini quinquaginta miliarda euronum superare.

(Tuomo Pekkanen)

Fiducia familiae regiae Suecorum minima

Societas radiophonica Sueciae (SVT) rettulit fiduciam Suecorum in familiam regiam minorem esse quam umquam ante. Tantum quattuor centesimas (4%) populi domui regiae fidem habere. Ante duos annos centesimas fuisse unam et viginti (21%). Anno millesimo nongentesimo nonagesimo quinto unam et quadraginta centesimas (41%) civium fiduciam habuisse.

(Tuomo Pekkanen)

Ictus in Afghanistania terroristici

20.4.2012

Die Dominico (15.4.) tota fere Afganistania ictibus terroristicis concussa est. Omnium maxima damna accepit urbs princeps Cabura, ubi imprimis parlamentum civitatis et diversae sedes diplomaticae petebantur.

Auctores harum aggressionum erant Talibani, islamistae extremi, quos iam multos annos contra regimen Afganistaniae et milites ibidem peregrinos rebellare constat. Ad extremum tamen copiis securitatis contigit, ut omnes terroristas occiderent.

(Reijo Pitkäranta)

Observatores in Syriam mittuntur

Ordo Nationum Unitarum etiam Finnam rogavit, ut observatores militares in Syriam mitteret, quorum esset ignititium inter partes bellantes factum custodire. Neque moderatores civitatis nostrae dubitaverunt, quin veniam petenti darent. Quot autem Finni primo agmini interfuturi sint, nondum constat. Praesidens Syriae Bashar al-Assad nuntiavit se observatores salvere iubere, dummodo sibi et suis huic actioni pari passu adesse liceret.

(Reijo Pitkäranta)

Genus malariae periculosissimum

Malaria, quae medicamento nomine artemisino resistere valet, in Asia grassari coepit. Tale genus illius morbi primum non nisi in Cambogia reperiebatur, sed iam eo ventum est, ut etiam in fines Thailandiae et Myanmariae diffunderetur. Quem rerum progressum periculosissimum putaveris, si respicis curam malariae imprimis in usu artemisini positam esse.

(Reijo Pitkäranta)

Niinistö iter in Suetiam suscepit

Hac septimana praesidens Finniae Sauli Niinistö cum coniuge Jenni Haukio iter statale biduanum in Suetiam suscepit. Hi, cum in aeriportu Arlandensi a principe Daniele et ministro Carolo Bildt recepti essent, ad stabula aulica in mediam Stockholmiam ducti sunt. Inde una cum rege Carolo XVI Gustavo et regina Silvia in domum regiam plaustro vehebantur. Postquam cohors honoraria in area ante palatium sita salutata est, rex hospitibus prandium privatum obtulit.

(Reijo Pitkäranta)

Ova dinosauri in Caucaso inventa

Investigatores universitatis Tzetzienae se circiter quadraginta ova dinosauri in Caucaso septentrionali invenisse autumaverunt. Ex imaginibus televisificis patet ea lapidibus rotundis similia esse et diametro inter viginti quinque centimetra et unum metrum variare. Ova illa casu in lucem venerunt, cum operarii viam novam munientes rupem quandam explodebant.

(Reijo Pitkäranta)

De inundationibus in Finnia vernis

Iam tempus adest, cum flumina glacie dissoluta multis locis Finniae meridianae agros inundare incipiunt. In Bothnia autem, ubi rerum condicio propter ripas fluviorum depressas pessima esse solet, caelum his diebus tam frigidum fuit, ut diluvia verna maiora septimana demum proxime futura expectentur. In regionibus maxime septentrionalibus amnes non ante quam mense Maio supra ripas effundentur.

(Reijo Pitkäranta)

Clinton Russiam reprehendit

13.4.2012

Hillary Clinton, ministra a rebus exteris Americanorum, regimen Russiae reprehendit, quod actionibus contra Syriam susceptis admodum lente interesset. Ait talem politicam id adjuvare, ut praesidens Bashar al-Assad in potestate maneret.

Multae civitates, inter eas Francogallia, Britannia, Turcia, consilia celerrima adversus praesidentem al-Assad flagitaverunt. Amplius novem milia hominum inter tumultus in Syria ortos iam mortua esse existimantur.

Electrificina solaris Iaponiae

Iaponia summa inopia energiae laborat, quia omnes fere electrificinae nucleares propter calamitatem in Fukushima factam clausae sunt. Quam ob rem in provincia Kakoshima, quae in partibus Iaponiae meridianis sita est, maxima electrificina solaris aedificabitur. De re nuntiavit societas mercatoria technicae modernae peritissima nomine Kyocera. Propositum est, ut fundamenta eius operis mense Iulio iaciantur.

Breivik mente sanus inventus

Anders Behring Breivik, occisor Norvegi multorum hominum, a psychiatris iterum de sanitate mentis examinatus est. Tunc apparuit eum tempore homicidiorum mentis compotem fuisse. Quae aestimatio contraria est ei sententiae, quam alii medici autumnis proximo de eo dixerunt. Restat igitur, ut iudices tandem decernant, utrum Breivik homo mente sanus habendus sit necne.

Titanic ante C annos submersa

Cras sive postridie Idus Apriles (14.4.) centum anni acti erunt, postquam Titanic, navis vaporaria Britannica suo tempore omnium capacissima, in itinere inaugurali naufragium fecit. Ex Britannia profecta erat et ad Novum Eboracum versus navigabat, cum in Oceano Atlantico septentrionali ad montem glaciale allisa aquis submersa est. Qua calamitate navali maxime infami plus mille quingenti homines fluctibus obruti sunt.

Caput Finniae CC annos complet

Abhinc ducentos annos sive die octavo mensis Aprilis anno millesimo octingentesimo duodecimo (8.4.1812) Helsinki caput Finniae factum est. Tum enim Alexander I, imperator Russiae et Magni Principatus Finlandiae, litteris divulgatis edixit, ne Aboa iam urbs princeps Finniae esset, sed illa dignitas eo die ad Helsinki transferretur. Causa eius consilii fuisse existimatur, quod haec urbs propius Russiae sita est.

Elias et Sophia praevalent

In praenominibus, quae parentes Finni anno proxime praeterito liberis suis indiderunt, Elias et Sophia ceteris praevalebant. Elias, quod nomen biblicum originem a lingua Hebraea trahit, quingentis fere pueris infantibus datum est. Eodem tempore quadringentae quinquaginta puellae primum praenomen Sophiam acceperunt. Constat hoc vocabulum inde ab aetate veterum Graecorum 'sapientiam' significare.

De pace in Syria facienda

30.3.2012

Consilium pacis in Syria componendae, quod Kofi Annan, pristinus secretarius generalis Nationum Unitarum, nuperrime adumbravit, a regimine Syriae approbatum est. Illud propositum in sex partes divisum etiam favorem Consilii securitatis Nationum Unitarum sibi conciliavit. Inter consultationes convenit, ut actionibus in Syria militaribus finis imponeretur et primi progressus politici ad pacem restituendam fierent.

(Reijo Pitkäranta)

Benedictus XVI Cubam obiit

Pontifex maximus Benedictus XVI itinere in Americam Latinam suscepto etiam Cubam obiit, ubi una cum praesidente Raul Castro de variis argumentis colloquebatur. Quod autem fuisset caput illorum sermonum, in publico positum non est. Sunt tamen, qui opinentur eos deliberavisse, quales partes ecclesia catholica in rebus Cubanis agerent. Die Mercurii (28.3.) papa Benedictus, antequam domum proficisceretur, Habanae, in urbe principe, missam sollemnem celebravit.

(Reijo Pitkäranta)

Quid praesidens Niinistö dixerit

Praesidens Finniae Sauli Niinistö, dum Coream Meridianam visitat, ait res Europaeas paulatim in prosperius mutari. Iam in eo esse, ut civitates Unionis Europaeae e difficultatibus oeconomicis se reciperent et in fidem pristinam redirent. Addidit Finniam et Coream Meridianam tam eruditione quam investigatione scientifica inter ceteras civitates eminere. Quae cum ita essent, societates mercatorias Coreanas hortatus est, ut pecuniam in negotiis in Finnia gerendis collocarent.

(Reijo Pitkäranta)

Potio cafeae valetudini prodest

Si quis multum cafeae, id est amplius quaterna pocilla, cotidie bibit, tutior adversus diabetem adutorum esse videtur quam is, qui minorem huius potionis copiam singulis diebus consumit. Quod patet ex investigatione a medicis Germanis divulgata, cui circiter quadraginta tria milia Europaeorum intererant. Neque potatio cafeae, quamvis acerrima esset, valetudini cuiusquam ullo modo nocebat. (Reijo Pitkäranta)

De studiis Russorum peregrinis

Parentes Russi ditiores magis magisque liberos suos in terras peregrinas studendi causa mittere solent. Neque hoc solum ad Moscuam et Petropolim valet, sed ad totam Russiam inde a Sibiria usque ad urbem Kalinigradum. Maior pars eorum Britanniam petit, ut occasionem scholas ibidem frequentandi nanciscatur et variis cursibus linguarum interesse possit. (Reijo Pitkäranta)

Quercus in Finnia crebrescit

Quercus in silvis Finniae meridiana sua sponte crebrescere coepit, quod fortasse mutationi climaticae tribuendum est. Quae arbor nobilis apud nos adhuc admodum raro colitur, cum plantae eius ad silviculturam exercendam carissime constent et magnum sit periculum, ne plantationes propter varias causas omnino deleantur. (Reijo Pitkäranta)

Caedes Tolosa et Montalbani factae

23.3.2012

Homicida autobirota vectus Tolosae (Toulouse), in urbe Franciae meridiana, die Lunae mane (19.3.) quattuor homines sclopetando occidit. Victimae erant magister et tres scholares scholae Hebraicae, ex quibus duo filii illius magistri.

Simili modo Montalbani (Montauban) duo milites et Tolosae unus miles septimana praeterita occisi sunt. Brevi apparuit scelera ab eodem homicida perpetrata esse. Compertum est eum esse civem Franciae, origine autem Algerica, virum viginti quattuor annorum, cui nomen esset Mohamed Merah. Habitabat Tolosae in primo tabulato multizonii, quod custodes publici die Iovis multo mane circumsedere coeperunt. Merah cum obsessoribus locutus homicidia confessus est. Francois Molins, accusator Parisiensis, dixit eum esse membrum ordinis Al Qaida, qui in Waziristania Pakistaniae et in Afganistania exercitationem terroristicam sibi paravisset. Idem narravit propositum fuisse homicidae adhuc unum militem et duos custodes publicos occidere.

Propter homicidia abominabilia ambitio praesidentialis in Francia interrupta est. Praesidens Nicolas Sarkozy et Francois Hollande, aemulus eius principalis, in synagoga Parisiensi memoriam victimarum scholae Hebraicae una recolebant. Caerimoniis funerariis militum occisorum Montalbani praesidens Sarkozy aliique summi politici et milites interfuerunt.

Die Iovis (22.3.) meridie longa obsidio tandem Tolosae ad finem venit, cum custodes publici gaso adhibito in domum homicidae septuplicis irruperunt. Tres custodes vulnerati sunt, cum Muhamed Merah, qui recusaverat, quominus se dederet, quantum potuit obsistere conaretur. Praesidens Sarkozy confirmavit illum mortuum esse.

Joachim Gauck novus praesidens foederalis

In Germania novus praesidens foederalis electus est Joachim Gauck, cui paene omnes partes politicae favebant. Gauck notus est activista a iuribus humanis, qui potestati communistarum in Germania Orientali fortiter resistebat. Praedecessor eius Christian Wulff propter obscura negotia oeconomica munus deponere coactus erat.

Oeconomia mundi convalescit

Christine Lagarde, moderatrix Fundi Monetarii Internationalis (IMF), censet oeconomiam mundi iam in eo esse, ut convalescat. Maxima autem pericula imminere ex magnitudine debitorum et pretio petrolei. Oratione Pekini habita Lagarde monuit oeconomiam Americanorum signa positiva iam ostendere et operationem Graeciae adiuvandae Europaeis progressum maximi momenti fuisse.

Aetna expergiscitur

Iam quartum hoc anno Aetna erumpit. Die Dominico (18.3.) lavam ita evomuit, ut nubes cineris in

altitudinem sex chiliometrorum surgeret. Neque tamen commeatui aereo fuit impedimento, nam aeriportus urbis Cataniae prope iacentis mansit apertus. Aetna, altitudine trium milium quingentorum metrorum, inter vulcanos in orbe terrarum activissimos numeratur.
(Tuomo Pekkanen)

Calamitas in Helvetia viaria

16.3.12

Animi Belgarum et omnium Europaeorum concussi sunt gravissima calamitate viaria, quae in pago Helvetiae nomine Valais die Martis vesperi accidit. Viginti duo scholares Belgae ferias hiemales agentes et sex homines adulti mortui sunt, cum autoraeda longa, qua invehebantur, parieti cuniculi impacta est.

Quae fuerit causa illius mali, adhuc incertum est. Constat tamen legem de maxima velocitate perlatam ab auriga observatam esse.

(Reijo Pitkäranta)

Strages civium in Afganistania

Moderatores Americani negaverunt disciplinam suam in Afganistania militarem mutatum iri propter stragem ibidem nuper factam. Die enim Dominico (11.3.) accidit, ut miles quidam Americanus in Afganistania meridiana sedecim cives ex improvise occideret. Talibani de tot caedibus ira incensi se Americanos pro illis homicidiis ulturos esse minati sunt.

(Reijo Pitkäranta)

Memoria cladum Iaponicarum

Die Dominico (11.3.) memoria anniversaria tsunami in Iaponia facti et calamitatis nuclearis in Fukushima ortae relegebatur. Illae clades inter se coniunctae tantae erant, ut sedecim fere milia hominum vitam amitterent et centum milia domo privarentur. Neque iis, qui patrium solum relinquere coacti sunt, ulla iam spes esse videtur ad penates redeundi. Tota enim regio propter radiationem nuclearem pessimae condicionis est.

(Reijo Pitkäranta)

De iuribus in Sinis humanis

Status iurum humanorum in Sinis anno proxime praeterito in peius mutatus est, ut censet ordo Honcongensis nomine ‘Chinese Human Rights Defenders’. Motibus enim popularibus in terris Arabicis ortis effectum esse, ut magistratus Sinenses extimescerent et ob eam rem cives suos ad libertatem aspirantes disciplina severiore regere inciperent. Magnum numerum activistarum aut cruciatibus affectum esse aut omnino evanuisse.

(Reijo Pitkäranta)

Futura fluminis Danuvii incerta

Flumen Danuvius siccitate ingravescenti laborat. Causa est, quod omnes fere uligines aggeribus, glareationibus, excavationibus eversae sunt. Deminuta aqua non solum commeatus fluvialis sed etiam aves aquatiles in magnis difficultatibus sunt. Mutatio climatica etiam novas sollicitudines civitatibus litoralibus afferre videtur – hac enim hieme frigora insolita Europae Orientalis naves onerarias itinere paene plane prohibuerunt.

(Saara Honkanen)

Fructus citrei salubres inventi

Apoplexia cerebri inter feminas poma citrea saepius edentes rarior esse videtur quam apud eas, quae his fructibus omnino non vescuntur. Quod apparet ex investigatione in Britannia edita, ubi in valetudinem septuaginta fere milium nosocomiarum inquisitum est. Vis salubris mali Sinici, Citri paradisiaci aliorumque huius generis fructuum in flavonoidis eorum posita esse existimatur.

(Reijo Pitkäranta)

Putin in comitiis vincit

9.3.2012

Vladimir Putin ex opinione in praesidentatum patriae revertetur neque altera comitia erunt necessaria, nam in electionibus die Dominico (4.3.) factis ille paene sexaginta quattuor centesimas suffragiorum accepit.

Oppositio autem censet eventum legalem haberi non posse. Secundum locum occupavit Gennadi Zjuganov, qui comitia fraudulenta, inhonesta nulliusque pretii iudicavit.

De sinceritate comitiorum dubitatur

Opiniones de sinceritate comitiorum quam maxime variant. Fautores Putini dicunt suffragia fuisse omnium apertissima et honestissima in historia Russiae, sed alii autumant multa milia fraudum electoralium exstitisse. Usitatissimas fuisse circumvectiones, scilicet homines autoraedis longis circumvectos esse, ut iterum iterumque suffragarentur. Etiam Consilium centrale electionibus Russiae curandis confitetur fraudes accidisse. Exempli gratia in urbe Iekaterinburgo decem fere homines arreptos esse, qui narravissent se multoties suffragatos esse. Miliardarius Mihail Prohorov, unus ex candidatis praesidentialibus, scripsit a fautoribus suis plus quattuor milia fraudum observata esse.

De iudicio Hodorkovski quaeritur

Dmitri Medvedev, praesidens Russiae munus relicturus, decrevit, ut accusator de poenis triginta duorum hominum inquireret, an legales essent. Sunt in illis negotiator Mihail Hodorkovski et Platon Lebedev, socius negotiorum eius. Hodorkovski, moderator societatis petroleariae Jukos, erat vir in Russia ditissimus, donec in carcerem coniectus est. Fautores eius censent eum causis politicis damnatum esse, quia moderatoribus Russiae obsisteret. Etiam Amnestia internationalis, ordo humanitarius, iudicavit Hodorkovski propter sententias politicas incarcerationum esse. Hodie est in opere coacto, quod usque ad annum bis millesimum sextum decimum (2016) duraturum est.

Graecia partem Corcyrae venditat

Graecia debitis oppressa novas rationes ad oeconomiam sanandam quaerit. Fundatio, cuius est bona rei publicae privatizare, decrevit, ut partem insulae Corcyrae (hodie Corfu) in centum annos venderet. Regio venalis, magnitudine quingentorum milium metrorum quadrorum, sita est in parte insulae occidentali-septentrionali.

Exercitus venatores clandestinos persequitur

Ordo mundi naturae tuendae (WWF) rettulit centum milites exercitus Cameruniensis contra venatores clandestinos in Camerunia orientali impetum fecisse. In remoto viridario nationali, cui nomen est Bouba N'Djida, ex quadringentis elephantibus, qui ibi viverent, iam trecentos a clandestinis venatoribus his duobus mensibus occisos esse.

Aurora borealis spectabilis

His diebus et forsitan etiam proximis septimanis aurora borealis rarae pulchritudinis in caelo septentrionali est visibilis. Nonis Martiis in sole apparuit magna eruptio, ex qua ferae tempestates magneticae et borealis aurora oriuntur. Illud spectaculum luminis in regionibus Finniae in septentrionem vergentibus optime observatur.
(Tuomo Pekkanen)

Novus praesidens munus suscepit

2.3.2012

Kalendis Martiis Sauli Niinistö, praesidens suffragio populi designatus, praesidentatum rei publicae Finniae suscepit, cum apud parlamentum sollemniter confirmavit se in munere gerendo sincere et fideliter constitutionem legesque rei publicae observaturum et omnibus viribus prosperitati populi Finnorum operam daturum esse.

Post praesidentem Paasikivi, qui anno millesimo nongentesimo quinquagesimo sexto (1956) munus deposuit, Niinistö est primus praesidens partis conservativae. Post longam potestatem praesidentis Urho Kekkonen summum in Finnia munus triginta annos tenuerunt Mauno Koivisto, Martti Ahtisaarti, Tarja Halonen, omnes democratiae sociales.

Exactores Germani in Graeciam profecturi

Plus centum sexaginta exactores Germani parati sunt in Graeciam proficisci, ut Graecos in vectigalibus efficacius colligendis adiuvant. Creditores peregrini censent Graeciam in crisim oeconomicam ideo incidisse, quod nimis multi vectigalia evadant. Nuper regimen Graeciae indicem quattuor milium hominum divulgavit, qui maximi evasores habentur. Nominibus divulgatis regimen efficere conatur, ut evasores ita palam facti debita tandem aliquando solvant. Ex relatione Unionis Europaeae, mense Novembri divulgata, exigenda sunt vectigalia non soluta omnino sexaginta miliarda euronum, quae

summa quartam fere partem facit integrae productionis nationalis Graecorum.

Minister Germanus: Graeci ex unione monetaria exeant

Hans-Peter Friedrich, minister a rebus domesticis Germaniae, censet Graecos melius ex difficultatibus suis oeconomicis surrecturos esse, si ex unione monetaria exierint. “Nolo”, inquit, “ut Graeci eiciantur, sed censeo illos ita esse incitandos, ut non possint recusare, quin exeant.” At Angela Merkel, cancellaria foederalis, Graeciam in unione monetaria retinere vult.

Latibulum Osamae bin Laden destructum

Osama bin Laden, terrorista diu quaesitus, in oppido Abbottabad Pakistaniae cum familiaribus multos annos latitabat, donec mense Maio anni proximi a copiis specialibus Americanorum occisus est. Cum complures centeni homines singulis diebus ad domum Osamae videndam venissent, magistratus Pakistani illam, ne meta peregrinationum fieret, funditus destruendam curaverunt.

Berlusconi corruptionis liberatus

Silvius Berlusconi, pristinus primus minister Italiae, in iudicio corruptionis liberatus est, quod crimina obsolevisent. Suspiciebatur iuristam Britannicum David Mills plus quadringentis quinquaginta milibus euronum corrupisse, ut falsum pro se testimonium in iudicio diceret. Accusator illi poenam carceris quinque annorum flagitaverat.

Rex Suetiae nomen neptis nuntiavit

Nova principissa Suetiae nomen habet Estelle Silvia Ewa Mary, ut rex Carolus XVI Gustavus nuntiavit. Erit etiam ducissa Ostrogothiae. Estelle olim appellabatur coniux comitis Folke Bernadotte. Ex regina Silvia, avia materna, infans Silvia nominatur, Ewa ex paterna avia, matre principis Danielis. (Tuomo Pekkanen)

Regimen Syriae condemnatur

24.2.2012

Coetus generalis Nationum Unitarum edicto promulgato violentiam regiminis Syriae condemnavit. Legati tamen Russorum et Sinensium contra id decretum suffragati sunt. Communi fere conventui placuit Foederi Arabico assentiri, quod censuit praesidentem Bashar al-Assad a potestate nulla mora interposita recedendum esse. Id quoque a moderatoribus Syriae flagitatum est, ne exercitus civitatis iam in suum populum saeviret, sed in stationes suas reduceretur. (Reijo Pitkäranta)

Auxilium Graecis datum

Die Lunae (20.2) inter ministros Unionis Europaeae convenit, ut Graecis alterum quoque auxilium pecuniarium concederetur, ne civitas eorum aere alieno grandissimo onerata omnino decoqueret. Summa pecuniae, quae illis dabitur, centum triginta miliarda euronum efficit. Eodem die Bruxellis etiam tractatus de cautionibus crediti inter Finnam et Graeciam subscriptum est. (Reijo Pitkäranta)

Wulff munus deposuit

Christianus Wulff, praesidens foederalis Germaniae, munus deposuit. Nuntiavit de ea re, postquam actor publicus parlamentum rogavit, ut is immunitate iudiciali privaretur. Neque enim abest suspicio, quin Wulff complura commoda ab amicis suis negotiatoribus per dedecus acceperit. Ei succedere videtur Joachim Gauck, propugnator libertatis et democratiae septuaginta duos annos natus. (Reijo Pitkäranta)

De petroleo Iranianorum

Iraniani Francogalliae et Britanniae petroleum suppeditare desierunt. Dubium non est, quin illo consilio facto sanctionibus ab Unione Europaea sibi impositis respondere velint. Nuntiaverunt se novos clientes habere, quibus petroleum vendituri essent. Agitur de Russis et Sinensibus, quibuscum Iranian libenter mercaturam exercent eamque etiam augere student. (Reijo Pitkäranta)

Victoria filiam peperit

Die Iovis (23.2.) prima luce Victoria, principissa Suetiae, in Instituto Carolino Stockholmiensi filiolum peperit, ut princeps Daniel, qui partui adfuerat, eodem mane magno gaudio affectus diurnariis nuntiavit. Et mater et infans bene valere dicuntur. Filia recens nata in ordine hereditario regni Suetiae a matre sua Victoria secunda est.
(Reijo Pitkäranta)

De antequadragesimalibus

Die Martis ((21.2.) ieiunium quadragesimale huius anni initium cepit. More solito ei magna sollemnia carnisprivia appellata antecesserunt, quorum omnium magnifentissima Rivi Ianuarii, in metropoli Brasiliae, magna pompa celebrabantur. Huic festo intra quinque dies amplius quinque miliones hominum intererant.
(Reijo Pitkäranta)

Periculum in nivibus magnum

In urbe Helsinki his diebus tanta nivium vis cecidit, ut curatores viarum difficultates in iis everrendis habuerint. Huc accedit, quod nives in summis domibus coacervatae peditibus praeter aedificia ambulantis magnum periculum inferunt. Iam una femina propter nives de tecto capiti delapsa vitam amisit.
(Reijo Pitkäranta)

Tumultus violenti Athenis orti

17.2.2012

Parsimoniae publicae, quas Unio Europaea et instituta nummaria internationalia Graecos poposcerant, a parlamento Graeciae approbatae sunt. Inter alia decretum est, ut quindecim milia sedium operandi publicarum abolerentur et salaria minima valde deminuerentur. Populus autem de consilio parlamenti certior factus tanta ira incensus est, ut in vias Athenarum saltem octoginta milia hominum reclamandi causa congregarentur. Tumultibus violentis ortis multa aedificia incensa sunt et magna multitudo civium vulnerata est.
(Reijo Pitkäranta)

Impetus in Emesam continui

Copiae Syriae in adversarios praesidentis Bashar al-Assad impetus facere perrexerunt. Aggrediuntur imprimis urbem Emesam sive Homs, quae pro sede principali motus rebellis habetur. Nuntiatum est eadem loca iterum atque iterum bombis verberari, ex quo sequitur, ut nemo ex urbe effugere possit.
(Reijo Pitkäranta)

Xi Jinping et Obama convenerunt

Die Martis (14.2.) Xi Jinping, vicepraesidens Sinarum, praesidentem Civitatum Americae Unitarum Barack Obama in Aedibus Albis convenit. Americani et Sinenses aequilibrium inter discordias et mutua commoda invenire conantur. Americani enim, quamquam Sinenses de iuribus humanis violatis et aliis vitiis reprehendunt, tamen momentum politicae suae externae magis atque magis in Asiam et in regiones Oceani Pacifici versus transtulerunt.
(Reijo Pitkäranta)

Periculum terrorismi in Suetia

Moderatores Suetiae censent periculum terrorismi, quod patriae suae imminet, verum et manifestum esse. Haec aestimatio in nova disciplina militari inest, quam administratores ad terrorismum avertendum nuper excogitaverunt. Condicio securitatis in peius mutata esse existimatur, nam abhinc quattuor annos illud periculum in Suetia parvi ducebatur.
(Reijo Pitkäranta)

Dickens ante CC annos natus

Hoc mense Februario ducenti anni acti sunt, cum Carolus Dickens, scriptor Britannus celeberrimus, natus est. Memoria eius bisaecularis non solum in Britannia, sed etiam in aliis orbis terrarum partibus variis modis celebratur. In ipsa Britannia hoc iubilaeum inter eos tres eventus numeratur, quibus populus hoc anno quasi in unum corpus coalescere videtur. Huc pertinent etiam Elisabeth II sexaginta annos regina et ludi Olympici hac aestate Londinii futuri.
(Reijo Pitkäranta)

Sambia victoriam reportavit

Pridie Idus Februarias (12.2.) Liberopoli, in urbe Gabonis, inter Sambiam et Litus Eburneum certatum est, utra harum civitatum principatum in Africa pedifollicum adeptura esset. Superior discessit Sambia, cuius grex nationalis adversarios numeris octo ad septem (8-7) vicit. Neque ludus ille suo tempore diiudicari potuit, sed opus erat certamen ictuum poenaliu instituire.

(Reijo Pitkäranta)

Niinistö praesidens designatus

10.2.2012

Sauli Niinistö, candidatus factionis conservativae, praesidens rei publicae Finniae designatus est, cum in alteris comitiis Nonis Februariis habitis competitorem Pekka Haavisto devicit. Illi enim sexaginta fere tres centesimae (62,6%) suffragantium favebant, huic triginta septem (37,4%).

Iam in demoscopiis ante comitia factis Niinistö multo maiore quam competitor gratia valuerat. Ad urnas tantum undeseptuaginta centesimae (68,9%) civium suffragium habentium venerunt. Causa partim erat frigus, quod inter viginti et triginta gradus variabat. Multi etiam domi manserunt, quia neutri ex candidatis favebant, cum ceteris candidatis in primis comitiis exclusis prasinus aut conservativus eligendus esset.

Niinistö victoriam reportavit in quattuordecim ex omnino quindecim regionibus comitialibus. Tantum Alandia candidatum Haavisto praesidentem maluisset. Acerrimum erat certamen in urbe Helsinki, ubi Haavisto prope dimidium votorum (49,8%) accepit et differentia inter competitores tantum mille ducentorum quinquaginta duorum (1252) suffragiorum erat.

Proprietas horum comitiorum erat, quod non agebatur tantum de opinionibus politicis candidatorum, qui de plerisque rebus maioribus consentiunt, quantum de indole et persona, quibus differunt. Haavisto, qui homosexualitatem suam profitetur, servitium militare non fecit neque ad ecclesiam pertinet, nihilo minus plus quam milionem fautorum invenit.

Niinistö, qui Kalendis Martiis munus in sexennium suscipiet, est iurista sexaginta tres annos natus. Ex comitiis praesidentialibus ante sex annos factis, cum Tarja Halonen praesidens designata est, inferior discessit, sed postea constanti favore populi usus est. Fuit delegatus parlamentaris, minister, praeses parlamenti, vicepraeses Argentariae Europaeae Investimentorum (EIB, European Investment Bank).

Russi et Sinenses iure vetandi usi sunt

Consilium securitatis Nationum Unitarum sententiam praeparaverat, qua postularetur, ut praesidens Syriae Bashar al-Assad munus deponeret. Sed Russia et Sinae iure vetandi usae sunt, quo impediverunt, ne sententia probaretur. Quo facto iram terrarum Arabicarum et occidentalium excitaverunt. Oppositio Syriae censebat regimen ita licentiam cives suos trucidandi accepisse. Barack Obama, praesidens Americanorum, flagitavit, ut praesidens al-Assad discederet. Affirmavit Americanos populum Syriae sustenturos esse. Hillary Clinton autem monuit interventum militare omnino exclusum esse. Nationes Unitae aestimaverunt propter violentiam his undecim mensibus circiter quinque milia quadringentos homines in Syria perisse.

Elisabeth II sexaginta annos regina

Elisabeth II iam sexaginta annos regina Britanniae est. Cum rex Georgius VI postridie Nonas Februarias anno millesimo nongentesimo quinquagesimo secundo (6.2.1952) mortuus esset, Elisabeth, filia eius maior, ad regnum pervenit. Tantum regina Victoria, quae thronum sexaginta tres annos habuit, diutius quam regina Elisabeth II regnavit.

(Tuomo Pekkanen)

Inspectores Iraniam obierunt

3.2.2012

Ordo internationalis ab energia atomica (IAEA) sex inspectores in Iraniam misit, qui cognoscerent, quorsum programma nucleare illius civitatis spectaret. Itinere triduo suscepto princeps legationis ait visitationem quidem bene successisse, sed adhuc multum restare, quod in Irania faciendum esset.

Itaque necesse esse, ut observatores tempore proximo futuro illuc denuo proficiscerentur.

(Reijo Pitkäranta)

Tumultus in Senegalia orti

Ban Ki-moon, secretarius generalis Nationum Unitarum, de violentia in Senegalia aucta sollicitus est.

Ibi enim tumultus cruenti orti sunt propter discordias ad comitia praesidentialia pertinentes. Ab una parte sunt fautores praesidentis hodierni, qui se iam tertium in idem munus creari vult, ab altera autem parte adversarii eius, qui commemorant lege fundamentali interdictum esse, ne cui tertius praesidatus daretur.

(Reijo Pitkäranta)

Norvegi veniam petiverunt

Die vicesimo septimo mensis Ianuarii (27.1.) memoria eorum celebrabatur, qui persecutionibus belli mundani alterius occisi erant. Eodem die Jens Stoltenberg, princeps minister Norvegiae, a Iudaeis petivit, ut populo Norvegico ignoscerent, quod magnus numerus Iudaeorum permissu eius in campos carcerales nazistarum transportatus esset. Constat Norvegiam anno millesimo nongentesimo quadragésimo (1940) a Germanis occupatam esse.

(Reijo Pitkäranta)

Tota Europa frigoribus alget

Hac septimana ex Sibiria ad Europam orientalem et occidentalem versus frigora acerrima diffusa sunt, quorum vis tanta fuit, ut multa dena hominum vitam amitterent. In Ucraina numerus civium ex gelu mortuorum iam saltem triginta esse dicitur et amplius sescenti, imprimis cives domo carentes, propter hypothermiam et congelationes sibi auxilium petiverunt.

(Reijo Pitkäranta)

Rousseau ante CCC annos natus

Hoc anno tria saecula acta sunt, cum philosophus Jean-Jacques Rousseau natus est. Quam ob rem Genavae, in urbe eius natali, et tota Helvetia multae et magnae sollemnitates ad eum celebrandum instituuntur. Huc pertinet, quod Rousseau unus e civibus in Helvetia maxime insignibus pronuntiatus est. Ille autem vivus apud suos persona tam ingrata erat, ut complura opera eius iussu magistratuum comburerentur et is ipse rerum novarum accusatus exilio multatus sit.

(Reijo Pitkäranta)

De caeliscalpiis aedificandis

Magistratus et viri politici Helsinkienses studio ardenti domos celsissimas in urbe aedificandi correpti sunt. Est enim eis in animo saltem quinquaginta aedificia turrium instar in diversis partibus Helsinki excitare. Si haec consilia perfecta erunt, non dubium erit, quin aspectus urbis valde mutetur. Sunt in Finnia alii quoque praefecti urbium, quibus aedificatio caeliscalpiorum placere videtur.

(Reijo Pitkäranta)

Suffragia finnorum praesidentialia

27.1.2012

In primis suffragiis comitiorum praesidentialium Sauli Niinistö, candidatus factionis conservativae, ex opinione competitoribus praevaluit, cum triginta septem centesimas (37%) votorum obtinuit. Secundus inopinanter factus est Pekka Haavisto factionis prasinorum, qui apud cives maiorem gratiam (18,8%) invenit quam Paavo Väyrynen (17,5%), politicus veteranus partis centralis.

Maximam cladem passus est Paavo Lipponen, democrata socialis, cui minus quam septem centesimae (6,7%) suffragantium favebant. Ad urnas paene septuaginta tres centesimae (72,7%) civium venerunt. Quae cum ita sint, in alteris comitiis Nonis Februariis (5.2.) futuris cives constituent, utrum Niinistö an Haavisto praesidens Finnorum in proximum sexennium designetur.

Tuomo Pekkanen

Rebelles suburbium Damasci occupaverunt

Rebelles Syriae Dumam, suburbium Damasci, occupaverunt, quod antea illis non contigerat. Res autem nondum a partibus neutralibus confirmari potuit. Duma, quam plus centum milia hominum habitant, circiter viginti chiliometra in septentrionem ab urbe Damasco distat. Fuit unus ex locis principalibus motuum Syriae popularium.

Tuomo Pekkanen

Qui non lugebant, puniuntur

Magistratus Coreae Septentrionalis omnes punire coeperunt, qui mortem Carissimi Ducis Kim Jong Il satis non lugebant. Acta diurna Coreae Meridianae (Daily NK) narraverunt opere coacto minime sex

mensium illos affici, qui conventibus inter luctum publicum convocatis non interfuissent aut in eis non flevisset neque satis sinceri apparuissent. At sedes informatica Coreae Septentrionalis (KCNA) haec falsissima esse asseveravit et propagatores talium nuntiorum “miserabilem populi faecem” appellavit. Alioquin Corea Septentrionalis vicinos meridianos accusavit, quod reverentiam adversus Kim Jong Il inter luctum non adhibuissent.

Tuomo Pekkanen

Lingua Lapponica in periculo

Periculum est, ne lingua Lapponica sive Samica in Finnia omnino intereat. Plures quam dimidium puerorum Samice loquentium iam extra regiones Samorum domesticas habitant, ubi institutio Samice non ministratur. His decem annis Sami magis magisque in oppida urbesque migraverunt neque nova generatio in circumiectis urbanis sermonem Samicum facile sibi assumit. Leges Finniae linguam Samorum tantum in communibus Lapponiae septentrionalibus tutantur, etsi tertia pars eorum alibi in Finnia habitat. Sami hodie numerantur minus quam octo milia, ex quibus in regione urbana Helsinkensi quingenti fere sunt.

Tuomo Pekkanen

Panis secalicius vires facit

Panis secalicius mane sumptus memoriam servat acriorem et vires facit meliores quam panis albus. Investigatio in Universitate Lundensi facta ostendit differentiam esse notabilem. Illa differentia maxima est duabus horis post ientaculum. Cibus, in quo multae fibrae insunt, etiam gradum sacchari sanguinis idoneum inter horas antemeridianas tenet.

Tuomo Pekkanen

Naufragium periculosissimum

0.1.2012

Idibus Ianuariis (13.1.), qui erat dies Veneris, ante oram Italiae calamitas maritima periculosissima accidit, cum navis circumvagans Italiana nomine Costa Concordia propter litus Tusciae ad scopulos allisa est. Quo facto latus eius male afflictum est et navis tantopere declinari coepit, ut non multum abesset, quin tota aquis submergeretur.

Vehebantur ea amplius tria milia viatorum cum mille fere nautis et ministris diversi generis. Terrore panico orto multi in mare desiliendo et in terram natando salutem petere conabantur. Saltem undecim inessores vitam amiserunt, et de sorte unius et viginti hominum parum constat.

(Reijo Pitkäranta)

Margareta XL annos regnavit

Postridie Idus Ianuarias (14.1.) quadraginta anni acti erant, cum Margareta II, regina Daniae, ad potestatem pervenit. Ad hoc festum celebrandum die Dominico (15.1.) in urbem Hafniam magnus numerus hospitem summae dignitatis convenerunt, inter eos Tarja Halonen, praesidens Finniae. In caerimoniis erant prandium, officium divinum sollemne epulumque magnificentissimum in palatio Christianiburgensi apparatus.

(Reijo Pitkäranta)

De poliomyeliti in India

Poliomyelitis ex India omnino evanuisse videtur, cum anno proximo nullus eius morbi casus ibidem inventus sit. Quam mutationem rerum eo pluris aestimaveris, si respicis numerum Indorum e poliomyeliti aegrotantium abhinc viginti annos centum quinquaginta milium in anno fuisse. Regimen autem Indiae vaccinationibus creberrimis apud populum institutis effecit, ut illi epidemiae tandem finis fieret.

(Reijo Pitkäranta)

Nives in Europa ceciderunt

In Austria et Helvetia et aliis quoque mediae Europae civitatibus tanta nivium copia paucis diebus cecidit, ut multae regiones acervis nivalibus etiam unum metrum altis obruerentur. Itaque haud mirum est commeatum viarium in Austria passim interruptum esse. In Helvetia autem cives a magistratibus moniti sunt, ut labinas nivium caverent.

(Reijo Pitkäranta)

Finnair volatus tutos habet

Finnair, societas aëria Finnica, se tutissimam ex omnibus societatibus Europaeis huius generis esse praebuilt. In comparatione autem ad totum mundum pertinente secunda fuit, cum primum locum sibi pararet societas Iaponica nomine All Nippon Airways. Hoc apparet ex indice securitatis aëriae, quem rerum periti Germani variis statisticis observatis divulgaverunt.

(Reijo Pitkäranta)

Kaisa Mäkäräinen victrix

Die Lunae (16.1.) redactores Finni a re athletica suffragio lato decreverunt, quis fuisset optimus vel optima athleta in Finnia anno bismillesimo undecimo (2011). Victoriam manifestam reportavit Kaisa Mäkäräinen, femina undetriginta annorum, quae anno proxime praeterito principatum mundanum in biathlo sibi conciliavit.

(Reijo Pitkäranta)

Conflictus in Sinu Persico imminet

13.1.2012

Unio Europaea nuntiavit novas contra Iraniam sanctiones susceptum iri, quibus impediretur, ne Irania apparatus nucleares ad bombam atomicam necessarios praepararet. Irani autem responderunt se, si id factum esset, Fretum Hormuz clausuros esse.

Contentionem politicam auget, quod Irania exercitia belli maritimi in illo freto habet. Fretum Hormuz, quod paeninsulam Arabicam a cetera Asia separat, vim habet strategicam, quia per illud commeant naves petroleariae non tantum Iraniae sed etiam Iraquae, Cuvaïti aliarumque terrarum apud Sinum Persicum iacentium. Americani nuntiaverunt se impedituros esse, ne Fretum Hormuz clauderetur. USA in illa regione Quintam classem navium longarum tenet, quae exercitui maritimo Iranorum haud dubie praevalere creditur.

(Tuomo Pekkanen)

Iudicium contra Mubarak continuatur

Iudicium contra Hosni Mubarak, praesidentem Aegypti potestate expulsum, in urbe Cairo continuatur. Ille inter alia accusatur, quod inter motus populi Aegypti particeps fuerit caedis, qua octingenti cives manifestantes interfecti sint. Accusator flagitat, ut Mubarak, si reus illius criminis iudicatus erit, laqueo suspendatur.

(Tuomo Pekkanen)

Iaponia veteres electrificinas nucleares claudit

Regimen Iaponiae suadet, ut omnes electrificinae nucleares plus quadraginta annorum claudantur. Propositum est securitatem augere. Antea aetas electrificinarum nuclearium in Iaponia nullo modo circumscripta fuit. Hodie tantum duae electrificinae aetatem quadraginta annorum superaverunt, sed proximis annis maior pars ex quinquaginta quattuor nuclearibus electrificinis, quae sunt in Iaponia, illum terminum assequuntur.

(Tuomo Pekkanen)

Stephen Hawking septuagenarius

Stephen Hawking, physicus Britannus notissimus, die Dominico (8.1.) septuaginta annos complevit. Morbo ALS debilitatus conventui, qui in Universitate Cantabrigensi in honorem eius factus est, interesse non potuit. Celeberrimus ex operibus eius est “Brevis historia temporis”, in quo universum eiusque originem modo populari explicavit. In colloquio a societate BBC transmissio Hawking censebat periculum esse, ne genus humanum emoriretur, cum magna calamitas, sicut bellum nucleare aut calefactio climatis, Terrae obtigisset. Ideo maximi esse, ut homines spatium cosmicum incolerent et colonias in Marte aut in aliis corporibus caelestibus conderent.

(Tuomo Pekkanen)

Suffragia praesidentialia anticipata

Comitia praesidentialia Finno-ruum die vicesimo secundo huius mensis (22.1.2012) fient, sed suffragia anticipata a die undecimo usque ad septimum decimum diem (11.-17.1.) dare licet. In demoscopiis factis Sauli Niinistö, candidatus factionis conservativae, ceteris praevalet, sed si plus quam dimidium votorum non acceperit, altera comitia Nonis Februariis (5.2.) inter duos candidatos fient, qui plurima vota obtinuerint.

(Tuomo Pekkanen)

De consultationibus pacis

6.1.2012

Die Martis (3.1.) conciliatores pacis Israelianorum et Palaestinensium primum post spatium unius anni inter se convenerunt. Jitzhak Molcho, internuntius Israelianus, et Saeb Erekat, orator regiminis Palaestinensis, in urbem Iordaniae Ammaniam congregati sunt, ut de pace inter utramque partem restituenda agerent. Colloquiis aderant etiam aliquot observatores internationales.

(Reijo Pitkäranta)

Rerum in Libya condicio

Mustafa Abdel Jalil, praeses regiminis temporarii Libyae, timet, ne in Libya bellum domesticum oriatur. Ita censuit, postquam quattuor homines Tripoli, in urbe capite, occisi sunt conflictibus violentis ibidem factis. Jalil ait Libyam post dictatorem Muammar Gaddafi mortuum in vacuum quoddam potestatis incidisse, cum novo regimini non contigisset, ut greges armatos inter se certantes coerceret.

(Reijo Pitkäranta)

Quid in Nigeria acciderit

Praesidens Nigeriae terrae suae statum necessitatis edixit, qui ad quattuor regiones eiusdem civitatis partim pertinet. Anno vergente in Nigeria tumultus orti sunt, quibus magna multitudo hominum vitam amisit. Neque solum de ictibus a musulmanis in ecclesias Christianas factis agitur, sed etiam variae gentes de agris possidendis ibidem inter se cruenta pugnaverunt.

(Reijo Pitkäranta)

Praesidatus Unionis Europaeae

Kalendis Ianuariis (1.1.) praesidatus Unionis Europaeae a Polonis ad Danos in sex menses transiit. Quod munus illis eo difficilius fore existimatur, quod Dania, utpote quae foederis pecuniaris socia non sit, a multis rebus Unionis Europaeae decernendis procul amota est. Quae cum ita essent, Dani imprimis id agere decreverunt, ut inter praesidatum suum in variis eventibus culturalibus instituendis praeter ceteros Europaeos excellerent.

(Reijo Pitkäranta)

De comitiis praesidentialibus

Anno bismillesimo duodecimo (2012), qui nuper iniit, in civitatibus praepotentibus, quales sunt Civitates Americae Unitae, Russia, Francogallia, comitia praesidentialia habebuntur. Hoc etiam ad Finniam valet, ubi die vicesimo secundo mensis Ianuarii (22.1.) novus praesidens eligitur. Omnino octo factiones politicae suum quaeque candidatum vel candidatam proposuerunt. Nisi quis eorum iam primo suffragio maiorem sententiarum partem consecutus erit, Nonis Februariis (5.2.) alterum suffragium fiet.

(Reijo Pitkäranta)

Louvre museum frequentissimum

E museis mundi viatoribus omnium gratissimum est Louvre, quod Lutetiae Parisiorum situm esse constat. Id enim anno proxime praeterito novem fere miliones hominum recepit. Secundum ab eo erat Museum Britannicum Londiniense, cui sex milionibus hospitum gaudere licebat. Tertio loco positum est Museum Metropolitanum Neo-Eboracense cum frequentia quinque milionum amicorum artis.

(Reijo Pitkäranta)

De tempestate S. Stephani

30.12.2011

Die Sancti Stephani (26.12.) Finnia tempestate vehementi afflicta est, qua saevior apud nos his decem annis non fuit. Illa procella apud Norvegiam orta in terram nostram per Suetiam venit arbores caedendo, tecta domuum eripiendo, vias commeatu interrumpendo.

Vis eius tanta erat, ut amplius ducenta milia familiarum electricitate privarentur. Incolae urbis Helsinki a magistratibus moniti sunt, ut domi remanerent, cum periculum esset, ne rebus vento solutis et in aere passim volantibus laederentur.

(Reijo Pitkäranta)

Havel et Kim Jong-il mortui

Mense Decembri exeunte duo principes civitatis diversissimi generis diem supremum obierunt. Unus eorum erat Vaclav Havel, celeberrimus propugnator libertatis et primus praesidens Tzecoslovakiae communismo liberatae. Alter erat Kim Jong-il, dux comunista Coreae Septentrionalis, qui populo suo ferrea manu imperavit et terram suam peregrinis omnino clausam tenebat.

(Reijo Pitkäranta)

Observatores in Syriam missi

Observatores a Foedere Arabico missi in Syriam advenerunt provisuri, ut regimen civitatis promisso staret neve civibus sibi adversantibus iam vim afferret. Pars legatorum, qui quinquaginta erant, etiam urbem Emesam, vulgo Homs appellatam, obierunt. Pridie quam eo venerunt ibidem plus triginta homines mortui erant, cum exercitus impetum in eos fecisset.

(Reijo Pitkäranta)

Animantes extraterrestres

Repraesentator Domus Albae negavit administrationem Civitatum Americae Unitarum ulla argumenta existentiae animantium extraterrestrium habere, quae populum celaret. Hac declaratione responsum est ad quaestionem a civibus per interrete positam. Dixit tamen vitam extraterrestrem esse posse et hanc possibilitatem ab Administratione Aeronautica et Spatiali (NASA) investigari.

(Tiina Arpiainen)

De viatoribus Russis

In Finnia exspectatur, ut saltem trecenta milia viatorum Russorum anno vergente huc veniant ad dies festos celebrandos et ad emptiones faciendas. Multi mercatores Finni, cum scirent eos suo sermone patrio negotiari velle, venditores Russice loquentes conduxerunt, qui mercaturae in tabernis exercendae auxilio essent.

(Reijo Pitkäranta)

Quid anno 2011 acciderit

Annus bismillesimus undecimus iam ad finem venit. Quam ob rem quaerere licet, quisnam eventus hoc anno animos hominum omnium maxime excitaverit. Opiniones de hac re variant, sed non desunt, qui censeant ea, quae in Iaponia acciderint, ceteris rebus praevalere. Constat ibi mense Martio ingentem terrae motum factum esse, ex quo magnum tsunamum et calamitas in Fukushima nuclearis secuta sunt. Alii autem eversionem rerum in terris Arabicis factam inter omnes nuntios eminere putant.

(Reijo Pitkäranta)

Conventus Unionis Europaeae

16.12.2011

Moderatores Unionis Europaeae conventu Bruxellis habito foedus oeconomico-politicum condere decreverunt, cuius esset oeconomiam singularum civitatum novis legibus stabilire. De rebus autem singulis huius consociationis non ante quam mense Martio constituetur.

Britanni recusaverunt, quominus hoc pactum approbarent. Neque participantibus manifeste demonstrare contigit, quonam modo discrimen aeris alieni, quo Europa iam per duos annos vexatur, tandem solveretur.

(Reijo Pitkäranta)

Tumultus in Russia orti

In diversis urbibus Russiae, imprimis Moscuae et Petropoli, tumultus violenti orti sunt, quibus multa milia hominum interfuerunt. Qui cives eventu comitiorum parlamentarium parum contenti principem ministrum Vladimir Putin et fautores eius fraudis accusaverunt et postulaverunt, ut in Russia novum suffragium populi haberetur. Praesidens Dmitri Medvedev pollicitus est in illas accusationes inquisitum iri.

(Reijo Pitkäranta)

De epidemia morbillorum

Ordo sanitarius mundi (WHO) Europaeos de epidemia morbillorum praemonuit. Timet enim, ne ille morbus, nisi cito coercitus sit, anno proximo futuro longe lateque effundatur. Rem ita se habere eo verisimilius esse existimatur, quod novem primis mensibus huius anni in Europa iam viginti sex milia

casuum morbillorum reperta sunt.
(Reijo Pitkäranta)

Res ab Amundsen gesta

Abhinc centum annos exploratores Roald Amundsen et Robert Scott acerrime certaverunt, uter eorum prior polum meridionalem consecuturus esset. Victor evasit Amundsen, qui postridie Idus Decembres anno millesimo nongentesimo undecimo (14.12.1911) vexillum Norvegicum illo loco constituit. Scott autem, vir Britannus, uno mense post eodem advenit et inde domum rediens frigore mortuus est.
(Reijo Pitkäranta)

Metallum pluma levius

Investigatores Americani ope nanotechnologiae genus metalli levissimum invenerunt. Id, cum pondo nonnisi nongentena microgrammata per singula centimetra cubica valet, centum partibus levius est, quam ulla alia materia insulatoria. Structura eius spumae similis esse videtur. Ob proprietates optimas, levitatem scilicet et flexibilitatem, in securitatem vehiculorum provehendam usui fore putatur.
(Karoliina Ignatius)

De cantionibus nataliciis

Societas missionaria Finniae iam pridem libellum edendum curavit, quo cantus natalicii omnium pulcherrimi continentur. Quae piae cantiones apud populum tantam gratiam assecutae sunt, ut non solum in aedibus sacris cantentur sed etiam in cauponis, stationibus benzinariis, sedibus mercatoriis personent. Huc accedit, quod fasciculi eorundem canticorum ex Finnia usque ad urbes Asiae propagati sunt.
(Reijo Pitkäranta)

Pausa Nuntiorum natalicia

Septimana proxime futura Dies nativitatis Domini celebrabitur, quam ob rem Nuntii Latini tunc non emittentur. Inde fit, ut auditoribus nostris iam nunc Bona Natalia exoptemus. Valete!
(Reijo Pitkäranta)

Quid Olli Rehn dixerit

9.12.2011

Die Iovis (8.12.) Bruxellis conventus biduanus Unionis Europaeae inauguratus est. Ibi deliberatur, quonam modo periculum, quod monetae in Europa communi imminet, averti possit. Olli Rehn, praeses vicarius Commissionis Unionis, dixit participantibus tales rationes inveniendas esse, quibus utendis foedus oeconomicum Europaeum corroboraretur.
Ita fieri posse, ut tale incommodum oeconomicum, quod Graeciae obtigisset, in aliis civitatibus Europaeis evitaretur.
(Reijo Pitkäranta)

Comitia in Russia facta

Die Dominico (4.12.) in Russia comitia parlamentaria instituta sunt. Tum accidit, ut factio nomine ‘Russia cohaerens’, cui princeps minister Vladimir Putin praeest, magnam partem gratiae, qua apud populum antea valuerat, infeliciter amitteret. Quantam cladem acceperit, inde apparet, quod factio eius septuaginta septem sedes parlamentares perdidit. Communistae autem, qui sententiarum paene vicenas centesimas sibi paraverunt, successu suo contenti erant.
(Reijo Pitkäranta)

Novum regimen Belgii

Discrimen in Belgio administrativum tandem solutum est, cum id Nonis Decembribus (5.12.) novum regimen accepit. Tum iam quingentesimus quadragesimus dies illuxerat, postquam comitia parlamentaria ibidem facta erant. Coalitio in tredecim ministris e sex diversis factionibus oriundis consistit. Munere ministri principis fungitur Elio Di Rupo, qui linguam Francogallicam pro sermone patrio habet.
(Reijo Pitkäranta)

Nationes Unitae et Libya

Consilium securitatis Nationum Unitarum Libyae usque eo auxilium ferre constituit, donec

armamentaria, quae ibidem magna sunt, omnino delerentur et res in civitate pacarentur. Quod intra tres menses perfici posse existimatur. Initio Nationum Unitarum erat providere, ut Libya novam legem fundamentalem haberet et comitia parlamentaria ibidem sine ullis perturbationibus fierent. Novum officium eius est Libyae in armis exeundis subvenire.

(Reijo Pitkäranta)

Res quaedam palaeontologica

Mandibula abhinc octoginta quinque annos in Britannia reperta demonstrat hominem sapientem maturius quam antea putatum est, in Europam advenisse. Computatio radiocarbonica quidem fieri non potuit, sed investigatoribus contigit ossibus animalium, quae una cum ea reperta erant, tempus dare. Apparuit mandibulam eius hominis fuisse, qui abhinc paene quadraginta quattuor milia annorum vixit. (Antti Ijäs)

Helenius victoriam reportavit

Pridie Nonas Decembres (4.12.) in urbe Helsinki de principatu Europaeo pugilationis gravissimi ponderis certabatur. Qua pugna superior discessit Robert Helenius, pugil professionalis Finnis, cum adversarium Britannum Dereck Chisora duobus punctis ad unum vicit. Eventus admodum dubius esse videbatur, quam ob rem Chisora statim postulabat, ut sibi brevi facultas daretur cum victore suo denuo confligendi. eleniHee

(Reijo Pitkäranta)

De conventu climatico

2.12.2011

Die Lunae (28.11.) Durbaniae, in urbe Africae Australis, conventus climaticus Nationum Unitarum inauguratus est. Participes imprimis id agere conantur, ut pactum de atmosphaera tuenda, de quo in urbe Kioto convenit, continuetur et ad novam pactionem ad omnes gentes pertinentem adeatur. Tractatus Kiotoensis, cui neque Sinae neque Civitates Americae Unitae subscripserunt, anno proxime futuro valere desinet.

(Reijo Pitkäranta)

Breivik mentis non compos

Iudices Norvegi censuerunt Andream Behring Breivik, qui aestate proxime praeterita septuaginta septem homines Osloae interfecit, mentis non compotem fuisse. Verisimile igitur est eum in vincula non coniectum sed in aliquod valetudinarium psychiatricum inclusum iri.

(Reijo Pitkäranta)

Neonazistae civium occisores

Animi Germanorum perturbati sunt compluribus homicidiis a neonazistis commissis, quibus saltem decem cives vitam amiserunt. Custodes publici tres homines deprehenderunt, quos commercium commune cum occisoribus habuisse creditur. Quam ob rem non desunt, qui reprehendant Germanos oblitos esse, quanto periculo partes dextrae extremae civitati essent.

(Reijo Pitkäranta)

De percontatro Martiali

Magistratus Russi ab investigatione spatiali concesserunt sibi non contigisse, ut percontatrum cosmicum ad stellam Martem emitterent. Navis enim sideralis eorum in orbitam Terrae circumvolventem quidem pervenit, sed deinde machinamenta motoria, quorum erat cursum navigii ad Martem versus dirigere, non incitata sunt. Ex hoc vitio technico sequitur, ut missile illud re infecta aliquando in Terram decadat.

(Reijo Pitkäranta)

Regio tutelariorum naturae

Regimen Australiae decrevit regionem mari tuendo maximam prope oram Australiae septentrionalis condere. Quae area tutelariorum Mare corallicum complectens circuitu tantum patet, ut superficiem Germaniae et Francogalliae in unum collatam aequiperet. Neque solum naturae Australiae proderit, sed etiam, ut speratur, ad rem viariam et quaestum piscatorum illis locis viventium nonnihil conferet.

(Reijo Pitkäranta)

Finni pane vix vescuntur

Consumptio panis in Finnia his temporibus valde deminuta est. In causa, cur tam multi homines eo cibo tamquam sibi noxio vesci recusent, sunt hydrates carbonici, qui pane continentur. Pistores autem, ut clientes amissos recuperarent et novos quoque emptores sibi acquirerent, panificia novi generis ad mercatum ferre coeperunt.

(Reijo Pitkäranta)

De cura laserica dentium

Cura dentium radio laserico multo facilior celeriorque redditur. Medici dentarii narrant curationem lasericam nullum dolorem aegrotis afferre, quae res efficiat, ut dentes etiam hominum odontophobia laborantium hodie sine anaesthesia locali curari possint. Apparatus laserici in Finnia adhuc rariores sunt quam in ceteris civitatibus Europaeis, sed usus eorum cito crebrescit.

(Saara Honkanen)

Tumultus in Aegypto orti

25.11.2011

In urbe Cairo et aliis Aegypti partibus tumultus violenti orti sunt, quibus cives consilio militari terram regenti vehementissime adversantur. Neque reclamitantes contenti erant oratione, quam Mohammed Tantawi, dux illius consilii, die Martis (22.11.) coram populo habuit.

Contionabundus enim pollicitus est brevi in Aegypto et novam administrationem formatum et comitia praesidentialia institutum iri. Activistae autem flagitant, ut regimen militare nulla mora interposita imperium deponat et summa potestas rerum senatui e togatorum numero electo tradatur.

(Reijo Pitkäranta)

Edictum Nationum Unitarum

Violentiae et facinora contra iura humana facta, quae in Syria iam per octo menses continuantur, a Coetu Nationum Unitarum condemnata sunt. Idem ordo magistratibus Syriae imperavit, ne suis civibus iam vim adhiberent. Omnino centum viginti duae civitates sociae huic edicto consenserunt, cum tredecim, in iis Irania, Corea Septentrionalis, Belorussia, tali clausulae adversarentur.

(Reijo Pitkäranta)

Comitia parlamentaria Hispaniae

In Hispania comitia parlamentaria facta sunt, quorum victoriam manifestam reportavit factio popularis dextra. Accepit enim sententiarum quadragenas quinas fere centesimas. Quae cum ita sint, novus princeps minister Hispaniae erit Mariano Rajoy, praeses partium victricarum. Socialistae autem, qui civitati multos annos praefuerunt, male vapulaverunt, quippe qui tantum undetricenas centesimas suffragiorum sibi conciliarent.

(Reijo Pitkäranta)

Neutrino luce velociora

Neutrino, corpuscula elementaria minutissima, luce velocius moveri videntur. Quod patuit ex experimentis, quae physici tribus annis iterum atque iterum modis operandi optimis et fide dignis usi fecerunt. Eventus a rerum peritis pro miraculo habetur, quia repugnat doctrinae ab Alberto Einstein propositae, qua contenditur in mundo nihil esse posse, quod lucem velocitate superet.

(Reijo Pitkäranta)

Urbes antiquae in Sahara

In imaginibus ope satellitum acceptis vestigia urbium antiquarum in desertis Saharae olim sitarum conspiciuntur. Existimantur haec loca archaeologica habitationes Garamantum esse, quem populum scriptores veteres in partibus Africae interioribus olim vixisse commemorant. Ex novis inventis conici potest cultum civilem huius gentis multo praestantiorum fuisse quam ex operibus Vergilii et Livii rem se habere putaveris.

(Reijo Pitkäranta)

Ordo verborum primarius

Investigatores Americani dicunt subiectum obiectumque in lingua primigenia ante verbum positum fuisse. Duo milia ducentae linguae, quarum evolutionem scrutati sunt, a prima origine hoc ordine utebantur, sed postea paene sine exceptione locum verbi mutaverunt. Huiusmodi lingua asseverant et

maiores nostros in Africa Orientali abhinc quinquaginta milia annorum locutos esse.
(Antti Ijäs)

Mario Monti primus minister

18.11.2011

Novus princeps minister Italiae electus est Mario Monti, vir oeconomiae peritus duodeseptuaginta annos natus. Neque quisquam dubitat, quin munus eius Italiae administrandae maximi laboris futurum sit.

Primum quidem ei tale subsidium regimini suo ab aliis partibus acquirendum est, ut structurae depravatae, quibus oeconomia Italiae aggravatur, penitus renovari possint. Nisi ei id efficere contigerit, magnum erit periculum, ne tota Italia aere alieno publico demergatur.

(Reijo Pitkäranta)

Quid Foedus Arabicum fecerit

Regimen Syriae in cives sibi reclamitantes stragibus cruentis effectis saevire perrexit. Quam ob rem Foedus Arabicum Syriam a societate sua interim demovere decrevit et exercitum eiusdem civitatis monuit, ut suos interficere desineret. Huc accedit, quod illa consociatio Syriae sanctiones oeconomicas et politicas imponendas esse censet et nationibus Foederis sociis suasit, ut legatos suos Damasco domum revocarent.

(Reijo Pitkäranta)

Medicus falsus in Finnia inventus

In Finnia duo medici falsi deprehensi sunt, qui per decem fere annos se medicos simulantes in variis sedibus sanitariis aegros curaverunt, quamvis nulla specimina academica ad artem pertinentia absolvisent. Quo nuntio perturbati cives iam solliciti inter se interrogant, num in valetudinariis Finniae alii quoque fraudatores pro medico se gerentes inveniantur.

(Reijo Pitkäranta)

Rhinoceros animal moribundum

‘Diceros bicornis’, species rhinocerotis Africana, qui vulgo ‘Rhinoceros niger’ appellatur, iam omnino e natura emortuus est. Neque multum abest, quin etiam duo alia rhinocerotum genera eandem sortem subeant. Hoc patet ex Indice rubro sic dicto, quem Unio internationalis naturae tuendae edendum curavit. Ibi aestimatur, quinam sit status vivendi diversorum animalium et herbarum in mundo occurrentium.

(Reijo Pitkäranta)

De peste bubonica mediaevali

Genoma pestis bubonicae ab investigatoribus Germanis, Canadensibus Americanisque totum exploratum est e cadaveribus Londiniensium, qui aetate media hoc morbo perierant. Apparuit bacterium non inusitate letale fuisse, sed Europaeos illo tempore immunitatem tam debilem habuisse, ut nullo modo pesti resistere possent. Haec pestilentia ab Sinis in Europam diffusa tertiam vel dimidiam partem populi Europaei saeculo quarto decimo interfecit.

(Antti Ijäs)

Utilitas corpus exercendi

Qui exercitationi corporis laboriosae operam dant, melioris valetudinis sunt quam illi, qui se levius movere solent. Hoc patet ex investigatione academica in Universitate Helsinkiensi nuper divulgata. Si quis igitur currendo aut aliis huiusmodi generibus athleticis se dediderit, bonam patientiam laboris habebit neque tam saepe a sede operandi aberit quam alii.

(Reijo Pitkäranta)

Berlusconi munus deponet

11.11.2011

Silvio Berlusconi, princeps minister Italiae, se munus depositurum esse promisit. Eum nuntium publice dedit, postquam suffragio die Martis in parlamento facto fidem plurium delegatorum amisit et de condicione rerum cum praesidente Georgio Napolitano collocutus est.

Constituit tamen loco suo remanere, donec parsimoniae et renovationes oeconomicae, quas Unio Europaea ab Italianis flagitavit, a parlamento approbarentur. Berlusconi confessus est statum Italiae in

mercato pecuniario difficillimum esse, quam ob rem cives ad res renovandas parati esse deberent.
(Reijo Pitkäranta)

Discrimen politicum Graeciae

Etiam regimen Graeciae collapsum est, cum primus minister Georgius Papandreu propter discordias politicas a potestate discessit. Graecis nunc tale consilium ministrorum eligendum est, quod condiciones ab Unione Europaea Graeciae positas certissime accipiet. Nisi id fecerit, periculum erit, ne auxilium pecuniarium ab Unione Europaea promissum Graecis omnino denegetur.
(Reijo Pitkäranta)

De rebus in Columbia factis

Ordo bellatorum in Columbia clandestinorum nomine Farc ducem suum amisit, cum Alfonso Cano, caput eius, impetu militari occisus est. Quo facto Juan Manuel Santos, praesidens civitatis, nuntiavit viam apertam ad consultationes pacis inter regimen Columbiae et bellatores tectos ineundas esse. Hi tamen recusaverunt, quominus ictibus terroristicis, qui inde ab annis sexagesimis continuantur, finem facerent.
(Reijo Pitkäranta)

Asteroides Terram praeteriit

Die Mercurii multo mane asteroides maximus Terram tam prope praetervolavit, ut ab ea nonnisi trecentorum viginti milium chiliometrorum spatium abesset. Constat Lunam a nobis longinquius distare. Astronomis iam antea persuasum erat illud corpus caeleste planetae nostrae periculo non fore.
(Reijo Pitkäranta)

Murray sceleris convictus

Conrad Murray, medicus cantoris popularis Michael Jackson, mortis allatae convictus est. Iudices enim Americani sententiam pronuntiaverunt, ex qua Murray, cum illi artifice dosin letalem remedii somniferi dedisset, necem ei paravisset. Quali autem poena sceleris afficiatur, adhuc sub iudice est. Michael Jackson, qui etiam rex musicae popularis appellabatur, mense Iunio anno bis millesimo nono (2009) diem supremum obiit.
(Reijo Pitkäranta)

Mensis October tepidior

Temperatura media mensis Octobris in Finnia paene tribus gradibus Celsius solito altior fuit. Aberratio omnium maxima in Lapponia et in partibus Finniae orientalibus reperta est, cum eadem mutatio in Alandia minor esset quam in ceteris regionibus. October apud nos hoc anno iam octavum mensem continuum se praebuit, quo caelum tepidius fuit quam fieri consuevit.
(Reijo Pitkäranta)

Discrimen Graeciae aggravatur

4.11.2011

Georgius Papandreu, princeps minister Graeciae, populum sententiam rogare statuit, utrum id auxilium pecuniarium, quod civitates Unionis Europaeae Graeciae nuper promiserunt, approbaretur necne. Reliqui quoque ministri de suffragio populari ineundo consenserunt. Principes autem Unionis Europaeae, ut id audiverunt, valde stupefacti et irati sunt, cum metuerent, ne Graecia, si illa opitulatio publice reiecta esset, in maiores difficultates oeconomicas delaberetur quam ante.
(Reijo Pitkäranta)

Mutationes Unionis Europaeae

Regimen Finniae investigaturum est, possitne fieri, ut singulis civitatibus Unionis Europaeae ius sit a societate Europae pecuniaria discedendi. Ita Germaniae et Nederlandiae respondere vult, quae pactum Unionis Europaeae fundamentale diversis modis renovandum esse censent. De mutationibus in summo conventu mense Decembri constituentur.
(Reijo Pitkäranta)

De imbribus Thailandiae

Thailandia et aliae regiones Asiae his septimanis imbris monsoniis solito vehementioribus vexatae sunt. Amplius quadringenti homines his tempestatibus mortui esse dicuntur. Iam in eo erat, ut ipsa urbs Bancokium inundationibus obrueretur, sed postremo periculum imminens aggeribus tutelaribus constructis evitari potuit, et partes urbis mediae siccae manserunt.
(Reijo Pitkäranta)

Quid UNESCO facere decreverit

Civitates Americae Unitae recusaverunt, quominus Ordini Nationum Unitarum Educationis, Scientiae, Culturae (vulgo UNESCO) iam pecuniam darent. In causa est decretum, ex quo regiones Palaestinenses in societatem eius approbantur. Quantum detrimentum UNESCO e secessione Americanorum accepturus sit, vel inde apparet, quod ille ordo ex quinta fere parte de pecunia eorum operatur.
(Reijo Pitkäranta)

Statua libertatis 125 annorum

Statua libertatis, quae in ostio portus Novi Eboraci erigitur, mense Octobri exeunte centum viginti quinque annos complevit. Illud monumentum, quod artifex Auguste Bartholdi sculpsit, Americani anno millesimo octingentesimo octogesimo sexto (1886) a Francogallis dono acceperunt.
(Reijo Pitkäranta)

Successio hereditatis Britanniae

Principes Communitatis nationum Britannicarum legem de heredibus regni Britanniae renovaverunt. Iis enim placuit filiabus regiis idem ius ad coronam obtinendam concedere quod filii habent. Ex lege enim Britanniae hodierna filiae domus regiae nonnisi tum in solium ascendere possunt, cum heredes masculini omnino desunt.
(Reijo Pitkäranta)

Lepra adhuc in orbe grassatur

Lepra e Finnia iam tota fere evanuit, sed alibi in orbe terrarum quotannis plus duo milia casuum huius morbi inveniuntur. Maior pars contagionum in India reperitur, et ibidem numerus infectionum in statu crescendi esse videtur. Constat lepram per guttas in aerem tussitas longe lateque diffundi.
(Reijo Pitkäranta)

Libya tyrannide tandem liberata

28.10.2011

Die Dominico (23.10.) multa milia Libycorum in urbem Bengasin sive Berenicen convenerunt, ut Libyam diutina tyrannide liberatam celebrarent. Tunc Mahmud Jibril, princeps interregni civitatis, publice pronuntiavit dictatorem Muammar Gaddafi mortuum esse et in historia Libyae novam aetatem coepisse.

Tyrannus enim ille die vicesimo huius mensis (20.10.) prope patriam suam Syrtim diem supremum obiit. Utrum autem in acie pugnans ceciderit an aliquis eum sclopeto usus consulto occiderit, nondum constat.

(Reijo Pitkäranta)

Conventus Unionis Europaeae

Hac septimana moderatores Unionis Europaeae Bruxellis congregati erant, ut deliberarent, quo modo discrimen pecuniarium Unionis solveretur. Argumentum maximi momenti erat de oeconomia Graeciae servanda consilia communicare. Primas partes in his consultationibus egerunt Angela Merkel, cancellaria foederalis Germaniae, et Nicolas Sarkozy, praesidens Francogalliae. Conventui tandem placuit, ut dimidia pars aeris alieni Graeciae remitteretur et eidem civitati centum miliarda euronum mutua darentur.

(Reijo Pitkäranta)

Terrae motus in Turcia gravis

Septimana vergente partes Turciae orientales terrae motu vehementi concussae sunt, cuius vis plus septem gradus Richterianos effecit. Quingenti fere homines hac calamitate vitam amiserunt et amplius mille trecenti vulnerati sunt. Numerus autem eorum, qui aedificiis collapsis obruti sunt, etiam maior esse existimatur. Complura dena milia civium, cum aut tecto privati essent aut metu novarum concussionum domum suam intrare non auderent, sub divo pernoctare coacti sunt.

(Reijo Pitkäranta)

Quid Barack Obama dixerit

Barack Obama, praesidens Civitatum Americae Unitarum, nuntiavit omnes copias Americanas ante finem huius anni ex Iraquia repatriaturas esse. Inde sequi, ut bellum Iraquicum per novem fere annos gestum, tandem componeretur. “Quae quamvis ita sint”, inquit, “Americani Iraquianis in administratione corroboranda opem ferre pergunt”.

(Reijo Pitkäranta)

Fames in Corea Septentrionali

“Civitatum opulentiorum est discordiis politicis depositis Coreanos Septentrionales inopia cibi laborantes adiuvare.” Ita dixit Valerie Amos, curatrix auxilii necessitatis Nationum Unitarum, quae iter in Coream Septentrionalem nuper fecit. Negavit annonam ibidem hoc anno multo uberiores fore quam anno proximo, quam ob rem saltem sex milionibus Coreanorum celeri auxilio cibario opus esset.

(Reijo Pitkäranta)

Theatrum Bolshoi renovatum

Theatrum Bolshoi Moscuense [post](#) refectionem sex annorum in pristinum splendorem restitutum est. Constat id anno millesimo octingentesimo vicesimo quinto (1825) aedificatum spectaculis melodramaticis et saltationibus scaenicis celeberrimum esse. Tirocinium sollemne hospitibus delectis die duodetricesimo mensis Octobris (28.10.) editur. Spectacula autem publica inde a postridie Kalendas Novembres (2.11.) initium capient.

(Reijo Pitkäranta)

De statu communium Finniae

21.10.2011

Consilium Europaeum de statu oeconomico communium Finniae sollicitum est, ut apparet e relatione de ea re nuper divulgata. Aestimatio posita est in cognitione, quam ille ordo sibi abhinc unum annum in Finnia acquisivit, cum investigaret, qualis esset condicio administrationis localis in singulis communibus.

Recensione absoluta commemoravit praesertim id metuendum esse, ne sumptus curae valetudinis et institutionis publicae in communibus aere alieno oppressis usque crescerent.

(Reijo Pitkäranta)

Gilad Shalit tandem liberatus

Gilad Shalit, miles Israelianus, quem ordo Palaestinensis Hamas per quinque annos in captivitate tenuerat, die Martis (18.10.) tandem in libertatem vindicatus est. Convenerat enim inter moderatores Israelianos et Palaestineses, ut pro hoc uno iuvene amplius mille Palaestineses bello capti redderentur. Prima commutatio die Martis facta est, cum quadringenti septuaginta septem Palaestineses ex Israele liberati sunt. Reliqui quingenti quinquaginta captivi intra duos menses e carcere dimittentur.

(Reijo Pitkäranta)

De lege Syriae fundamentali

Praesidens Syriae Bashar al-Assad collegium novae legi fundamentali scribundae delegit. Agitur de renovatione, quam cives regimini suo reclamantes eum maxime poposcerunt. Lex hodierna inde ab annis septuagesimis valet, ab eo scilicet tempore, quo al-Assad senior rerum Syriae potiebatur. Tum statutum est, ut factio baath sola in Syria summam potestatem haberet.

(Reijo Pitkäranta)

Clades naturae Novae Zelandiae

In aquis Novae Zelandiae gravis calamitas oecologica accidit, cum navis petrolearia prope Insulam septentrionalem naufragium fecit. Qua re fieri non potuit, quin magna copia petrolei in mare effunderetur. Clades praesertim avibus marinis perniciem fuit, nam iam mille aves petroleo male inquinatae examines repertae sunt. Numerus autem talium mortuum multotiens maior esse aestimatur.

(Reijo Pitkäranta)

Cursus electronicus XL annorum

Cursus electronicus his diebus quadraginta annos complet. Mense enim Octobri anno millesimo nongentesimo septuagesimo primo (1971) factum est, ut ex uno computatro ad alterum primus nuntius electronicus emitteretur. Scriptor textus erat Ray Tomlinson, ingeniarius computatorius Americanus. Eidem viro etiam id signum debemus, quod ad inscriptionem electronicam componendam adhibetur. (Reijo Pitkäranta)

Quid Jean Beliveaux fecerit

Vir Canadensis nomine Jean Beliveaux, postquam totum orbem terrarum pedibus circumambulavit, undecim annis peractis domum revertit. In itinere suo septuaginta quinque milia chiliometrorum longo sex diversas continentes lustravit, Alpes et Andas superavit, complura deserta peragravit, apud mille sescentas familias pernoctavit. In usu eius quinquaginta quattuor paria calceorum omnino contrita sunt. (Reijo Pitkäranta)

Iuvenes Graeci patriam relinquunt

14.10.2011

Maxima post secundum bellum mundanum emigratio Graeciae imminet. Imprimis iuvenes eruditi, qui propter inopiam quaestus de rebus futuris desperant, crisim oeconomiam fugiunt. Inter mensem Maium anni bis millesimi noni (2009) et Februarium bis millesimi decimi (2010) novem centesimae (9%) studentium Graecorum emigravisse aestimantur.

His mensibus emigrationes frequentiores factae sunt, cum regimen Graeciae, ut crisim coerceat, ad novas sumptuum restrictiones cogatur. Mihalīs Krysokoidis, minister ab oeconomia Graeciae, res desperatas esse confitetur. “Reditus et pensiones civium iam saepius amputavimus”, inquit, “et vectigalia tributaque auximus. Tempus hodiernum Graecis est gravissimum.”

De novis praemiis Nobelianis

Praemium pacis Nobelianum tribus feminis designatum est. Ellen Johnson Sirleaf est praesidens Liberiae eademque prima et adhuc unica praesidens femina comitiis electa in Africa. Leymah Gbowee est concivis et collega eius in motu pacis Liberiae. Tawakkul Karman est redactrix et activista pro pace Iemeniensis. Commissio Nobeliana has feminas de labore praemiavit, quo securitatem et iura feminarum promovissent. Praesidens Finniae Tarja Halonen commissionem laudavit, quod rem maximi momenti animadvertisset, scilicet pacem et evolutionem in continente Africa et eam partem, quam feminae in illo labore efficiendo haberent. Litterarum praemium accipiet Thomas Tranströmer, poeta Suecus octoginta annorum, qui scriptor Scandinavus maximi post secundum bellum mundanum momenti habitus est. Est surrealista, qui mysteria mentis humanae investigat. Opera eius in sexaginta linguas versa sunt. Tranströmer iam multos annos candidatus aliis antepositus ad praemium accipiendum fuit.

Quot homines, tot telephonula

In fine anni currentis numerus telephonulorum gestabilium sex miliarda superabit, exeunte anno proximo conexiones telephonicae septem miliarda fore aestimantur. Respectu populationis rariora sunt telephonula in Africa, ubi duo Africani ex tribus telephonulum gestabile habent. In terris locupletioribus conexionum numerus iam ante multos annos civium numerum superavit.

Ludi mundani canum pastorum

Kiovae, in urbe Ucrainae, ludi mundani canum pastorum Germanicorum nuper instituti sunt, in quibus de investigatione, oboedientia, protectione agebatur. Intererant plus centum canes pastores cum suis moderatoribus. Victoriā et secundum locum occupaverunt canes Finnorum, qui etiam in certamine gregum caninorum optimi iudicati sunt.

Steve Jobs diem obiit

Steve Jobs, conditor societatis Apple, die quinto mensis Octobris mortuus est. Iam mense Augusto morbo canceri debilitatus munus directoris generalis in societate reliquerat. Erat vir ingeniosus, ex quo multae et utiles innovationes scaturiebant. Praesidens Barack Obama censebat modum, quo unusquisque nostrum mundum videret, a Jobs mutatum esse

Conventus consociationis NATO

7.10.2011

Die Iovis (6.10.) ministri a rebus exteris consociationis Nato Bruxellas convenerunt, ut imprimis de

rebus in Libya gerendis colloquerentur. Alterum maius argumentum participantibus est deliberare, num magistratibus securitati Afganistaniae tuendae maior potestas sui defendendi detur.

(Reijo Pitkäranta)

De consultationibus pacis

Regimen Israelis se consultationes pacis cum Palaestiniensibus rursus initurum esse promisit. Quaternio, quae ex Civitatibus Americae Unitis, Russia, Unione Europaea, Nationibus Unitis constat, Israelianos hortata erat, ut utraque pars intra unum mensem de pace conveniret. Palaestinienses autem negaverunt consultationes ante incohari posse, quam Israeliani suis coloniis amplificandis finem fecissent.

(Reijo Pitkäranta)

Monumentum servitutis

Ordo Nationum Unitarum decrevit, ut ad memoriam eorum, qui servitutem passi essent, monumentum fieret idque in urbe New York collocaretur. Id ideo faciendum esse censuit, quod mercatura servorum scelus extraordinarium contra genus humanum fuisset. Ad opus memoriale conficiendum certamen omnibus orbis terrarum artificibus ponetur.

(Reijo Pitkäranta)

Quid Vladimir Putin dixerit

Vladimir Putin, princeps minister Russiae, proposuit, ut pristinae civitates Unionis Sovieticae societatem facerent et in 'Unionem Eurasiae' coalescerent. Idem negavit se de Unione Sovietica restituenda loqui. "Puerile est", inquit, "id appetere, quod iam praeteriit. Eo autem tendimus, ut exemplum Unionis Europaeae secuti cooperationem inter res publicas ab Unione Sovietica separatas efficaciorum reddamus."

(Reijo Pitkäranta)

Novi Nobelistae medicinae

Praemium Nobelianum artis medicinae hoc anno inter tres viros doctos dividitur. Qui sunt Bruce Beutler Americanus, Jules Hoffmann Luxemburgensis, Ralph Steinman Canadensis. Tali honore digni habiti sunt, cum explicavissent, quonam modo systema immunitatis in corpore humano fungeretur. Auxilio studiorum eorum novae rationes inventae sunt, quibus infectiones, inflammationes, canceri praevenirentur et curarentur.

(Reijo Pitkäranta)

De addictione iuvenum Finno-

Pueri et puellae in Finnia iam tamdiu apud interrete, televisionem, ludos computatorios tempus terere dicuntur, ut valetudo eorum in periculum vocetur. Illa enim addictione prohibentur, quominus corpus suum satis exerceant et noctu tantum dormiant quantum opus sit. Id quoque metuendum est, ne condicio eorum mentalis illiusmodi occupationibus perturbetur.

(Reijo Pitkäranta)

Nundinis aringorum Helsinkienses

Postridie Kalendas Octobres (2.10.) in Foro mercatorio urbis Helsinki nundinae haringorum, ut dicuntur, celebrari coeptae sunt. Mos talis mercatus instituendi veterrimus est, nam iam anno millesimo septingentesimo quadragesimo tertio (1743) primum accidit, ut piscatores Maris Baltici aringos et alios pisces, quos e mari captavissent, in portum Helsinkiensem veneundos apportarent.

(Reijo Pitkäranta)

Medvedev et Putin munera mutaturi

30.9.2011

In Russia comitia praesidentialia anno proximo fient. Praesidens Dmitri Medvedev suasit, ut primus minister Vladimir Putin candidatus factionis Russiae Unitae nominaretur. Quod consilium Putin probavit. Ille autem censuit optimum fore, si Medvedev primus minister factus esset.

Uterque rem in sessione illius factionis Moscuae palam fecit. In Russia diu disserebatur, uter ex illis praesidentatum petiturus esset. Putin ab anno bis millesimo octavo primus minister est. Antea praesidens Russiae bis quadriennium fuit. Ex lege fundamentali, quae tum erat, in tertium quadriennium praesidens creari non potuit. Mutata lege praesidentatus Russiae post comitia anni

proximi erit sex annorum.

Numerus hominum septem miliarda superabit

Mense Octobri numerus hominum septem miliarda superabit. Tanta multitudo in terra satis spatii habet, sed populatione nimis crescente difficultates oriuntur, quia cibus, aqua pura et productio energiae non omnibus sufficiunt. Maxime populus crescit in Uganda, ubi in singulis familiis septeni infantes in medio nascuntur.

Tauromachiae in Catalonia finitae

Barcinone, in capite Cataloniae, ultima spectacula tauromachiae, antequam lex de illis vetandis valeret, die Dominico (25.9.) data sunt. Nam parlamentum Cataloniae decrevit, ut illa spectacula ab initio anni bis millesimi duodecimi vetarentur. In insulis Canariis tauromachiae iam ante viginti annos vetitae sunt. In ceteris Hispaniae partibus spectacula tauromachiae permittuntur et in urbibus, ut Hispali, Matriti, Pamplonae, annuatim dies festi tauromachiarum fiunt, quibus ingens turba hominum interesse solet. His diebus in actis diurnis Hispaniae inter defensores animalium et fautores tauromachiarum de illis spectaculis vehementer disputatum est.

Feminis Finniae optima iura politica

Newsweek, periodicum Americanum, condiciones feminarum, quales essent in variis terris, nuperrime aestimavit. Optimam terram feminis esse Islandiam, sed iura feminarum politica optime recognosci in Finnia. Terrae septentrionales in hac comparatione bene evadunt, nam post Islandiam inter primas quinque sunt Suetia, Canada, Dania, Finnia. Norvegia posita est septimo loco. In aestimatione considerabantur iura feminarum, institutio scholaris, cura valetudinis, oeconomia. Pessima terra feminis est Tzadia, quam sequuntur Afganistania, Iemen, Res publica democratica Congo. In Africa orientali condiciones feminarum penuria cibi et fame continua maxime afficiuntur.

Ursus venatores momordit

Venatio ursorum in Finnia mense Augusto incohata usque ad Kalendas Novembres continuabitur. Ursi, quorum maxima frequentia est in regionibus orientalibus, hodie circiter mille trecenti numerantur. Nuper in Carelia septentrionali accidit, ut ursus vulneratus duos venatores aggrederetur et ita morderet, ut uterque in nosocomium portaretur.
(Tuomo Pekkanen)

Coetus nationum unitarum

23.9.2011

Die Mercurii (21.9.) in urbe New York coetus generalis Nationum Unitarum inauguratus est. Inter argumenta maximi momenti sunt quaestiones, quatenus sit condicio Libyae futura et quo modo res in Proximo Oriente pacentur. De sorte Libyae communitas internationalis aequo animo est, sed tensio inter Israelianos et Palaestinienses politica sollicitudinem parat.
(Reijo Pitkäranta)

Discordia Turciae et Graeciae

Moderatores Turciae Graecos in Cypro habitantes monuerunt, ne una cum Americanis gasum in Mari Mediterraneo quaerere inciperent. Nisi illo consilio destitissent, etiam Turcos se ibidem investigationes eiusmodi suscepturos et naves bellicas indagatoribus praesidio missuros esse. Cypro-Graecos nullum ius habere mare ad suum usum convertendi, cum opes naturae communes essent.
(Reijo Pitkäranta)

Comitia in Dania habita

In Dania comitia parlamentaria habita sunt, quorum victoriam reportavit coalitio partium sinistrarum et mediarum. Quae cum ita essent, Helle Thorning-Schmidt, praeses factionis democratarum socialium quadraginta quattuor annos nata, princeps ministra Daniae facta est. Eventu comitiorum nuntiato pristinus princeps minister Lars Løkke Rasmussen a regina petivit, ut ipsum ex munere liberaret.
(Reijo Pitkäranta)

Belorussia a Sinis adiuvatur

Belorussia, quae ex difficultatibus oeconomicis laborat, a Sinis pecuniam unius miliardi dollarorum

mutuam accipiet. Huc accedit, quod Sinenses se eidem civitati etiam stipendio undecim milionum dollarorum opitulaturos esse promiserunt. Insuper Wu Bangguo, praeses parlamenti Sinensis, de pactis nuntiavit, ex quibus in urbe Minsk deversorium et fabrica chartaria aedificarentur.
(Reijo Pitkäranta)

Duo Finni terrorismi fautores

In Finnia duo homines, vir et femina, a custodibus publicis deprehensi sunt, cum in suspicionem terrorismi provehendi incidissent. Qui et cuiates illi essent, magistratus propter causas investigatorias nondum patefecerunt, sed in actis diurnis legitur eos origine Somalos esse, qui civitatem Finnicam possident.
(Reijo Pitkäranta)

Migratio gruum autumnalis

Septimana vergente grues ex Finnia in regiones meridianas emigrare coeperunt. Quin etiam quinquaginta milia gruum in magnis examinibus cuneatis volantium uno die in caelo Finniae videbantur, quod ornithophilis magnam admirationem iniecit. Hoc avium genus hiemem imprimis in Hispania et Africa Septentrionali agere solet.
(Reijo Pitkäranta)

De ludis follis volatici

Mense Septembri Vindobonae, in urbe Austriae, de principatu Europaeo ludi follis volatici certatum est. Primas tulit manus nationalis Serbiae, quae ultimo certamine cum Italianis commisso adversarios punctis tria ad unum (3-1) vicit. Grex Poloniae, postquam cum Russis de tertio loco dimicavit, nomismate aeneo potitus est.
(Reijo Pitkäranta)

Ictus terroristici commemorabantur

16.9.2011

Die Dominico (11.9.) decem anni acti erant ex quo impetus terroristicus maximae crudelitatis in USA factus est. Terroristae aeroplanum commerciale vi abduxerunt et contra turrim aedium Neo-Eboracensium, nomine World Trade Center, gubernaverunt. Duodeviginti minutis post, aliud aeroplanum contra alteram earundem aedium turrim volavit.

Turres geminae, altitudine quadringentorum undecim metrorum, ignem conceperunt et post unam fere horam corruerunt. Tertium aeroplanum contra Pentagon praecipitavit, quartum prope urbem Pittsburgh Pennsylvaniae in silvam decidit. In his ictibus, quos undeviginti abductores inopinanter effecerunt, tria fere milia hominum perierunt. Osama bin Laden, origo sceleris, tandem Kalendis Maiis huius anni in Pakistania a copiis specialibus Americanis interfectus est. Die decennali impetuum, victimae per civitates Americanorum recalebantur. Commemoratio principalis facta est Neo-Eboraci loco turrium deletarum, ubi nomina omnium in ictibus mortuorum recitata sunt.

Medvedev in societates aerias vehemens

In Russia hoc anno complures graves calamitates aeriae acciderunt. Ideo praesidens Dmitri Medvedev flagitavit, ut societates aeriae, quae securitatem neglegerent, severius punirentur. Regimini mandavit, ut regulas pararet, ex quibus societates, quae praecepta securitatis violarent, maiore quam ante pecunia multarentur aut operatio illarum omnino finiretur.

Oceanus civitatibus insularum imminet

Civitates insularum Oceani Pacifici iam mutatione climatis afficiuntur. Cum superficies maris surgit, undae litora corrodunt, putei et fontes aquae potabilis facile saliuntur messesque corrumpuntur. Moderatores insulae Kiribati, ubi centum milia hominum habitant, iam quaerunt, quo incolae transferantur, si aqua surgere perrexerit.

Radiatio Tzernoby lensis in fungis Finniae restat

Etsi ab calamitate nucleari Tzernoby lensi iam viginti quinque anni acti sunt, in fructibus silvarum Finniae, praecipue in fungis, cesium radioactivum adhuc invenitur. Exempli gratia in provincia Tavastia radioactivitas fungorum alta esse pergit. Nihilo minus fungi, si recte praeparati sunt, sine periculo comedi possunt.

Planeta, ubi vita exsistere possit, repertus

Astronomi Obsevatorii meridionalis Europae in Chile laborantes extra nostrum systema solare novum planetam reppererunt, ubi vita theorice exsistere possit. Quoad massam, ille planeta est ter quaterve maior quam Terra. Vita ibi possibilis habetur, quia temperatura inter triginta et quinquaginta gradus Celsius variante aqua inveniri possit. De novo planeta relatum est in conventu in USA habito. Ibidem astronomi quinquaginta alios planetas a se extra solare systema repertos esse narraverunt.

Observatorium meridionale Europae (ESO, the European Southern Observatory) est ordo astronomorum, quem civitates Europaeae, inter quas Finnia, sustinent. Sedes eius centralis est in Germania.

(Tuomo Pekkanen)

Rixa inter Turciam et Israellem

9.9.2011

Inter Turciam et Israellem, nationes Civitatum Americae Unitarum in Proximo Oriente socias, rixa vehementissima orta est. In causa discriminis est ictus, quem milites Israeliani anno praeterito in navem auxiliarem Turcicam cum morte novem nautarum fecerunt. Moderatores Turci Israelianos excusationem delicti poposcerunt, sed hi recusaverunt, quominus id facerent.

(Reijo Pitkäranta)

Operistitia in Italia facta

In urbibus maioribus Italiae operistitia generalia facta sunt, cum multa milia operariorum consiliis regiminis de novis parsimoniis resisterent. Argentaria centralis Europaea et Argentaria Mundana administratores Italiae hortatae sunt, ne ab inceptis oeconomiae suae stabiliendae absisterent.

(Reijo Pitkäranta)

Programma Iraniae nucleare

Ordo internationalis ab energia atomica (IAEA) in sollicitudinem programmatis Iranianorum nuclearis adductus est. Cognovit enim in Irania iam tales apparatus usu recipi, quorum ope uranium ad arma nuclearia aptum eliquari potest. Huc accedit, quod Iraniani sedes suas atomicas in loca subterranea transferre coeperunt, ut eas ab ictibus bombicis tutaerentur.

(Reijo Pitkäranta)

Incendia Texiae silvestria

In Texia, quae est una e regionibus Civitatum Americae Unitarum, saltem quinquaginta incendia campestris grassantur. Vis eorum tanta fuit, ut iam amplius mille domus delerentur. Rick Perry, gubernator Texiae idemque candidatus praesidentialis, sperat fore, ut tempestas frigidior una cum ventis debilioribus operam siphonariorum faciliorem reddat.

(Reijo Pitkäranta)

Dies festus Caroli vici (Kaarlela)

Pridie Nonas Septembres (4.9.) in urbe Finniae Kokkola dies mediaevalis agebatur tam torneamento instituto quam missa sollemni Latine procurata. Causa diei festi erat, quod tunc quingenti anni praeterierant, cum pars eius Caroli vicus (vulgo Kaarlela) ab ecclesia materna Pedersöre separata sui iuris factus est. Hanc rem confirmavit ipse Iulius II, papa Romanus, litteris apostolicis anno millesimo quingentesimo undecimo (1511) missis.

(Reijo Pitkäranta)

De peragratione murium lemmorum

Plurimi mures lemmi hoc tempore in Lapponia ex partibus septentrionalibus in regiones meridionales peragrant. Pristina emigratio aequae magna annis millesimis nongentesimis septuagesimis fuit. Peragratio ad mensem Octobrem durabit, et tum lemmi ubique fere in Lapponia videri poterunt. Hoc genus animalium, quotienscumque populatio eorum nimium crevit, peragrarare incipit.

(Karoliina Ignatius)

Certamina athleticae mundana

Mense Augusto in Septembrem vergente in urbe Coreae Meridionalis nomine Daegu ludi mundani athleticae campestris celebrabantur. Longum est enumerare, quis in quoque certaminis genere ceteris antecesserit. Commemorandum tamen est athletas Finnos rem tam male gessisse, ut ne unum punctum

quidem domum reportarent.
(Reijo Pitkäranta)

Familia Gaddafiana in Algeria

2.9.2011

Ministerium a rebus exteris Algeriae nuntiavit membra familiae Gaddafianae die Lunae (29.8.) in Algeriam confugisse. Fuisse in comitatu unum et triginta homines, in quibus essent Saifa, coniux Gaddafi, filii eius Mohammed et Hannibal, filia Aisha liberique eorum. Khamis, tertius filius, in bello cecidisse dicitur.

Cum Aisha iam parturiret, ministerium Algeriae facere non potuit, quin permetteret, ut comitatus Gaddafianorum ex Libya in Algeriam venirent. Algeria est sola ex terris vicinis, quae regimen Libycorum rebellium non agnovit. Rebellibus propositum est flagitare, ut familia Gaddafiana ex Algeria in Libyam expellatur.

Petroleum ex Syria ne importetur

Unio Europaea decrevit, ut importationem petrolei ex Syria vetaret, quia regimen reclamaciones civium reprimere non desisset. Nationes Unitae duo milia ducentos cives propter violentiam regiminis in Syria inter tumultus interisse rettulerunt. Complures deni milites, qui concives reclamitantes interficere noluerint, castra deseruisse narrantur.

Ilves iterum praesidens Estoniae designatus

Thomas Henricus Ilves a parlamento Estoniae in alterum quinquennium praesidens designatus est. Ex uno et centum votis ille tria et septuaginta accepit, cum duodeseptuaginta vota iam suffecissent. Ilves, antequam praesidens factus est, fuit parlamentarius Europaeus et minister a rebus exteris Estoniae.

Cineres et lava ex Aetna erumpunt

Aetna, maximus vulcanus Europae in ora Siciliae orientali situs, septimana ineunte cineres et lavam evomere coepit. Eruptio in dies fortior nondum fuit periculosa neque commeatum in proximum aeriportum Cataniae perturbavit. Ex maioribus Aetnae eruptionibus ultimae factae sunt decem annis ante, scilicet anno bis millesimo uno et secundo (2001-2002).

Panis secalicius est saluberrimus

Notum est panem secalicium saluberrimum esse. Investigationibus recentioribus confirmatum est illum panem, quem Finni amant, complures effectus salutares habere, exempli gratia in prohibendo diabete mellito adulatorum. Etiam in moderatione ponderis panis secalicius est optimum adiumentum, cum nutrimentum sit egregium et famem diu arceat.

Lacus Finniae piscibus abundant

Pisces optimi saporis in lacubus Finniae non finiuntur, immo multae species nimia multitudine laborant, cum cibus omni populo piscario non sufficiat. Aquae lacuum sunt purae et condiciones piscatoribus bonae, sed pisces domestici rarius in tabernis et cauponis praebentur, cum emptores salmonem vili pretio ex Norvegia importatum praeferant.

Domus Musica inaugurata

Domus Musica, in media urbe Helsinki constructa, pridie Kalendas Septembres inaugurata est. Auditorium eius principale capit mille septingentos hospites. Inter festivitates inaugurales optimi symphoniaci specimina ex musica Finnorum classica concinerunt. Culmen programmatis fuit opus Finlandia a musicographo Jean Sibelius compositum, quod moderante magistro Jukka-Pekka Saraste cantatum est.
(Tuomo Pekkanen)

Gaddafi de potestate deiectus

26.8.2011

Bellum domesticum, quod in Libya inter copias dictatoris Muammar Gaddafi et cives seditiosos iam per multos menses geritur, hac septimana clade Gaddafianorum finitum esse videbatur. Bellatoribus enim seditiosis contigit, ut post pugnas triduanas acerrime commissas Tripoli, urbe capite, potirentur et etiam praetorium dictatoris optime munitum expugnarent.

Ipse Gaddafi autem e munitione iam effugerat, neque inter ullos constat, ubinam hodie versetur. Ita

deiectus est potestate tyrannus undeseptuaginta annos natus, qui Libyae amplius quattuor decennia ferrea manu et cum terrore praefuit.

Esthonia ante XX annos liberata

Die Saturni (20.8.) viginti anni acti erant, cum Esthonia ex potestate Unionis Sovieticae liberata sui iuris denuo facta est. Ad eam rem celebrandam Tallinnae, in urbe principe, festum popolare institutum est, quae 'Libertas canentium' appellabatur. Urmas Paet, minister a rebus exteris, pro multo auxilio patriae suae allato gratias egit et addidit Esthonienses iam ad alios adiuvandos paratos esse.

Quid rex Olavus Osloae dixerit

Die Dominico (21.8.) Osloae, in capite Norvegiae, sollemnitas tristis habebatur ad memoriam eorum, qui uno mense ante vitam amiserant ingenti strage in eadem urbe facta. Horae memoriali adfuerunt etiam Victoria, principissa hereditaria regni Suetiae, et Tarja Halonen, praesidens Finniae, una cum ministro principe Jyrki Katainen. Inter oratores erat Olavus, rex Norvegiae, qui propinquos occisorum his fere verbis allocutus est: "Equidem", inquit, "ipse pater, avus, coniux, intellegere possum, quanto luctu et dolore affecti sitis. Teneor tamen fide libertatem metu fortiolem esse et mihi persuasum est Norvegos potentes esse in sua patria libere et tute vivendi."

Sepulcrum Philippi inventum

Archaeologi Italiani credunt sepulcrum apostoli Philippi, qui unus e discipulis Iesu erat, in Turcia occidentali repertum esse. Inventum factum est prope urbem, quae olim Hierapolis Phrygiae appellabatur. Francesco d'Andria, dux gregis investigatorii, nuntiavit monumentum apostoli in ecclesia quadam vetustate collapsa positum esse.

Feminae militiam suscipientes

Iam est tempus, cum in Finnia dilectus autumnalis habetur. Magistratus militares aliquantum solliciti sunt de numero crescente eorum tironum, qui militiam quotannis intermittunt. Sed eo magis de feminis gaudent, quarum maior multitudo quam ante sibi servitium militare voluntarium iam suscipere coepit. Interrogantibus, quare nomen suum dedissent, responderunt se in exercitu tam peritiam ducendi discere quam res extraordinarias experiri velle.

(Reijo Pitkäranta)

De rebus oeconomicis

18.8.2011

Erkki Liikanen, moderator Argentariae Finniae, dixit oeconomiam mundi sollicitudinem afferre. Cum prospectus essent incerti, retardationem incremento oeconomico Finnorum iam imminere. Liikanen regimina et parlamenta Unionis Europaeae hortatus est, ut in crisi debitorum tractanda fortius agerent. Quod Argentaria Europae Centralis faceret, id solum ad problemata solvenda non sufficere.

George Soros, investor notissimus Hungaro-Americanus, censebat vix fore calamitosum, si minores terrae, ut Graecia aut Portugallia, ex Unione Monetaria discessissent. Discessionem autem magnarum terrarum, ut Italiae aut Hispaniae, non fore supportabilem.

Lampedusa navigiis profugorum inundatur

Insula Italiae Lampedusa velut symbolum Europaeum conflictuum Africae septentrionalis factum est. Primis huius anni mensibus imprimis Tunesienses quaestum petentes in Lampedusam venerunt, nunc autem profugi etiam ex Libya, Aethiopia, Somalia, Sudania, Erythraea et terris trans Saharam iacentibus oriundi Europam petunt. Hoc anno Italia iam circiter quinquaginta milia advenarum recepit. Maior pars sunt viri, feminae liberique admodum rari. In itinere inter Africam et Lampedusam circiter duo milia hominum tempestatibus et naufragiis interisse aestimantur.

Canes caccabum evitaverunt

Magistratus Thailandenses plus mille canes salvaverunt, qui in parvis caveis in Vietnamiam portabantur, ut ibi venditi coquerentur et comederentur. In provincia Nakhon Phanom Thailandiae septentrionalis-orientalis custodes viarum quattuor autocarros consistere coegerunt, in quibus caveas ligneas canibus refertas reppererunt. Mille undecim canes in receptacula magistratuum portati sunt, centum undeviginti aut suffocati aut a mercatoribus clandestinis custodes fugientibus ex autocarris eiecti perierant. Mercatores, ut custodes narraverunt, in vicis deviis Thailandiae canes erraticos aut domesticos deprehendunt, quos Vietnamensibus in cibum vendunt.

Exercitatio corporis annos vitae auget

Ex investigatione Taivaniensi patet exercitationem corporis vitam homini vel triennio prorogare posse. Illa investigatio nititur valetudine quadringentorum milium virorum et feminarum, qui per octo annos observabantur. Apparuit morbos cardiovasculares, diabetem, cancerum casusque mortis ex illis malis ortos notabiliter deminui, si homines sedentarii vel quindenis minutis corpus cotidie exercerent.

Feriae scholarum finitae

Hac septimana annus scholasticus in Finnia incepit. In primam classem scholae fundamentalis circiter undesexaginta milia puerorum venerunt. In institutione fundamentali sunt omnino quingenta quadraginta unum milia discipulorum, in gymnasiis centum decem milia, in institutis professionalibus centum triginta quinque milia. Annus scholasticus postridie Kalendas Iunias anni proximi finietur. (Tuomo Pekkanen)

Tumultus Britanniae

12.8.2011

Tumultus, die Saturni in suburbio Tottenhamia Londinii septentrionalis orti, septimana ineunte in complures urbis regiones et brevi postea in alias Britanniae urbes extendebantur, Birminghamiam, Bristolium, Liverpoolam, Mancestriam alioque.

Greges iuvenum vehicula et aedificia incendebant, fenestris fractis merces ex tabernis rapiebant, bonis publicis damna afferebant. Maxima erat violentia Londinii, ubi octingenti homines quadriduo deprehensi sunt. Tumultus initium cepit, cum multitudo hominum propter virum a custodibus publicis interfectum reclamitaret et manifestatio initio pacifica in violentiam mutaretur.

Ad tranquillitatem restituendam magistratus die Martis sedecim milia custodum publicorum in vias Londinii miserunt. Etiam cives congregati domos et possessiones custodire coeperunt et mercatores tabernas suas clausas habebant. Tumultuantes a moderatoribus Britanniae latrones criminales appellabantur, qui de facinoribus punirentur. Iudicia, quae sequerentur, fore maxima in historia urbis Londinii.

Caedes in Syria continuatur

Caedes in Syria iam multos menses continuatur. Dum regimen cives democratiam flagitantes reprimere conatur, plus mille sescenti homines mortui et complura milia deprehensi sunt. Ban Ki-moon, secretarius generalis Nationum Unitarum, colloquio telephonico ad praesidentem Syriae Bashar al-Assad appellavit, ut exercitus Syriae ilico vim contra cives adhibere desineret. Abdallah, rex Arabiae Saudianae, dixit condiciones Syriae hodiernas nullo iure iustificari posse et regimen Syriae hortatus est, ut caedibus finem imponeret, antequam sero esset. Recep Tayyip Erdogan, primus minister Turciae, monuit patientiam patriae suae iam prope finem esse neque Turciam res in Syria gestas impassibilem observare posse.

Victimae Hiroshimae commemorabantur

Postridie Nonas Augustas (6.8.) sexaginta sex anni acti erant, ex quo urbs Hiroshima bomba atomica deleta est. Dies memorialis in variis mundi partibus, etiam in Finnia, lucernis candelarum ex more Iaponico in aqua positis recalebatur. Hiroshimae circiter centum quadraginta hominum interierunt, complura dena milia morbis radioactivitate effectis adhuc laborant.

Ambulationes meretriciae

Reclamatio, quae dicitur ambulatio meretricia (Slut Walk), initium habuit mense Aprili in Canada, cum biocolyta quidam Torontinus feminis suasisset, ne more meretricio vestirentur, si violentiam vellent vitare. Ambulationibus, in quibus aliae vestibus consuetis, aliae provocative vestiuntur, feminae affirmare volunt victimam stupri numquam esse culpabilem. Vestitum feminae, qualiscumque sit, nullam causam violentiae sexuali offerre. Paucis mensibus ambulationes huius modi in maiores urbes orbis terrarum propagatae sunt et optimum ex omnibus actionibus feministarum successum his viginti annis habuerunt. In Finnia iam sex milia quingenti participes ambulationum fuerunt. (Tuomo Pekkanen)

De duabus stragibus Osloae

5.8.2011

Animi Norvegorum et aliorum quoque hominum valde concussi sunt duabus stragibus Osloae die

vicesimo secundo mensis Iulii (22.7.) factis. Primum quidem media urbe bomba autocineto imposita tanta vi displosa est, ut octo homines vitam amitterent et aedificia publica circumiacentia pessime delerentur. Duabus horis post in insula Utöya prope Osloam sita, ubi conventus iuvenum factionis operariorum celebrabatur, strages ingens effici coepta est, quae amplius unam horam fiebat. Perpetrator caedium erat vir quidam veste custodis publici personatus, qui sclopeto usus insulam circumibat et omnes homines sibi occurrentes consilio occidebat. Neque antea interficiendi finem fecit, quam a biocolytis in locum tandem pervenientibus captus est. Ad id tempus iam undeseptuaginta homines immisericorditer interfecerat, quorum maior pars ex adolescentulis constabat. Nomen terroristae, ut postea nuntiatum, erat Anders Behring Breivik, extremista partium dextrarum triginta duos annos natus.

Quid Breivik postea dixerit

Breivik, cum paucis post diebus a iudicibus audiretur, ait aequo animo facinora sua crudelia sed necessaria fuisse: illa enim eo spectavisse, ut Norvegia ex marxismo culturali et potestate musulmanorum servaretur. His verbis auditis in diversis partibus Europae disceptari coeptum est de quaestione, quantum periculum motus extremistarum civitatibus facerent.

Reclamatio rosaria Norvegiae

Die vicesimo quinto (25.7.) plus centum milia civium Norvegorum in mediam urbem Osloam et in alia regni loca confluxerunt, ut rosas manu tenentes memoriam mortuorum recolerent. Primus minister Jens Stoltenberg: “Luctu”, inquit, “affecti sumus, sed in deditionem non veniemus. Rosarum ope omni mundo ostendimus fieri non posse, ut metu devincamur!”

Fames in Africa gravissima

Qui in Cornu Africae habitant, famem extremam tolerare coguntur propter siccitatem pessimam, quae has regiones hoc anno vexavit. In Kenia castra profugis recipiendis collocata sunt, quo homines inopia confecti ex Somalia magna multitudine confugiunt. Praesertim infantes et parvuli subalimentatione gravissime laborant.

Qualis aestas in Finnia fuerit

Aestas hoc anno in Finnia hucusque calidior fuit quam umquam his viginti tribus annis. Iam mense Aprili tempestas solito tepidior esse coepit, et mensibus Iunio et Iulio temperatura media duobus semis gradibus Celsius altior erat quam eodem tempore anno proxime praeterito. Ex aestibus tonitrus frequentes orti sunt, quibus saevientibus uno die multa milia fulminum in caelo micantium numerabantur.

(Reijo Pitkäranta)

Cives ex Syria effugiunt

17.6.2011

Exercitus Syriae adversarios regiminis persequi perrexit, quo factum est, ut incolae prope confinium Turciae habitantes magna multitudine ex patria in Turciam confugerent. Quae cum ita essent, Ordo auxiliarius a Semiluna Rubra in regione ex adverso Syriae iam quintam sedem profugis excipiendis aedificare coepit.

(Reijo Pitkäranta)

Operstitium Atheniense

Die Mercurii (15.6.) vita publica Atheniensium operistitio generali male perturbata est. Multa dena milia hominum, dum consiliis administratorum de tributis augendis et novis parsimoniis faciendis adversantur, per urbem reclamitantes incedebant. Neque in hac animorum concitatione evitari potuit, quin inter reclamatores et custodes publicos conflictus violenti orerentur.

(Reijo Pitkäranta)

Status seditiosorum Libyae

Consilium nationale Libyae ex seditiosis constans a moderatoribus Germaniae regimen illius terrae officiale agnitum est. Germania hac in re vestigia Francogalliae, Britanniae, Italiae, Hispaniae sequitur, quae id iam antea fecerunt. Civitates Americae Unitae, quamvis seditiosis statum officialem nondum concesserunt, tamen eos monuerunt, ut in urbe Washington sedem constituerent.

(Reijo Pitkäranta)

Dies anniversarii regii

Die Saturni (10.6.) in Britannia octogesimus quintus dies anniversarius reginae Elisabeth II celebrabatur. Re vera sollemnitatis illa iam mense Aprili agi debuit, sed mos est Britannis diem natalem reginae quotannis mense Iunio celebrare, ut tempestas ad eam caerimoniam opportunior sit. Princeps Philippus, coniux reginae, pridie illius diei (9.6.) nonaginta annos complevit.
(Reijo Pitkäranta)

Fibula Praenestina authentica

Fibula Praenestina se documentum authenticum esse praestitit. Agitur de monumento linguae Latinae omnium vetustissimo cum inscriptione MANIOS MED PHEPHAKED NVMASIOI, id est: Manius me fecit Numerio. Origo antiqua huius textus diu in dubium revocabatur, donec rerum periti Italiani postridie Nonas Iunias (6.6.) nuntiaverunt experimenta technica maxima fide digna ostendisse nihil iam esse, cur de vera natura fibulae Praenestinae dubitaretur.
(Reijo Pitkäranta)

De proventu bacarum in Finnia

Proventus bacarum silvestrium in Finnia hac aestate bonus futurus esse exspectatur. Hoc saltem ad myrtillum et vitem idaeam valere videtur, ut quorum floritio bene successerit. Rubus chamaemorus mense Iunio ineunte flores agere coepit, sed quando in maturitatem venturus sit, multum inde pendet, utrum in paludibus apertis an in locis arboribus opacatis crescat.
(Reijo Pitkäranta)

Nuntii Latini ad ferias abeunt

Nuntii Latini ob ferias aestivas ad sex septimanas intermittuntur, quam ob rem proxima emissio non ante quam Nonis Augustis (5.8.) fiet. Restat, ut auscultatoribus nostris gratias quam maximas agamus et iisdem aestatem quam optimam exoptemus.
(Reijo Pitkäranta)

Origo bacterii EHEC quaeritur **0.6.2011**

In Germania origo bacterii letalis, quod dicitur EHEC, vehementer quaeritur, nam epidemia, quae imprimis Germanos vexat, inter pessimas huius bacterii contagiones in mundo habetur. Iam circiter tria milia hominum intoxicatione alimentaria ex hoc bacterio orta infecti sunt, viginti quinque perierunt. Infectiones quidem in tredecim terris iam occurrerunt, sed casus mortis, uno excepto, in Germania fuerunt. Nemo adhuc scit, ubi epidemia orta sit et quo modo bacterium in cibum transierit. Holera primum suspiciebantur, nam morbo affecti rettulerunt se cucumeres, lycopersica acetariaque comedisse.

Deinde origo bacterii in germinibus soiae esse credebatur, quae in Germania septentrionali coluntur, sed ne illa quidem suspicio investigationibus accuratioribus confirmata est. Commercio holerum propter timorem consumptorum deficiente cultores maxima damna ceperunt, ad quae sarcinda a Commissione Europaea auxilium exspectatur.

Commissio Europaea miliones per luxuriam dissipavit

Ex libris rationum Commissionis Europaeae apparet praesidem José Manuel Barroso cum adiutoribus suis luxuriose vivendo multas miliones dissipavisse. Magnae pecuniae consumptae sunt in aeroplana privata, potiones exquisitas, ferias cum familiaribus in litoribus longinquis celebratas, convivia et deversoria luxuosa, dona carissima. In rationes Commissionis inquisivit Societas internationalis diurnalismi investigativi.

Eodem tempore, quo Unio Europaea cum dispensatione oeconomica laborat, commissio summas ingentes a tributariis collectas in talem vitae modum consumit, de quo cives ne somniare quidem possunt. Commissio Europaea ex viginti septem commissariis et circiter duobus milibus septingentis officialibus constat. Omnem pecuniam illi praestant tributarii Unionis.

Biologi vitam in profundo invenerunt

In fossis Africae Australis, profunditate mille trecentorum metrorum, inventae sunt duae species vermium, ex quibus una ignota erat. Huc usque creditum est tantum bacteria unicellularia in tanta profunditate sub terra vivere posse, nam antea propter inopiam oxygeni tales condiciones multicellularibus impossibiles habebantur.

Cygnus canorus crebrescit

Cygnus canorus, avis Finnorum nationalis, ante sexaginta annos haud procul aberat, quin exstingueretur, quia tum vulgo a venatoribus petebatur. Postea autem, vetita venatione, in stagnis remotioribus, paludibus lacubusque totius fere Finniae pervulgatus est.

Hodie a quinque milibus ad septem milia parium nidificantium esse aestimantur. Aliquot ante decenniis tantum mille quingenta fuerunt. Cygnus canorus inimicos naturales non habet et territorium suum fortiter defendit. Ex propinquitate nidi omnes alias aves nidificantes expellit, ut anates, anseres aliasque aquatiles. Inter nidificationem territorium suum propemodum solus cum coniuge possidet.

(Tuomo Pekkanen)

Ratko Mladic comprehensus

3.6.2011

Ratko Mladic, dux generalis Serbianus per quindecim annos quaesitus, die vicesimo sexto mensis Maii (26.5.) in Serbia deprehensus est, ut Boris Tadic, praesidens Serbiae, eodem die publice nuntiavit. Adductus est Mladic ad tribunal Nationum Unitarum militare, ubi de genocidio in pristina Iugoslavia annis nonagesimis facto accusatur. Bello enim Bosniensi, quod tum gerebatur, Mladic exercitui totius Serbiae praeerat.

In criminibus eius numeratur strages anno millesimo nongentesimo nonagesimo quinto (1995)

Srebrenicae edita, qua plus octo milia virum et puerorum musulmanorum occisa sunt.

(Reijo Pitkäranta)

Germani vim nuclearem deponent

In Germania omnes electrificinae nucleares ante annum bismillesimum vicesimum secundum (2022) clauduntur. Quae cum ita sint, Germania prima civitas industrialis maior erit, quae vi nucleari omnino abstinerit. Huc pertinet, quod octo reactiva, quae post calamitatem in Fukushima factam adhiberi destita sunt, non iam usu recipiuntur.

(Reijo Pitkäranta)

Quid Olli Rehn Graecis dixerit

Olli Rehn, commissarius a rebus oeconomicis Unionis Europaeae, Graecos hortatus est, ut in oeconomia sua renovanda efficacius agerent. Nisi id fecissent, periculum esse, ne pars auxilii pecuniarii ad mensem Iunium iis promissi non distribueretur. Rehn colloquio actis diurnis Der Spiegel dato ait Unionem Europaeam de ea re tum demum statuturam esse, cum rationes Graeciae oeconomicas pro primo huius anni trimestri recensisset.

Berlusconi cladem accepit

Italianos ministri sui principis Silvio Berlusconi et asseclarum eius iam taedere coepit. Nam suffragiis localibus et regionalibus in Italia habitis Berlusconi clades admodum graves acceperunt, quae eo acerbiores esse videbantur, quod candidati eorum et Mediolani et Neapoli, in duabus urbibus magni ponderis, pristinam auctoritatem politicam amiserunt.

(Reijo Pitkäranta)

Divortium in Melita sinetur

Die Saturni (29.5.) populus Melitensis interrogatus est, num legem novam approbaret, quae civibus licentiam divortium faciendi concederet. Sententiis computatis apparuit maiorem partem suffragatorum huic renovationi favere. Eventus suffragii parlamentum non obligat, sed princeps minister Lawrence Gonzi censuit fieri non posse, quin legati parlamentares vocem populi respicerent.

(Reijo Pitkäranta)

De siccitate Francogalliae

Francogallia siccitate laborans coacta est consumptionem aquae in multis districtibus restringere.

Mense Aprili minime pluit et caelum inusitate fervidum erat, qua de causa copiae aquae valde diminutae sunt. Ministra circumiectalis Nathalie Kosciusco-Morizet rerum condicionem discriminis instar esse describit. Francogallia maxima productrix frumenti in Unione Europaea est, sed nunc de suo statu timet.

(Tiina Arpiainen)

Socialistae in Hispania cladem acceperunt

27.5.2011

Factio socialistarum, quae in Hispania potestatem tenet, in comitiis regionalibus et localibus die Dominica (22.5.) factis cladem haud inopinatam accepit. Ex suffragiis minus quam duodetriginta centesimas (28%) cepit, cum Partes populares (PP) plus triginta septem centesimas (37%) obtinuerint. His eventus fuit omnium temporum optimus, socialistis autem multis decenniis pessimus. Socialistae gratiam populi imprimis propter difficultates oeconomicas et quaestus inopiam amiserunt. Primus minister Hispaniae est Jose Luis Rodriguez Zapatero, cuius mandatum non ante quam anno bis millesimo duodecimo finitum est, sed multi credunt nova comitia parlamentaria iam antea habitum iri.

(Tuomo Pekkanen)

Strauss-Kahn in custodiam domesticam

Dominique Strauss-Kahn, iam pristinus director generalis Fundi monetarii internationalis, ex carcere in custodiam domesticam ad interim dimissus est soluta cautione sex millionum dollarorum. Praeterea semper custodem armatum secum habere et pedicam electronicam portare debet, qua omnibus horis vigilatur; neque regionem Manhattanum relinquere illi licet. Accusatus est ab ancilla deversorii Neo-eboracensis, quod illam pedicando et irrumando stupravisset. In accusatione omnino septem crimina enumerantur. Si Strauss-Kahn horum omnium convictus erit, carcere septuaginta quattuor annorum damnari poterit. Ipse autem cum suis advocatis facinora infigitur.

(Tuomo Pekkanen)

Turbines perniciosi

Die Lunae (23.5.) venti motus vorticosus in Missuria, civitate Americana, oppidum Joplin penitus delevit. Centum viginti tres homines mortui sunt, vulneratorum numerus fuit saltem septingenti quinquaginta. Praeterea multi disparuerunt. Maior pars oppidi est in ruinas redacta. Post annum millesimum nongentesimum quadragesimum septimum (1947) turbo tam letalis non exstitit. Post calamitatem oppidi Joplin turbines late vagari perrexerunt et biduo post in Oclahomam irruerunt ibique octo homines peremerunt et complures denos vulneraverunt. Hoc vere in USA saltem trecenti homines turbinibus interierunt. Damna materialia plus duorum miliardorum dollarorum fuerunt.

(Tuomo Pekkanen)

Vulcanus in Islandia denuo saeviit

Vulcanus Islandiae nomine Grimsvötn vespere Sabbati (21.5.) erumpens volatus in Islandiam impedit, nam nubes vulcanica commeatui aereo est periculosa, quia particulae cineris in reatorio aeroplani haerentes efficere possunt, ut motrum obstruatur et fungi desistat. Eruptio ferocior erat quam illa, quae anno praeterito ex monte Eyjafjallajökull facta est. Cinis autem, ut meteorologi Islandienses affirmant, non est tam subtilis neque commeatum Europae eodem modo perturbare creditur. Nihilo minus complures centeni volatus in Europa abrogati sunt.

Meteorologi die Mercurii rettulerunt vulcano Grimsvötn iam pacato eruptionem lavae finitam esse.

(Tuomo Pekkanen)

Mississippi agros inundat

20.5.2011

In Civitatibus Americae Unitis saltem mille trecentae familiae domum relinquere coactae sunt propter inundationes fluminis Mississippi. Magistratus etiam carcerem quendam in civitate Ludoviciana vacuefecerunt et aggerem ad eluviones arcendas constructum aperuerunt, ut copiam aquarum civitati Novae Aureliae imminuentium deminuerent.

(Reijo Pitkäranta)

De Portugallia adiuvanda

Ministri aerarii publici Unionis Europaeae consenserunt, ut Portugalliae auxilium pecuniarium concederetur, cuius summa undeoctoginta miliarda euronum efficeret. Neque id comprobatum esset, nisi Portugalli condiciones a Finnis propositas acceperint: partem bonorum publicorum venderent et collocatores pecuniae hortarentur, ne possessiones suas ex Portugallia in terras externas deducerent.

(Reijo Pitkäranta)

Scandalum Francogallicum

Dominique Strauss-Kahn, director generalis Fundi monetarii internationalis (IMF), in urbe New York deprehensus est. Accusatur ille vir sexaginta duos annos natus de stupro temptato, maletractatione sexuali, libertate vi abrepta. Ante hoc scandalum Strauss-Kahn inter homines in mundo maximae auctoritatis numerabatur. Quin etiam praesidens Francogalliae anno proxime futuro electum iri putabatur.

(Reijo Pitkäranta)

Reclamationes in Aegypto

Die tertio decimo mensis Maii (13.5.) in Aegypto multa milia hominum reclamationi pro unitate nationali servanda interfuerunt. Reclamatores in media urbe Cairo congregati violentiis inter musulmanos et Christianos Coptos ortis adversabantur. Neque deerant, qui ibi cruces manu tenerent, sed maior pars multitudinis e musulmanis Aegyptiis constare videbatur.

(Reijo Pitkäranta)

Causa calamitatis aeriae

Iam in eo est, ut causa calamitatis, quae abhinc duos annos aeroplano Francogallico obtigit, tandem patefiat. Namque ante duas septimanas in imo mari caseta nigra reperta est, ex qua conici potest, quidnam ultimis illius volatus momentis in aere factum sit. Loquimur de aeronavi ex societate Air France, quae mense Iunio anno bismillesimo nono (2009) ex urbe Rio de Janeiro profecta Parisium versus volabat, cum subito in mare praecipitata est.

(Reijo Pitkäranta)

Finni victoriam adepti

Certamina hoccei glacialis mundana hoc anno in Slovakia habita sunt. Ludus finalis Idibus Maiis (15.5.) in urbe Bratislava inter Finnos et Suetos commissus est. Quo ex certamine grex Finnorum nationalis superior discessit, quo factum est, ut tropaeum iustissimo iure nostratibus daretur.

(Reijo Pitkäranta)

Nox sine nocte adest

Die septimo decimo huius mensis (17.5.) aestas in partibus Finniae maxime septentrionalis iniit. Sol enim eo mane ortus his locis per septuaginta duos dies et noctes continuas in conspectu manebit, donec die duodetricesimo mensis Iulii (28.7.) rursus occidet. Hoc spatium temporis apud nos 'nox sine nocte' appellari solet.

(Reijo Pitkäranta)

De castris carceralibus Coreae Septentrionali

13.5.2011

In Corea Septentrionali numerus captivorum politicorum crevit. Amnestia Internationalis, ordo iuribus humanis defendendis, rettulit in ingentibus castris carceralibus esse circiter ducenta milia hominum, quorum condiciones essent horribiles.

Captivos coram familiaribus iugulari et cruciari, laborem coactum in castris esse servituti similem.

Cibo deficiente famelicos etiam serpentibus, rattis et seminibus in excrementis avium repertis vesci.

Conditiones captivorum in peius mutatas esse etiam propterea, quod Corea Septentrionalis penuria cibi laboraret, quia messis propter diluvia et frigora hiemis solito minor fuisset et aphta epizootica animalia domestica temptavisset. Quadraginta centesimae captivorum in quibusdam castris fame perisse aestimantur. Amnestia Internationalis photographemata castrorum ex satellitibus facta divulgavit et illa cum imaginibus decem annis anterioribus comparavit. Praeterea colloquia habuit cum custodibus et captivis, qui in castris carceralibus fuerant quibusque contigerat, ut ex Corea Septentrionali effugerent.

Bellum Libycum crudescit

Bellum civile in Libya crudescit. Acerrima proelia Misratae facta sunt, in urbe a Gaddafianis octo septimanas obsessa. Rebelles referunt se obsidionem rupisse et vicum Zareek occupavisse, qui circiter viginti quinque chiliometra in occidentem versus distat. Copias Gaddafianas apud aeroportum Misratae circumdatas esse. Etiam in fronte orientali inter Ajdabijam et Bregam vehementer pugnatum est.

Aeroplana autem Natonis ictus contra Tripolim continuaverunt. Inter operationes pridie Kalendas Apriles susceptas Nato circiter sex milia volatuum in Libyam fecit, ex quibus duo milia trecenti ictus contra Gaddafianos fuerunt.

Sanctiones Syriae impositae

Unio Europaea Syriae sanctiones imposuit. Arma aut instrumenta, quae contra reclamatores adhiberi possunt, in Syriam exportare non licet. Praeterea decretum est, ut tredecim magistratus Syriaci, qui responsales de reclamationibus reprimendis haberi possent, in Unionem venire vetarentur. Inter duos menses in Syria octo milia adversariorum regiminis deprehensi sunt.

Democratiae Unionis Europaeae diffiditur

Ex demoscopia, quam acta diurna Helsinkiensia (Helsingin Sanomat) faciendam curavit, tantum quarta pars Finno-ruum censet democratiam in Unione Europaea bene operari. Plus quam dimidia pars Unioni diffidit. Nihilominus tantum quinta pars populi putat Finnos posse solos in omnibus condicionibus optime se expedire.

De novo Finniae regimine constituendo

Colloquia de novo Finniae regimine constituendo fiunt inter Conservativos et Democratas sociales, ad quos minores quaedam factiones adiungantur, necesse erit. Finni fundamentales, qui ex comitiis parlamentariis victores evaserunt, de terris debito publico oppressis adiuvandis cum illis consentire non potuerunt ideoque in novo parlamento principalem oppositionem politicam facient. (Tuomo Pekkanen)

Osama bin Laden mortuus

6.5.2011

Osama bin Laden, dux ordinis Al-Qaida et terrorista in orbe terrarum maxime quaesitus, Kalendis Maiis occisus est. Barack Obama, praesidens Civitatum Americae Unitarum, oratione televisifice habita nuntiavit eum mortuum esse impetu militari a parva manu Americanorum speciali in Pakistania facto.

Latebat Osama in villa quadam luxuriosa et bene munita prope urbem Islamabad aedificata, cum milites Americani ex helicopteris subitum ictum mortiferum in eum fecerunt. Corpus eius, cum certe agnitum esset, nulla mora interposita in Mari Arabico sepultum est.

“Obama Osamam occidit!”

Ubi primum nuntius de Osama bin Laden mortuo divulgatus est, in urbe Washington magna copia hominum gaudio exsultantium ante Aedes Albas congregari coepit. Paulo post tota area personabat clamore “Obama Osamam occidit!”. Eodem fere tempore pristinus praesidens George Bush minor mortem illius terroristae magnam rem ab Americanis gestam descripsit. Etiam Bill Clinton facere non potuit, quin se rerum eventu contentum esse diceret.

Quid Alexander Stubb dixerit

Alexander Stubb, minister a rebus exteris Finniae, sperat fore, ut terrorismus internationalis post Osamam interfectum deminuat. Colloquio percontativo diurnariis dato censuit orbem terrarum iam paulo tutiorem videri. Quae quamvis ita essent, ait tamen se metuere, ne terroristae cupiditate ulciscendi capti viatoribus etiam maiori periculo essent quam ante.

Acta Syriae condemnantur

Communitas internationalis adhuc gravius in Syriam consulere decrevit. Consilium enim Nationum Unitarum a iuribus humanis violentiam regiminis Syriae in reclamatores non solum vehementer condemnavit, sed etiam in facinora ibi commissa inquisitum est. Huc accedit, quod praesidens Civitatum Americae Unitarum Syriae sanctiones oeconomicas imposuit propter iura humana ibidem violata.

Americani turbinibus vexati

In Civitatibus Americae Unitis amplius trecenti homines vitam amiserunt tempestatibus gravissimis, quae imprimis partes terrae medias et meridianas ingenti vi vexaverunt. Ventis turbinibus et imbribus urceatim cadentibus effectum est, ut fila electrica rumperentur et electrificinae nucleares claudendae essent. Multae civitates regioni suae statum necessitatis indicare coactae sunt.

Magna statua pharaonis reperta

Archaeologi Aegyptii in urbe Luxor statuam pharaonis tredecim metra altam invenerunt, quae a saeculo a.Chr.n. quarto decimo originem ducit. Quod simulacrum e quartzite factum pharaonem Amenhotep III

figurare dicitur. Monumentum in septem partes fractum erat una e duabus statuīs, quae in aditu templi pharaonis sepulchralis collocatae erant.

Comitia Finnorum Palamentaria

9.4.2011

Comitia Finnorum palamentaria, quae Dominica palmarum (17.4.) facta sunt, magnam mutationem in parlamentum attulerunt. Victores haud dubie erant Finni fundamentales, qui, cum antea parva factio quinque delegatorum fuerit, nunc undequadragesima (39) delegatis acquisitis magnitudine tertium locum in parlamento habent.

Gratia ceterarum partium apud cives minor erat quam ante. Maximam cladem, amissa tertia fere parte delegatorum, quos antea habuerant, acceperunt Virides et Centrales. Conservativa factio, etsi tam fautores quam delegatos perdidit, quadraginta quattuor (44) delegatis acceptis in novo parlamento maxima est.

In secundum locum cum quadraginta duobus (42) delegatis ascenderunt Democratae sociales.

In parlamentum, quod ex ducentis delegatis constat, octoginta quattuor novi delegati electi sunt.

Feminae sunt octoginta quinque, plures quam umquam ante.

Media aetas delegatorum est duodequingenta annorum. De novo regimine constituendo inter tres maximas factiones consultatur. Consultationes moderatur Jyrki Katainen, praeses factionis

Conservativae.

De causis mutationis politicae

Mutatio, quae facta est in comitiis Finnorum, non erat omnino inopinata, sed nihilo minus maior quam quisquam praevidere potuerat. Finni fundamentales (vel Veri Finni) accusabant veteres factiones, quae patriam regebant, quod populum minutum non auscultarent sed potius suo commodo servirent. Magna inter factiones erat etiam de Graecia, Irlandia Portugalliaque adiuvandis discordia, cum Democratae sociales et Finni fundamentales censerent responsalitem debitorum, quae illae terrae contraxissent, ad ceteras nationes Europaeas non pertinere sed ad ipsas domos argentarias, quae magno faenore adductae mutuas pecunias commodavissent.

William et Kate matrimonium iunxerunt

William, princeps Britanniae, filius maior principis Caroli (Charles) et principissae Dianae, amicam Kate (Catherine Elisabeth) Middleton, quam mense Octobri sibi desponderat, hodie in matrimonium duxit. Ad caerimonias nuptiales, quae in Abbatia Vestmonasteriensi (Wesminster Abbey) Londinii celebratae sunt, circiter mille nongenti hospites invitati erant. Plerique ex eis erant familiares aut amici novorum coniugum. Ex principibus civitatum tantum reges et reginae eorumque proximi familiares aderant. Moderatores autem politici invitationem non acceperant. Erant quidem inter hospites etiam magistratus et milites veterani. Nuptias regias per televisionem forsitan duo milia hominum spectaverunt.

Ioannes Paulus II beatus fiet

Kalendis Maiis Papa Ioannes Paulus II in Civitate Vaticana a successore suo Benedicto XVI inter beatos referetur. Ritus beatificationis fiet in Platea Petriana, ubi octoginta milia hospitem sedentes vel stantes locum habebunt. Circiter quadringenta milia peregrinorum, maxime ex Polonia, unde Ioannes Paulus II erat oriundus, Romam his diebus venisse aut venturi esse aestimantur.

Tuomo Pekkanen

De calamitate Iaponiae

15.04.2011

Die Lunae (11.4.) unus mensis a terrae motu Iaponiae abierat. Illa calamitas carissima omnium temporum fieri poterit. Sumptus, ut regimen Iaponiae aestimat, ducenta milia euronum superant. Radiatione nucleari vel metu pollutionis imprimis piscatores et agricolae afficiuntur. In regionibus pessime afflictis tsunami octoginta centesimas agrorum delevit. Circum Fukushima agricolae sunt desperati, nam partem fructuum vendere aut exportare vetantur. Multae civitates importationem ciborum ex Iaponia orientali circumscripserunt. India omnem ex Iaponia ciborum importationem vetuit. Quia aqua radioactiva in mare emittitur, curatores industriae piscatoriae timent, ne quaestus piscationis Iaponiae omnino intereat. In regione maritima praefecturae Ibaraki, quae iacet inter praefecturam Fukushima et urbem Tokio, omnis piscatus finitus est. In foro piscatorio Tokiensi, quod inter maxima orbis terrarum numeratur, venditio piscium prima post calamitatem septimana ab anno

praeterito quadraginta quattuor centesimis (44%) deminuta est. Fiducia in vim nuclearem Iaponiensem pessime labefacta est. Etsi regimen Iaponiae affirmavit periculum magnae emissionis radioactivae ex electrificina nucleari notabiliter deminutum esse, complura instrumenta communicatoria die Lunae (11.4.) narraverunt zonam evacuationis usque ad triginta unum chiliometra a Fukushima amplificatam esse. Neque Vulcanus adhuc acquievit, nam hac septimana novi terrae motus Iaponiam orientalem concusserunt, sed damna notabilia non effecerunt. Motus primus, quo aedificia etiam in urbe Tokio movebantur, factus est die Lunae in profunditate decem chiliometrorum. Calamitas in Fukushima a magistratibus Iaponiensibus par Tshernobyleni iudicatur.
(Tuomo Pekkanen)

Russi Finnam frequentant

Hoc anno plures periegetae Russi quam umquam ante in Finnam exspectantur. Numerum augent incrementum oeconomicum Russiae et perturbationes politicae in ceteris terris, quas Russi frequentare solent. Anno proximo (2010) peregrinationes Russorum triginta centesimis(30%) auctae sunt. Gratissima illis erat Finnia, in quam illi tres virgula tres (3,3) miliones itinerum fecerunt.
(Tuomo Pekkanen)

Dies Michaelis Agricolae et linguae Finnicae

Die nono mensis Aprilis (9.4.) Michael Agricola vexillis propositis in Finnia commemorabatur. Agricola fundator linguae Finnicae litterariae habetur, nam scripsit primum Abecedarium Finnicum (a. 1543) et Novum Testamentum Finnice vertit (a. 1548). Dies, quo Agricola natus est, ignoratur ideoque dies eius festus est ille, quo mortem obiit. Idem dies appellatur etiam dies linguae Finnicae, nam est dies natalis Eliae Lönnroth (1802-1884), qui linguam Finnicam renovavit, cum multa lexica scripsit et prima acta diurna Finnica suis sumptibus edidit. Notissimus autem est, quod ex carminibus Finnorum popularibus Kalevalam, epopaeam Finnorum nationalem, collegit.
(Tuomo Pekkanen)

De bello in Libya gerendo

8.4.2011

Bellum inter Gaddafianos et defensores libertatis in Libya continuatur. Ex consociatione Nato nuntiatum est tertiam fere partem armorum gravium dictatoris Muammar Gaddafi iam deletam esse. Quod detrimentum ei attulerunt aeroplana bellica coalitionis internationalis, quae Tripolim et alias urbes vehementer bombardaverunt. Neque tamen seditiosi his rebus gestis contenti fuerunt, sed duces consociationis Nato reprehenderunt, quod bellum nimis cunctanter gessissent.
(Reijo Pitkäranta)

De altero bello Africano

In Africa alterum quoque bellum exarsit, cui communitas internationalis intervenit. In Litore Eburneo enim accidit, ut praesidens civitatis, quamvis cladem suffragio praesidentiali accepisset, tamen munus deponere recusaret. Quo facto copiae Francogalliae et Nationum Unitarum stationes eius ex helicopteris bombis verberare coeperunt, ut ille potestate absistere cogeretur.
(Reijo Pitkäranta)

Rerum in Iaponia condicio

In informatione publica in Iaponia divulganda adhuc ii nuntii praevalent, quibus edocetur, quales progressus operae auxiliares locis tsunami deletis fecerint et quid novi in electrificina nucleari Fukushimae acciderit. Calamitates autem in Iaponia nuper factae mentibus civium sensum communitatis fortissimum inspiraverunt. Iaponienses iam eodem fere animo esse dicuntur ac post bellum alterum mundanum fuerint.
(Reijo Pitkäranta)

Gasiductus Medigaz usu receptus

Medigaz, sive tubus gasalis subter Mare Mediterraneum actus, Kalendis Aprilibus (1.4.) in usum venit. Dicitur hic gasiductus, qui abhinc tres annos aedificari coeptus est, circiter mille chiliometra longus esse. Propositum est, ut copia gasi terrestris undecim fere miliardorum metrorum cubicorum per eum singulis annis ex Algeria in Hispaniam transferretur.
(Reijo Pitkäranta)

De comitiis in Finnia futuris

Die septimo decimo mensis Aprilis (17.4.) sive die Dominico palmarum, in Finnia comitia parlamentaria habebuntur. Itaque Ordo a securitate et cooperatione Europaea in terram nostram octo observatores internationales misit, quorum esset videre, ut omnia legitime fierent. Quam magni haec res ducatur, vel inde patet, quod illi custodes in Finnam iam duabus septimanis ante ipsum diem comitiorum venerunt.

(Reijo Pitkäranta)

Ver thermicum in Finnia iniit

Mensis Martius in Finnia hoc anno admodum calidus fuit. Quae quamvis ita essent, ver tamen serius initium cepit quam fieri consuevit. Meteorologi definiunt ver thermicum tum inire, cum temperatura diei et noctis media assidue supra zerum manet. In Finnia meridionali res ita se habere coepit non ante quam septimana mensis Aprilis secunda. In partibus Finniae orientalis adhuc magna copia nivium invenitur.

(Reijo Pitkäranta)

De rebus in Libya gestis

1.4.2011

Ictibus aereis coalitionis adiuti rebelles ex Libya orientali in regionem Tripolitanam versus paulatim progrediuntur. Septimana vergente complura oppida in ora Libyae occupaverunt, in quibus Ras Lanuf et Brega, ex quibus magna pars petrolei Libyae exportatur.

Milites regiminis ex illis omnino disparuerunt. Sed die Martis (29.3.) copiae oppositionis ex aliquot oppidis, quae pridie occupaverant, regredi coactae sunt. Misratae, in quam Gaddafiani curribus cataphractis invaserunt, ancipite Marte pugnatur. Apud illam uno die quinque aeroplana et duo helicoptera, quae in terra erant, ictibus Francorum deleta sunt.

De civibus bello mortuis

Regimen Gaddafianum coalitionem accusavit, quod cives innocentes occidisset. Americani autem monuerunt propositum coalitionis esse videre, ne Gaddafi suos cives occideret. Robert Gates, minister a defensione Americanorum, dixit veri simile esse, quod Gaddafiani corpora rebellium, quos ipsi occidissent, in ea loca transtulissent, in quae ictus aerei facti essent.

Nato operationibus Libycis praeest

Die Dominico (27.3.) convenit, ut confoederatio Nato omnibus rebus militaribus in Libya gerendis praeesset. Anders Fogh Rasmussen, secretarius Natonis generalis, dixit confoederationis esse cives et regiones in quibus cives habitarent, ab omnibus impetibus regiminis Gaddafiani defendere. Haec fieri ex sententia Nationum Unitarum. Nihil amplius, nihil minus.

Conventus de Libya Londiniensis

Duodequadraginta ministri a rebus exteris illarum terrarum, quae res in Libya gerunt aut illis favent, die Martis (29.3.) Londinii convenerunt. Conventui placuit, ut ictus aerei continuarentur, donec Moammar Gaddafi postulationibus Nationum Unitarum concederet: Violentiam contra cives finiret et copias ex oppidis Libyae deduceret.

Sueci in bellum proficiscuntur

Regimen Suecorum decrevit, ut Suecia bello Libyco interesset. Etsi Suecia in confoederatione Natone non est, tamen decem aeroplana in Libyam mittere constituit, scilicet octo insectatoria, unum portatorium unumque exploratorium. Finni in bellum non proficiscuntur sed auxilium humanitarium in Libyam iam miserunt et mittere pergunt.

An status extraordinarius in Syria finiatur?

In Syria status extraordinarius ab anno millesimo nongentesimo sexagesimo tertio (1963) est. Ex lege magistratibus ius est cives deprehendere, qui securitati publicae immineant. commercium loquendi et scribendi inter cives vigilatur, manifestationes et conventus vetantur et acta diurna censoria virgula notantur. Consiliarius praesidentis Syriae nuper rettulit iam decretum esse, ut lex de statu extraordinario abrogaretur; rem esse certam, sed tempus, quo abrogatio futura esset, incertum. Die Martis regimen Syriae dimissum est neque novum adhuc est constitutum.

(Tuomo Pekkanen)

Bellum Libyae illatum

25.3.2011

Die Saturni (19.3.) terrae occidentales permissu Nationum Unitarum dictatori Libyae Muammar Gaddafi bellum indixerunt, ut prohiberent, ne ille cives suos sibi adversantes opprimeret et horribiliter occideret.

Huic actioni militari, cui nomen 'Odyssea matutina' inditum est, complures civitates intersunt, imprimis autem Francogallia, Civitates Americae, Unitae, Britannia. Russi autem, sicut Germani et Sinenses, neque licentiam belli gerendi dederunt neque illi consilio repugnaverunt.

(Reijo Pitkäranta)

Primae actiones bellicae

Bello Libyco ineunte complura missilia circumvagantia Tripolim, in urbem principem, emissa sunt. Id autem aggressoribus impedimento erat, quod Gaddafi sui defendendi causa hominibus velut scutis contra ictus aërios uti dicebatur. Eodem tempore pugnae de oppido Misrata possidendo continuabantur. Hoc enim oppidum, quod a seditione adhuc tenetur, a copiis regiminis oppugnari coeptum est.

(Reijo Pitkäranta)

Quid Stubb dixerit

Alexander Stubb, minister a rebus exteris Finniae, ait vix fieri posse, ut ex Finnia in Libyam aut milites aut aeroplana bellica mitterentur. "Si autem", inquit, "a nobis auxilium petatum erit, re diligenter deliberata decernemus, quid faciamus".

(Reijo Pitkäranta)

Quid in Syria acciderit

Etiam in Syria perturbationes politicae ortae sunt. In oppido Daraa, quod in partibus terrae meridionalibus situm est, accidit, ut activistae democratiam postulantes cum copiis securitatis cruenta confligerent. Huc accessit, quod praetorium locale factionis civitatem regentis incenderunt et alia quoque aedificia publica deleverunt.

(Reijo Pitkäranta)

De conventu Bruxellensi

Periculum calamitatis, quod electrificinae nucleari in oppido Fukushima aedificatae adhuc imminet, effecit, ut ministri ab energia Unionis Europaeae Bruxellis conventum necessitatis haberent. Ibi novas leges securitatis communes adumbraverunt, quae in omnibus ergasteriis in Europa nuclearibus observarentur. Ex Finnia sessioni interfuit Mauri Pekkarinen, minister a rebus oeconomicis.

(Reijo Pitkäranta)

Discrimen Portugalliae

Parlamentum Portugalliae novum programma oeconomicum a regimine excogitatum repudiavit. Quo facto princeps minister Jose Socrates televisifice nuntiavit se munus depositurum esse, quod fore iam antea minatus erat, si illa lex a parlamento reiecta esset. Ex hoc discrimine sequi videtur, ut Portugallia ad debita sua solvenda pecuniam ab Unione Europaea mutuari cogatur.

(Reijo Pitkäranta)

Urbes iucundissimae

Helsinki, caput Finniae, sexto loco positum est in comparatione internationali, qua investigabatur, quatenam orbis terrarum urbes ad vivendum iucundissimae essent. Victoriam reportaverunt urbes et oppida imprimis in Canada et Australia sita, ut Vancouverium, Melburnum, Torontum, Calgaria. Ex urbibus Europaeis nonnisi Vindobona et Helsinki inter decem optimas numerabantur.

(Reijo Pitkäranta)

Motus terrae terribilis

18.3.2011

Die Veneris (11.3.) motus terrae novem graduum Richterianorum in Iaponia factus est. Placae continentales in fundo maris prope Iaponiam tam vehementer motae sunt, ut axis globi terrestris aliquot centimetra inclinaretur. Fundus maris tremore affectus erat longitudine trecentorum vel quadringentorum, latitudine centum fere chiliometrorum.

In altitudinem vibratio placarum erat quadraginta metrorum, qua maiores rarissime observatae sunt. Illa in altitudinem vibratio effecit, ut ingens unda, Iaponice tsunami, surgeret. Epicentrum quadringenta fere chiliometra ab ora Iaponiae orientali-septentrionali distabat, sed tsunami tam celeriter ruebat, ut litus decem fere minutis assequeretur. Etsi terrae motus haud raro in Iaponia fiunt, calamitas homines prope litora habitantes paene inopinatos oppressit. Altitudo fluctus irruentis erat etiam decem metrorum, neque tsunami in litore constitit, sed moles aquarum, quae domos et vehicula arripiebant et incendia faciebant, procul in interiora ruebant.

Damna calamitatis enormia

Quanta essent damna, diebus calamitatem sequentibus paulatim patefiebat. Cum multi vici et oppida omnino deleta sint, nondum constat, quot sint mortui et vulnerati, sed iam quindecim milia victimarum esse aestimantur. Hic numerus multiplicari poterit, nam tantum in oppido Ishinomak, ut burgimagister eius nuntiat, decem milia hominum disparuerunt. Damna materialia ducentis miliardis dollarorum aestimantur. Primum enim tremor terrae aedificia delevit, deinde tsunami omnia ad distantiam quinque chiliometrorum a litore aquis operuit. Oppidis vicisque deletis plus centum milia hominum domos cum bonis suis amiserunt.

In Fukushima clades nuclearis imminet

In oppido Fukushima, quod iacet in litore Iaponiae orientali, motus terrae et tsunami electricinae nucleari gravissima damna attulerunt. Displosiones et incendia subsequebantur et omnia sex reactiva, quae ibi sunt, damna maiora vel minora acceperunt. Periculum calamitatis nuclearis imminet, nam gradus radioactivitatis in propinquitate electricinae crescit. Ducenta milia hominum, qui a Fukushima ad distantiam viginti chiliometrorum habitant, longius deportati sunt. Illi autem, qui inde inter viginti et triginta chiliometra distant, clausis fenestris domi manere iussi sunt. Etiam Tokii signa radioactivitatis crescentis apparent, et in vicina provincia Chiba radiatio iam decies normam superat.

Homines perterriti fugam capessunt

Cum Fukushima tantum ducenta quadraginta chiliometra ab urbe Tokio distat, multa hominum milia calamitate nucleari et terrae motibus perterriti illam urbem vel totam Iaponiam relinquere volunt. His diebus ventus radiationem in Oceanum Pacificum versus portat, sed homines timent, ne ventus in occidentem vergatur, ideoque nuntios meteorologicos attentissime observant.

(Tuomo Pekkanen)

Quid Gaddafi dixerit

11.3.2011

Cives seditiosi Libyae a communitate internationali iterum atque iterum flagitaverunt, ut terrae suae spatium ab aeroplanis omnino prohibitum decerneretur.

Sed dictator Muammar Gaddafi colloquio televisioni Turcicae dato minatus est cives suos arma sumpturos esse, si Libyae talis sanctio imposita esset. Idem cum nationes peregrinas tum ordinem terroristicum al-Qaida de perturbationibus in Libya ortis accusare perrexerit.

(Reijo Pitkäranta)

Quid apud Saudianos acciderit

In Arabia Saudiana civibus interdictum est, ne voluntati regis ullo modo reclamarent. Nuntiatur ibidem viginti duos musulmanos shiitas, qui huic legi adversarentur, a custodibus publicis comprehensos esse. Constat Arabiam Saudianam monarchiam esse, cui parlamentum populi omnino deest. Quam ob rem islamistae moderati, shiitae alique a rege Abdullah postulaverunt, ut civibus libertatem suffragia faciendi concederet.

(Reijo Pitkäranta)

Joe Biden Finnam obiit

Nonis Martiis (7.3.) Joe Biden, praesidens vicarius Civitatum Americae Unitarum, iter officiale in Finnam suscepit, ut et nostram praesidentem et primam ministram conveniret. Visitatio eo insignior habebatur, quod eo tempore, cum Tarja Halonen munere praesidentis fungitur, Biden est primus hospes, qui ex Aedibus Albis in Finnam venit. Ex Finnia Biden lustrationem suam Europaeam unius septimanae in Russiam et Moldoviam continuavit.

(Reijo Pitkäranta)

Centesimus dies feminarum

Postridie Nonas Martias (8.3.) dies internationalis feminarum ordine centesimus celebrabatur. Mos huius festi quotannis agendi anno millesimo nongentesimo undecimo (1911) initium cepit, cum feminae Hafniam congregatae decreverunt, ut hic dies singulis annis sollemniter observaretur. Anno millesimo nongentesimo septuagesimo quinto (1975) etiam ordo Nationum Unitarum diem feminarum in rem suam convertit.

(Reijo Pitkäranta)

Mäkäräinen principatum assecuta

In oppido Hanti-Mansijsk Sibiriae occidentalis certamina biathli mundana instituta sunt. In cursu decem chiliometrorum feminis constituto victoriam reportavit Kaisa Mäkäräinen, iuvenis e Finnia oriunda. Qualis eventus certaminis futurus esset, iam in ultimo sclopetandi loco apparuit, cum participi Finlandensi contigit, ut quinque ictibus celeriter emissis omnia destinata feliciter feriret.

(Reijo Pitkäranta)

Ursi ex sopore brumali excitati

Unum e signis veris appropinquantis dixeris, quod ursi in vivario Helsinkiensi habitantes ex somno brumali quattuor mensium excitati sunt. Die Dominico quadragesimali (6.3.) accidit, ut ursae mater et catulus eius e lustro suo foras exirent. Aere subdivali tantopere gaudebant, ut non solum in nivibus alacres animo cernuarent, sed etiam ventri incumbentes per declivitatem delaberentur.

(Reijo Pitkäranta)

Sanctiones contra Libyam positae

4.3.2011

Consilium securitatis Nationum Unitarum unanimiter decrevit, ut contra Libyam et eius ducem Muammar Gaddafi sanctiones ponerentur. Arma in Libyam portari non sinuntur, Gaddafi et eius familiares extra patriam itinera suscipere vetantur, opes, quas peregre habent, gelantur. Praeterea Gaddafi in poenale tribunal internationale vocabitur. Est enim suspicio, ne crimina contra humanitatem commiserit, cum reclamaciones oppositionis politicae vi et armis oppresserit. Gaddafi contra per televisionem Serbicam nuntiavit illas sanctiones esse nullius momenti et asseveravit statum rerum in Libya tranquillum esse. Etiam filius eius Saif al-Islam Gaddafi sanctiones irridebat. Idem affirmavit familiam Gaddafi esse pauperem neque ullas opes in Europa alibive peregre habere. At postea Ministerium aerarii Americanum rettulit illam familiam in rationibus argentariis Americanis triginta miliarda dollarorum habere.

Peregrini Libyam relinquunt

Peregrini, tumultus et violentiam timentes, Libyam relinquunt. Commissio Nationum Unitarum (UNHCR) aestimavit circiter centum quadraginta milia hominum ex Libya effugisse. Ordo a iuribus humanis Libycus (Libyan Human Rights Watch) saltem sex milia hominum inter tumultus mortuos esse nuntiavit.

Discovery ultimum volat

Discovery, navicula spatialis Americanorum, die Iovis (24.2.) ultimum volatum suscepit, ut in stationem spatialem internationalem instrumenta necessaria et automatatum portaret. Intersunt in itinere, quod undecim dies durabit, sex astronautae. Propter nimios sumptus NASA, Nationalis aeronautica et spatialis administratio, programmati navicularum spatialium finem imponit.

Oratio regis excellit

Praemia Ansgariana, vulgo Oscar, quae in re cinematographica maximi aestimantur, Angelopoli tributa sunt. Oratio regis, quae iam in antecessum favorem maximum assecuta erat, optima pellicula iudicata est. Etiam moderatio scaenarum et manuscriptum originale eiusdem pelliculae statunculum Oscar ceperunt. Praeterea Colin Firth pro optimo actore principali praemiatus est. Persona, quam Colin Firth gerit, est princeps Albertus, postea rex Britanniae Georgius VI, pater reginae hodiernae Elisabethae II. Cum balbus esset nec orationem publicam facere valeret, in thronum ascendere noluisse. In pellicula narratur, quo modo difficultatem loquendi therapeuta adiuvante superaverit et animos civium bello orto confirmaverit.

Frigora mitescunt

Frigora solito acriora, quibus tota fere Finnia per multas septimanas laboravit, tandem remittunt, etsi congeries glaciei in partibus septentrionalibus Maris Baltici navigantibus magno est impedimento. Certissimum signum veris est, quod primae aves migratoriae reverterunt. Etiam alaudae, ex quarum adventu aestas unum mensem abesse dicitur, in regione Helsinkiensi visae sunt.
(Tuomo Pekkanen)

Rerum in Libya condicio

25.2.2011

In diversis partibus Libyae, quin etiam Tripoli, in urbe principe, vehementes reclamaciones populi contra regimen ortae sunt. Quibus perturbationibus Muammar Gaddafi, dux civitatis, crudelissime respondit, cum adversarios suos vi militari oppressurus magnam stragem civium reclamantium fecit. Neque iam multum abesse videtur, quin in Libya bellum civile exardescat. Ipse Gaddafi orationem televisificam habuit, qua ira incensus recusavit, quominus umquam e patria sua abiret. Idem iuravit se una cum fautoribus adversus reclamatores usque ad ultimam sanguinis guttam pugnaturum esse et, si res postularet, in terra sua tamquam martyrem moriturum.
(Reijo Pitkäranta)

Sententia Nationum Unitarum

Consilium securitatis Nationum Unitarum a Libya flagitat, ut nulla mora interposita vim suis civibus inferre desistat. Hanc declarationem, quae per totum diem Martis (22.2.) arbitris remotis praeparata erat, quindecim nationes illius consilii unanimiter divulgaverunt. Ex eodem documento id quoque patet, quam sollicitae Nationes Unitae de rerum in Libya condicione sint.
(Reijo Pitkäranta)

Calamitas Novae Zelandiae

In Nova Zelandia saltem sexaginta quinque homines vitam amiserunt et multa centena vulnerati sunt terrae motu die Martis facto, cuius vis amplius sex graduum Richterianorum fuisse aestimatur. Epicentrum calamitatis erat urbs Christchurch, quae in illa clade tanta detrimenta accepit, ut tota area in campum pugnae mutata esse videretur.
(Reijo Pitkäranta)

Colloquia Americanorum

Acta diurna Americana nomine *The New Yorker* narrant legatos Civitatum Americae Unitarum in Afganistania consultationes clandestinas cum Talibanis agere. Ferunt illa colloquia iam per unum annum haberi. Americanos illa ratione usos esse ad cognoscendum, essentne inter Talibanos tales duces, cum quibus consultationes pacis iniri possent.
(Reijo Pitkäranta)

Putin suum montem accepit

Legati parlamentares Kirgizistaniae decreverunt, ut monti cuidam patriae suae nomen Putin ex principe ministro Russiae inderetur. Hoc consilio capto indicare voluerunt, quam bonae relationes inter utramque nationem intercederent. Mons Putinianus multo excelsior est quam ille, qui abhinc novem annos Jeltsin appellari coeptus est in honorem praesidentis Russiae illius nominis.
(Reijo Pitkäranta)

De balaenis captandis

Magistratus Iaponienses statuerunt, ne hoc vere iam balaenas captare pergerent. Decretum idcirco factum esse dicitur, quod ille labor a tutoribus animalium tantopere perturbaretur, ut piscatores in periculum vocarentur. Ordo balaenis tuendis nomine Sea Shephard nuntium cum gaudio accepit, sed ait se diligenter observaturum esse, num naves piscatoriae Iaponensium re vera ab aquis Antartidis domum reverterentur.
(Reijo Pitkäranta)

Mubarak praesidentatum deposuit

8.2.2011

Postquam cives Cairi aliisque in urbibus Aegypti duodeviginti dies reclamitaverunt, praesidens Hosni

Mubarak die Veneris (11.2.) praesidentatum deponere decrevit, etsi pridie eius diei in oratione televisifica dixerat se usque ad proxima comitia praesidentialia, autumno futura, in munere mansurum esse.

In reclamationibus complura centena milia Aegyptiorum interfuerant. Inter tumultus circiter trecentos homines mortuos esse relatum est. Omar Suleiman, praesidentis vicarius, in televisione praesidentem discessisse et summam potestatem exercitui translatam esse dixit.

Consilium militare, quod potestatem cepit, nuntiavit parlamentum dimissum esse et commissionem ad novam legem fundamentalem praeparandam constitutam esse.

Postea vita Aegyptiorum paulatim suum cursum recepit, tabernae mercatorum et domus argentariae apertae sunt. Cives mutatione rerum admodum contenti esse dicuntur.

Mubarak munere relicto in urbem Sharm el-Sheikh, ubi palatium habet, abiit. Valetudo eius in exilio male vacillare dicitur.

Italia fugitivis Tunesiensibus laborat

Praesidente Tunesiae expulso multa milia Tunesiensium patria relicta Italiam petiverunt. His septimanis in insulam Italiae Lampedusam complura milia fugitivorum naviculis piscatorum hominibus refertis venerunt.

Italiani, propter multitudinem usque crescentem solliciti, ab Unione Europaea auxilium petiverunt, ut diluvio advenarum finis imponeretur.

Robertus Maroni, minister a rebus Italiae interioribus, calamitatem humanitariam timet et monet immigrationem illegalem periculo etiam securitati Europae interiori futuram esse. Censet propter res Tunesiae adhuc instabiles in numero immigrantium etiam terroristas et criminales forsitan esse, qui inter tumultus ex carceribus effugerint.

Lampedusa Tunesiensibus aliisque Africanis septentrionalibus admodum facilis est aditu, quippe quae tantum centum tredecim chiliometra ab ora Tunesiae distet. Ex Lampedusa immigratores, a custodibus limitis Italiae capti, in centra fugitivis recipiendis, quae sunt in Sicilia et Italia continente, deportantur.

Nokia et Microsoft cooperationem ineunt

Nokia, societas Finnica telephonulis faciendis, nuntiavit se cooperationem cum societate Americana Microsoft inituram esse. In novis Nokiae telephonulis, quae telephonula ingeniosa vel multiscia (Anglice smartphone) appellantur, systema operatorium erit Microsoft Windows. Nova cooperatio a investoribus haud benigne accepta est, nam nuntio de illa die Veneris (11.2.) divulgato titulus Nokiae in bursa argentaria ilico quindecim centesimis descendit.

Sinus Finnicus glacie contextus

Propter frigora huius mensis insolita Sinus Finnicus, qui Finnam ab Estonia separat, totus glacie continua contextus est. Incolae litorum libenter super glaciem ambulant, sed prudentia opus est, nam passim glacies est adhuc fragilis. Neque commeatus maritimus perturbatur. Sin autem frigora acriora duraverint, difficultates navigantibus orientur.

(Tuomo Pekkanen)

Nova civitas Africana

11.2.2011

In Africa civitas nova in statu nascendi est, nam Sudania australis die nono mensis Iulii (9.7.) sui iuris futura esse videtur. Omar al-Bashir, praesidens Sudaniae, nuntiavit regimen suum non resistere, quominus eventus suffragii populi mense Ianuario habiti ratus duceretur. Illis comitiis suffragatores ad unum fere omnes sententiam pro Sudania australi suae potestatis facienda dederunt.

(Reijo Pitkäranta)

De novo pacto Start

Novum pactum militare (vulgo Start) inter Russiam et Civitates Americae Unitas factum, Nonis Februariis (5.2.) valere coepit. Ad signum eius rei Hillary Clinton, ministra Americanorum a rebus exteris, et Sergei Lavrov, collega eius Russiae, tabulis pactionis Monaci subscripserunt. Partes consenserunt, ut copia armorum nuclearium strategicorum utrimque tertia fere parte imminueretur.

(Reijo Pitkäranta)

Russi tempus servant

Russi autumno proximo horologia ad tempus hiemale non iam removebunt. Ita decrevit praesidens

Dmitri Medvedev causam imponens, quod cives propter differentiam horalem anxietate et morbis afficerentur. Idem monuit plurimos homines a se petivisse, ut ab indicibus horologii ultro citroque movendis tandem desisteretur.

(Reijo Pitkäranta)

Honores urbis Aboae

Aboa sive urbs Turku, quod olim caput Finniae erat, in hunc annum una cum Tallinna urbs princeps cultus civilis Europae electa est. Nuperrime alteram quoque dignitatem accepit, cum Ordo Europae arboribus curandis (EAC) Aboam urbem arborum tota Europa principalem nominavit.

(Reijo Pitkäranta)

Infantes narcoleptici

Multi infantes in Finnia, postquam contra febrim suinam vaccinati sunt, in morbum narcolepsiae inciderunt. Quam ob rem ministerium rei socialis et sanitatis gregem investigatorum instituendum curavit, cuius esset praecepta communia ad narcolepticos curandos in publico ponere. Idem ministerium indagari iussit, quales partes causae geneticae in narcolepsia contrahenda egissent.

(Reijo Pitkäranta)

Canis tigres adoptavit

Quattuor pulli ex tigre alba orti in quodam vivario Sinensi a cane adoptati esse traduntur. Cum mater ortu parvulorum adeo perturbata esset, ut eos fovere non posset, operarii vivarii pullos tigris cani, qui duos catulos proprios habebat, nutriendos dederunt. Omnes sex fetus nunc una contenti dormiunt et cibum capessunt.

(Saara Honkanen)

Passer in Finnia rarescit

Passer domesticus in Finnia valde rarescere coepit. Magistra philosophiae Jaana Kekkonen, quae rem dissertationis divulgandae causa examinavit, ostendit copiam huius avis his viginti annis sexaginta fere centesimis deminutam esse. Huc accedit, quod populatio passeris, quae antea cohaerens erat, iam in complures greges inter se differentes divisa est.

(Reijo Pitkäranta)

Crisis politica in Aegypto

4.2.2011

Exemplo Tunesianorum adducti cives Aegyptii Cairi aliisque in urbibus plus decem dies contra regimen praesidentis Hosni Mubarak reclamitant. Complura centena hominum flagitant, ut Mubarak munus deponat. Ille oratione televisifica habita nuntiavit se in proximis comitiis praesidentialibus candidatum non fore, sed id civibus non sufficit.

Die Mercurii (2.2.) manifestationes, quae antea pacificae fuerant, in confusionem et violentiam mutatae sunt. Fautores praesidentis in plateam Tahrir urbis Cairi camelis et equis vecti cives lapidabant et fustibus mulcabant.

Die Iovis (3.2.) etiam arma ignifera contra reclamatores adhibere ceperunt multosque vulneraverunt. Adversarii praesidentis putant aggressores pecunia conductos esse, ut manifestationem pacificam in confusionem verterent. Vita cotidiana in Aegypto magnam partem torpet.

Domus argentariae, bursa atque complures tabernae mercatorum et pantopolia clausa sunt. Ex carceribus multa milia captivorum, quorum maior pars islamistae, effugerunt.

Mohamed ElBaradei legatus oppositionis

Mohammed ElBaradei, qui olim Ordini Internationali Energiae Atomicae (IAEA) praefuit, ad causam reclamatorum se adiunxit et nuntiavit se mandatum politicum a populo approbatum habere, ut de novo regimine in Aegypto constituendo consuleret. ElBaradei exercitum appellat, ut ad cives tutandos tumultibus violentis interveniat.

Parlamentum Aegypti interruptum

Parlamentum Aegypti decrevit, ut sessiones ad interim interromperet. Decretum valebit, donec suffragia comitiorum parlamentariorum anno proximo habitorum denuo computata erunt. In illis comitiis factio praesidentis Mubarak ceteras partes devicit, sed oppositio suffragio abstinuit, quia comitia fraudulenta habebat. Nondum constat, quamdiu nova suffragiorum computatio duratura sit.

Peregrini Aegyptum relinquunt

Peregrini tumultibus perterriti gregatim in patriam reverterunt, unde res periegetica Aegypti maxima damna oeconomica cepit. Ministerium a rebus exteris Finniae aeroplano in Aegyptum misso sero die Iovis viatores aliosque Finnos ibi versantes in patriam reportavit. Multi ex eis rettulerunt condiciones in Aegypto cotidie in peius mutari.

Reclamationes in terris Arabicis continuantur

Reclamationes populi etiam in aliis terris Arabicis continuantur. In urbe Tunete, quod caput est Tunesiae, feminae pro iuribus feminarum reclamitaverunt. In urbe Bejalan Algeriae cives celerem mutationem regiminis flagitant. In Iemen praesidens Ali Abdullah affirmavit se septennio finito (2013) a munere discessurum neque praesidentatum filio translaturum esse.

Nationes occidentales violentiam damnant

Britannia, Francia Germaniaeque flagitaverunt, ut Mubarak postulata reclamatorum audiret et patriam quam primum ad libera comitia praepararet. Americani, qui Aegyptum confoederatam habent, iam regimen eius originem violentiae esse suspicantur. Praesidens Barack Obama Mubarakum telephonice hortatus est, ut pacificam summae potestatis mutationem ilico incoharet.
(Tuomo Pekkanen)

Ictus bombicus Moscuensis

28.1.2011

Die Lunae (24.1.) in aeriportu Moscuensi nomine Domodedovo ictus suicidalis factus est, quo triginta quinque homines occisi et saltem centum triginta vulnerati sunt. Explosio bombica in statione terminali accidit, quo cuilibet aditus liber est.

Quis aut qui illud scelus perpetraverint, nondum constat, sed priores impetus eiusdem generis separatistis Caucasiae septentrionalis crimini dati sunt. Sunt, qui censeant recens facinus, si de securitate aeriportus recte curatum esset, omnino non futurum fuisse. Re audita Dmitri Medvedev, praesidens Russiae, qui eodem tempore iter in oppidum Davonem suscepturus erat: "Hic est terror", inquit, "hic est luctus, haec est tragoedia". Idem iuravit se omnia acturum esse, ut ii, qui illa homicidia imperavissent, invenirentur et punirentur.

(Reijo Pitkäranta)

Sanctiones Belorussiae impositae

Parlamentum Unionis Europaeae sessione plenaria habita magistratibus Belorussiae varias sanctiones imposuit. In iis est interdictio itinera faciendi, quae tam diu valebit, donec duces factionis oppositae e custodia liberabuntur. Comitibus enim praesidentialibus mense Decembri factis accidit, ut reclamationes populi a magistratibus Belorussiae violentissime opprimerentur et multi eorum, qui regimini adversabantur, in vincula conicerentur.

(Reijo Pitkäranta)

Quid Cameron proposuerit

David Cameron, princeps minister Britanniae, civitates Europae septentrionales hortatus est, ut societatem cooperandi inirent. Munus eius esse commoda communia Britanniae, Baltiae, Terrarum septentrionalium provehere. Tali foedere pacto nationes eius participes tamquam 'primum agmen civitatum sanioris oeconomiae' ducturas esse.

(Reijo Pitkäranta)

Colosseum privatim reficietur

Amphitheatrum Flavium sive Colosseum sumptu privato reficietur. Diego Della Valle, negotiator Italianus, qui calceis fabricandis sibi magnas divitias paravit, pollicitus est se pecuniam ad hoc opus necessariam aerario publico donaturum esse. Refectio Colosseum saltem viginti quinque milionibus euronum constatura esse existimatur.

(Reijo Pitkäranta)

De sepulcro Tutanchamonis

Sepulcrum pharaonis Tutanchamonis celeberrimum, quod in Valle Regum in Aegypto est, propter magnas peregrinatorum turbas corrumpi coepit. Humor, pulvis, magna multitudo hominum picturis eius

pretiosis iam pessime nocuerunt. Quam ob rem magistratus locales illud sepulcrum hoc anno exeunte claudere volunt, sed exemplar eius viatoribus spectandum aperietur.

(Karoliina Ignatius)

De silvis Finniae mutatis

Constat Finniam silvis celeberrimam esse. Ex arboribus autem in illis crescentibus abies hodie magis atque magis ceteris generibus praevalere coepit. Quae constitutio mutata inde orta est, quod frutices aliarum arborum ut pinuum et betularum plerumque ab alcibus devorantur. Itaque mirum non est possessores silvarum in arboribus serendis abietem plurimi aestimare.

(Reijo Pitkäranta)

De rebus novis Tunesiae

21.1.2011

Cum oppositio politica et reclamatores diu et vehementer flagitavissent, ut munus deponeret, praesidens Tunesiae Zine al-Abidine Ben Ali, qui viginti quattuor annos summam potestatem tenuerat, patria relicta in exilium (14.1.) profectus est. Cum Francia recusavisset, ne praesidentem depositum reciperet, aeroplanum eius in Arabiam Saudianam descendit.

Franci nuntiaverunt ne familiaribus quidem praesidentis exsulis in Gallia manere licere. De loco, ubi Ben Ali exulat, certo non scitur, sed sunt, qui autument eum in urbe Abha versari, quia ibi periculum manifestationum minus sit quam in maioribus Arabiae Saudianae urbibus. In mundo Arabico mutatio rerum Tunesiensium cum circumspectione accepta est. In interreti nuntii communicati sunt, in quibus speratur fore, ut exemplo Tunesiae similes versiones etiam in alias terras Arabicas extendantur. In rebus autem Tunesiensium non de seditione Islamica sed de motu populi agitur. Similiter Ammanae, in urbe capite Iordaniae, cives iam contra paupertatem, inopiam quaestus, corruptionem et pretia mercium aucta reclamaverunt. Motus oppositionis Islamicus (IAF) die Dominico (16.1.) flagitavit, ut regimina Arabica veras renovationes inducerent et hominibus sua iura redderent. In paginis suis interretariis IAF scripsit tyrannidem esse problema principale terrarum Arabicarum.

Ioannes Paulus II beatificabitur

Papa Benedictus XVI decrevit, ut Ioannes Paulus II beatificaretur. Ecclesia catholica censet hunc duobus annis post mortem miraculum fecisse, quia sanctimonialis Gallica, quae auxilium eius oravisset, ex parkinsonismo sanata esset. Civitas Vaticana nuntiavit casum penitus a medicis suis examinatum esse neque sanationi ullam causam scientificam exstitisse. Antequam Ioannes Paulus II sanctus fieri possit, oportet alterum miraculum faciat, quod ecclesia catholica approbet. Beatificatio eius fiet Kalendis Maiis, quo die complura centena milia peregrinorum Romam adventuros esse exspectatur. Ioannes Paulus II, qui anno bis millesimo quinto obiit, viginti septem annos summus pontifex fuit.

Berlusconi scandalis implicatus

In documento hac septimana divulgato accusatores Mediolanenses asseverant Silvium Berlusconi, primum ministrum Italiae, servitiis sexualibus complurium adolescentularum usum esse, ex quibus una iam non duodeviginti annorum tum esset. Orgia luxuriosa in villa prope Mediolanum sita facta esse, in quam adolescentulae pecunia soluta donisque datis invitarentur. In Italia quidem non est legi contrarium servitia sexualia a feminis adultis emere, sed puellas nondum sui iuris corrumpere crimen habetur. Immunitas accusationum, quam primus minister sibi paravit, anno praeterito, ut legi fundamentali contraria, sublata est. Berlusconi crimen a se commissum infitatus est.

(Tuomo Pekkanen)

Strages magna in Arizona

14.1.2011

Die Saturni (8.1.) Tucsoniae, in urbe civitatis Arizonae, strages funestissima accidit, qua sex homines vitam amiserunt et tredecim vulnerati sunt. Quorum in numero erat Gabrielle Giffords, delegata congressus Americani quadraginta annorum, quae in cerebro gravissime sauciata est.

Inter conventum publicum subdialem, quem Gabrielle convocaverat, vir armatus viginti duos annos natus, ex causa ignota sclopeto ex improvviso sumpto homines sibi astantes interficere coepit. Paulo post occisor ille, qui mente perturbatus esse videbatur, comprehensus et custodibus publicis traditus est. Medici credunt miro modo fieri posse, ut Giffords, quamvis glans plumbea comminus emissa caput eius perforaverit, tamen e vulneribus suis reviviscat.

(Reijo Pitkäranta)

Scandalum in Germania

Ministerium agriculturae Germaniae quinque fere milia praediorum rusticorum claudi iussit hac lege imprimis ad regionem Saxoniae inferioris pertinente. Magistratibus hoc faciendum erat, cum investigationibus chemicis apparuisset pabula pecoris dioxino venenoso mixta esse. Dicitur copia dioxini, quae in cibo animalium inerat, etiam septuagies septies id, quod licitum est, superavisse. (Reijo Pitkäranta)

De oeconomia mundana

Oeconomia mundana, postquam per aliquot annos ex magnis difficultatibus laboravit, iam paulatim se recipit. Id affirmaverunt directores generales variarum argentariarum centralium, qui in urbem Basileam congregati erant. Illis mos est alternis mensibus eo convenire ad aestimandum, qualis condicio oeconomiae mundi sit. (Reijo Pitkäranta)

Colosseum totum apertum

Iam primum factum est, ut Amphitheatrum Flavium sive Colosseum totum publico pateret, cum partes eius inferiores quoque adiri sinerentur. Ita viatoribus Romam petentibus occasio data est etiam eas cellas et conclavia cognoscendi, ubi gladiatores et bestiae ferae olim expectabant, donec in arenam ad pugnam committendam admitterentur. (Reijo Pitkäranta)

Peritia chirurgiae Finnicae

Medici Finni in peritia chirurgiae ossium summum fastigium internationale consecuti sunt. Iis enim computatri ope usis contigit, ut ad faciem hominum gravibus laesionibus affectorum transplantata ossibus originalibus simillima applicarent. Materia ad hunc finem maxime idonea videtur esse titanium, quippe quod corpore humano non reiciatur. (Reijo Pitkäranta)

Schola militaris 90 annorum

Schola praefectis copiarum subsidiariorum excolendis in Finnia nuper nonaginta annos complevit. Permulti praefecti militum subsidiarii caerimoniae et decursui sollemni in Portu Frederici sive in urbe Hamina celebratis interfuerunt. In hac schola militari iuvenes militantes erudiuntur, qui tempore belli suis centuriis et manipulis praesint. In cursibus bis in anno instituendis circiter septingeni studentes approbantur. (Antti Ijäs)

Estonia in euronem transiit

7.1.2011

Anno bis millesimo undecimo ineunte Estonia euronem usu recepit et ita facta est septima decima terra regionis euronicae, in qua trecentae triginta miliones hominum habitant. Ex terris olim communisticis Estonia est post Slovakiā et Sloveniam tertia, quae vetere moneta reiecta euronem accepit. Estonienses coronas in euronēs a Kalendis Decembribus mutare potuerunt. Andrus Ansip, primus minister Estoniae, cum primas eurochartulas ex automato argentario media nocte sumeret, monuit euronem secum securitatem attulisse, cum Estonia nunc membrum plenipotentiarium esset regionis oeconomicae, quae magnitudine secunda in orbe terrarum esset.

Hungaria praesidium UE accepit

Kalendis Ianuariis Hungaria praesidium Unionis Europaeae ad sex menses accepit. Membrum Unionis factum est anno bis millesimo quarto. In Hungaria nova de instrumentis communicativis lex nuper lata est, qua libertas rei diurnariae periclitari videtur. Praeter alias terras etiam oppositio Hungariae politica libertatem verbi nova lege impediri censet. Lex enim permittit, ut redactor vel divulgator nuntii, quem vigiles statales offensivum habeant, pecunia vel septingentorum viginti milium euronum multetur. Praeterea, si de re ad securitatem nationalem pertinente agitur, tutela, qua fons informationis fruitur, abrogari potest. Quae cum ita sint, Commissio Unionis Europaeae regimen Hungariae de illa lege quaesivit.

Australia diluviis gravatur

Propter imbres continuos in Queenslandia, civitate Australiae septentrionalis orientalis, diluvia usque gravescunt. Aquae diluviales ex regionibus interioribus in oras humiliores labuntur et iam viginti duo oppida inundaverunt. In urbe Rockhampton, ubi septuaginta quinque milia hominum habitant, diluvium iam novem metra ascendit. Aeriportus iam non est in usu et omnes in illam urbem viae diruptae sunt. Cibus et medicamenta civibus helicopteris a militibus portantur. Regio diluviis afflicta maior est quam omnis superficies Germaniae et Franciae vel ter amplior Finnia. Plus ducenta milia hominum domos suas relinquere coacti sunt. Aquae fodinas carbonis compleverunt et agricolationem, praecipue educationem animalium, male temptant. Periculum est, ne flumina inundantia etiam serpentes et crocodilos secum ferant. In regionibus maxime afflictis superficies aquae ascendere pergit et magistratus timent, ne diluvium saltem duas per septimanas in alto maneat.

Commeatus inter Russiam et Finniam frequentissimus

Commeatus inter Russiam et Finniam in annos crescit. Anno proximo (2010) paene sex miliones octingenta milia hominum limitem transierunt, quod quindecim centesimis plus est quam anno superiore (2009). Praecipue anno vergente et ante epiphaniam viatores Russi frequentissimi pantopolia et deversoria Finnica petunt.
(Tuomo Pekkanen)

Ictus terroristici Stockholmiae

17.12.2010

Die Sabbati (11.12.) media in urbe Stockholmia duae explosiones factae sunt, quos ictus terroristicos fuisse postea apparuit. Primum auctor facinoris autovehiculum lagenis gasi oneratum accendit, quod paulo post explosit. Postquam inde circiter ducenta metra abiit, bomba, quam secum portabat, explosa est, sed nemo nisi ille ipse mortuus est.

Explosione autovehiculi duo homines vulnerati sunt. Terrorista suicidarius sex bombas tubiformes in cingulo habebat, ex quibus una sola explosit. Erat illi etiam pera clavis plena. Decem minutis ante primam explosionem custodes securitatis Suetiae praemonitionem electronicam acceperant, cui annexa erant duo additamenta auditiva, unum Arabicum, alterum Sueticum.

In illis terrorista nationes occidentales accusavit, quod bellum contra fidem Islamicam gererent. Suetiae crimini dedit, quod bellum Afganisticum sustineret et pictorem Lars Vilks, gryllis notum, tueretur. Sacrum bellum praedicavit dicens tempus adesse impetus quibusvis armis faciendi neque quemquam esse timendum. Terrorista, ut postea compertum est, erat Taimur Abdulwahab, vir duodetriginta annorum in Iraquia natus, qui adulescens (1992-2001) in Suetia vixerat ibique civitatem habebat. Inde in oppidum Luton Britanniae migraverat, ubi cum uxore et tribus liberis vivebat atque in centro eius Islamico Islamismum radicalem praeferabat. Etiam per interrete radicalismum propagabat. Parentes, quos Abdulwahab saepe visitabat, adhuc in Suetia habitant. Ad illos aliquot septimanis ante ex Britannia reverterat. Verisimile est eum non ante quam in Britannia radicalizatum esse, nam oppidum Luton unum ex locis principalibus islamismi radicalis in Britannia esse constat.

Argentaria Vaticana de lavatione pecuniae suspecta

Sedes nuntiis divulgandis AP (Associated Press) nuper rettulit Argentariam Vaticanam de pecuniis lavandis suspectam esse atque consuetudines cum mafia et negotiatoribus corruptis habere. Magnas summas ex illa argentaria contra leges Italiae et internationales ita translatas esse, ut possessor, origo et finis pecuniae absconderentur.

Tramen inter Helsinkium et Petroburgum rapidum

Tramen rapidum, nomine "Allegro", inter Helsinkium et Petroburgum commeans, die Dominico (12.12.) inauguratum est. Iter, quod antea sex fere horis fiebat, novo tramine tribus horis et dimidio conficitur. Primo tramine hospites notabiliores cum praesidente Finniae Tarja Halonen vehebantur, quibus in statione Viburgi Vladimir Putin, primus minister Russiae, se adiunxit.

Dies festi appropinquant

Hoc anno vigilia et Nativitatis Domini et Novi anni in diem Veneris incidunt, quo Nuntii Latini transmitti solent. Quam ob rem Nuntii Latini illis diebus non fient. Novo anno bis millesimo undecimo nuntii more solito continuabuntur. Proxima transmissio erit post Epiphaniam sive Festivitatem trium regum septimo die mensis Ianuarii (7.1.2011). Restat, ut auditoribus Nuntiorum Latinorum gratias pro fidelitate eorum agamus et felix festum Nativitatis Domini et Novum annum faustum fortunatumque exoptemus.

(Tuomo Pekkanen)

Emanatio informatica Wikileaks

10.12.2010

His septimanis animi politicorum toto orbe terrarum commoti sunt paginis interretialibus vulgo Wikileaks appellatis. Agitur de divulgatione epistularum clandestinarum, quibus legati Americani sine ullis ambagibus suis superioribus narraverunt, quid de ducibus civitatum cogitarent.

Illa emanatione informatica omnium temporum gravissima factum est, ut ducenta quinquaginta milia nuntiorum secretorum propalam fierent.

(Reijo Pitkäranta)

Hispania multos aeriportus vendit

Regimen Hispaniae varias rationes parcendi approbavit, quae oeconomiae nationis resarciendae inservirent et quibus Unioni Europaeae ostenderetur, quam serii Hispani in aere alieno suo curando essent. Ministris placuit dimidiam partem aeriportuum et tertiam partem aleae publicae possessoribus privatis vendere. Sperant fore, ut civitas isoanica Hispex his negotiis quattuordecim miliarda euronum accipiat.

(Reijo Pitkäranta)

Novum microbium nuper inventum

Investigatores Americani in quodam lacu venenoso Californiano microbium novi generis invenerunt. Maxime id in eo mirantur, quod sine phosphoro vivere et crescere valet ad cellulas suas nutriendas nonnisi arseno utendo. Biochemista Felisa Wolfe Simon ait hunc organismum utilissimum esse ad indolem vitae melius intellegendam.

(Reijo Pitkäranta)

Thermae Romanae repertae

In vico Hierosolymorum vetere ruinae thermarum Romanarum in lucem venerunt. Existimatur haec area partem Aeliae Capitolinae constituisse, quae erat colonia Romana anno centesimo tricesimo ab imperatore Hadriano condita. Creditur balneas nuper repertas in usu legionis decimae fuisse, nam constat castra eius in hac regione iacuisse.

(Reijo Pitkäranta)

Regula Sancti Benedicti Finnice

Regula monasterialis Sancti Benedicti, quae originem ab saeculo sexto trahit, ex Latino in Finnicum translata est. Translationem perfecit grex investigatorum studentiumque Universitatis Helsinkiensis. Benedictus monasterium in Monte Cassino constituit et regulam eius scripsit. Hoc documento vita spiritualis, vitae monasterialis consuetudo, poenae quoque ex delictis sequentes tractantur. Translatores opus suum etiam papae Benedicto XVI mittent.

(Outi Kaltio)

Lahti, urbs praesaepiorum

Tempore natalicio Christianis mos est praesaepia varii generis fabricari. In Finnia praecipue urbs Lahti in hac arte eminet, quippe quae abhinc quinque annos se urbem praesaepiorum Finniae pronuntiaverit. Materia illorum operum multum variat. Ut unum exemplum afferamus, in urbe Lahti praesaepium videre licet, ubi Iesus infans in nido e lana neta contexto iacet.

(Reijo Pitkäranta)

Helsinki nivibus completum

Mense Decembri ineunte Helsinki plurimae nives ceciderunt, quae res civibus ad laborem properantibus magnas difficultates attulit. Acervi enim nivium in viis congregati impediunt, ne vehicula publica aut iter consuetum servare aut in horario constituto manere possint.

(Reijo Pitkäranta)

Destalinazio in Russia suscipietur

3.12.2010

In Russia anno proximo propositum nomine “Destalinizatio” in cohabitatur, cui praesidebit praesidens Dmitri Medvedev: Facinora et crimina contra humanitatem inter Unionem Sovieticam commissa in

lucem proferentur. Archiva secreta aperientur, ut homines de familiaribus inter dictaturam expulsis aut occisis certiora scire possint. Reliquiae castrorum carcerum quaerantur et monumenta victimis ponantur.

Stalino mortuo (1953) moderatores Russiae eum diversis modis aestimaverunt. Nikita Hruschtshev regimen Stalini reprehendebat sed Leonid Brezhnev gratiam eius augere studebat. Mihail Gorbatschov scelera dictatoris aperiebat, Vladimir Putin autem eius merita proferebat. Demum Medvedev destalinizationem inter officia principalia regiminis sui suscepit.

Caedes in silva Katyn scelus Stalini

Ad inceptum destalinizationis spectat, quod Duma Russiae die Veneris (26.11.) declarationem comprobavit, in qua confitetur caedem viginti duorum milium Polonorum in silva Katyn Russiae occidentalis iussu Stalini susceptam esse. Illa caedes incipiente anno millesimo nongentesimo quadagesimo (1940) facta erat. Victimae Polonae erant praefecti militum, magistri, professores, magistratus alique homines eruditi. Natalia Lebedeva, sodalis Academiae Scientifica Russiae, censet caedem in silva Katyn maturatam esse, quia spatium desideraretur captivis ex Finnia deportandis. Stalino autem non contigit, ut bello hiemali, quod tum (1939-40) gerebatur, Finnam expugnaret civesque inde deportaret.

Gratia popularis regis Suetorum deminuta

Plures Suetorum quam ante sperant fore, ut rex Carolus XVI Gustavus se corona abdicet. Ex demoscopia, quam acta diurna Dagens Nyheter nuperrime instituit, tantum dimidia fere pars civium (51%) regi favebat, cum mense Februario anni praeteriti (2009) sexaginta quattuor centesimae (64%) illum in throno mansurum esse optarent. Tertius quisque ex respondentibus volebat, ut corona Victoriae, principissae hereditariae, transferretur. Domum Suetiae regiam gravat liber de rege biographicus mense Novembri divulgatus, in quo inter alia de lascivia eius privata narratur. Mense Iunio, cum nuptiae principissae Victoriae celebrarentur, familia regia adhuc magno apud populum favore gaudebat.

Nox polaris in Nuorgam incipit

Vicus maxime septentrionalis Finniae est Nuorgam, qui iacet in paroecia Utsjoki apud flumen Teno. Ibi proximo die Sabbati (27.11.) sol ultimum hoc anno occidit. Manebit post horizontem sex septimanas, nam non ante quam die sexto decimo mensis Ianuarii est oriturus. Neque tamen nox polaris est omnino tenebrosa. Obscuritas est caerulea et, dum luna splendet, tam bene videas quam interdiu. Praeterea noctem Aurora borealis illuminat. Apud polum Arcticum nox polaris sex menses durat sed fit eo brevior quo longius a polo disceditur. In circulo Arctico est tantum unius diei.
(Tuomo Pekkanen)

Conflictus inter Coreas

JULKAISTU 26.11.2010 KLO 10.17

Die Martis (23.11.) non multum aberat, quin in paeninsula Corea bellum perniciosum exardesceret. Conflictus initium cepit, cum Coreani Septentrionales circiter ducenta proiectilia in insulam Yeonpyeong emisissent, ubi Coreani Meridiani exercitationem militarem agebant. Impetu ex inopinato facto saltem duo milites mortui et tres cives vulnerati sunt. Corea Meridiana autem statim aggressioni respondebat hostes septentrionales tormentis suis verberando et aeroplanis insectatoriis in aera missis. Postea res pacata est, sed illa pugna in gravissimis conflictionibus inter utramque terram ortis numeratur post bellum Coreanum anno millesimo nongentesimo quinquagesimo tertio (1953) compositum.
(Reijo Pitkäranta)

Discrimen Irlandiae

Moderatores Irlandiae necessitate coacti tam ab Unione Europaea quam a Fundo monetario internationali (IMF) et a Mensa nummaria centrali Europae auxilium pecuniarium petiverunt. Neque civitates Unionis Europaeae petenti veniam dare recusaverunt, cum metuerent, ne, nisi id fecissent, discrimen argentarium latius diffunderetur. Summa pecuniae, qua Irlandiae ad oeconomiam suam servandam opus est, etiam centum viginti miliarda euronum efficere potest.
(Reijo Pitkäranta)

De militia Germaniae

Germania aestate proxime futura militia generali desistet, ut minister defensionis Karl-Theodor zu Guttenberg die Lunae Dresdae nuntiavit. Quae cum ita essent, inde a mense Iulio ineunte nullos

dilectus iam in Germania fore. Idem ait magnitudinem exercitus Germaniae ad centum octoginta milia virum reductum iri.

(Reijo Pitkäranta)

Nova Zelandia in luctu

Die Iovis (25.11.) in Nova Zelandia vexilla medio palo sunt proposita propter explosionem in metallifodina septimana proxima factam. Creditur omnes undetriginta fossores, qui ibi laborabant, ea calamitate vitam amisisse. Id eo verisimilius est, quod die Mercurii (24.11.) in iisdem metallis nova explosio gasalis eaque maior quam ante accidit. Negavit dux gregis servatorii quemquam ex tanto malo vivum evadere potuisse.

(Reijo Pitkäranta)

De litteris in Peruvia inventis

Archaeologi in ruinis cuiusdam ecclesiae Peruviana litteras saeculo septimo decimo compositas invenerunt, quibus systema numerorum linguae ignotae scriptum est. Ea lingua, quae in usu aboriginum Peruviae fuerat, abhinc multa centena annorum extincta est. Investigatores narrant sermonem inventum similem esse eius linguae, qua multae miliones hominum etiam nunc in Andis loquuntur.

(Saara Honkanen)

Consilia tigris servandis

Legati civitatum Asiae Petroburgum congregati decreverunt impediendum esse, ne tigres ex orbe terrarum omnino emorerentur. Inter participes convenit, ut populatio tigrum duodecim annis duplex redderetur. Iisdem placuit novas rationes excogitare, quibus venatio occulta efficacius quam ante prohiberetur et regiones tigrum tutelares amplificarentur.

(Reijo Pitkäranta)

Aung San Suu Kyi liberata

JULKAISTU 19.11.2010 KLO 11.11

Custodia libera, qua Aung San Suu Kyi, dux oppositionis Burmanae, post annum millesimum nongentesimum nonagesimum (1990) omnino quindecim annos habita erat, die Sabbati (13.11.) ad finem venit. Postridie eius diei Suu Kyi multis milibus fautorum suorum orationem pro democratia et libertate loquendi et scribendi habuit. Monuit se velle omnibus viribus democraticis cooperari et petivit, ut homines, quid vellent, sibi dicerent. Addidit in consilium militare, quod se libertate privavisset, se odium non habere.

Apud nationes occidentales nuntius de liberatione dominae Suu Kyi cum gaudio receptus est.

Praesidens Barack Obama illam heroidem suam appellavit et flagitavit, ut consilium Burmae militare omnes captivos politicos liberaret.

Praesidens Nicolas Sarkozy consilium militare praemonuit, ne commeatum dominae Suu Kyi ullo modo circumscriberet. Suu Kyi, sexaginta quinque annos nata, anno millesimo nongentesimo nonagesimo primo (1991) praemium pacis Nobelianum cepit.

Haitiani contra Nationes Unidas reclamant

In multis urbibus Haitianis incolae contra Nationes Unidas reclamaverunt. Causa est, quod Haitiani credunt milites Nepalianos Nationum Unitarum cholera in patriam suam attulisse. Duo homines mortui sunt, cum milites tumultuantes, qui lapides iaciebant et autoraedas concremabant, sclopetando pacare conarentur.

Cholera in Haitia celeriter vagatur et iam plus mille homines illo morbo perierunt et praeterea multa milia incolarum contagione affecti sunt. Propter motum terrae mense Ianuario factum milio fere Haitiani domibus amissis adhuc in condicionibus miserrimis apud Portum Principis (Port-au-Prince) sub tentoriis vivunt.

Incendium multizonii calamitosum

In multizonio urbis Shanghai, duodequadragesima metra alto, die Lunae (15.11.) incendium ortum est, quo saltem quinquaginta tres homines perierunt. Ignis initium habuit ex sustentaculis ligneis, quae contra parietes aedificii externos posita erant. Suspicio est ferruminae, qui in illis sustentaculis operabantur, praecepta securitatis neglexisse.

Princeps William amicam Kate sibi despondit

William, princeps Britanniae, amicam Kate (Catherine Elisabeth) Middleton sibi despondit. Sponsalia iam mense Octobri in Kenia facta sunt. Domus regia Britannorum nuntiavit nuptias anno proximo, vere aut aestate, Londinii celebratum iri. William, filius maior principis Caroli (Charles) et principissae Dianae, est alter a patre heres regni Britannici. Kate Middleton oriunda est ab oppidulo Bucklebury in Berkshire, ubi parentes eius sunt mercatores.

William et Kate in Universitate Sancti Andreae (St Andrew's) in Scotia inter se convenerunt, cum ibi anno bis millesimo primo (2001) studia historiae artis suscepissent. Anulus sponsalis, quem Kate accepit, idem est, quo princeps Carolus principissam Dianam sibi desponderat.

(Tuomo Pekkanen)

Comitia in Burma fraudulenta

JULKAISTU 12.11.2010 KLO 17.18

In Burma post viginti annos prima comitia parlamentaria die Dominico (7.11.) facta sunt. Factio USDP, a consilio militari sustentata, quae sola in omnibus regionibus candidatos habebat, octoginta centesimas ex sedibus parlamentariis occupavit. Sed et oppositio et observatores peregrini comitia, ut fraudulenta et minime libera, vehementer vituperaverunt.

Quarta pars sedium parlamentariarum iam in antecessum militibus reservata erat. Consilium militare summam potestatem in Burma iam duodequingenta annos tenet. In comitiis anno millesimo nongentesimo nonagesimo factis oppositio victoriam reportavit sed milites non permiserunt, ut eventus comitiorum in effectum perduceretur.

Praesidens Medvedev legem reiecit

Praesidens Russiae Dmitri Medvedev recusavit, quominus legi subscriberet, qua reclamationes oppositionis restringerentur. Antea illa lex in utraque camera parlamenti magna cum maioriitate suffragiorum probata erat. Praesidens, qui ad leges a parlamento latas ius vetandi habet, censebat reclamationes esse iura civium constitutionalia.

Diurnarii Russiae in periculo

Post Unionem Sovieticam dissolutam complures redactores in Russia male mulcati aut occisi sunt. Septimana praeterita Oleg Kashin, redactor actorum Kommersant, apud domum suam tam crudeliter caedebatur, ut vix vivus evaderet. Nunc parlamentum novam legem praeparat, qua impetus contra redactores facti gravius quam ante puniantur. Ex nova lege tale crimen carcere duodecim annorum aut, si violentia est gravis, etiam perpetuo carcere puniri possit. Praesidens Medvedev confessus est redactores Russiae in periculo esse et affirmavit aggressores redactoris Kashin punitum iri.

Domus Gladiatorum Pompeiis corruit

Aedificium Pompeianum, quae Domus Gladiatorum appellatur, nuper corruit. Illa domus iacet apud viam principalem Pompeiorum, qui eruptione montis Vesuvii anno undeoctogesimo p.Chr.n. obruti sunt. Tectum domus post damna, quae bombardatione secundi belli mundani ceperat, reffectum erat ideoque verisimile habetur, quod parietes antiqui pondus eius portare non potuerunt.

Statua Iesus in mundo altissima

In oppido Swiebodzin Poloniae occidentalis posita est statua Iesus, quae in orbe terrarum altissima dicitur. Antea altissimus erat Iesus in urbe Rivo Ianuario statutus, cuius altitudo est triginta metrorum. Statua Swiebodzinensis altitudinem habet triginta sex metrorum et pondus quadringentarum quadraginta tonnarum.

Securis veterrima in Australia reperta

Archaeologi in Australia septentrionali partem securis lapideae reppererunt, quae triginta quinque milium quingentorum annorum esse putatur. Adhuc credebatur securim esse instrumentum originis Europaeae. Sed veterrima exemplaria Europaea facta sunt post proximam aetatem glaciale ante viginti vel maxime triginta milia annorum.

(Tuomo Pekkanen)

De comitiis Americanorum

JULKAISTU 05.11.2010 KLO 15.59

In Civitatibus Americae Unitis comitia parlamentaria habita sunt, quae praesidenti Barack Obama et

factioni democraticae magnam cladem attulerunt. In senatu quidem democratae principatum servaverunt, sed in camera delegatorum potestas politica ad republicanos transiit, quippe qui ibidem sexaginta novas sedes sibi conciliarent.

(Reijo Pitkäranta)

De pacto defensivo inito

Inter Britanniam et Francogalliam pactum defensivum factum est, quod historicum describitur. Tractatus eo spectat, ut hae nationes copias communes constituent et sedem armis nuclearibus investigandis in Francogallia condant. Huius instituti erit cavere, ne securitas armamentorum atomicorum in periculum vocetur.

(Reijo Pitkäranta)

Conventus circumiectalis

Ministri circumiectales plus ducentarum terrarum in Iaponia conventum egerunt, ut novas rationes ad raras animantium species tutandas invenirent. Inter participes de programme usque ad annum bismillesimum vicesimum (2020) valituro convenit, quo biodiversitas naturae servaretur et usus opum naturae aequaliter inter omnes gentes divideretur.

(Reijo Pitkäranta)

Expositio mundana finita

Expositio mundana, quae Sanghaevi per annum dimidium aperta erat, mense Octobri exeunte clausa est. Dubium non est, quin haec monstratio in eventus multitudinem hominum omnium temporum frequentissimos referenda sit, cum eam septuaginta duae fere miliones hospitem obierint. Una ex eis erat Mari Kiviniemi, princeps ministra Finniae, quae ultimo expositionis die illum locum visitavit.

(Reijo Pitkäranta)

Iter Victoriae et Danielis

Kalendis Novembribus (1.11.) Victoria, principissa hereditaria Suetiae, et princeps Daniel Helsinki venerunt, ubi a praesidente Finniae Tarja Halonen et coniuge eius benevolentissime excepti sunt. Favor popularis eorum tantus erat, ut die Martis octo fere milia hominum in Forum mercatorium convenirent parvis regalibus videndi causa. Victoria brevi oratione habita multitudinem e maeniano curiae urbis salutavit.

(Reijo Pitkäranta)

Sclopetator serialis Suetiae

Malmoeae, in urbe Suetiae meridiana, amplius centum custodes publici occisorem ignotum quaerunt, qui homines peregrinorum similes ex insidiis interficere videtur. Iam unum virum sclopeto occidit et complures vulneravit. Diurnarii monent haec facinora insignem similitudinem eorum homicidiorum prae se ferre, quae Vir lasericus sic dictus annis nonagesimis in Suetia commiserit.

(Reijo Pitkäranta)

Nova lingua in India reperta

Investigatores Americani linguam novam nomine Koro in India invenerunt. Haec lingua, qua circiter octingenti homines loquuntur, antea nonnisi dialectus esse iudicabatur. Koro ab aliis linguis Tibeto-Burmanis et phonetica et copia verborum maxime differt, sed locutores differentias pro nihilo habent et putant linguam suam simillimam sermoni vicinorum suorum esse.

(Antti Ijäs)

Corruptio in Finnia minima

JULKAISTU 29.10.2010 KLO 10.28

In comparatione, quam ordo Transparency International de corruptione instituit, Finnia inter centum duodecoginta (178) nationes una ex terris minime corruptis iudicata est. Ante Finniam, quae una cum Suetia quarto loco posita est, sunt Dania, Nova Zelandia, Singapura. Maxime corruptae iudicatae sunt Somalia, Burma, Afganistania.

Maxima navis in Finnia facta

Navis traectoria, in toto mundo maxima, nomine « Allure of the Seas » (Illecebra marium), hodie

navalia urbis Turku reliquit. Est longitudine trecenta sexaginta unum (361) metra, latitudine sexaginta sex metra. Vectores sex milia trecentos sexaginta (6360) capere potest. Navis gemina eiusdem prope magnitudinis in eisdem navalibus anno ante perfecta est. Utraque navis facta est mandatu Societatis Royal Caribbean Cruises Ltd. Potius ad navigationes voluptarias destinatae sunt quam ad commeatum, nam sunt velut magnifica palatia aut deversoria fluitantia, artificiiis, hortis viridariisque ornatae et omni luxu et omnibus commoditatibus instructae.

Lex pensionaria a parlamento Francorum accepta

Lex pensionaria, quam regimen Francorum tulit, ab utraque camera parlamenti accepta est. Pensiones ita renovabuntur, ut aetas incipientis pensionis a sexaginta annis ad sexaginta duos annos promoveatur. Cum foederationes syndicales de lege ad iudicium constitutionale appellaturae sint, fieri poterit, ut illa non ante quam proximo mense valere incipiat.

Tariq Aziz capitis damnatus

Tariq Aziz, pristinus minister Iraquiae, die Martis (26.10.) capitis damnatus est, quod populum shiitarum persecutus erat. Supremum iudicium Iraquiae decrevit, ut laqueo suspenderetur. De illa poena intra spatium triginta dierum appellare poterit. Tariq Aziz, vir septuaginta quattuor annorum, erat proximus adiutor dictatoris Saddam Hussein, Fuerat minister a rebus exteris et primi ministri vicarius et habebatur velut facies internationalis regiminis Saddami. Quod complures mercatores interficiendos curaverat et Curdos ex domiciliis expulerat, iam antea carcere damnatus erat. Ipse Saddam laqueo suspensus est mense Decembri anno bis millesimo tertio.

Cholera in Haitia et Nigeria grassatur

In Haitia cholera epidemica grassatur. Plus duo milia sescenti Haitiani in morbum iam inciderunt et plus ducenti ex eis mortui sunt. Etiam in Nigeria idem morbus male crebrescit, nam casuum cholerae sunt hoc anno plus duodequadragesita milia. Cholera per aquam inquinatam et cibum vagatur et sine curatione mortem aegrotanti affert.

Dies festus Nationum Unitarum

Consociatio Nationum Unitarum tractatu internationali die vicesimo quarto mensis Octobris anno millesimo nongentesimo quadragesimo quinto (24.10.1945) condita est. Itaque die Dominico proximo sexaginta quinque anni ab illa consociatione condita acti erant, cuius propositum est pacem et securitatem in orbe terrarum promovere.

(Tuomo Pekkanen)

Res francogalliae turbatae

JULKAISTU 22.10.2010 KLO 12.07

In Francogallia reclamationes violentissimae cum operistitiis amplis ortae sunt, quae vitae civium cotidiana multumodis officiunt. In diversis terrae partibus turbatores aedificia incenderunt et custodibus publicis manus intulerunt. Saevit vulgus in administatores, qui novam legem pensionariam populo ingratam perlaturi sunt.

(Reijo Pitkäranta)

Programma Iraniae nucleare

Cathrine Ashton, ministra Unionis Europaeae a rebus exteris, Iranianis novas consultationes de programme eorum nucleari proposuit. Manouchehr Mottaki, minister Iranianus, hoc consilium 'bonum nuntium' descripsit et dixit fieri posse, ut illa colloquia triduana aut mense Octobri aut Novembri agerentur.

(Reijo Pitkäranta)

De re publica Portugallia

Hoc mense ineunte centum anni acti erant, cum Portugallia regibus exactis res publica libera facta est. Die enim quinto mensis Octobris anno millesimo nongentesimo decimo (5.10.1910) rex Emmanuel II Londinium exsulatum ire coactus est, quo facto Portugallia ex regno in civitatem popularem mutata est. Iubilaeum saeculare in Portugallia variis sollemnitatibus celebrabatur.

(Reijo Pitkäranta)

Cuniculus ferroviarius longus

Ultima pars cuniculi ferriviarii, quo Helvetia cum Italia coniungeretur, in visceribus montis Sancti Gotthardi, ad finem est adducta. Ita ortus est meatus subterraneus quinquaginta septem chiliometrorum, quo longior nullus alius transitus subter montes ductus invenitur. Primum tramen maximae velocitatis in novo cuniculo subalpino anno bismillesimo septimo decimo (2017) commeare incipiet.
(Reijo Pitkäranta)

Quid NASA in Finnia faciat

Administratio Aeronautica et Spatialis (NASA) Americana in Finnam rerum peritos misit, qui hic pluviam tenuissimam investigarent. Imprimis scire volunt, quonam modo nubes conformentur et quibus rationibus imbres in hemisphaera septentrionali oriantur. Locus operandi principalis illis est aerioportus Turkuensis, ubi iam per unum mensem observationes meteorologicas faciunt.
(Reijo Pitkäranta)

Missale quoddam mediaevale

Bibliotheca nationalis Britanniae (British Library) missale, quod originem ab saeculo duodecimo trahit, Italiae reddit. Missale bello mundano secundo ex ecclesia cathedrali Beneventana raptum anno millesimo nongentesimo quadragésimo septimo (1947) in possessionem Musei Britannici (British Museum) post auctionem venit. Nova lex de rebus culturalibus reddendis efficit, ut missale veris possessoribus reddi possit.
(Outi Kaltio)

Vicus pristinus Norvegiae

In Norvegia meridiana vicus ex aetate lapidea oriundus repertus est. Iacebat in profunditate duorum metrorum et tam bene conservatus erat, ut non deessent, qui censerent illam aream archaeologicam parvos Pompeios appellandos esse. Rerum periti arbitrantur hunc vicum abhinc quinque milia quingentos annos subita tempestate orta aggeribus arenosis obrutum esse.
(Reijo Pitkäranta)

Fossores Chilienses servati

JULKAISTU 18.10.2010 KLO 09.52

15.10.2010

Die Mercurii (13.10.) mane triginta tres fossores Chilienses, qui per duodeseptuaginta dies in caverna subterranea inclusi fuerant, in sublime extolli coepti sunt. In profunditatem septingentorum fere metrorum, ubi illi versabantur, capsula auxiliaria nomine Phoenix demissa est, in cuius caveam angustissimam impositi singuli viri alternis vicibus velut ab inferis ad vivos extrahebantur. Omnium primus servatus est Florencio Avalos, suppraefectus opificum unum et triginta annos natus. Luis Urzua autem, vir quinquaginta quattuor annorum, qui gregi fossorum praeerat, ultimus ex tenebris in lucem venit.
(Reijo Pitkäranta)

Quo modo illi recepti sint

Ad metallifodinam San José, ubi calamitas acciderat, non solum propinqui fossorum, sed etiam alii homines ex omnibus orbis terrarum partibus magna multitudine congregati erant animis suspensis spectaturi, quo modo opus servandi succederet. Praeter praesidentem Chiliae illuc venerat princeps civitatis Boliviae, cum unus ex operariis concivis eius esset. Viri e capsula egressi in complexu suorum haerentes cum magno applausu et lacrimis in genas manantibus excepti sunt. Qui e periculo mortis servati erant, et Deo et patriae suae pro salute sibi reddita gratias agebant.
(Reijo Pitkäranta)

Clades oecologica Hungariae

In Hungaria magna clades oecologica facta est, cum e fabrica alumini eiectamenta venenosa in vicum proxime situm nomine Kolontar effluxit. Saltem novem homines ea calamitate vitam amiserunt, et totus pagus Kolontar limo alcalico obrutus est. Diluvium purgamentorum effecit, ut illa communitas ab incolis vacuefacienda esset.
(Reijo Pitkäranta)

Liu novus Nobelista pacis

Praemium Nobelianum pacis accipit hoc anno Liu Xiaobo, dissidens Sinensis quinquaginta quattuor

annos natus. Anno proximo ille vir, postquam a moderatoribus Sinarum diu postulavit, ut civibus patriae suae maior libertas concederetur, rerum novarum accusatus vinculis undecim annorum damnatus est.

(Reijo Pitkäranta)

Quid in Corea acciderit

Dictator proximus Coreae Septentrionalis videtur fore Kim Jong-un, filius directoris hodierni Kim Jong-il. Quae successio eo veri similior existimatur esse, quod hic iuvenis viginti quinque fere annos natus non ita pridem dux generalis nominatus est. Septimana vergente etiam una cum patre magnam pompam militarem publice salutabat.

(Reijo Pitkäranta)

De operibus Sacelli Xystini

Multitudo periegetarum operibus tectoriis Sacelli Xystini magno periculo est, ut refert Antonia Paolucci, praefecta museorum Civitatis Vaticanae. Ad viginti milia hominum cotidie hoc sacellum visitantium huc nimis sordium atque umoris secum inferre. Inde sequi, ut picturae a Michelangelo factae detrimentum capiant.

(Tom Bergman)

Germania XX annos unita

JULKAISTU 08.10.2010 KLO 09.41

Die Dominico (3.10.) erat anniversarium vicesimum diei, quo Germania Occidentalis (Res publica Foederata Germaniae) et Germania Orientalis (Res publica Democratica Germaniae) unitae sunt. Sollemnia principalia cancellaria foederali Angela Merkel duce in urbe Brema celebrata sunt.

Unificatio initium cepit, cum Murus Berolinensis mense Novembri anno millesimo nongentesimo undenonagesimo (1989) dirutus est. Prima comitia libera in Germania Orientali mense Martio anni sequentis (1990) habita sunt.

Duobus post mensibus unio monetaria inter utramque Germaniae partem iuncta est et die tertio mensis Octobris lex Germaniae fundamentalis etiam in civitatibus Germaniae orientalibus denuo constitutis valere coepit.

Nigeria independentiam celebravit

Nigeria Kalendis Octobribus annum independentiae quinquagesimum celebravit. Paulo ante quam sollemnia Abujae, in urbe Nigeriae principe, coeperunt, duae bombae in autocinetis positae ibi disploserunt. De illis bombis grex nomine Mend cursu electronico praemonuerat.

Hic grex, qui in faucibus fluminis Nigris versatur, flagitat, ut opes Nigeriae petroleariae iustius dividantur. Sed postea Goodluck Jonathan, praesidens Nigeriae, nuntiavit in culpa esse parvum gregem terroristarum, qui extra fines Nigeriae agerent. Nigeria est populosissima in Africa civitas, ubi centum sexaginta miliones hominum habitant. Civitas foederalis sui iuris facta est anno millesimo nongentesimo sexagesimo.

Comitia Brasiliae praesidentialia

Prima suffragia comitorum praesidentialium in Brasilia die Dominico (3.10.) acta sunt. Dilma Rouseff, candidata factionis operariorum, quae in demoscopiis ante comitia factis longe maxima apud cives gratia valebat, quadraginta sex centesimas suffragiorum accepit, Jose Serra, democrata socialis, triginta tres centesimas adeptus est.

Ad urnas quaterni ex quinis Brazilianis accesserunt. Cum nemo ex candidatis plus quam dimidium suffragiorum nactus sit, altera suffragia pridie Kalendas Novembres fient. Dilma Rouseff, cui Luiz Inacio Lula da Silva, praesidens hodiernus, quam maxime favet, si victrix discesserit, erit prima praesidens femina Brasiliae.

Nova lex tabacaria

Nova lex tabacaria, durissima totius mundi, in Finnia a Kalendis Octobribus valet. Ad id praecipue spectat, ne liberi et adulescentes fumificare incipiant. Propositum est usum tabaci finire. Minutatim vendentibus merces tabacarias exhibere et duodeviginti annis minoribus vendere non licet.

Adulescentibus etiam illarum mercium importatio et possessio vetatur. Interdictio fumificationis

amplificatur ad loca, in quibus fumus saluti praesentium nocere potest, ut ad caveas spectaculorum, quae sub divo fiunt, spatia communia condominiorum aliaque similia.
Lex tam dura ferri potuit, quia Finnia tantum venditores tabaci sed nullam industriam tabacariam habet.
(Tuomo Pekkanen)

Consultationes de pace

JULKAISTU 01.10.2010 KLO 10.09

Benjamin Netanjahu, princeps minister Israelis, interdictum de novis domibus in coloniis Iudaeis aedificandis sustulit. Mahmud Abbas, praesidens Palaestiniensium, ob eam rem iratus se a consultationibus de pace recessurum esse minatus est. Septimana proxima apparebit, utrum consilium suum perfecturus sit necne.

Chavez cladem accepit

Septimana vergente in Venetiola comitia parlamentaria facta sunt. Sententiis computatis apparuit eos, qui regimini adversantur, amplius tertiam partem sedium parlamentarium sibi conciliavisse. Ita socialistae una cum praesidente Hugo Chavez cladem acceperunt, cum speravissent se duas saltem votorum partes consecuturos esse. Si id iis contigisset, fieri potuit, ut terram ad suum arbitrium administrarent.

Luzhkov munus deposuit

Juri Luzhkov, praefectus urbis Moscuae, iussu praesidentis Russiae Dmitri Medvedev munus deponere coactus est. Causa dimissionis, de qua etiam princeps minister Vladimir Putin consensit, fides amissa fuisse nuntiatur. Luzhkov non ita pridem praesidentem Medvedev reprehendit censens Russiam manu fortiore regendam esse.

De minis terroristarum

E fontibus exploratoriis cognitum est terroristis propositum fuisse, ut impetum in complures urbes Europaeas uno tempore facerent. Iis in animo fuisse tam Londinium quam nonnullas metropoles Germaniae et Francogalliae aggredi. Suspicio harum insidiarum in bellatores ordinis Al-Qaida incidit, quorum castra in finibus Pakistaniae posita sunt.

De vi nucleari Suetiae

Constat in Suetia decem electrificinas nucleares esse, quarum quattuor in praesenti clausae sunt et quinta quoque mox claudetur propter quasdam difficultates technicas. Periculum est, ne proxima hieme idem fiat quod anno superiore, quo complura ergasteria nuclearia vitiis technicis laborantia omnino non fungebantur. Quae si ita erunt, Suetos energiam electricam e terris peregrinis emere necesse erit.

Navis antiqua reperta

In ora Italiae navis oneraria antiqua inventa est, quae circiter anno a.Chr. n. centesimo tricesimo in mari Italiae circumfuso submersa erat. Onus eius constabat cum e re vitrea Syriaca tum e medicamentis Graecis, quae antea nonnisi e scriptis medicorum antiquorum nota erant. In remediis etiam helianthus repertus est, quamquam opinio vetus erat eum non ante quam saeculo quinto decimo in Europam venisse.

Venatio alcium iniit

Die Saturni (25.9.) in Finnia venatio alcium initium cepit. In regionibus autem terrae septentrionalibus haec animalia iam Kalendis Septembribus probandi causa caedi coepta sunt. Existimantur amplius centum milia venatorum hoc autumnus ad alces sternendas profectura esse, et praedam eorum septuaginta fere milium alcium fore creditur.
(Reijo Pitkäranta)

Comitia parlamentaria Suetiae

JULKAISTU 24.09.2010 KLO 10.43

comitiis Suetiae parlamentariis coalitio partium dextrarum centum septuaginta tres (173) delegatos parlamentarios obtinuit. Oppositio rubro-prasina, in qua sunt democratae sociales, prasini, factio sinistra, centum quinquaginta sex delegatos (156) accepit.
Nova factio, cui nomen est Democratae Suetiae, viginti delegatos assecuta est. Cum in parlamento

Suetiae numerus delegatorum sit trecenti undequinquaginta (349), neque coalitio dextra, ex qua hodiernum regimen constat, neque oppositio rubro-sinistra maioritatem in novo parlamento habet. Ad novum regimen constituendum difficultas in eo est, quod ceterae partes recusant, quominus cum Democratis Suetiae cooperentur. Hi enim, cum immigrationem vehementer coercere velint, xenophobiae accusantur.

Volunt etiam registrum paedophilorum divulgare et criminibus sexualibus maiores quam nunc poenas imponere. Est in programme factionis etiam pensiones augere atque securitatem et vitae condiciones senum meliores reddere.

De condicione zingarorum in Unione Europaea

Postquam Bulgaria et Romania ad Unionem Europaeam adiunctae sunt, zingari in his terris habitantes in terras occidentales catervatim migrare coeperunt. Casulis fortuitis in suburbiis positos victum mendicantes quaerunt. Etiam in maioribus urbibus Finniae zingari mendici cum liberis infantibusque haud raro videntur. In Francia numerus zingarorum in casulis illegalibus habitantium tantopere crevit, ut moderatores iam plus mille zingaros in Romaniam et Bulgariam remitterent. Quod cum apud Unionem Europaeam reprobatum esset, Francois Fillon, minister primarius Franciae, flagitavit, ut Unio Europaea consilia communia caperet, quibus problema zingarorum mendicantium solveretur.

Letalitas puerorum deminuta

Ordo Unicef refert letalitem puerorum, qui nondum quinque annos compleverint, post annum millesimum nongentesimum nonagesimum (1990) tertia parte deminutam esse. Mortes puerorum praematurae in terras usque rariores coacervantur. Maxima est letalitas in Africa infra Saharam, ubi singuli ex quinque puerulis ante diem natalem quintum moriuntur.

Disputatio de adipibus renovata

Adipes animalium forsitan non sunt tam insalubres quam vulgo creditur. Testimonia scientifica de nexu inter adipem et morbos cardiovasculares non sunt firmissima, nam etiam usu oleorum vegetaliū morbi cardiaci augescunt. Res est ambigua. Regula generalis a scientificis Finnis data est, quod olea vegetalia salubriora sunt quam adipēs animalium.

Octobralia Monaci celebrantur

Festum populare cervisiae, vulgo Oktoberfest, quod anno millesimo octingentesimo decimo in prato Monacensi primum celebrabatur, iubilaeum ducentesimum agit. Ad dies festos, quorum numerus hoc anno iubilaeo est septendecim, plus septem miliones hospitum exspectantur. Maxima quantitas cervisiae, in Octobralibus venditae, est sex virgula novem (6,9) miliones litrarum. (Tuomo Pekkanen)

Elop novus director Nokiae

JULKAISTU 17.09.2010 KLO 09.39

17.9.10

Novus director generalis societatis telecommunicativae NOKIA designatus est Stephen Elop, vir Canadensis quadraginta sex annos natus. Hoc munus inibit die vicesimo primo huius mensis (21.9.). Olli-Pekka Kallasvuo, pristinus director natione Finnis, qui eidem societati quinque annos praefuerat, officio decedere coactus est, cum ei non contigisset, ut administratoribus opere suo satisfaceret.

Irja Askola episcopus ordinata

Finnia primam episcopum feminam accepit, cum Irja Askola, magistra theologiae quinquaginta septem annos nata, episcopus dioecesis Helsinkiensis ordinata est. Caerimonia die Dominico, pridie Idus Septembres (12.9.), in Ecclesia cathedrali Helsinkiensi facta est eamque procuravit Kari Mäkinen, archiepiscopus ecclesiae evangelico-Lutheranae Finniae. Ei ordinationem exsequenti assistebant multi episcopi peregrini.

Defectio legati Iraniani

Hossein Alizadeh, qui in sede diplomatica Iraniae in Finnia ministrabat, legatione deposita sibi asylum politicum a Finnis petivit. Inter colloquium diurnariis datum syngraphum suum Iranianum coram omnibus abiecit et negavit se iam in patriam reverti posse. Ait se iis adiunctum esse, qui praesidenti Iraniae omnia iura humana neglegenti vehementer resisterent.

Expeditio Finnica contra piratas

Anno futuro ineunte ex Finnia navis minis everrendis nomine Pohjanmaa in Somaliam proficiscetur. Navigio centum viginti milites imponentur, quorum erit aquas Cornus Africae adversus aggressiones piratarum tueri itaque impedire, ne transportationes cibariae in Somaliam missae in periculum vocentur.

Democratia in Turcia augetur

Suffragio generali in Turcia instituto apparuit maiorem suffragatorum partem suavisse, ut lex fundamentalis a regimine militari duodeviginti annis ante perlata ex multis partibus mutaretur. Princeps minister Erdogan voluntate populi gavisus nuntiavit eventum comitiorum documento esse Turciam iam propius legislationem Unionis Europaeae accessisse.

Turris Eiffeliana vacuefacta

Die Martis (14.9.) turris Eiffeliana et area ei circumiecta a duobus fere milibus hominum vacuefactae sunt, cum quidam vir ignotus telephonice nuntiavisset ibi bombam collocatam esse. Rerum periti tamen eo loco nihil suspiciosi invenerunt, quam ob rem illud aedificium plus trecenta metra altum die Mercurii mane denuo patefactum est.

Sherlock Holmes renovatus

Corpus radiophonicum Britannicum, vulgo BBC nuncupatum, hac aestate seriem televisificam nomine Sherlock praesentavit, ubi Sherlock Holmes, detector ille celeberrimus, scelera in hodierno Londinio commissa investigat. Programma apud spectatores tanta gratia valebat, ut fieri non posset, quin eadem societas scriptores ad novas fabulas Sherlockianas componendas hortaretur.

Islamismum radicalem maximum periculum

JULKAISTU 10.09.2010 KLO 09.23

10.9.2010

Tony Blair, pristinus primus minister Britanniae, dicit islamismum radicalem maximum huius temporis periculum esse. In colloquio percontativo societatis radiophonicae BBC monuit terroristis omnia facinora nomine islamismi licita esse, in his usum armorum chemicorum, biologicorum nucleariumque, quae adhibere non dubitarent.

Feminae innuptae, hereditas bellorum Iraquicorum

In Iraquia iuvenes feminae magnas difficultates maritum inveniendi habent, nam his tribus decenniis tria bella in Iraquia gesta sunt, in quibus complura centena milia virorum ceciderunt. Itemque complura centena milia iuvenum, ut militiam et violentiam evitarent, peregre effugerunt.

Ita numerus feminarum innuptarum in relatione ad virorum numerum crevit. In Iraquia feminae adulescentes aut serissime viginti annos natae nubere solent. Triginta annos natae iam condiciones habent difficiles, cum domi vel apud familiares habitare et sine mercede laborare cogantur.

Rebus sic stantibus ordines feminarum rationes excogitant, quibus sors feminarum levetur. Sunt, quae velint, ut viris ad alteram uxorem aut feminam plus triginta annorum ducendam subsidium statale solvatur. Omnes autem has rationes non accipiunt, nam censent subsidio statali feminas in merces redactum iri. Optima ad feminas adiuvandas auxilia fore securitatem meliorem, augmentum oeconomiae, numerum opere destitutorum deminutum.

Universum sine Deo ortum

Stephen Hawking, notissimus in mundo physicus, censet Universum sine Deo vel numine ortum esse.

In libro ante viginti duos annos divulgato, cui titulus est "A Brief History of Time" (Brevis historia temporis), Hawking originem divinam possibilem adhuc putabat. In recentissimo autem opere (The Grand Design), quod una cum Leonardo Mlodinow fecit, illam hypothesim repudiat.

Affirmat novissima studia legum physices demonstrare Universum et potuisse et debuisse ex vacuo oriri. Quae cum ita sint, ad displosionem initialem efficiendam impetum divinum non fuisse necessarium. Testimonium maximi momenti ad hoc phaenomenon probandum esse existentiam gravitatis.

Aves in meridiem emigrant

Circiter ducentae miliones avium in Finnia nidificare aestimantur. Ex his maior pars autumnus in

meridiem emigrant, nam tantum decima quaeque per totum annum in Finnia habitat. Propter aestatem calidam nidificatio avicularum solito melius successit et aves migratoriae hoc anno plures sunt quam assolet. Dimidia fere pars Finniam iam reliquit.

Migratio autem maxime spectabilis his septimanis fit. Multae species avium in magnas catervas congregantur et in pratis agrisque vescuntur, ut vires ad longum iter habeant. Meta migrationis variat. Multae aves aquatiles in Europa manent, sed species, quae primo vere ultimae advenerunt, ut hirundines, cuculi, luscinae, usque ad Africam autumnus emigrant.

(Tuomo Pekkanen)

Fossores sub terra inclusi

JULKAISTU 06.09.2010 KLO 09.51

3.9.2010

Triginta tres fossores Chilienses iam plus tres septimanas in fodina metallorum, ubi laborant, calamitate facta inclusi sunt. Dicuntur adhuc bonae valetudinis esse, sed condiciones vitae eorum miserrimae sunt: coguntur enim in specu angusto in profunditate paene septingentorum metrorum sito versari, ubi temperatura continenter in triginta quinque gradibus Celsiusianis manet.

Adiri possunt per tres tubulos, quibus eis cibus, potus, medicamenta, aliae res necessariae demittuntur. Unica ratio eos servandi est cuniculum satis amplum terebrare, qui eis iter ad summam terram praebeat. Opus iam susceptum tanti laboris erit, ut non ante quam duobus aut tribus mensibus ad finem adducatur.

Expediitio Iraquica finita

Die Martis, qui dies ultimus mensis Augusti erat, expediitio bellica, quam Americani contra Iraquiam anno bismillesimo tertio (2003) susceperant, ad finem venit. Ad honorem eius rei Joe Biden, vicepraesidens Civitatum Americae Unitarum, in Iraquiam iter fecit, ut caerimoniae belli compositi interesset. Quinquaginta milia militum Americanorum in Iraquia democratiae tutandae causa remanent.

Germania XX annos unita

Pridie Kalendas Septembres (31.8.) viginti anni acti erant, cum pacto de duabus Germaniis uniendis Berolino orientali subscriptum est. Iam uno mense ante quam id factum est, sive mense Iulio anno millesimo nongentesimo nonagesimo (1990), inter duces politicos convenerat, ut Res publica Foederata Germaniae et Res publica Democratica Germanica in unam civitatem Germaniam coalescerent.

Narcolepsia et febris suina

Magistratus Ordinis Europaei a medicamentis (EMA) investigaturi sunt, num vaccinum nomine Pandemrix, quod adversus febrim suinam adhibetur, narcolepsiam effecerit. Id ideo facere constituerunt, quod in Finnia saltem septendecim casus eiusmodi somnolentiae inventi sunt, neque suspicio abest, quin etiam in Suetia aliquot homines post eandem vaccinationem narcolepsia impliciti sint.

Tutela tigrium et leopardorum

Russi et Sinenses genera animalium rara et moribunda consiliis communibus protegere decreverunt. Quam ob rem regionem tutelariam conditurae sunt, quae ad fines utriusque nationis pertineat. Haec ratio imprimis tigribus et leopardis Amuriensibus servandis proderit.

Prisca urbs in Aegypto reperta

Archaeologi auspiciis Universitatis Yale operati in desertis Aegypti urbem abhinc tria milia quingentos annos inhabitatam reppererunt. Locus ille ad oasis quandam situs est, quae ducenta fere chiliometra ab urbe Cairo ad meridiem distat. Inventum ex inopinato factum est, cum grex archaeologicus prisca itinera mercatorum investigaret.

(Reijo Pitkäranta)

Políticos irridere in Brasilia vetitum

JULKAISTU 27.08.2010 KLO 15.46

27.8.2010

In Brasilia comoedi propter legem stomachantur, quae candidatos políticos irridere vetat. Anno enim proxime praeterito lex comitalis ita mutata est, ut talis materia auditiva et visualis vetaretur, qua candidati aut factiones politicae aliquo modo humiliarentur aut risui haberentur.

Lex mense Iulio valere coepit. Reus irrisionis multam etiam centum milium regalium sive prope

quadraginta quinque milium euronum subire poterit. Si quis iterum contra legem peccaverit, multam duplicem solvet.

Die Dominico (22.8.) in litore Copacabana urbis Rio de Janeiro complures centeni homines contra legem comitalem reclamabant. In tabella cuiusdam reclamatoris scriptum erat: "Si non vis esse politicus, qui irridetur, esto politicus honestus."

Mense Octobri in Brasilia fient comitia, quibus novus praesidens rei publicae, novi senatores et delegati parlamentarii nec non gubernatores sive praefecti provinciarum creabuntur.

Hornotinas opes naturae iam consumptas

Ordo mundi naturae tuendae (WWF) aestimavit hornotinas opes naturae iam die vicesimo primo mensis Augusti consumptas esse. Consumptio ab anno proximo crevit, nam tum opes, quas natura uno anno fert, uno mense diutius, scilicet a Kalendis Ianuariis usque ad diem vicesimum mensis Septembris suffecerunt.

Mexicopolis saccos ex plastica vetat

Mexicopoli nuper nova de circumiectis lex lata est, quae vetat, ne sacci ex plastica a mercatoribus gratis emptoribus distribuuntur. Propositum est impedire, ne urbs plastica non dissolubili obruatur. Magistratus aestimant Mexicopolitanos singulis diebus vicens miliones saccorum adhibere. Lege perlata mercatores tantum saccos in natura dissolubiles clientibus vendere possunt.

Novae planetae extrasolares

Astronomi Europaei quinque novas planetas extrasolares invenerunt, quae circum stellam soli similem feruntur. Distant a Terra plus centum annos luce mensos. Numquam tot planetae tam procul conspectae sunt. Praeter illas quinque extrasolares planetas, iam conspectas, astronomi credunt duas alias planetas circum idem sidus vagari. Unam ex his esse magnitudine parem Saturno, alteram autem sesqui maiorem quam Terra. Planetae extrasolares his quindecim annis prope quingentae inventae sunt. Maior pars sunt ingentes, etiam vices quinquies Terrâ maiores. Planetae extrasolares recens inventae, ut astronomi credunt, denuo probant Universum esse plenum planetarum, forsitan etiam Terrae similibus.

Vulpes in urbibus crebrescunt

Vulpes in urbibus Finniae iam ante viginti annos crebrescere coeperunt. Neque civibus ingratae sunt, forsitan quia homines ab infantia de vulpibus lepidis et callidissimis in fabulis legerunt. Cum vulpes non tantum nocte sed etiam interdiu vagantur, facile conspiciuntur. Vehicula evitare didicerunt et cibum in urbe facile inveniunt.

(Tuomo Pekkanen)

Inundationes in Pakistania

JULKAISTU 20.08.2010 KLO 12.44

20.8.2010

Amplae regiones Pakistaniae tantis inundationibus affliguntur, ut circiter mille sescenti cives vitam amiserint et viginti fere milionibus auxilio celeri opus sit. Numerus hominum opis externae egentium fortasse maior est quam in ulla alia clade nostra aetate facta.

Huc accedit periculum, ne calamitas epidemiis varii generis in illa regione ortis aggravetur. Multi enim, quos aquam impuram bibere necesse est, imprimis morbo cholerae implicari periclitantur.

Relationes Taivaniae et Sinarum

Parlamentum Taivaniae tractatum commercialem cum Sinis mense Iunio factum approbavit. Speratur fore, ut hoc documento historico signato relationes utriusque partis iam dudum inimicae paulatim meliores fiant. Taivania e dominatione Sinarum continentalium anno millesimo nongentesimo undequingagesimo (1949) discessit, sed Sinenses illam insulam adhuc pro suo territorio habent.

Castra zingarorum in Francogallia

Magistratus Francogalliae brevi tempore iam plus quadraginta castra zingarorum claudi iusserunt et septingentos fere incolas eorum in Romaniam et Bulgariam expellere coeperunt. Quae actio ad bellum pertinet, quod praesidens Nicolas Sarkozy immigrationi illegali indixit. Adversarii autem praesidentem de praeiudiciis in gentes minores excitandis accusant.

Periculum bacterii nosocomialis

Bacterium nosocomiale, quod fortasse omnibus medicamentis adhuc cognitum resistere valet, rei sanitariae in toto orbe terrarum imminet. Casus infectionis eo effecti iam in Britannia, Belgio, Suetia reperti sunt. Rerum periti censent difficillimum et maximi pretii esse illo bacterio liberari, si in nosocomium penetraverit.

Finnia terra omnium optima

Acta septimanalia Americana magnae auctoritatis nomine Newsweek centum civitates inter se comparaverunt ad cognoscendum, ubinam gentium optimae vitae condiciones essent. Comparatio e quinque partibus constabat: primum quidem investigabatur, quomodo in quaque terra educatio et cura valetudinis institutae essent. Deinde quaerebatur, quam magni qualitas vitae, navitas oeconomica, ratio rerum politicarum ubique aestimarentur. Qua examinatione facta apparuit Finnam esse civitatem omnium optimam. Secundo loco posita est Helvetia, tertio autem Suetia.

Eero Saarinen ante C annos natus

Hodie sive die vicesimo mensis Augusti (20.8.) centum anni acti sunt, cum Eero Saarinen, architectus celeberrimus, in Finnia natus est. Postea in Civitates Americae Unitas migravit, ubi multa aedificia publica magna arte delineavit. Ex novissimis investigationibus patet eum inter secundum bellum mundanum rei exploratoriae Americanorum inservivisse. Ei enim persuasum erat, nisi copiae foederatae nazistas bello vicissent, democratiam et libertatem loquendi pessum ituras esse. (Reijo Pitkäranta)

ABEST PLICA SONIFERA 13 Aug in situ est nexus ad deponendum sed revera plica est redeuplicationis illius quae ad 20 Aug pertinet

Certamen saunationis fatale

JULKAISTU 16.08.2010 KLO 09.33

13.8.2010

Apud Finnos mos est in balneo vaporeo, quae sauna appellatur, frequentissime balneare. Vapor ita efficitur, ut super fornacem lapideam aqua iaciatur. Temperatura in sauna bene calefacta facile centum gradus Celsius superat.

Neque rarum est, quod balneantes inter se certant, quis eorum diutissime in sauna calidissima sedere valeat. Certamina saunationis mundana in oppido Heinola Finniae meridionalis iam duodecies facta sunt.

Recentissimum ex eis, septimana vergente (5.-7.8.) institutum, finem tristissimum habuit. Participes certaminis, numero centum undeviginti, ex sedecim nationibus oriundi erant. Maximi greges peregrini ex Estonia et Belorussia venerant.

Certamen ita factum est, ut aemuli in sauna centum decem graduum tam diu sederent quam possent, dum semilitra aquae bis singulis minutis super fornacem funditur. Post saunationes eliminatorias in certamen virorum finale admissi erant sex participes, ex quibus quattuor sua quisque vice post tres vel quattuor minutas exierunt.

Duo autem balneare paene sex minutas perseverabant, donec observatores ex fenestra notaverunt unum ex eis in pedes surgere non posse. Tum moderatores certaminis ambos ex sauna extraxerunt et sanitarii eos ilico recreare coeperunt. Vladimir Ladyzenskij Russus, nihilo minus mortuus est, Timo Kaukonen Finnus, in nosocomium Helsinkiense portatus est.

De causa mortis Vladimiri adhuc inquiritur. Lasse Lehtonen, medicus princeps et praesidens Societatis Balnearis Finniae (Suomen Saunaseura) dicit hominem facile saunam etiam centum quadraginta graduum aliquamdiu sustinere; Societatem Balnearem unam ex suis saunis usque ad illam temperaturam calefacere solere neque quemquam ex balneantibus ibi damnum cepisse.

Ingens moles glaciei ex Groenlandia defracta

Ex glaciario Petermann Groenlandiae septentrionalis moles glaciei ducentorum sexaginta chiliometrorum quadratorum dissoluta est. Ex imaginibus per satellitem factis apparet illud glaciarium quartam fere partem superficiei ita amisisse. Nunc illa moles in fretum Nares fluitat, quod mille fere chiliometra a polo arctico in meridiem iacens Groenlandiam a Canada separat.

Hominem et spongiaria eadem gena habere

Investigatores Australiani, cum de genis spongiarium in oceano viventium investigabant, rem

inopinatam reppererunt. Animadverterunt enim ex genis hominis et spongiarium paene septuaginta centesimas (70%) eadem esse. Spongiaria sunt vetustissima animalia maritima, ad quae pertinet inter alia spongia lavatoria, quae in Mari Mediterraneo est vulgaris. Investigatores maximi momenti esse censent, quod inter gena hominis et spongiarium communia sunt multa, quae cum cancro aliisque morbis coniungi solent. Itaque studium eorum etiam medicinae prodesse poterit. Eventus investigationis, quae quinque annos duravit, in periodico scientifico, cui nomen « Nature » nuperrime divulgatus est.

(Tuomo Pekkanen)

Aestas calidissima in Finnia

JULKAISTU 06.08.2010 KLO 08.56

Haec aestas, quae adhuc continuatur, in Finnia aestuosissima fuit ac quidem ita, ut dies undetricesimus mensis Iulii (29.7.) apud nos omnium temporum calidissimus inveniretur. Tum enim ex Instituto meteorologico nuntiatum est temperaturam prope urbem Joensuu ad plus triginta septem (37,2°) gradus Celsius ascendisse. Pristinus primatus amplius uno gradu inferior erat.

Calamitates tempestatis

Fieri non potuit, quin aestas calida multas calamitates secum ferret. Septimana proxime praeterita et his quoque diebus amplae regiones Finniae tonitribus vehementibus et saevis tempestatibus vexatae sunt. Quo factum est, ut multa milia domuum non solum electricitate privarentur sed etiam itinere et nexu telephonico intercluderentur. Arbores ventis caesae etiam commeatui ferriviario pessime offecerunt.

Ahmadinejad vitam servavit

Praesidens Iraniae Mahmud Ahmadinejad ex impetu in se facto incolumis evasit. Conamen occidendi in Irania occidentali accidit, ubi ille in comitatu autocinetorum iter faciebat. Ex improvise vir quidam ante vehiculum eius pyrobolum manuum coniecit, qui tamen praesidenti non nocuit. Perpetrator sceleris statim deprehensus est.

De incendiis Russiae

Moscua, urbs princeps Russiae, densa nebula fumosa obvoluta est, nam copia particularum nocivarum in aere volitantium decies tanto maior est quam fieri solet. In causa sunt incendia silvestria et terrestria, quae in variis Russiae partibus iam diu grassantur. Existimantur in Russia octingenta fere loca esse, quae in praesenti flammis delentur.

De tauromachiis Cataloniae

Parlamentum Cataloniae decrevit, ne in his Hispaniae finibus iam tauromachiae instituerentur. Neque deerant, qui novae legi vehementissime repugnarent censentes illa spectacula ut ad cultum civilem nationalem pertinentia servanda esse. Vicit tamen sententia eorum, qui tauromachias nonnisi pro vexatione animalium habebant.

Colosseum reficiendum est

In Italia maecenates quaeruntur, qui pecuniam suppeditent ad Amphitheatrum Flavium sive Colosseum plane reficiendum. Propositum est, ut opera restituendi iam proximo autumnus susciperetur, ne hoc aedificium celeberrimum omnino ruinam traheret. Refectio Colossei viginti quinque milionibus euronum constatura esse aestimatur, quam ob rem moderatoribus Italiae ad benefactores privatos convertendum est.

Certamina Barcinonensia

Kalendis Augustis (1.8.) certamina Europaea athleticae campestris, quae sex diebus Barcinone celebrabantur, ad finem venerunt. Omnium optimos athletas se praebuerunt Russi, qui decem nomismata aurea sibi conciliaverunt. Successus Finnorum ad unum nomisma aeneum redactus est: id obtinuit Tero Pitkämäki, qui in telo iaciendo tertius evasit.

In Kirgisia tumultus violenti

JULKAISTU 18.06.2010 KLO 18.37

In Kirgisia his diebus tumultus violenti inter Kirgisos et Usbekos ibi habitantes orti sunt, in quibus iam complures centeni homines vitam amiserunt. Centum milia Usbekorum propter violentiam in Usbekistaniam effugerunt. Ducenta septuaginta quinque milia hominum domos suas reliquisse

aestimantur.

Usbekistania auxilium petivit, ut copiam fugitivorum ex vicina Kirgisia fluentium adiuveret. Violentia, ut testes oculati narraverunt, in urbe Osh orta est, ubi greges armati quinque impetus simul fecerunt. Tumultus ita consulto moti postea in conflictus ethnicos inter Kirgisos et Usbekos degeneraverunt.

Papa veniam petivit

Summus pontifex Benedictus XVI in platea Petriana missam celebravit, in qua monuit peccata sacerdotum eo ipso anno, qui iubilaeus esset, in lucem venisse. "Petimus instanter", inquit, "a Deo et ab hominibus convolutis veniam pro abusibus erga minores, commissis a religiosis." Papa affirmavit se omnia, quae fieri possent, facturum esse, ne talis abusus umquam postea succederet.

Sepulcretum gladiatorum in Britannia inventum

Archaeologi Britanni credunt se sepulcretum gladiatorum optime omnium conservatum invenisse. Viri in Britannia septentrionali apud Eboracum (hodie York) sepulti minime ante mille sescentos annos, maxime ante duo milia annorum mortui sunt. Cadavera eorum vulnera eius generis habent, quae in spectaculis gladiatorum fiebant. Maior pars sunt viri robusti corpore maiores quam coetanei. Plerique iugulati sunt, sicut fiebat gladiatori, qui in pugna inferior factus erat. Unus ex sceletis etiam signa dentium alicuius bestiae habet. Id ab archaeologis certissime ostendit mortuos fuisse gladiatores, nam illi etiam contra bestias feras pugnare solebant.

Mutationem climatis causas habere naturales

In urbem Rovaniemi Finniae septentrionalis conventus internationalis convocatus est, in quem investigatores silvarum ex variis orbis terrarum partibus convenerunt. De mutatione climatis illi viri docti unanimiter censebant causas eius esse naturales. Inter hos centum annos calefactionem mutationi naturali deberi, quia aetas frigida recentissima exeunte saeculo undevicesimo finita esset. Temperaturam climatis admodum regulariter iam octingenta milia annorum ita variatam esse, ut aetates frigidae et calidae intervallo centum milium annorum altera alteram sequerentur. Parvam aetatem glaciale a quinto decimo saeculo usque ad initium undevicesimi saeculi duravisse. Hanc ob rem temperaturam mundi his centum annis uno gradu calidiorem factam esse.

Vuvuzelae inter ludos concinunt

Ludi pedifollii mundani, qui his septimanis fiunt, per totum orbem terrarum a compluribus centenis milionibus hominum per televisionem spectantur. Novitas quaedam est tuba nomine vuvuzela, qua spectatores in caveis stadiorum iugiter stridule concinunt. Stridor vuvuzelarum, quem quidam vituperant, a moderatoribus non vetatur, nam ludi sunt Africani.

Ad finem venimus. Auscultatoribus iucundissimas ferias aestivas exoptamus et valedicimus. Nuntii Latini mense Augusto continuabuntur.

(Tuomo Pekkanen)

Inundationes Poloniae et Hungariae

10.06.2010, klo 21.56

Flumina Poloniae et Hungariae gravibus pluviis et imbribus tantopere aucta sunt, ut multa milia hominum propter inundationes domos suas relinquere cogerentur.

Vistula, quod maximum est flumen Poloniae, ripas suas superavit et urbi Varsaviae imminet.

Budapestini, in capite Hungariae, diluvium iam multa aedificia inundavit.

In flumine Danuvio magistratus navigationem vetuerunt. Solum mense Maio in Hungaria plus pluit quam plerumque toto anno.

Etiam in Slovakia aquae diluviales altius surrexerunt quam umquam ante, sed ibi inundatio iam descendere coepit.

Viae autem publicae multis in partibus clausae sunt.

(Tuomo Pekkanen)

Insulae Oceani Pacifici non interibunt

10.06.2010, klo 21.55

Metus, ne humiles insulae Oceani Pacifici aequore mergantur, forsitan est vanus, nam ex nova investigatione multae ex illis paene sexaginta annos similes manserunt, etiam creverunt.

Venti enim et fluctus coralla soluta et sedimenta ad litora insularum portantes efficiunt, ut illae firmentur.

Ex viginti septem insulis tantum quattuor minores factae sunt, ceterae similes fere manserunt aut creverunt.

Superficies maris sexaginta annis tantum centum viginti milimetra surrexit.

Quae cum ita sint, insulae Oceani Pacifici saltem centum annos securae erunt.

Incertum autem est, an habitabiles mansurae sint.

(Tuomo Pekkanen)

In Finnia femina episcopus electa

10.06.2010, klo 21.55

Episcopus urbis Helsinki designata est Irja Askola, quae futura est prima episcopus femina Finnorum. Munus episcopale inibit Kalendis Septembribus, cum Eero Huovinen, episcopus hodiernus, emeritus fiet.

In Finnia feminae ab anno millesimo nongentesimo duodenonagesimo sacerdotes inaugurantur.

Askola est secretaria dioecesis et adiutrix specialis episcopi Esboensis.

(Tuomo Pekkanen)

Culices hac aestate pullulant

10.06.2010, klo 21.54

Hac aestae in terris septentrionalibus culices magnopere pullulant.

Magna culicum multitudo causam habet in hieme solito nivosiore et tempestate calida aestatis ineuntis.

Stagna insectis idonea ex nivibus solutis et pluviis abundantibus orta sunt.

Etiam ovula culicum aestatis proximae numerum culicum auxerunt. Species culicum in Finnia sunt circiter quadraginta, ex quibus decem sanguinem hominis non respuunt.

Culices sanguisugae sunt feminae, nam mares melle vescuntur et post copulationem moriuntur.

Contra culices recens remedium est chartula, taenia electromagnetica ornata, quae collo suspensa impedit, ne illa insecta hominem agnoscant.

(Tuomo Pekkanen)

Certationes mundanae pedifollii incipiunt

10.06.2010, klo 21.53

Certationes mundanae pedifollii, ordine undevicesimae, in Re publica Africae Australis hodie incipiunt.

Intersunt greges triginta duarum nationum, qui in octo sectiones sorte divisi sunt.

Certamen finale die undecimo mensis Iulii Iohannisburgi fiet. Numquam antea mundanae pedifollii certationes in Africa factae sunt.

(Tuomo Pekkanen)

Israeliani impetum maritimum fecerunt

03.06.2010, klo 18.00

Saltem decem homines mortui et multo plures vulnerati sunt ictu militari, quem classarii Israeliani ex helicopteris et naviculis cummeis erumpentes in sex naves internationales in Mari Mediterraneo fecerunt.

Maior pars occisorum cives Turciae esse dicitur. Illis navibus, quae variis rebus auxiliariis onustae a Turcia profectae erant, septingenti fere homines pro causa Palaestiniensium agentes vehebantur.

Propositum eis erat obsidio maritimo neglecto ad Gazam appellere et auxilium humanitarium incolis ibidem habitantibus suppeditare.

(Reijo Pitkäranta)

Ictus Israelis animos commovit

03.06.2010, klo 18.00

Impetus Israelianorum ubique gentium animos hominum valde commovit.

Princeps minister Turciae ea, quae Israeliani commiserant, terrorismum statalem descripsit.

Ban Ki-moon, secretarius generalis Nationum Unitarum, et Catherine Ashton, ministra Unionis Europaeae a rebus exteris, postulaverunt, ut in stragem perpetrata diligentissime inquireretur.

(Reijo Pitkäranta)

Köhler magistratu se abdicavit

03.06.2010, klo 17.59

Horst Köhler, praesidens foederalis Germaniae sexaginta septem annos natus, ex inopinato munus deponere constituit.

In causa est sententia, quam in colloquio diurnariis dato de exercitu patriae suae dixit.

Ait enim fieri posse, ut Germaniae, cuius prosperitas imprimis in commercio externo posita esset, interventu militari opus esset ad emolumenta sua tutanda.

(Reijo Pitkäranta)

Aes alienum Haitiae remissum

03.06.2010, klo 17.58

Argentaria mundana Haitiam aere alieno, quod undetriginta milionum euronum fuerat, omnino liberavit.

Consilium eo spectat, ut illa civitas e terrae motu mense Ianuario facto facilius se recipiat.

Remissio debitorum fieri potuit, postquam tredecim nationes, in iis Finnia, illam pecuniam pro Haitia collegerunt.

(Reijo Pitkäranta)

Nuntius de domo regia Suetiae

03.06.2010, klo 17.57

Die Dominico (30.5.) in ecclesia Arcis regiae Stockholmiensis officium divinum habebatur, ubi publice pronuntiatum est Victoriam, principissam Suetiae hereditariam, sponso suo Danieli Westling nupturam esse.

Constat nuptias eorum die undevicesimo huius mensis (19.6.) celebratum iri.

Iis peractis Daniel princeps celsissimus appellabitur.

(Reijo Pitkäranta)

Nova dinosaurorum species

03.06.2010, klo 17.57

Grege palaeontologorum Americanorum in Mexico novam speciem dinosaurorum invenit.

Cornua enim eius longiora sunt quam ullius alius speciei antea repertae.

Belua septem fere metra longa et duo metra alta fuisse existimatur.

Investigatores in fossilia duorum dinosaurorum, quorum unus iuvenis, alter adultus vitam amiserat, in regione Mexici septentrionali incurrerunt.

(Reijo Pitkäranta)

Consecratio agrorum in Tavastia

03.06.2010, klo 17.56

Olim Finnis moris erat sationes vernaes sollemni precatione consecrare.

Haec consuetudo a maioribus tradita in ecclesiis Hollola et Heinola recreata est, cum pastores praepositi una cum agricolis et vicanis sacra divina huius generis in agris procuraverunt.

(Reijo Pitkäranta)

Discrimen paeninsulae Coreae

28.05.2010, klo 10.29

Relationes inter utramque Coream intercedentes in pessimum mutatae sunt, postquam moderatores Coreae Meridianae autumaverunt navem longam suam a Coreanis Septentrionalibus torpedine submersam esse.

Illo ictu quadraginta sex classarios mortem obisse.

Accusatione audita Coreani Septentrionales nuntiaverunt se omnes necessitudines cum finitimis suis meridianis interrupturos esse.

(Reijo Pitkäranta)

Arma chemica in Mari Baltico

28.05.2010, klo 10.29

In imo Mari Baltico ingens copia armorum chemicorum iacet, ut dicit Ordo Russo-Estonicus circumiectis tuendis.

Illa arma a bello altero mundano originem trahere et aquis nationalibus pristinae Unionis Sovieticae subiacere.

Idem ordo contendit societatem Nord Stream licentiam gasiductus agendi a Terris Septentrionalibus ideo petivisse, ut controversias politicas cum civitatibus Balticis evitaret.
(Outi Kaltio)

Eruptio vulcani Eyjafjöll remisit

28.05.2010, klo 10.28

Eruptio vulcani Eyjafjöll, quae commeatui aerio Europaeo magnum detrimentum intulit, interim remisit, ut ait geophysicus Magnus Gudmundsson.

Negavit montem e cratere suo aut massam lavicam aut cinerem vulcanicum iam evomere.

Difficile tamen esse aestimare, utrum vulcanus omnino siluisset an brevi tempore denuo erupturus esset.

(Reijo Pitkäranta)

Furtum magnum Parisiis factum

28.05.2010, klo 10.28

Moderatores Parisiorum magistratus hortati sunt, ut custodiam museorum efficaciorum redderent.

Id ideo fecerunt, quod vir quidam personatus quinque picturas pretiosissimas ex Museo artis modernae Parisiensi furatus est.

Inter tabulas surreptas, quae amplius centum milionibus euronum aestimantur, erant opera ab Henri Matisse et Pablo Picasso confecta.

(Reijo Pitkäranta)

Laser 50 annos nuper complevit

28.05.2010, klo 10.27

Laser, quo energia electrica in radium lucis acutissimum mutatur, hoc mense quinquaginta annos complevit.

Inventor eius erat Theodore Maiman, doctor machinarius Americanus, qui postridie Idus Maias anno millesimo nongentesimo sexagesimo (16.5.1960) in laboratorio suo Californiano radium lasericum creavit.

Quot et quam multiplices sint usus huius instrumenti, longum est enarrare.

(Reijo Pitkäranta)

Quid Jordan Romero fecerit

28.05.2010, klo 10.26

Jordan Romero, puer Americanus tredecim annos natus, summo Monte Everestio potitus est itaque primus omnium id aetatis tantam rem gessit.

In altitudinem octo milium octingentorum duodequingenta (8 848) metrorum una cum fratre, noverca, tribus monstratoribus ascendit itinere a parte montis Sinensi incepto.

(Reijo Pitkäranta)

In natura ambulare saluti est

28.05.2010, klo 10.26

Sanitati mentis provehendae sufficit, ut quinque minutas in natura ambules.

Utilitas, quae e motu corporis huius generis capitur, eo maior est, si in conspectu eorum, qui sub divo moventur, lacus, fluvius aut aliae aquae sunt.

Hic erat eventus investigationis, quam rerum periti Britanni de occupationibus subdialibus hominum otium agentium fecerunt.

(Reijo Pitkäranta)

Dies memorialis bello caducorum

20.05.2010, klo 17.16

Die Dominico (16.5.) memoria militum bellis caducorum in Finnia colebatur.

Ille dies memorialis ab anno millesimo nongentesimo quadragésimo (1940) quotannis est tertius dies Dominicus mensis Mai.

Tum vexilla exponuntur, sepulcra heroum floribus coronisque decorantur, orationes habentur, quibus res gestae commemorantur et veterani laudantur.

Duobus bellis, quae Finni contra Unionem Sovieticam gesserunt (1939-40, 1941-44), intererant circiter septingenta milia virorum et ducenta milia feminarum, ex quibus prope septuaginta milia mortem

obierunt.
(Tuomo Pekkanen)

De calamitate Sinus Mexicani

20.05.2010, klo 17.15

Effluxio petrolei in Sinu Mexicano iam tres septimanas durat.

Die Dominico (16.5.) societas BP (British Petroleum) nuntiavit sibi contigisse, ut loco, unde petroleum efflueret, novum tubum figeret, quo maior pars petrolei in receptacula sugeretur.

Copia autem petrolei in profundo mari observata indicat effluxionem, quam displosio insulae terebratoria effecerat, multo maiorem esse quam putabatur.

(Tuomo Pekkanen)

Salvatio mirabilis

20.05.2010, klo 17.15

Calamitate aerea, quae in Libya septimana proxima accidit, omnes viatores vitam amisisse credebantur, cum aeroplanum, Iohannisburgo profectum, prope aeriportum Tripolitanum ita praecipitaret, ut frustatim frangeretur.

Succursores autem inopinanter unum superstitem invenerunt.

Is est Ruben van Assow, puer Nederlandiensis novem annorum.

Ceteri viatores, numero nonaginta, ex quibus unus et sexaginta erant Nederlandienses, cum pilotis et ministris aeroplani mortem obierunt.

Ruben solus, capite leviter laeso et pede fracto, vivus evasit. Medici censent eum non esse in periculo mortis et bene convalescere.

(Tuomo Pekkanen)

Adolescens sola mundum circumnavigavit

20.05.2010, klo 17.14

Jessica Watson, adolescens Australiana sedecim annorum, ad finem circumnavigationis mundi pervenit.

Jessica est iunior quam quisquam, qui solus circa mundum navigavit.

Navis eius velifera nomine Ella's Pink Lady ad portum Sydneensem die Sabbati (15.5.) appulit.

Iter viginti trium milium passuum maritimum ducentis decem diebus sine intermissione fecerat.

(Tuomo Pekkanen)

Britanni de tempestate colloquuntur

20.05.2010, klo 17.14

Britanni libentius et frequentius quam ceteri populi de tempestate colloquuntur.

Ex investigatione nuper facta Britannus medius sex menses vitae suae de tempestate loquitur.

Cetera argumenta, ut res athleticae, labores, matrimonium, procul sequuntur.

Paene sexaginta centesimae Britannorum censent optimum modum colloquii incipiendi esse sermones de tempestate serere.

(Tuomo Pekkanen)

Animalia silvestria ne perturbentur !

20.05.2010, klo 17.13

Hoc tempore natura rerum renovatur, cum aves nidificant, alces, cervi, lepores aliaque animalia novam prolem edunt.

Illi, qui in silvis pratisque vagantur, commonentur, ne animalia perturbent. Iam lex vetat, ne canes hoc anni tempore liberi circumcurrant.

Etiam homines hinuleum recens natum aut lepusculum obire possunt, sed animalia loco relinquere debent, quia mater plerumque prope adest et ad parvulum nutriendum brevi revertitur.

(Tuomo Pekkanen)

Aerarium Unionis Europaeae

14.05.2010, klo 09.25

Inter ministros Unionis Europaeae convenit, ut in Europa aerarium quingentorum miliardorum euronum conderetur, cuius esset mercatum nummarium stabilire.

Huc accedit opitulatio Fundi monetarii internationalis (IMF), quam ob rem tota summa illius aerarii septingenta quinquaginta miliarda euronum efficit. Ita prohibere conantur, ne discrimen oeconomicum

Graeciae in alias terras Unionis Europaeae diffundatur.
(Reijo Pitkäranta)

Comitia parlamentaria Britanniae

14.05.2010, klo 09.24

In Britannia comitia parlamentaria facta sunt, quorum victoriam conservativi tulerunt. Quae cum ita essent, administratio Britanniae ita mutata est, ut David Cameron, praeses factionis conservativae, novus minister princeps evaderet. Gordon Brown autem, dux laboristarum, clade accepta et principatum ministerialem et praesidatum partium suarum deposuit.
(Reijo Pitkäranta)

Quid Dmitri Medvedev dixerit

14.05.2010, klo 09.23

Praesidens Russiae Dmitri Medvedev Unionem Sovieticam et pristinum ducem eius Josif Stalin acerrime reprehendit. Colloquio actis diurnis Izvestija Nonis Maiis (7.5.) dato ait iura humana et libertatem civium aetate Unionis Sovieticae violata esse. Idem dixit scelera, quae Stalin altero bello mundano in populum suum commisisset, tam horribilia esse, ut iis numquam ignosci posset.
(Reijo Pitkäranta)

Palmae oleariae Amazoniae

14.05.2010, klo 09.23

Regimen Brasiliae in regionibus Amazoniae, quae silvicidiis pessime vastatae sunt, novas arbores conserere studet. Propositum est ibi palmas olearias implantare, quarum oleum in biodieselium eliquaretur. Speratur fore, ut ex palmetis magna utilitas oeconomica aliquando capiatur. Valet hoc consilium imprimis ad territorium Brasiliae septentrionalis nomine Para, ubi interitus silvarum maximus fuit.
(Reijo Pitkäranta)

Gigantopolis in Sinis nascitur

14.05.2010, klo 09.21

Anno bis millesimo quinquagesimo (2050) in Sinis urbs gigantea plus quam centum milionum incolarum exstabit, ut prospicitur in relatione a Nationibus Unitis composita. Regionem circa urbes Hongkong, Shenzhen, Guangzhou in unam gigantopolim crescere, cum spatia intermedia habitatoribus impleantur. Etiam in aliis mundi regionibus urbes amplissimae nascentur.
(Outi Kaltio)

Transplantatio pancreatis

14.05.2010, klo 09.20

In Instituto chirurgico Helsinkiensi transplantatio pancreatis praestita est, quod in Finnia numquam ante evenit. Inter hanc operationem aegrotus diabeticus, qui curabatur, etiam novum renem ab eodem donatore accepit. Utrumque organum statim sine ullo vitio fungi coepit, unde secutum est, ut ille neque insulino neque cura dialyseos iam egeret.
(Reijo Pitkäranta)

Dies matrum celebrabatur

14.05.2010, klo 09.19

Die Dominico (9.5.) dies omnium matrum more solito celebrabatur. In Finnia triginta una matres honore particulari affectae sunt, cum praesidens rei publicae Tarja Halonen iis de opera educandi optime meritis insigne Ordinis equestris Finlandiae a Rosa alba concessit.
(Reijo Pitkäranta)

Oeconomia Graeciae vacillat

06.05.2010, klo 18.12

Debita Graeciae publica iam anno proximo (2009) maiora erant quam productio nationalis sive valor mercium et servitiorum computatus.

Hoc anno Graecia haud procul abest, quin decoquat, si Argentaria Europae Centralis et Fundus Monetarius Internationalis illi non succurrunt.
Aestimatur creditum minime centum decem miliardorum euronum Graecis necessarium esse.
Pars Finniae erit mille quingentorum milionum euronum.
Condiciones, quibus summa necessaria Graecis creditur, sunt admodum severae.
Sumptus publici illis sunt contrahendi et redditus augendi, ex quo sequitur, ut vectigalia sint addenda et stipendia publica deminuenda.
Cives Graeci contra talem parsimoniam vehementissime reclamitant. Ex demoscopiis in Graecia factis dimidia fere pars populi manifestare et reclamare parata est.
Neque tamen alia via salutis ex crisi oeconomica Graecis patere videtur.
Si Graecia decoxerit, quod multi timent, periculum erit, ne crisis in alias terras Europaeas, ut in Portugalliam, Hispaniam Italiamque vagetur et oeconomia in tota Europa confundatur.
(Tuomo Pekkanen)

Shanghai Expo 2010 **06.05.2010, klo 18.06**

Kalendis Maiis in urbe Shanghai expositio universalis inaugurata est.
Thema expositionis est "Melior urbs, melior vita", quod generis humani communem spem melioris vitae in circumiectis urbanis repraesentat.
Inter sex menses plus septuaginta miliones hominum ad illam visendam expectantur, ex quibus plurimi erunt Sinenses.
Finnia in expositione suam aulam habet, quam iam ante inaugurationem septuaginta milia hominum visitaverunt.
Singulis diebus vicena hospitum milia in illam venturos esse aestimatur.
Adsunt complures societates Finncorum industriales et culturales.
Speciale programma Finnicum die vicesimo septimo huius mensis visitoribus praebebitur.
(Tuomo Pekkanen)

Dies libertatis verbi **06.05.2010, klo 18.03**

Anno millesimo nongentesimo nonagesimo tertio Nationes Unitae decreverunt, ut dies tertius mensis Mai dies internationalis rei diurnariae esset.
Illo die celebrando non tantum libertas rei diurnariae manifestatur sed etiam liberum arbitrium loquendi et scribendi, quod ius hominum est fundamentale.
In Finnia libertas verbi, sicut et alia iura humana, in lege fundamentali scripta est.
Aliter res se habet in illis terris, in quibus complures deni diurnarii aut redactores annuatim vitam amittunt.
Pessimae sunt condiciones in Africa, America Meridionali, Proxima Oriente, Irania, Bielorussia, Corea Septentrionali, in quibus instrumenta communicatoria opiniones gubernantium repetunt, de oppositione autem tacetur.
(Tuomo Pekkanen)

Mendici in Finnam influunt **06.05.2010, klo 18.03**

Postquam Romania et Bulgaria in Unionem Europaeam acceptae sunt, mendici zingari ex his terris in Finnam influere coeperunt.
Hoc anno numerus mendicorum praesertim in urbibus tantopere crevit, ut magistratus pertinaciam et arrogantiam eorum pertaesi de mendicatione vetanda deliberaverint.
Ministerium rerum interiorum novam de hac re legem praeparat.
(Tuomo Pekkanen)

Graecia auxilium petivit **29.04.2010, klo 18.06**

Georgius Papandreou, princeps minister Graeciae, civitati suae ex grandi aere alieno laboranti subsidium ab Unione Europaea et Fundo monetario internationali petivit.
Oratione televisifice habita ait illud adiumentum pecuniarium nationi suae maxime necessarium esse.
Constat mercatum nummarium totius Unionis Europaeae propter discrimen oeconomicum Graeciae

labefieri.
(Reijo Pitkäranta)

Concordia Norvegiae et Russiae

29.04.2010, klo 18.05

Norvegi et Russi quaestionem, ubi confinium maritimum inter utramque civitatem in Mari Barentsico esset, post consultationes quadraginta annorum tandem solverunt.

Decretum est illam regionem submarinam in duas partes ita dividendam esse, ut una natio tantundem fundi quaestuosi maris acciperet quantum altera.

Consensus huius rei inventus est, dum praesidens Russiae Dmitri Medvedev in Norvegiam iter officiale facit.

(Reijo Pitkäranta)

De calamitate oecologica

29.04.2010, klo 18.05

In Sinu Mexicano insula terebratoria Britannica submersa est, quod maximam calamitatem oecologicam effecit.

In causa est petroleum ex imo mari usque profluens, cuius fontem cohortes auxiliares quoquo modo obturare conantur.

Nisi iis contigerit illi effluxioni finem facere, periculum erit, ne orae Americae Septentrionalis per magnum spatium pessime inquinentur.

(Reijo Pitkäranta)

Madelaine sponsalia resolvit

29.04.2010, klo 18.04

Principissa Suetiae Madelaine sponsalia sua mense Augusto facta resolvit, ut ex domo regia Suetiae die Saturni (24.4.) nuntiatum est.

Id consilium captum esse, postquam Madelaine et sponsus eius Jonas Bergström rem diligentissime considerassent.

(Reijo Pitkäranta)

Vitae tempus auctum

29.04.2010, klo 18.03

Vitae tempus civium Finnum decenniis proxime praeteritis decem annis longius factum est.

Praeterea rarius quam ante fit, ut causa moriendi sit aliquis morbus popularis.

Concedendum tamen est prosperitatem imprimis inter homines ditiores distribui solere.

Haec omnia ex relatione patent, quam ministerium rei socialis et sanitatis nuper divulgavit.

(Reijo Pitkäranta)

Tomi Tuuha victor evasit

29.04.2010, klo 18.02

Septimana vergente in urbe Birmingham certamina Europaea artis gymnicae facta sunt.

Hi ludi Finnis maximo gaudio erant, cum Tomi Tuuha, iuvenis Helsinkiensis viginti annos natus, pulcherrimam victoriam saltus gymnici adeptus est.

Secundas tulit Matthias Fahrig Germanus, tertio loco positus est Flavius Koczi, gymnasta ex Romania oriundus.

(Reijo Pitkäranta)

Vulcanus in Islandia saevit

23.04.2010, klo 10.29

Vulcanus Islandiae nomine Eyjafjöll die Mercurii (14.4.) erupit et vapores cinere mixtos in altitudinem plus decem chiliometrorum iacere coepit.

Infra glaciem, qua summus mons operitur, rima in longitudinem duorum chiliometrorum aperta est, unde magma sive lapis liquefactus erumpens cum glacie supra iacente colliditur.

Ex collisione magmatis et glaciei oritur cinis minutissimis particulis vitreis mixtus, qui commeatui aereo est periculosissimus.

Particulae enim cineris in reactorio aeroplani haerentes efficere possunt, ut motrum obstruatur et fungi desistat.

Fuerunt antea casus, in quibus aeroplana in nubes vulcanicas incurrentia in magnum periculum inciderunt.

(Tuomo Pekkanen)

Nubes cineris commeatum aerium perturbat

23.04.2010, klo 10.28

Dum nubes cineris vulcanici in orientem versus ventis fertur, commeatus aerius in Europa pessime perturbatus est.

Non tantum in Europa occidentali et septentrionali sed etiam in terris ab Islandia longinquioribus aeroportus ad multos dies clausi sunt.

Inter dies Iovis et Martis (15-20.4.) plus nonaginta quinque milia volatuum in Europa revocata sunt.

Mense Martio (20.3.) prope eundem Vulcanum in glaciario Eyjafjallajökull eruptio moderatior facta est, qua tantum vita Islandiensium prope habitantium affecta est.

Nunc autem viatores maximis difficultatibus laborant, cum neque nova itinera suscipere possunt neque ex peregrinis terris via aerea in patriam reverti.

Quam diu eruptio duratura sit, vulcanologi aestimare adhuc non valent.

(Tuomo Pekkanen)

Mors praesidentis Poloniae

16.04.2010, klo 13.41

Praesidens Poloniae Lech Kaczynski calamitate aerea die Saturni (10.4.) facta mortem obiit.

Aeroplanum eius, cum duo chiliometra ab aéroportu urbis Smolenscae in Russia occidentali abesset, arboribus impactum et minutatim fractum in terram decidit.

Omnes nonaginta sex inessores vitam amiserunt.

Verisimile est, nisi caelum nebulosum et caliginosum fuisset, illam calamitatem futuram non fuisse.

(Reijo Pitkäranta)

Polonia in luctu iacet

16.04.2010, klo 13.41

Mors praesidentis totam nationem Polonorum ingenti maerore affecit.

Multa dena milia civium capite demisso iuxta viam stabant, dum autocinetum corpus principis civitatis portans ex aéroportu Varsoviensi ad palatium praesidentiale iter facit.

Area Pilsudski, quae in media urbe iacet, brevi in campum floribus et candelis refertissimum mutata est, cum Poloni magna multitudine omnibus, qui illa calamitate perierant, ultimum vale dicere vellent.

In hanc septimanam Poloniae luctus nationalis indictus est.

(Reijo Pitkäranta)

Quid conventus principum dixerit

16.04.2010, klo 13.40

Principes quadraginta septem civitatum in urbem Washington congregati promiserunt se id acturos esse, ut securitas materiae nuclearis melius quam ante praestaretur.

Sibi propositum esse cooperatione internationali aucta impedire, ne mercatura illicita exerceretur.

Se tamen meminisse cuivis nationi ius esse vi nucleari ad usus non militares adhibendi.

(Reijo Pitkäranta)

De minis terroristarum

16.04.2010, klo 13.39

Grex terroristicus Algeriensis minatus est se certamina pedifollica mundana, quae in Africa Australi aestate proxima instituentur, ictu bombico persecuturum esse.

Qui minas iactabant, dixerunt se talem materiam explosivam possidere, quae nullis inspectionibus securitatis detegi posset.

(Reijo Pitkäranta)

Finni e Tzadia reducuntur

16.04.2010, klo 13.39

Octoginta fere milites Finni paci tuendae, qui in Tzadia, terra in media Africa sita, munus obierunt, domum reducuntur.

Quod consilium a summis magistratibus ideo factum esse dicitur, quod etiam copiae Irlandiae, quibus Finni in partibus Tzadiae orientalibus cooperantur, ex eadem regione abiturae sunt.
(Reijo Pitkäranta)

Memoria occupationis

16.04.2010, klo 13.39

Hoc mense septuaginta anni acti sunt, cum Norvegia et Dania in potestatem nazistarum venerunt. Memoria anniversaria occupationis quinquennalis in ambabus terris die Veneris proxime praeterito recalebatur.

Dimidia pars tamen Danorum omnino ignorat, quid ille dies memorialis significet, ut ex demoscopia nuper facta apparet.

(Reijo Pitkäranta)

Quid PepsiCo constituerit

16.04.2010, klo 13.38

Opus mercatorium PepsiCo, quod potiones citreas parat, decrevit, ne potiones saccharo dulcoratae iam in scholis venirent.

Pekka Puska, praeses Ordinis cardiologici mundi (WHF) hoc consultum magni momenti ad sanitatem scholarium erigendam aestimat.

Constat enim adhuc plures liberos obesitate laborare.

(Karoliina Ignatius)

Scandala ecclesiam catholicam urgent

08.04.2010, klo 17.18

His temporibus Civitas Vaticana delationibus urgetur, quibus sacerdotes catholici in compluribus nationibus de paedophilia accusantur.

Novi casus cotidie fere in lucem proferuntur. Praesulibus catholicis, etiam summo pontifici Benedicto XVI, crimini datum est, quod delationibus neglectis crimina occultavissent et paedophilos protexissent.

Res gravata est, cum pater Rainerius Cantalamessa, praedicator pontificius, in Basilica Sancti Petri accusationes papae et ecclesiae catholicae cum antisemitismo comparavisset.

Etsi Fredericus Lombardi, nuntius Vaticanus, illa verba in bonam partem explicabat, ordines Hebraeorum et familiares victimarum paedophiliae sermonem patris Cantalamessa durissimis verbis damnaverunt.

In oratione paschali, quam urbi et orbi in platea Petriana Civitatis Vaticanae habuit, summus pontifex mentionem scandali paedophiliae, quo ecclesia catholica implicata est, omnino non fecit.

At pacem in Proximum Orientem optabat atque persecutiones minoritatum Christianarum et delinquentiam ex abusu drogarum ortam damnavit.

(Tuomo Pekkanen)

Plerique Finni in Natonem nolunt

08.04.2010, klo 17.17

Ex demoscopia recens facta quinquaginta sex centesimae (56%) Finnorum resistunt, ne patria ad Natonem adiungatur.

Viginti sex centesimae (26%) sodalitatem sustinent. Numerus adversantium post proximum annum tribus centesimis crevit.

Causa imprimis ea est, quod cives timent, ne patria in conflictus trahatur, qui ad Finniam nullo modo spectant.

Undesexaginta centesimae (59%) ex respondentibus censebant bonas inter Finnos et Russos relationes periclitatum iri, si Finnia ad Natonem adiuncta esset.

Ille numerus post annum bis millesimum sextum octo centesimis crevit.

Neque tamen Russia Finniae imminere creditur, nam septuaginta sex centesimae (76%) civium censent minas Russiae parvas aut nullas esse.

(Tuomo Pekkanen)

Cuniculi urbani pullulant

08.04.2010, klo 17.16

In regione Helsinkiensi vivunt plus decem milia cuniculorum, qui viridariis hortisque urbis damna notabilia afferunt.

Populatio orta est ante triginta annos, cum cuniculi, quos homines in deliciis habebant, in libertatem dimissi essent.

Damna arboribus herbisque urbis facta centenis milibus euronum aestimantur.

Cuniculi enim cortices arborum et fruticum dentibus rodunt, quod efficit, ut illa paulatim moriantur.

Ut damna coercerent, magistratus urbis homines conduxerunt, qui populationem cuniculorum urbanorum decipulis armisque venatoriis adhibitis deminuerent.

Inter autumnum hiememque circiter tria milia cuniculorum ita necati sunt.

(Tuomo Pekkanen)

Diluvia in Brasilia

08.04.2010, klo 17.16

Imbres saevissimi atque diluvia ex illis orta in urbe Rio de Janeiro et in civitate eiusdem nominis maximum chaos effecit.

Labinae ex collibus urbi circumiacentibus casulas pauperum deiecerunt, commeatus publicus est collapsurus, omnes viae principales clausae sunt.

Victimae calamitatis plus centum numerantur.

(Tuomo Pekkanen)

Lex de cura valetudinis in USA perlata

26.03.2010, klo 16.32

Camera delegatorum congressus Americani renovationem curae valetudinis probavit.

Lex accepta est votis ducentis undeviginti contra ducenta duodecim (219-212).

Renovatione, quae insignis est victoria praesidentis Barack Obama, fiet, ut nonaginta quinque centesimae Americanorum cautionem valetudinariam habeant.

In illis triginta duae miliones hominum sunt, quibus illa cautio nondum fuit.

(Tuomo Pekkanen)

Hillary Clinton Israelem vituperavit

26.03.2010, klo 16.32

Hillary Clinton, ministra a rebus exteris Americanorum, censet consultationes pacis in Proximo oriente propter opera Israelis in regionibus orientalibus Hierosolymorum periclitatum iri.

Postquam Israeliani nuntiaverunt se mille sescentas novas habitationes in terra Palestinensium aedificaturos esse, Clinton eos vituperavit, quod ita potestatem Americanorum pacem conciliandi infirmarent.

USA et Israel de coloniis deducendis male dissentiunt. Benjamin Netanjahu, primus minister Israelis, qui Washingtoniam visit, politicam suam defendit, cum dixit Hierosolyma non esse coloniam sed caput Israelis ideoque Iraelianis ius esse domos etiam in urbis regionibus orientalibus aedificandi.

Israeliani Hierosolyma orientalia bello anno millesimo nongentesimo sexagesimo septimo (1967) gesto expugnaverunt et censent se ita urbem univisse.

Palaestineses autem volunt, ut Hierosolyma orientalia sit futurum caput civitatis Palaestinensium.

(Tuomo Pekkanen)

Tempestates pulveris Sinas vexant

26.03.2010, klo 16.31

Tempestates, quibus pulveres flavi ex desertis in Sinas septentrionales feruntur, his annis fortiores et frequentiores factae sunt quam ante et iam Iaponiam et Coream attingunt.

Pulvis oritur ex partibus Sinarum occidentalibus, quae desertificatione patiuntur.

Silvis morientibus tempestates pulverulentae fiunt fortiores, quas regimen Sinarum novis silvis serendis coercere conatur.

(Tuomo Pekkanen)

Grandines in Australia

26.03.2010, klo 16.30

Tempesta sui generis in urbe Perth Australiae die Lunae (22.3.) chaos effecit.

Grandines magnitudine ovi gallinacei urbem verberaverunt, arbores tempestate caesae domibus damna attulerunt et vias obstruxerunt.

Praeterea imbres diluvia et labinas terrae effecerunt. Velocitas venti erat passim centum viginti chiliometrorum horalium.

(Tuomo Pekkanen)

Vulcanus in Islandia erumpit

26.03.2010, klo 16.30

Vulcanus in glaciario Eyjafjallajökull Islandiae nocte Sabbati (20.3.) erumpens circiter quadringentos homines domos suas relinquere coegit.

Magistratus vias in illa regione propter periculum clausurunt. Neque adhuc constat, quantum temporis eruptio duratura sit.

Proxima eruptio eiusdem Vulcani, anno millesimo octingentesimo vicesimo primo (1821) facta, duos per annos continuata est.

(Tuomo Pekkanen)

Cerasi iam Tokium ornant

26.03.2010, klo 16.29

Institutum meteorologicum Iaponiae die Lunae nuntiavit tempus cerasorum florentium officialiter incepisse.

Apud Iapones tempus, quo cerasi florescunt, est maximus eventus primi veris.

In nuntiis meteorologicis cotidie refertur, quo modo floritio, mense Ianuario in Okinawa incipiens septimanatim in septentrionem progrediatur.

(Tuomo Pekkanen)

Memoria belli hiberni

19.03.2010, klo 10.16

Die Saturni (13.3.) septuaginta anni acti erant, cum pax inter Finnos et Russos post bellum hibernum per centum quinque dies acerrime gestum facta est.

Memoria huius diei in Finnia variis eventibus recalebatur. Inter eos eminuit sollemnitas in Palatio praesidentiali celebrata: eo enim invitatu praesidentis Tarja Halonen multitudo veteranorum Finnorum congregata erat una cum iis militibus voluntariis Suetis et Esthoniensibus, qui illo tempore pro Finnia liberanda in acie pugnaverant.

(Reijo Pitkäranta)

Novus archiepiscopus Finniae

19.03.2010, klo 10.15

Archiepiscopus ecclesiae evangelico-Lutheranae Finniae electus est Kari Mäkinen, episcopus dioecesis Aboensis quinquaginta quinque annos natus.

Certamen de hac dignitate accipienda tam aequum erat, ut ille competitorem suum professorem Miikka Ruokanen tantum undecim suffragiis superaret.

(Reijo Pitkäranta)

Hereditas genica Finnorum

19.03.2010, klo 10.15

Genologi de hereditate genica Finnorum novam scientiam patefecerunt.

Ex investigatione eorum apparet populum nostrum sui generis esse, qui ratione genorum habita tam a nationibus in media Europa habitantibus quam a vicinis suis orientalibus multum differat. Respectu genorum Finnos propius Hollandienses quam Hungaros accedere.

(Reijo Pitkäranta)

De itineribus Finnorum

19.03.2010, klo 10.14

Finni itineribus peregrinis denuo delectantur, proinde ac si regressio oeconomica iam omnino praeterierit.

Aestate proxima libentissime in Graeciam, praesertim in insulam Rhodum, proficiscentur. Etiam terrae extra Unionem Europaeam positae, ut Aegyptus, Tunesia, Turcia favorem suum apud viatores Finnos magnopere auxerunt.

(Reijo Pitkäranta)

De flumine Gange purgando

19.03.2010, klo 10.13

Ganges, flumen Indiae nobilissimum, venenis industrialibus male infectus est.
In causa sunt imprimis fabricae coriorum, quae eiectionis suis Gangem pessime inquinaverunt.
Quam ob rem illae sedes industriales ad flumen purgandum iam claudi coeptae sunt. Quo consilio
tutores naturae quidem gaudent, sed multi homines opus amiserunt.
(Reijo Pitkäranta)

Manuscriptum Einsteinianum

19.03.2010, klo 10.13

Manuscriptum celeberrimum, quo Albertus Einstein theoriam relativitatis primum divulgavit, in Israele
ante oculos omnium positum est.

Hoc documentum, quae etiam Magna Charta physices appellatur, ex quadraginta sex paginis chartaceis
constat et inde ab anno millesimo nongentesimo vicesimo quinto (1925) in Academia Scientiarum
Hierosolymorum asservatur.ē

(Reijo Pitkäranta)

Aves iam redire coeperunt

19.03.2010, klo 10.12

Primae aves migratoriae e terris australibus in Finnam reverti coeperunt, quod unum e signis veris
appropinquantis putaveris.

In volucris, de quarum reditu ornithophili narraverunt, sunt columba, sturnus, cycnus canorus. Quae
quamvis ita sint, multum adhuc abest, quominus hiems a nobis recesserit. Plurima enim loca non solum
ruri, sed etiam in magnis urbibus nive completa sunt.

(Reijo Pitkäranta)

Ahtisaari de Proximo oriente sollicitus

12.03.2010, klo 20.02

Martti Ahtisaari, pristinus praesidens rei publicae Finniae, qui anno proximo praemium pacis
Nobelianum accepit, oratione Washingtoniae habita Europaeos et Americanos hortatus est, ut ad crisim
Orientis Proximi solvendam efficacius operarentur, et suasit, ut partes, quas Tony Blair ad pacem inter
Israelianos et Palaestinenses conciliandam ageret, firmarentur.

Ahtisaari censet discrimine Proximi Orientis, nisi duabus civitatibus separatim constitutis soluta sit,
periculum conflictus nuclearis in illa regione sustentari.

"Quamdiu dearmatio non succedit", inquit, "verum periculum est, ne etiam arma atomica ad hos
conflictus solvandos accedant."

(Tuomo Pekkanen)

Violentia in Nigeria saevit

12.03.2010, klo 20.01

Inter Christianos et musulmanos Nigeriae septentrionalis conflictus violentissimi orti sunt.

Testes oculati rettulerunt se magnos cadaverum acervos et domos Christianorum a musulmanis
crematis in regione urbis Jos vidisse.

Maiorem partem victimarum fuisse feminas, pueros infantesque, quos musulmani tribus Fulani cultus
necavissent.

Narratum est eos, qui fugere conarentur, decipulis et retibus venatoriis ab aggressoribus deprehensos
esse.

Redactores, qui ibi sunt, et ordines a iuribus humanis aestimant circiter quingentos homines trucidatos
esse.

Goodluck Jonathan, praesidens Nigeriae ad interim, tutores securitatis in regiones turbidas misit.

(Tuomo Pekkanen)

Gorbatshov regimen Russiae accusavit

12.03.2010, klo 20.00

Mihail Gorbatshov, moderator pristinae Unionis Sovieticae, hodiernos Russiae moderatores accusavit,
quod ex eo processu regressi essent, qui de perestroika, a se inchoato, initium habuisset.

Factionem Russiae Unitae Vladimiri Putin esse velut communisticam factionem Unionis Sovieticae,
ea tantum differentia, quod peior esset.

Gorbatshov monuit, ut nostalgia Sovietica omnis generis caveretur, et eos vituperavit, qui tempora
Brezneviana, etiam Staliniana, desiderarent.

Perestroika sive renovatio disciplinae politicae et oeconomicae Unionis Sovieticae duce Gorbatshev ante viginti quinque annos suscepta est.

Inde originem habuit processus, qui denique effecit, ut Unio Sovietica dissolveretur.

(Tuomo Pekkanen)

De tauromachiis in Hispania disputatur

12.03.2010, klo 19.59

Parlamentum Cataloniae de tauromachiis vetandis disputationem suscepit.

In Catalonia enim, contra ac in ceteris Hispaniae partibus, tauromachiae his annis gratia populari minus valere coeperunt.

Hispani, Matriti, Pamplonae annuatim dies festi tauromachiarum fiunt, quibus ingens turba hominum interesse solet.

In insulis autem Canariis tauromachiae vetitae sunt.

Administratio regionalis Matritensis vult, ut tauromachia ab UNESCO pars hereditatis culturalis Hispaniae declaretur.

Esperanza Aguirre, quae illi administrationi praeest, monuit tauromachiam semper partem cultus Hispanici fuisse atque inflavisse artifices et scriptores, inter quos essent Goya, Picasso, García Lorca, Hemingway, Orson Welles.

(Tuomo Pekkanen)

Tahir al-Qadri terrorismum damnat

05.03.2010, klo 13.35

Tahir al Qadri, sheichus religionis islamicae peritissimus, qui magnam auctoritatem habet, fatwam sive sententiam religiosam Londinii divulgavit, qua terrorismum damnat : Terroristas islamitas suicidas iudicat infideles, qui ad inferos sint incasuri.

Fatwa a sheicho divulgata est opus sescentarum paginarum, quam auctor ipse amplissimam de terrorismo opinionem appellat.

Est Anglice scripta et in interreti divulgata, quo pondus eius augetur. Al-Qadri imprimis iuvenes musulmanos appellare vult, ne sectatores radicalis islamismi fiant.

Erat inter primos religiosos islamitas, qui ictus undecimo die mensis Septembris anno bis millesimo primo contra USA factos condemnauerunt.

(Tuomo Pekkanen)

Chilia motu terrae concussa

05.03.2010, klo 13.34

Terrae motus die Sabbati (27.2.) Chiliam concussit. Primum motum, quo violentior his triginta annis in illa terra non exstitit, complures denae concussiones minores secutae sunt.

Epicentrum erat prope oram Chiliensem in profunditate quinquaginta quinque chiliometrorum.

Distabat ab urbe Conceptione (vulgo Concepción) paene centum chiliometra, ab Iacobopoli (vulgo Santiago) circiter trecenta.

Damna in variis Chiliae regionibus sunt magna.

Magistratus nuntiant quingenta milia domorum detrimenta cepisse, vias et lineas electricas ruptas, distributionem aquae impeditam esse, homines paene octingentos perisse.

Praeterea minime centum homines disparuerunt. Paene dimidia pars ex victimis in urbe Conceptione inventae sunt.

Illam enim urbem tsunami, unda tumescens concussionem sublata, pessime afflictavit.

Inter confusionem calamitatis fures et latrones tabernas mercatorum et emporia diripere coeperunt, ad quos coercendos regimen Chiliae quattuordecim milia militum misit.

Etiam cives, quorum domus ex calamitate incolumes manserant, greges vigiles ad bona sua tutanda condiderunt.

(Tuomo Pekkanen)

Xynthia Europam flagellavit

05.03.2010, klo 13.34

Saeva tempestas hiemalis, Xynthia appellata, die Lunae oram Europae occidentalem flagellavit.

Ferus ventus et pluviae Hispaniam, Franciam, Belgium, Nederlandiam Germaniamque gravissime temptaverunt.

Pessime afflicta est Francia, ubi superficies aquae passim octo metris ascendens multos inopinanter

oppressit.
Plus quinquaginta homines in calamitate interisse constat.
(Tuomo Pekkanen)

Olympia hiemalia finita

05.03.2010, klo 13.33

Olympia hiemalia Vancouverii celebrata septimana vergente ad finem pervenerunt.
Genera athletica erant in his ludis octoginta sex. Plurima nomismata aurea, scilicet quattuordecim, obtinuit Canada, Germania decem, USA et Norvegia novem, Russia tantum tria, Finnia nullum.
Russis, qui in ludis hiemalibus excellere solent, Olympia Vancouveriensia omnium pessima erant.
Quam ob rem stomachatus Dmitri Medvedev, praesidens Russiae, flagitavit, ut membra commissionis Olympicae Russorum discederent.
Quod nisi sua sponte fecissent, dimitterentur.
Exercitationem athletarum esse in Russia penitus mutandam.
Athletas ipsos in medio esse debere, non confoederationes generum athleticorum, quae hoc tempore ex cattis obesis constare viderentur.
(Tuomo Pekkanen)

Calamitas insulae Materiae

26.02.2010, klo 13.17

Insula Materia in Oceano Atlantico posita die Saturni tantis imbribus et procellis afflicta est, ut amplius quadraginta homines inundationibus et labinis terrae interirent.
Huc accedit, quod centum viginti cives laesi et ducenti quinquaginta tecto privati sunt.
Haec calamitas naturae imprimis in urbem Funchaliam incidit, ubi vi tempestatis arbores evelli, autocineta subverti, ipsa aedificia loco amoveri videres.
(Reijo Pitkäranta)

Obama et Dalai-lama convenerunt

26.02.2010, klo 13.17

Barack Obama, praesidens Americanorum, ducem spirituales Tibeti Dalai-lama in Aedibus Albis convenit.
Quam salutationem moderatores Sinarum aegerrime tulerunt dicentes eam relationibus inter Sinenses et Americanos intercedentibus valde nocere.
Idem monuerunt Civitates Americae Unitas antea affirmavisse Tibetum partem Sinarum esse.
Conventum cum Dalai-lama habitum documento esse praesidentem Obama in sententia sua non mansisse.
(Reijo Pitkäranta)

Russi missilia Iranianis vendituri

26.02.2010, klo 13.16

Russi ex pacto antea facto Iranianis trecenta quinquaginta missilia antiaëria vendituri sunt, ut ait Sergei Riabkov, minister adiunctus a rebus exteris.
Negavit illam rem ullo modo cum programme nucleari Iraniae coniunctam esse.
Israeliani et Americani Russos saepenumero hortati sunt, ut illo negotio desisterent.
(Reijo Pitkäranta)

Nova rixa de Insulis Falclandicis

26.02.2010, klo 13.16

Societas quaedam Britannica ante Insulas Falclandicas petroleum terebrare coepit.
Mirum non est huiusmodi inceptum Argentinis, quippe qui hanc regionem maritimam sibi vindicarent, stomachum fecisse.
Constat Britannos cum Argentinis anno millesimo nongentesimo octogesimo secundo (1982) de imperio harum insularum bello certavisse.
(Reijo Pitkäranta)

De operistitiis commeatus acrii

26.02.2010, klo 13.15

Commeatus aerius Europae variis controversiis operae perturbatur.
Primum quidem aeronautae societatis Germanicae Lufthansa operistitium in quadriduum indixerunt, quamquam hoc consilio paulo post abstiterunt.
In Francogallia autem praepositi a commeatu aereo die Martis cessationem operis quinque dierum incohaverunt.
Iam etiam quidam operarii societatis British Airways intermissionem ministrationis minitati sunt.
(Reijo Pitkäranta)

De statu biodiversitatis Finniae

26.02.2010, klo 13.15

Finnis non contigit impedire, quominus biodiversitas naturae deminueretur.
Nam multae species plantarum, quae in paludibus et in circumiectis ruralibus antea abundabant, rarissimae factae sunt.
Quaedam autem genera animalium, quae iam emori credebatur, auxilio hominum augeri coeperunt, ut aquila marina et Dendrocopus leucotus.
(Reijo Pitkäranta)

Summum frigus homines defatigat

26.02.2010, klo 13.14

Summum frigus homines lassos reddit. Secundum rerum peritos qualitas somni frigore diurno imminuitur et homo facilius quam calido tempore defatigatur.
Itaque oportet summo frigore paulum plus dormire, quoniam corpori aliter quoque magis laborandum est: pressio sanguinis et pulsus concitantur, et cellulae plus energiae consumunt.
(Outi Kaltio)

Bellum in Afganistania

19.02.2010, klo 10.42

Copiae consociationis NATO una cum exercitu regiminis in Afganistania impetum magnum in Talibanos susceperunt.
Confoederati, quamquam in hac re militari etiam fortuna adversa usi sunt, saltem talem victoriam iam tulerunt, ut ducem Talibanorum ceteris notabiliorem nomine Baradar deprehenderent.
(Reijo Pitkäranta)

Custodia oeconomiae

19.02.2010, klo 10.41

Commissio Unionis Europaeae novas rationes praeparat, quarum ope progressus oeconomicus civitatum Unionis accuratius custodiatur.
Commissarii enim metuunt, ne ceteris quoque terris Europae idem accadat quod Graeciae, quae multo aere alieno oppressa est. Custodia rei nummariae cavebitur, ut oeconomia totius regionis Unionis Europaeae in aequilibrio maneat.
(Reijo Pitkäranta)

De gasiductu aedificando

19.02.2010, klo 10.41

Societas Nord Stream etiam a Finnis licentiam accepit gasiductum subter mare Balticum agendi.
Quae cum ita sint, nihil iam impedit, quin ille tubus submarinus amplius mille ducenta chiliometra longus e Russia in Germaniam ducatur. Propositum est, ut hoc opus magni laboris mense Aprili incipiatur.
(Reijo Pitkäranta)

De motu elephantorum

[: Nuntii Latini](#)

19.02.2010, klo 10.40

Quaestio, qui fieri posset, ut elephanti tam perneciter progredierentur, ab investigatoribus soluta esse videtur.
Animadverterunt enim illos eodem tempore et currere et ambulare, cum prioribus pedibus cursu irent, posterioribus autem gradus ambulandi facerent. Hunc motum duplicem causam esse, cur celerrimi

elephanti velocitatem horalem etiam duodeviginti chiliometrorum assequerentur.
(Reijo Pitkäranta)

Roma nivibus completa

19.02.2010, klo 10.39

Quanta fuerit hoc anno hiemis saevitia, vel inde apparet, quod proximo die Veneris Romae quoque et in insulis Maris mediterranei nives ceciderunt.

Quo factum est, ut Colosseum et Forum Romanum omnino clauderentur. Nivibus etiam impediabatur, quominus aeriportus Ciampino prope Romam situs in usu esset. In Sardinia autem tempestas nivalis scholaribus diem feriarum dedit.

(Reijo Pitkäranta)

Ambidexteritas et ADHD

19.02.2010, klo 10.38

Ambidexteritas efficit, ut liberi propensiores ad perturbationem activitatis et attentionis (ADHD) sint. Ex investigatione in Finnia facta patet apud liberos et iuvenes, qui ambabus manibus aequae utuntur, multo crebrius hyperactivitatem inveniri quam apud homines dextrales. Qui ex illa perturbatione laborant, in schola minores facultates discendi habent. Symptomata a functionibus motoriiis loborum cerebri oriuntur.

(Outi Kaltio).

Verbum maxime romanticum

19.02.2010, klo 10.38

Sub diem Valentini (14.2.) trecenti viginti linguistae sententiam rogati sunt, quod verbum inter omnes gentes maxime romanticum esse sentirent.

Victoriam reportavit amour, vox amoris Francogallica. Secundum locum obtinuit amore, forma Italiana eiusdem vocabuli. Ceteroquin verba Italiana in hoc certamine tantum successum habuerunt, ut lingua Italianorum omnium venustissima eligeretur.

(Reijo Pitkäranta)

Nova commissio UE comprobata

12.02.2010, klo 10.58

Die Martis (9.2.) Parlamentum Europaeum novam commissionem Unionis Europaeae comprobavit.

In illa sunt, praeter praesidem Manuelem Barroso, viginti sex commissarii, scilicet singuli ex singulis civitatibus membris Unionis.

Ex his novem sunt feminae. Commissarius a rebus oeconomicis est Olli Rehn Finlandensis.

(Tuomo Pekkanen)

Conventus de Mari Baltico tuendo

12.02.2010, klo 10.58

Conventus internationalis de Mari Baltico tuendo (Baltic Sea Action Summit, BSAS) die Mercurii (10.2.) Helsinki celebratus est.

Intererant moderatores civitatum et regiminum regionis Balticae, societates industriales et commerciales, investigatores ordinesque.

Participes iam in antecessum promittere debebant, quid ad propositum efficiendum facturi essent, et de eo in conventu fidem dare.

Inter hospites notabiliores erant praesidens Russiae Vladimir Putin et Carolus XVI Gustavus rex Suetiae.

Mare Balticum inquinatissimum inter maria orbis terrarum dicitur.

Profunditas eius media est tantum quinquaginta quattuor metrorum, et cum Mari Germanico freto Danico angustissimo iungitur, quo fit, ut aqua eius lente mutetur.

(Tuomo Pekkanen)

Ianukovitsh praesidens Ucrainae

12.02.2010, klo 10.57

Victor Ianukovitsh in comitiis Ucrainae praesidentialibus victoriam adeptus est.

Dicit se obsistere, ne Ucraina ad consociationem Natonis accedat, operam autem dare, ut cum Unione Europaea rationes habeat propinquiores.

Iulia Timoshenko, quae inferior discessit, eventum non probat, sed observatores internationales censent comitia sine fraude acta esse.

(Tuomo Pekkanen)

Debita Haitiae dimissa

12.02.2010, klo 10.56

Principales terrae industriales promiserunt se Haitiae debita dimissuras esse.

De dimissione debitorum Jim Flaherty, minister aerarii publici Canadensium, inter conventum a grege septem terrarum (G7) in Canada habitum nuntiavit.

Gordon Brown, primus minister Britanniae, propositum laudavit admonens Haitiam ruinis obrutam etiam debitis obruendam non esse.

(Tuomo Pekkanen)

Olympia hiemalia inaugurantur

12.02.2010, klo 10.56

Olympia hiemalia proximis duabus septimanis Vancouverii, in urbe Canadae, celebrabuntur.

Post Montem Regalem (1976) et Calgariam (1988) Vancouverium est iam tertia urbs Canadensium, quae ludos instituit.

Inauguratio sollemnis fit hodie. Primum certamen est ludus exclusorius desulturae scridatoriae.

(Tuomo Pekkanen)

Ululae frigore pereunt

12.02.2010, klo 10.55

Maior pars ulularum, quarum decem species in Finnia nidificant, hac hieme perire creditur.

Deminutio talparum, quibus vescuntur, et frigora insolita ululas pessime temptaverunt. Anno proximo, cum silvae populationibus talparum abundabant, nidificatio bene successit et pulli nascebantur numerosi.

Nunc autem talpis in Finnia meridionali propemodum emortuis condiciones in gravissimas mutatae sunt.

Ululae, quae in silvis latere solent, in angustias adductae prope domicilia hominum advolant velut auxilium quaerentes.

In vivarium avium, quod est in urbe Heinola, brevi tempore viginti ululae viribus defectae et famelicae portatae sunt.

(Tuomo Pekkanen)

Americani arma vendituri

05.02.2010, klo 14.16

Regimen Civitatum Americae Unitarum Taivaniae arma et aliud belli instrumentum venditurum est.

Quod consilium moderatores Sinenses, quippe qui Taivaniam pro sua provincia haberent, aegerrime tulerunt dicentes talem mercaturam necessitudinibus Americanorum et Sinensium magno detrimento fore.

Censent enim securitatem suam nationalem, si illud negotium ad effectum perfectum sit, in periculum vocatum iri.

(Reijo Pitkäranta)

Forum ab oeconomia mundi

05.02.2010, klo 14.16

Forum ab oeconomia mundi, quod dicitur, septimana vergente Davone, in oppido Helvetiae, conventum habuit.

Rerum periti arbitrabantur recessione nummaria effectum esse, ut potentia oeconomica e terris occidentalibus in orientem transiret: Asiam iam in rebus oeconomicis partes principales agere.

Futuro autem tempore eas civitates, quae opibus oeconomicis aut naturalibus valerent, ut Quataria et Africa Australis, ad gradum fortunae ceteris superiorem ascensuras esse.

(Reijo Pitkäranta)

Toyota detrimentum fecit

05.02.2010, klo 14.15

Toyota, societas Iaponiensis autocinetis fabricandis, his septimanis magnam iacturam negotiorum fecit.

In causa est vitium technicum in pedali accelerationis vehiculorum eius repertum.
Qua re cognita multas miliones autocinetorum huius notae ad reficiendum revocari necesse erat.
Neque directores Toyotae abstinere potuerunt, quominus se peccasse faterentur et a clientibus suis veniam erroris peterent.
(Reijo Pitkäranta)

Lacuna nigra remotissima

05.02.2010, klo 14.15

Astronomi in observatorio meridionali Europae laborantes in spatio cosmico lacunam nigram invenerunt, quae a nobis remotior est quam ulla alia antea nota.
Magnitudine inter lacunas eiusdem generis secundum locum obtinet et massa sua quindecim partibus maior est quam Sol.
Constat lacunam nigram tum oriri, cum stella propter suam gravitationem collabitur.
(Reijo Pitkäranta)

Dani vita sua contentissimi

05.02.2010, klo 14.14

Commissio Unionis Europaeae percontationem faciendam curavit ad sciscitandum, quam felices cives cuiusque terrae Europae se esse putarent.
Ex hoc eurobarometro apparuit homines condicionem vitae suae contentissimos in Dania, deinde in Suetia Nederlandiaque inveniri, cum Finni in hac comparatione quarto loco positi essent.
Qui autem in Bulgaria Hungaria, Graecia, Dacoromania vivunt, sorte sua minime contenti esse videntur.
(Reijo Pitkäranta)

Helsinki, urbs nivium

05.02.2010, klo 14.14

Hac hieme in urbe Helsinki tantopere nixit, ut omnes viae et plateae acervis nivium complerentur.
Quae rerum condicio imprimis operae auxiliariae officit, cum vehicula variis calamitatibus succurrentia prae obstaculis nivosis vix eo, quo intendunt, pervenire possint.
Neque everricula publica ad vias purgandas sufficiunt, quam ob rem curatores urbis incolas Helsinkienses hortati sunt, ut ultro palam arriperent et in nivibus egerendis auxilium ferrent.
(Reijo Pitkäranta)

Ali Chemicus laqueo suspensus

29.01.2010, klo 17.07

Ali Chemicus sive Ali Hassan al-Majid in Iraquia die Lunae (25.1.) laqueo suspensus est.
Ante unam septimanam capitis damnatus erat propter impetum chemicum in vicum Halabja factum, in quo quinque milia Curdorum perierunt.
Iam antea propter stragem shiitarum ter capitis damnatus erat.
Cognomen Chemici ex eo habuit, quod armis chemicis, ut gaso ypprite, ad Curdos exstirpandos importune utebatur.
Erat consobrinus dictatoris Saddam Hussein et ex eodem vico Tikrit oriundus.
Praefectus erat illis regionibus, quas Curdi tenebant, ideoque illi saepe mandatum est, ut seditiones Curdorum reprimeret.
(Tuomo Pekkanen)

De calamitate Haitiana

29.01.2010, klo 17.06

Unio Europaea rettulit in motu terrae, sicut ex Haitia officialiter nuntiatum esset, circiter ducenta milia hominum interisse, ex quibus centum viginti milia repertos esse.
Numerum vulneratorum esse centum nonaginta trium milium.
In regione Portus Principis circiter sescenta novem milia hominum domos suas amisisse.
(Tuomo Pekkanen)

Pekinum birotarios revocat

29.01.2010, klo 17.05

Magistratus Pekinenses incolas urbis hortantur, ut birotis vehantur.

Ante viginti annos quaterni ex quinis Pekinensibus birotis utebantur, nunc autem plures quam ante autoraeda vehuntur.

Tantum singuli ex quinis birotis uti pergunt.

Propositum est, ut anno bis millesimo quinto decimo quarta pars Pekinensium birota quam autoraeda vehi malit.

(Tuomo Pekkanen)

Tigres in Asia interituri

29.01.2010, klo 17.05

Ordo mundi naturae tuendae (WWF) monet periculum esse, ne tigres Asiae orientalis-meridionalis omnino intereant.

Duodecim annis numerum tigrium in illa parte ex mille ducentis ad trecentos quinquaginta descendisse. Relatio ordinis divulgata est eodem tempore, quo conventus de tigribus tuendis triduanus ministrorum tredecim terrarum in Thailandia iniit.

Maximum periculum, tigribus Asiae orientalis-meridionalis imminens est, quod medicina traditionalis Sinarum multis corporis partibus tigrium utitur ideoque petitio earum usque augetur.

In toto orbe terrarum circiter tria milia ducenti tigres restant, cum annis nonagesimis circiter viginti milia numerarentur.

(Tuomo Pekkanen)

Victimae persecutionum commemorabantur

29.01.2010, klo 17.04

Die Mercurii (27.1.) a liberatione campi concentrationis Auschwitz sexaginta quinque anni acti erant.

In illo campo circiter quindecies centena milia hominum, maximam partem Iudaeorum, a nazistis crudelissime interfecti sunt.

Anno millesimo nongentesimo nonagesimo quinto (1995) parlamentum Europaeum decrevit, ut dies liberationis campi Auschwitz dies memorialis Europaeus esset.

Ita Auschwitz factum est symbolum rerum, quae neque oblivione obrui neque repeti debent.

Propositum est, ut die memoriali in scholis et aliis studiorum institutis celebrando iuventus de persecutionis tam prioribus quam hodiernis doceatur simulque admoneatur, ut pro dignitate humana et tolerantia operetur.

(Tuomo Pekkanen)

Quid Ban Ki-moon dixerit

22.01.2010, klo 10.31

Ban Ki-moon, secretarius generalis Nationum Unitarum, terrae motum in Haitia factum discrimen humanitarium his decenniis omnium gravissimum descripsit.

Die Dominico (17.1.), ubi primum in regionem vastatam venit, pollicitus est se id acturum esse, ut opera auxiliaria in illis locis pessime deletis maturaretur.

Idem censuit cladem Haitianam cum tsunami comparari posse, quod anno bismillesimo quarto (2004) in Indonesia accidisset.

(Reijo Pitkäranta)

De opera in Haitia auxiliaria

22.01.2010, klo 10.31

Ordo a Cruce Rubra Finniae Haitiae auxilium diversi generis suppeditavit.

Misit enim in aream terrae motu afflictam multas res necessarias ut stragula et tentoria familiaria.

In subsidiis erant etiam conclave sectionibus chirurgicis exsequendis et lecti ad usum aegrotantium destinati, qui postea in valetudinario campestri e Germania importato collocati sunt.

Saltem quindecim operarii auxilarii e Finnia in Haitiam profecti sunt, ut incolis inopia omnium rerum laborantibus subvenirent.

(Reijo Pitkäranta)

Nova lex in Iraquia lata

22.01.2010, klo 10.30

Regimen Iraquiae legem tulit, quae medicis ius daret arma portandi, ut a variis periculis sibi imminentibus se defenderent.

Rogatio eo quoque spectat, ne medici catervatim ex Iraquia effugiant, ut his annis factum est.

Una fugae causa est mos in Iraquia antiquitus traditus, ex quo propinqui aegri mortui a medico, quo curante ille periit, remunerationem mortis postulare possunt.

(Reijo Pitkäranta)

De quaestione Freti Gaditani

22.01.2010, klo 10.30

Controversiae inter Britanniam et Hispaniam de aquis Freti Gaditani auctae sunt.

Mense Decembri accidit, ut quattuor milites cohortis nationalis Hispaniae a biocolytis Britanniae deprehenderentur accusati, quod illicite in litus Gibraltariae venissent.

Haec regio anno millesimo septingentesimo tertio decimo (1713) ab Hispanis in potestatem Britannorum transiit.

(Reijo Pitkäranta)

Benedictus XVI in synagoga

22.01.2010, klo 10.29

Pontifex Maximus Benedictus XVI synagogam Romanam visit ibique admodum comiter receptus est.

Ait papa Christianis et Iudaeis, quamquam de certis rebus dissentirent, tamen multum commune esse.

Benedictus, cum visitationem iniret, ad monumentum Iudaeorum constitit, ut memoriam eorum

Israelitarum recoleret, qui in persecutionibus nazistarum in Italia vitam amiserant.

(Reijo Pitkäranta)

"Eldorado" in Brasilia detecta

22.01.2010, klo 10.29

In silvis pluvialibus, quae circa Amazonium in Brasilia sunt, urbs antiqua alicuius civitatis ignotae detecta est.

In imaginibus satellitum tumuli viis latis inter se coniuncti conspiciebantur, qui antea silvis operati erant.

Haec urbs mediaevalis, ubi sexaginta milia incolarum habitavisse putantur, originem multarum fabularum de urbe aurea vel "Eldorado" veram esse monstrare potest.

(Karoliina Ignatius)

Motus terrae in Haitia

15.01.2010, klo 16.28

Portus Principis (Port-au-Prince), caput civitatis Haitiae, die Mercurii saevissimo terrae motu devastatum est.

Complura dena milia hominum interisse narrantur.

Portus Principis cum circumiectis in ruinas redactus est concussione, qua fortior his ducentis annis ibi non exstitit.

Ex novem milionibus Haitianis tertia pars celeri auxilio egere nuntiatur.

(Tuomo Pekkanen)

Murus inter Israellem et Aegyptum ducetur

15.01.2010, klo 16.27

Regimen Israelis consilium muri in limite Aegypti aedificandi probavit.

Propositum est, ut ait primus minister Benjamin Netanjahu, impedire, ne immigratores clandestini et terroristae in Israellem veniant.

Neque murus per totum limitem ducetur, cuius longitudo est ducentorum sexaginta sex chiliometrorum, sed tantum ad illa itinera obstruenda, quibus immigratores utuntur.

Frequentissimi Israellem petunt per regiones sub urbe Eilat iacentes et confinium Gazae.

Proximis annis ex Aegypto in Israellem complura milia immigratorum illegalium venerunt.

Maior pars sunt Africani. Netanjahu aestimat iam nunc in Israele, terra septem milionum incolarum, circiter trecenta milia peregrinorum illegaliter versari.

Corea Septentrionalis foedus pacis poscit

15.01.2010, klo 16.27

Corea Septentrionalis Americanis proposuit, ut consultationes susciperentur, quibus armistitio belli

Coreani foedus pacis substitueretur.

Bellum Coreanum anno millesimo nongentesimo quinquagesimo ortum armistitio post tres annos facto finitum est sed foedus pacis officiale nondum exstitit.

USA nuntiavit consultationes fieri non posse, antequam Coreani Septentrionales programma nucleare deposuissent.

(Tuomo Pekkanen)

Mona Lisa cholestero affecta?

15.01.2010, klo 16.26

Vito Franco, investigator Universitatis Panormitanae, in tabulis multorum pictorum signa morborum invenit, quibus homines in eis delineati gravarentur.

De Mona Lisa vir ille doctus censet surrisum eius aenigmaticum forsitan significare, quod femina a Leonardo da Vinci depicta gradum cholestero habuerit altissimum.

In angulo oculi eius sinistri apparere subcutaneam accumulationem cholestero, quod xanthelasma dicitur, et in una manu visibilem esse tumorem adipatum.

In tabulis, quas Dick Ket, pictor Nederlandensis, de se ipso pinxit, Franco signa morbi cardiaci ingeniiti observavit.

(Tuomo Pekkanen)

Hiems asperrima grassatur

15.01.2010, klo 16.25

Tempestas nivosa, nomine Daisy, septimana vergente in Media Europa saeviebat.

Die Dominico condiciones in Germania septentrionali et in insulis Balticis erant pessimae.

Commeatus terra marique laborabat atque volatus in multis aeriportibus revocati sunt.

Autoraedae in molibus nivium inhaerescebant et lineae ferriviariae passim interruptae sunt.

In Bosnia et Croatia pluviae et nives solutae diluvia effecerunt.

In Albaniam septentrionalem, ubi inundatio duobus milibus quingentis domibus imminebat, greges adiutorum a multis terris missi sunt.

In Italia totus mons Vesuvius erat die Dominico nivibus candidus.

Etiam in aliis continentibus frigora insolita fuerunt.

(Tuomo Pekkanen)

Strages cruenta Esboae facta

08.01.2010, klo 13.05

Pridie Kalendas Ianuarias (31.12.) Esboae, in urbe prope Helsinkium sita, strages cruenta facta est, qua sex homines vitam amiserunt.

Perpetrator caedium erat Albanus quidam Kosoviensis quadraginta tres annos natus, qui viginti fere annos in Finnia vixerat.

Primum quidem pristinam suam concubinam domi eius crudelissime trucidavit, deinde in vicinam sedem mercatoriam profectus est, ubi pistolio usus quattuor collegas feminae paulo ante interfectae occidit.

Quo facto domum suam reversus mortem sibi ipse conscivit. In causa homicidiorum zelotypia et cupiditas ulciscendi fuisse putantur.

(Reijo Pitkäranta)

Salutatio Coreae Septentrionalis

08.01.2010, klo 13.04

Primores Coreae Septentrionalis salutationem novi anni admodum inopinatam edixerunt.

Nuntiaverunt enim se inimicitias, quas cum Civitatibus Americae Unitis haberent, finem facere et cum Corea Meridiana pacem perpetuam conciliare velle.

Idem proposuerunt, ut tota paeninsula Corea regio armis nuclearibus vacua redderetur.

Talia vota eo mirabiliora habentur, quod Coreani Septentrionales mense Aprili recusaverunt, quominus consultationes ad programma nucleare pertinentes continuarent.

(Reijo Pitkäranta)

Quid in Iemenio acciderit

08.01.2010, klo 13.03

Americani et Britanni, cum ictum terroristicum metuerent, aedes legationis suae in Iemenio ad aliquot dies claudere decreverunt.

Moderatores enim Civitatum Americae Unitarum suspicantur Iemenium unum ex illis locis esse, ubi terroristae ordinis al-Qaida latebras suas habeant.

Paulo post nuntius emanavit bellatores eiusdem consociationis cum copiis regiminis Iemenii conflxisse et inter illos tumultus duos homines mortuos esse.

(Reijo Pitkäranta)

Aedificium omnium altissimum

08.01.2010, klo 13.03

Pridie Nonas Ianuarias (4.1.) in civitate Dubaia aedificium in orbe terrarum omnium excelsissimum inauguratum est.

Culmen enim eius ad altitudinem octingentorum duodetriginta metrorum surgit.

Constat haec domus turrita e centum sexaginta tabulatis, et in ea insunt plus mille habitationes, complura graphea, deversoriumque, quod vestium delineator Georgius Armani decoravit.

(Reijo Pitkäranta)

Restauratio Codicis Restae

08.01.2010, klo 13.03

Collectio picturarum linearium post restaurationem septem annorum in Bibliothecam Ambrosianam Mediolanensem restituta est.

Hoc codice, qui originem trahit a saeculo septimo decimo, etiam imagines a Leonardo Da Vinci et Raphaelae delineatae continentur.

Hic codex est ex eis triginta libris, in quos Sebastianus Resta, monachus Italus, tria milia quingentas fere picturas lineares collegit.

(Antti Ijäs)

Carlsen optimus scacchista

08.01.2010, klo 13.02

Lusor scacorum omnium optimus in praesenti habetur Magnus Carlsen, adolescens Norvegus undeviginti annos natus.

Quam praeclara sit eius indoles ad hanc artem, vel inde apparet, quod nemo ante eum tam iuvenis hunc principatum obtinuit.

(Reijo Pitkäranta)

Protestationes in Irania sanguineae

07.01.2010, klo 17.01

Postquam Mahmud Ahmadinejad mense Iunio ab exercitu et ducibus religiosis adiutus praesidens Iraniae creatus est, tumultus politici, in multis Iraniae partibus orti, continuantur et in dies exacerbescunt.

Die Dominico (27.12.) quindecim homines perisse narrantur, cum custodes securitatis protestantes armis ignivomis aggressi essent.

In his erat Ali Musavi, cuius avunculus Mirhosein Musavi est dux oppositionis.

Die Lunae homines, qui ad eum convenire conabantur, gaso lacrimogeno adhibito dispersebantur et circiter trecenti homines, inter quos decem notissimi duces oppositionis, incarcerati sunt.

Oppositio politica praesidentem eiusque fautores fraudis electoralis noxios habet.

Ayatolla Ahmad Khatami nationes peregrinas accusat, quod res Iraniae evertere conentur.

"Hae sunt", inquit Khatami, "insidiae contra rem publicam Islamicam Iraniae. Tribunalia debent illos punire, qui in recessu protestationum diei Dominici versantur."

USA et UE actiones magistratuum Iraniae damnaverunt.

(Tuomo Pekkanen)

Ictus terroristicus elusus

07.01.2010, klo 17.00

Die Nativitatis (25.12.) vir Nigerianus, nomine Umar Faruk Abdumutallab, aeroplanum, quod ab aeriportu Amstelodamensi in Detroit volabat et iam erat descensurum, displodere conabatur.

Jasper Schuringa, iuvenis Nederlandensis, cum flammas surgentes vidisset, non dubitabat terroristam aggredi eumque coercere, donec vinculis constringeretur.

Umar ex urbe Lagosa Nigeriae Amstelodamum volaverat ibique alterum aeroplanum ascenderat, quo iter in Detroit versus pergebat.

Ille custodes securitatis tam in aeriportu Lagosensi quam Amstelodamensi fefellerat, cum novum genus materiae displosivae, quod in inspectionibus aeriportuum est invisibile, in feminalibus suis

abscondidisset.

Grex regionalis ordinis terroristici, qui al-Qaida dicitur, in paginis suis interretariis affirmavit se ictum, quo illud aeroplanum interiret, molitum esse.

Se dedisse viro Nigeriano instrumentum expeditum, quod propter vitium technicum displosum non esset.

Motivum fuisse ictum aerium, quod Americani in Iemenio fecissent.

(Tuomo Pekkanen)

Mare glaciale solito calidius

07.01.2010, klo 16.59

Observatoria meteorologica Oceani Arctici hoc anno mediam temperaturam tribus gradibus altiore, si cum statisticis longinquis compares, mensuraverunt.

Mensibus Novembri et Decembri temperatura a quinque usque ad novem gradibus altior erat quam in medio his triginta annis.

In causa est aqua maris solito calidior et glacies in superficie eius deminuta.

(Tuomo Pekkanen)

Dies festi nivibus candidi

07.01.2010, klo 16.59

At dies festi Nativitatis Domini in tota Finnia solito niviosiores fuerunt.

Institutum meteorologicum rettulit in partibus meridionalibus in vigilia Nativitatis plus nivium fuisse quam multis annis, scilicet inter quindecim et triginta centimetra.

In quibusdam locis Finniae septentrionalis frigora diebus festis triginta gradus superabant.

(Tuomo Pekkanen)

Pactum Americano-Polonicum

18.12.2009, klo 10.37

Moderatores Poloniae et Civitatum Americae Unitarum post diurnas consultationes pacto

subscripserunt, ex quo in finibus Poloniae centum magistratus militares Americani collocarentur.

Tali consilio inito Americani licentiam habent systema missilibus avertendis in Polonia constituendi.

Ex quo efficitur, ut Polonia artius quam ante cooperatione militari cum Civitatibus Americae Unitis coniungatur.

(Reijo Pitkäranta)

Monumentum Bukarestiense

18.12.2009, klo 10.36

Bucarestiis, in urbe principe Dacoromaniae, monumentum revelatum est, quo memoria Iudaeorum et zingarorum altero bello mundano occisorum recoleretur.

Ait praesidens Traian Basescu iam tempus esse Dacoromanos atrocitates pristini temporis reminisci et confiteri, quantum genocidium in patria sua cum nazistis confoederata factum esset.

Constat numerum hominum in Dacoromania illo tempore interfectorum paene quadringentorum milium fuisse.

(Reijo Pitkäranta)

Inventum archaeologicum

18.12.2009, klo 10.36

Archaeologi Itali in Sahara vestigia invenerunt exercitus Persici,

qui abhinc duo milia quingentos fere annos disparuit.

Exercitus missus erat ad oasis Siwam vastandam, sed quinquaginta milia militum in itinere omnino evanuerunt.

Herodotus, historicus Graecus, narrat tempestatem vehementem milites eripuisse et eos alta harena obruisse.

Nunc partes telorum aeneorum, ornamenta ossaque humana effossionibus archaeologicis detecta sunt.

(Outi Kaltio)

Periculum mutationis climaticae

18.12.2009, klo 10.35

Die Dominico (13.12.) hora post meridiem tertia campanae ecclesiarum in multis Finniae partibus

sonabant, ut cives de periculis mutationis climaticae monerentur.
Mos enim est a maioribus traditus campanas pulsare, cum quod periculum communi saluti imminet.
Neque hic sonitus apud nos solos audiebatur, sed in toto fere orbe terrarum.
(Reijo Pitkäranta)

Sollemnitās Sanctae Luciae

18.12.2009, klo 10.35

Idibus Decembribus (13.12.) in urbe Helsinki festum Sanctae Luciae celebrabatur.
Traditur virgo Christiana huius nominis illo ipso die anno trecentesimo quarto Syracusis martyrium subisse.
Caerimonia sub vesperum in Ecclesia cathedrali Helsinkiensi initium cepit, cum Ellen Husberg, Sancta Lucia hoc anno electa, corona candelarum redimita est.
Postea curru bigarum per mediam urbem vehebatur lucem tenebris brumalibus afferens.
(Reijo Pitkäranta)

Mores Finnorum natalicii

18.12.2009, klo 10.34

Mores natalicii in Finnia his duobus decenniis vix ullo modo mutati sunt, ut patet ex percontatione Gallupiana apud nos nuper divulgata.
Nec quicquam differt, cuius aetatis aut condicionis quisque sit.
Nativitas Domini Finnis omnium feriarum annuarum longe acceptissima esse videtur, et hoc festum unusquisque nostrum libentissime domi suae una cum familia celebrat.
Illis diebus, praesertim vigilia diei natalis Christi, quartus quisque civis in ecclesiam it, ut verbum de puero in Bethlehem nato audiat.
(Reijo Pitkäranta)

Dies independentiae Finnorum

11.12.2009, klo 17.30

Nonagesimus secundus dies independentiae Finnorum postridie Nonas Decembres (6.12.) celebratus est.
Per totam Finniā officia divina et concentus instituebantur atque sepulcra heroum in bellis caducorum sertis ornabantur.
In cathedrali Helsinkiensi praesertim veterani Belli hiemalis (1939-1940) relegebantur.
Pompa militum ostensionalis in oppido Riihimäki facta est.
Receptio sollemnis in palatio praesidentis rei publicae diem clausit.
In palatium circiter mille octingenti hospites invitati erant, imprimis ministri, delegati parlamentarii et diplomatici, artifices, athletae.
Die festo Tarja Halonen, praesidens rei publicae Finniae, plus quattuor milia quingentos cives bene meritos insignibus decoravit.
(Tuomo Pekkanen)

Incendium cauponae nocturnae

11.12.2009, klo 17.29

In urbe Russiae Perm, quae plus mille chiliometra a Moscuā in orientem distat, sero die Veneris (4.12.) caupona nocturna ignem ex materia pyrotechnica concepit.
Incendio repente orto centum sedecim homines fumo aut pedibus effugientium conculcati perierunt, plus centum triginta laesi sunt, complures deni ex his gravissime.
Maior pars victimarum erant possessores illius cauponae aut amici familiaresque eorum, qui ad anniversarium tabernae celebrandum convenerant.
Praesidens Dmitri Medvedev luctum nationalem in memoriam incendio defunctorum ad diem Lunae (7.12.) indixit.
Magistratus moderatores cauponae accusant, quod decreta de incendiis praecavendis neglexerint.
(Tuomo Pekkanen)

Coreani Septentrionales protestari ausi sunt

11.12.2009, klo 17.28

Coreani Septentrionales contra inopinatam renovationem pecuniae protestati sunt, quod apud populum sub durissima dictatura viventem perrarum est.

Nuntii in Corea Meridiana divulgati narrant homines in via urbis Hamhung veteres chartas nummarias cremavisse et libellulos distribuisse, in quibus Kim Jong Il reprehenderetur.

Regimen Coreae Septentrionalis de renovatione nuntiavit, ex qua veteres nummi in novos ita mutarentur, ut pro centum veteribus unus novus daretur.

Praeterea tantum certam summam mutari posse, ceteram pecuniam in argentariis statalibus deponendam esse.

Cives protestantur, quia credunt pecuniam depositam numquam a regimine restitutum iri.

(Tuomo Pekkanen)

Colloquia de climate Hafniensia

11.12.2009, klo 17.28

Magnus de climate conventus Nationum Unitarum die Lunae (7.12.) Hafniae incepit.

Adsunt quindecim milia repraesentatorum, qui ex centum nonaginta duabus nationibus venerunt.

Spatio duarum fere septimanarum (7-18.12.) illi tractatum globalem componere conantur, ex quo emissiones dioxydi carbonici ita deminuantur, ut calefactio climatis coerceatur.

De emissionibus deminuendis nationes ditiores ante duodecim annos (1997) concordiam in urbe Kioto invenerunt, sed tractatus Kiotensis anno bis millesimo duodecimo valere desinet.

Conventus Hafniensis ad id spectat, ut Kiotensi tractatui novus substituatur.

Deliberatur praeterea, quibus modis nationes effectibus mutationis climaticae se accommodare possint.

(Tuomo Pekkanen)

Quid Barack Obama dixerit

04.12.2009, klo 14.04

Praesidens Barack Obama triginta milia militum novorum in Afganistaniam missurus est, ut oratione die Mercurii habita publice nuntiavit.

Praeterea a sociis Europaeis petivit, ut auxiliis quinque aut etiam decem milium virum comparatis copiis Americanorum succurrerent.

Idem dixit rerum condicionem in Afganistania quidem debilitatam esse, sed nullam esse causam, cur de ea desperaretur.

(Reijo Pitkäranta)

Rehn commissarius electus

04.12.2009, klo 14.04

Commissarius Unionis Europaeae a rebus oeconomicis designatus est Olli Rehn, vir Finnus quadraginta septem annos natus.

Consultum tum demum ratum erit, cum parlamentum Europaeum id comprobaverit.

Munus, quo Rehn functurus est, a rerum peritis plurimi habetur, nam novo commissario imprimis id curandum erit, ut res Europaeae post discrimen oeconomicum denuo florere incipiant.

(Reijo Pitkäranta)

Signa communistica vetita

04.12.2009, klo 14.03

Praesidens Poloniae Lech Kaczynski legi subscripsit, quae civibus usu omnium imaginum et signorum ad communismum pertinentium interdicat.

Censuit quidam senator novae legi favens communismum eodem modo tractandum esse ac nazismum, quod utraque doctrina aequae multis hominibus perniciiei fuisset.

Polonos, qui e potestate nazistarum liberati sub dicionem communistarum venissent, bene scire, quales uni et alteri essent.

(Reijo Pitkäranta)

Venetiae aquis obrutae

04.12.2009, klo 14.03

Dimidia fere pars mediae urbis Venetiarum inundationibus obruta est, quo factum est, ut etiam Area Sancti Marci diluvio cooperiretur.

Nuntiaverunt observatores accessus et recessus maris summam aquam centum triginta uno centimetris ascendisse.

Constat Venetias urbem subliciam sive in sublicis positam esse, quam ob rem vici plateaeque huius emporii assidue fluctibus maris exposita sunt.

(Reijo Pitkäranta)

Annona in Finnia optima

04.12.2009, klo 14.02

Proventus frumenti in Finnia hoc autumno aequè uber fuit ac duobus annis proxime praeteritis. Hoc maxime ad triticum et hordeum valet, quorum segetes laetissimae erant, cum annona secalis et avenae minor remanserit quam sperabatur. Secale apud nos solum frumenti genus est, quod peregre importari oportet, cum cultura eius domestica ad panem proferendum non sufficiat.

(Reijo Pitkäranta)

De timore medici dentarii

04.12.2009, klo 14.02

Tertius quisque Finnus medicum dentarium aliquo modo timet. Multi eorum tanta formidine imbuti sunt, ut ne cogitare quidem possent se in sella dentistae assidere. Credideris huius generis homines, ne ad medicum dentium ire cogantur, diligentissimos in ore suo purgando esse, sed reapse hi ipsi curam dentium domesticam neglegere solent. Hoc patet ex dissertatione academica, quae non ita pridem in Universitate Ouluensi divulgata est.

(Reijo Pitkäranta)

Memoria belli hiemalis

27.11.2009, klo 11.46

His diebus septuaginta anni acti sunt ex die, quo copiae Unionis Sovieticae bello non indicto in Finnam invaserunt. Simul aeroplana Sovietica complures urbes Finnorum bombis percusserunt. Bellum hiemale, pridie Kalendas Decembres anno millesimo nongentesimo undequadragesimo ita ortum, centum quinque dies duravit. In illo bello paene viginti septem milia militum Finnorum ceciderunt, circiter quadraginta quattuor milia vulnerati sunt, prope mille cives animam bombardationibus amiserunt. Clades autem copiarum Sovieticarum multiplices fuerunt. Armistitium die duodecimo mensis Martii factum est et arma postridie eius diei conticuerunt.

(Tuomo Pekkanen)

Summi magistratus Europaei designati

27.11.2009, klo 11.45

Commissio Europaea de summis magistratibus in quinquennium creandis constituit. Primus praesidens Unionis Europaeae designatus est Herman Van Rompuy, minister primarius Belgarum. Catherine Ashton, baronissa Britannica, designata est, quae rebus exteris Unionis praeesset. Uterque Kalendis Decembribus, cum tractatus Olisiponensis valere incipiet, munus inibit. Novi magistratus in politica internationali extra patriam suam huc usque admodum ignoti fuerunt. Van Rompuy in Universitate Catholica Lovaniensi et philosophiae et oeconomiae applicatae studuit. Baronissa Ashton examen sociologiae in Universitate Londiniensi solvit, fuit membrum parlamenti Britannici et postea commissaria Europaea mercaturae.

(Tuomo Pekkanen)

Fodinae Sinarum periculosissimae

27.11.2009, klo 11.45

In fodinis Sinarum plures calamitates accidunt quam in ulla alia terra. Periculosissimae sunt carbonis fodinae, in quibus securitas saepissime neglegitur. Anno proximo (2008) plus tria milia ducenti fossores interierunt et primis sex huius anni mensibus numerus in fodinis mortuorum est iam mille ducenti. Die Sabbati (21.11.) in fodina carbonis apud urbem Hegang Sinarum septentrionalium sita, in qua tum quingenti duodetriginta homines laborabant, facta est explosio, in qua centum sex fossores perierunt. Illa calamitas fuit maxima post mensem Septembrem anni bis millesimi septimi, quo centum octoginta unus fossores vitam amiserunt.

(Tuomo Pekkanen)

Montes glaciei Novae Zelandiae appropinquant

27.11.2009, klo 11.44

Magistratus Novae Zelandiae nautas in propinquo aequore navigantes de montibus glaciei praemonuerunt.

Saltem centum glaciei montes, quorum maximi diametrum plus ducentorum metrorum habent, in septentrionem versus fluitant.

Illi montes putantur esse fragmenta ingentis molis glacialis ex Antarctica solutae, cuius superficies originalis erat triginta chiliometrorum quadratorum.

(Tuomo Pekkanen)

Senes lentiores maturius moriuntur

27.11.2009, klo 11.43

Investigatores Franci ambulationem hominum seniorum per quinquennium observaverunt.

Cum tria milia ducenti homines in tres greges ex celeritate ambulationis divisi essent, compertum est lentissime ambulantes ter verisimilius morbis cardiovascularibus mori quam celeriores.

Relatio ambulationis lentae ad singulas mortis causas antea investigata non est.

(Tuomo Pekkanen)

Quid Barack Obama dixerit

20.11.2009, klo 16.23

Praesidens Barack Obama oratione in Iaponia habita affirmavit Americanos cum nationibus Asiae cooperari velle.

Negavit Civitates Americae Unitas eo tendere, ut Sinae debilitarentur.

"Res publica Sinensis", inquit, "opibus et copiis florens communitati internationali usui esse poterit".

Obama, cum sciret se in eo reprehensum esse, quod iura humana in Sinis violata silentio praeterisset, promisit in colloquiis cum Sinensibus habendis etiam res controversas tractatum iri.

(Reijo Pitkäranta)

Febris suina in Finnam venit

20.11.2009, klo 16.22

Febris suina iam per totam Finnam vagari coepit, quamquam vis eius fortasse se leviolem praebuit quam antea metuebatur.

Numerus contagionum tamen multorum denorum milium esse aestimatur, et, ut in expectatione erat, fieri non potuit, quin aliquot aegri hoc morbo implicati vitam amitterent.

Magistratus asseveraverunt remedium pandemiae unicuique civi mox praesto fore, quam ob rem sibi propositum esset, ut omnes Finni contra pestilentiam suinam vaccinantur.

(Reijo Pitkäranta)

Turris Eiffeliana CXX annorum

20.11.2009, klo 16.21

Turris Eiffeliana Parisiensis trecenta viginti quattuor metra alta abhinc centum viginti annos erecta est.

Ad honorem iubilaei hoc monumentum celeberrimum luminibus multicoloribus ornatum micat, cum lampades eius singulis vesperis quater accensae sunt.

Incolae Parisienses sicut viatores urbem obeuntes usque ad finem huius anni occasionem habebunt illud spectaculum admirandi.

(Reijo Pitkäranta)

Vespasianus ante MM annos natus

20.11.2009, klo 15.05

Dies septimus decimus huius mensis (17.11.) dies natalis bismillesimus imperatoris Vespasiani erat.

Narrat enim Suetonius eum ante diem quintum decimum Kalendas Decembres in Sabinis ultra Reate natum esse, quinquennio ante quam Augustus excederet.

Tacitus, rerum scriptor Romanus, scripsit Vespasianum solum imperatorem Romanum fuisse, qui rerum potitus se melius gessisset quam ante potestatem acceptam.

(Reijo Pitkäranta)

Cultura Finnica Matriti ostenditur

20.11.2009, klo 15.05

Matriti, in urbe principe Hispaniae, mense Novembri complures expositiones instituuntur, quibus imprimis architectura et ars designandi Finnica moderna exhibentur.

Neque umquam ante cultura Finnica in Hispania tanto apparatu ostentata est.

In conspectu sunt exempla architecturae lignae praecipuae artis, aedificia et utensilia ab architecto Alvar Aalto delineata, varia opera artis designandi industrialis.

(Reijo Pitkäranta)

De fossilibus semisimiae

20.11.2009, klo 15.04

In Aegypto fossilia cuiusdam semisimiae inventa sunt, in quibus proprietates humanae inesse videbantur.

Relictis diligenter inspectis iam credebatur illud animal cognatum esse eius primatis, quae "Ida" vocatur.

Nunc autem - ambobus fossilibus cum aliis primatibus collatis - clarum factum est neutras species ad originem hominum pertinuisse.

(Jokke Häsä)

Anniversarium a muro Berolinensi deiecto vicesimum

13.11.2009, klo 18.17

Dies anniversarius vicesimus a muro Berolinensi deiecto die Lunae (9.11.) duce cancellaria Angela Merkel Berolini celebratus est.

Aderant Mihail Gorbatschov, ultimus praesidens Unionis Sovieticae, Lech Walesa, pristinus praesidens Poloniae, qui consociationi Solidaritati praefuerat, Miklos Nemeth, pristinus praesidens Hungariae, qui primus fines patriae in occidentem aperuerat.

Sollemnitatis principalis apud Portam Brandenburgensem fiebat, quod velut symbolum liberationis Berolini orientalis factum est.

Circa proximam plateam murus symbolicus ex mille magnis tesseris domini ludi ductus erat.

Tesserae erant duo metra et dimidium altae et murus ille longus sesquichilometrum.

Prima ex illis tesseris a Lech Walesa inter sollemnitatem ita deiecta est, ut postea omnes tesserae singillatim caderent.

Tesseris cadentibus illustrabatur, quo modo regimina communistica autumno anni millesimi nongentesimi undenonagesimi (1989) aliud post aliud corruerent.

Vespere facto spectaculum pyrotechnicum et concentus festivus sollemnitates clausurunt.

(Tuomo Pekkanen)

Gorbatschov : Bellum mundanum imminebat

13.11.2009, klo 18.16

Mihail Gorbatschov censet tertium bellum mundanum oriturum fuisse, si reclamaciones, quae fierent antequam murus Berolinensis deiceretur, vi et armis suppressae essent.

"Si Unio Sovietica voluisset," inquit, "murus non cecidisset neque Germania orientalis et occidentalis unitae essent. At quid tum factum esset ? Catastropham aut plane tertium bellum mundanum. Equidem sanguinem effundere nolebam."

Ita Gorbatschov in actis Britannicis Daily Telegraph.

Unio Sovietica illo tempore quingenta milia militum in Germania orientali habebat, quibus reclamaciones facile reprimi potuissent.

(Tuomo Pekkanen)

Mafiosi in Italia deprehensi

13.11.2009, klo 18.15

Roberto Maroni, minister a rebus interioribus Italiae, tria milia sescentos mafiosos his duodeviginti mensibus deprehensos esse rettulit, in illis quindecim, qui ad triginta latrones Italiae maxime quaesitos pertinerent.

Die Sabbati (5.11.) a vigilibus deprehensus est Luigi Esposito, dux tribus Camorristicae, qui sex annos latitaverat.

Inventus est in villa Neapolitana lautissima collis Pausilupi (vulgo Posilippo), ubi falso nomine usus vivebat.

Ob commercium drogarum et consuetudines mafiosas carcere novem annorum damnatus erat.

Una septimana ante deprehensus erat Pasquale Rosso cum duobus fratribus, qui duces principales

Camorrae Neapolitanae habentur.
(Tuomo Pekkanen)

Kalashnikov nonagenarius

13.11.2009, klo 18.14

Mihail Kalashnikov, qui sclopetum nomine suo appellatum construxit, die Martis nonaginta annos complevit.

Die natali a praesidente Dmitri Medvedev in Kremlinum invitatus erat.

Vivit modeste in urbe Izhveski civitatis Udmurtiae neque ullum fere lucrum ex illo sclopeto accipit, cuius exemplaria per orbem terrarum vendita plus centum miliones numerantur.

(Tuomo Pekkanen)

Karzai iterum electus

06.11.2009, klo 14.07

Hamid Karzai, praesidens Afganistanae hodiernus, munere suo fungi pergit.

Neque enim opus erat alterum suffragium praesidentiale hac septimana instituere, cum solus competitor eius Abdullah Abdullah de certamine recessisset.

Quae cum ita essent, Karzai, quippe qui primo suffragio mense Augusto facto maiorem sententiarum partem sibi paravisset, victor electionis renuntiatus est.

(Reijo Pitkäranta)

De pacto Olisiponensi

06.11.2009, klo 14.07

Praesidens Tzekiae Vaslav Klaus pacto Olisiponensi Unionem Europaeam renovanti tandem subscripsit.

Hoc factum est, postquam iudicium constitutionale Tzekiae censuit illud pactum legi fundamentali patriae non repugnare.

Dixit Klaus se sententiam tribunalis revereri, quamquam ipse ab ea dissentiret. "Pacto", inquit, "Olisiponensi valente Tzekia non iam civitas sui iuris est."

Ex approbatione sequitur, ut nihil iam impediat, quin Unioni Europaeae praesidens et minister a rebus exteris creentur.

(Reijo Pitkäranta)

Memoria muri Berolinensis

06.11.2009, klo 14.06

His diebus viginti anni acti sunt, cum murus Berolinensis apertus et Germania iterum unita est.

Laus eius rei imprimis tribus principibus civitatum ascribitur, qui sunt Mihail Gorbatsov, praesidens Unionis Sovieticae, George Bush maior, praesidens Civitatum Americae Unitarum, Helmut Kohl, cancellarius foederalis Germaniae occidentalis.

Illi tresviri Germaniae redintegrandae ante diem quartum Kalendas Novembres (29.10.) Berolinum invitati erant ad memoriam illius momenti historici recolendam, et a multitudine maximo plausu recepti sunt.

(Reijo Pitkäranta)

Asterix L annos complevit

06.11.2009, klo 14.06

Asterix, series pictographica in toto orbe terrarum nota, mense Octobri exeunte quinquaginta annos complevit.

Quod iubilaeum in Francogallia variis expositionibus, concentibus aliisque eventibus institutis, quin etiam propria tessera epistulari edita, publice celebrabatur.

Ad honorem anniversarii semisaecularis etiam novus libellus pictus et divulgatus est, qui inscribitur: 'Dies natalis Asterigis et Obeligis - Liber aureus'.

(Reijo Pitkäranta)

De arte poetica in Britannia

06.11.2009, klo 14.09

Ars poetica in Britannia denuo floret.

Claire Pollard, poetria iuvenis Angla, dicit modum poematum publicandorum technica informatica

renovatum esse, quod poetae facillime per interrete alius cum alio communicare et versus inter se mittere possent.

Neque poetae Britannii auditoribus carent: recitantur enim carmina etiam in viis, foris tabernisque publicis.

(Antti Ijäs)

Canes pastores aucti

06.11.2009, klo 14.04

Auxilium, quod canes pastores in praediis Finniae pecuariis praestant, in annos pluris aestimatur.

Numerus enim eorum in fundis nostris utcumque rarescentibus uno decennio duplex factus est.

Adhibentur maxime ad greges vaccarum et ovium custodiendos.

Usitatissima fere iussa, quibus canes in negotio suo gerendo oboediunt, sunt haec: 'sinistra!', 'dextra!', 'humi!', 'abstine!', 'respice!'.

(Reijo Pitkäranta)

Finnia in mundo prosperrima

29.10.2009, klo 18.43

In indice prosperitatis internationali die Lunae (26.10.) divulgato Finnia inter centum quattuor terras primo loco posita est.

Institutum Londiniense, cui nomen est Legatum, in illa comparatione non tantum oeconomiam nationum respexit sed etiam qualitatem vitae.

Consideratae sunt novem rationes, quibus prosperitas efficeretur.

Quae sunt fundamenta oeconomica, industria et innovationes, institutiones democraticae, res scholastica, valetudo, securitas, administratio, libertas civium, capitale sociale.

Finnia erat unica terra, quae in omnibus his rationibus inter decem primas posita est.

In re scholastica Finnia erat tertia, secunda in securitate et administratione.

Moderator Instituti William Inboden Finnos laudavit, quod tam oeconomia quam felicitate civium excelleret.

Felicitatem non fieri ex pecunia sed ex labore, probitate, eruditione atque imprimis ex eo, quod possibilitas ad condiciones vitae meliorandas praesto esset.

"Hae sunt res", inquit, "quibus prosperitas creatur".

Post Finniam prosperrimae iudicatae sunt Helvetia, Suetia, Dania et Norvegia, quae quidem productione nationali ante omnes posita est.

Inter triginta primas in indice nominatas sunt tantum terrae industriales ditiores.

USA (IX) est ante Britanniam (XII), Germaniam (XIV) et Franciam (XVII).

Agmen terrarum claudunt Zimbabwe, Jemen, Sudan.

(Tuomo Pekkanen)

Coreani Septentrionales fame laborant

29.10.2009, klo 18.42

Ex Coreanis Septentrionalibus, qui viginti quattuor miliones numerantur, paene novem miliones fame laborant.

Auxilium cibarium internationale pluribus quam duabus milionibus non sufficit.

Corea Septentrionalis est quidem opibus naturae ditior quam Meridiana Corea, sed illae opes potius ad experimenta nuclearia et missilia quam ad populum nutriendum consumuntur.

Vitit Muntarbhorn, qui de iuribus humanis Coreae Septentrionalis in sessione generali Nationum Unitarum rettulit, dixit populum ibi continuo metuere atque poenis collectivis, cruciatui et suppliciis arbitrariis subici.

Cives nec non magistratus incitari et urgeri, ut alter alterum proderent.

(Tuomo Pekkanen)

Mafia venena in mare mersit

29.10.2009, klo 18.41

Magistratus Italiae mense Septembri apud oram Italiae Meridianae navem materia radioactiva oneratam invenerunt, quam mafia, factio nefariosa, in mare meraserat.

Pristini mafiosi narraverunt Ndrangetam, quae mafia est Calabriae, omnino triginta duas naves, quae eiectionis radioactivae oneratae essent, in Mare Mediterraneum mersisse.

Negotium materiae radioactivae ita abscondendae a mafiosis per viginti annos gestum esse.

Ex illis navibus nulla antea reperta erat. Incolae oppidi Amanteae, quod est in Calabria, die Sabbati (24.10.) irati contra magistratus reclamitantes flagitabant, ut sordes radioactivae ex regionibus inquinatis sine mora purgarentur.
(Tuomo Pekkanen)

Comitia fraudulenta

23.10.2009, klo 12.36

Commissio a Nationibus Unitis posita, cuius erat de fraudibus electoralibus Afganistanae inquirere, decrevit, ut suffragium in ducentis decem circumscriptionibus irritum declararetur.

Complura centena milia votorum praesidenti Hamid Karzai datorum propter fraudes reiecta sunt, quo factum est, ut ille victoriam non reportaret.

Praesidens Karzai, qui antea obstiterat, ne nova comitia fierent, fraudibus electoralibus a commissione patefactis iam confessus est altera suffragia legitima fore.

Quae cum ita sint, Afgani die mensis Novembris septimo ad praesidentem eligendum iterum ad urnas accedent.

In alteris comitiis candidati erunt Abdullah Abdullah, pristinus minister a rebus exteris, et praesidens Karzai, ex quibus alteruter novus praesidens designabitur.

Difficultates rei bene gerendae afferunt hiems iam propinqua, qua commeatus impeditur, atque metus violentiae crescentis et novarum fraudum electoralium.

(Tuomo Pekkanen)

Feminae contra Berlusconi reclamitant

23.10.2009, klo 12.36

Circiter centum milia feminarum Italicarum promulgationi subscripserunt, qua sermones Silvii Berlusconi contumeliosos vehementissime damnant.

Ille enim in colloquio televisifico ministrae Rosy Bindi dixerat illam quidem praestare pulchritudine sed non intelligentia.

Bindi, quae in Italia magni aestimatur, respondit se esse feminam, quae quovis modo tractari non posset.

(Tuomo Pekkanen)

Diaeta mediterranea demissionem arcet

23.10.2009, klo 12.35

In tractatu recens divulgato investigatores Hispani concluderunt homines in regionibus meridianis viventes demissione animi rarius affici quam septentrionales.

Causam esse diaetam salubriorem, in terris circa Mare mediterraneum iacentibus translaticiam.

Exempli gratia oleum olivarum continere acida crassa, quae animi demissionem averterent.

Praeterea in holeribus, fructibus, piscibus, nucibus cerealibusque multa vitamina et multos flavonoides inesse, quibus animus salubriter afficeretur.

In illa investigatione diaeta decem milium Hispanorum bene valentium per quadriennium observabatur.

Illo temporis spatio tantum quadringenti octoginta ex eis in demissionem animi inciderunt.

(Tuomo Pekkanen)

Luce decrescente Finni languescunt

23.10.2009, klo 12.34

Autumno procedente et luce decrescente Finni languescunt.

Multi capsulas pilularum arripiunt, ut languorem ex anni tempore tenebroso ortum vitaminis expellant.

Ex multis investigationibus domesticis apparet Finnos ex cibo parum vitamini D accipere.

Praesertim media hieme inopia vitamini D apud Finnos observata est. Optimus fons illius vitamini est sol, cuius lux ultravioleacea vitaminum D in corpore humano generat.

In septentrione autem lux solis tantum aestate satis suppeditat.

Ideo vitaminum D hieme utiliter sumitur, sed si cibus est varius neque lac et pisces in diaeta desunt, vitaminum additiciu non est necessarium.

(Tuomo Pekkanen)

Incendium funestum

16.10.2009, klo 11.51

Quattuor pueri et una puella mortui sunt incendio saevissimo in oppido Finniae Valle Gratiae sive Naantali orto.

Grege quindecim adolescentium in domum quandam privatam ad finem septimanae agendum convenerat, cum aedificium subito ad modum explosionis flammam cepit et brevi tempore totum combustum est.

(Reijo Pitkäranta)

Obama Nobelista pacis

16.10.2009, klo 11.50

Praemium Nobelianum pacis accipit hoc anno Barack Obama, praesidens Civitatum Americae Unitarum.

Thorbjörn Jagland, praeses Collegii Nobeliani Norvegici, ait illum effecisse, ut spes in orbem terrarum rediret. Huc accedere, quod Obama politicae internationali novum spiritum dedisset et multum ad cooperationem inter gentes promovendam contulisset. Neque merita eius in armis nuclearibus compescendis obliviscenda esse.

(Reijo Pitkäranta)

Pax Turciae et Armeniae

16.10.2009, klo 11.49

Ministri Turciae et Armeniae pacti sunt, ut inter utramque civitatem post inimicitias unum fere saeculum gestas tandem concordia constitueretur.

Pax auctoribus Helvetiis facta est, quam ob rem tabulis illius pacti in urbe Turico die Saturni (10.10.) subscriptum est. In causa litigandi erat strages anno millesimo nongentesimo quinto decimo (1915) in Turcia facta, qua multa centena milia Armeniorum occisa sunt.

(Reijo Pitkäranta)

Arma in Nigeria posita

16.10.2009, klo 11.46

In Nigeria circiter quindecim milia hominum rebellium, postquam veniam a regimine oblatam approbaverunt, arma posuerunt.

Iam speratur fore, ut impetus in fablicas petrolearias per multos annos facti ad finem veniant. Nunc autem magistratus solliciti sunt de quaestione, quibusnam rationibus tanta rebellium multitudo ad societatem publicam rursus applicari possit.

(Reijo Pitkäranta)

Rixa de tabulis lapideis

16.10.2009, klo 11.45

Curatores Collegii antiquitatis Aegypti a Francogallis flagitaverunt, ut quinque tabulas lapideas ex Museo artis Louvre Aegyptiis redderent.

Nisi id fecissent, ipsis iam nullam consuetudinem cum illis fore. Haud ita multo post ministerio Francogalliae culturali optimum factu visum est voluntati Aegyptiorum morem gerere.

(Reijo Pitkäranta)

De diaeta mediterranea

16.10.2009, klo 11.44

Cibus mediterraneus bonum remedium ad depressionem mentis prohibendam se praebuit, ut patet ex investigatione in Hispania instituta.

Itaque veri simile est eos, quorum victus imprimis ex olere, fructu, nuce, pisce constat, morbum depressionis evitare. Iam antea cognitum erat diaetam huius generis periculum diabetae et canceri deminuere.

(Reijo Pitkäranta)

Res viatoria in Finnia

16.10.2009, klo 11.43

Hieme proxime praeterita pauciores viatores in Finnam venerunt quam ante.

Numerus Britannorum et Germanorum viginti fere centesimis decrevit, Suetorum Estoniensiumque decem centesimis. Russi autem eadem frequentia Finnam obierunt atque hieme superiore.

(Reijo Pitkäranta)

Irlandia pactum Olisiponense probavit

09.10.2009, klo 09.21

Irlandienses die Sabbati (3.10.) de pacto Olisiponensi, quo structurae Unionis Europaeae renovarentur, suffragium popolare habuerunt.

Anno bis millesimo octavo Irlandia pactum repudiavit, quo factum est, ut processus renovationis omnino cessaret. Nunc autem, crisi oeconomica oppressi, plurimi Irlandienses pactum Olisiponense aliquatenus modificatum comprobaverunt.

(Tuomo Pekkanen)

Berlusconi ad iudices

09.10.2009, klo 09.20

Silvius Berlusconi, primus minister Italiae, corruptionis et fraudis fiscalis in patria accusatus est, sed lex ad hoc lata impedit, ne summi magistratus Italiae in ius vocentur.

Die Martis (6.10.) tribunal constitutionale illam legem contrariam constitutioni esse decrevit. Lege abrogata fieri poterit, ut Berlusconi munus deponere cogatur. Die Sabbati (3.10.) circiter trecenta milia civium contra primum ministrum Romae reclamabant flagitantes, ut libertas instrumentis informaticis redderetur. Berlusconi enim cum suis acta diurna aliaque informatica instrumenta vehementissime aggressus est, quia de scandalis sexualibus aliisque, quibus ille implicitus est, civibus aperte rettulerunt.

(Tuomo Pekkanen)

Norvegia progressionem eminet

09.10.2009, klo 09.19

UNDP est programma progressionis humanae Nationum Unitarum, cui propositum est administrationem democraticam promovere et facultates populorum egentiorum confirmare, ut ad postulationes condicionesque globales respondeant.

In novissimo indice ab UNDP divulgato civitates mundi in ordine secundum gradum humanae progressionis positae sunt. Primum locum tenet Norvegia, Finnia est duodecima, ultimae sunt Niger, Afganistania, Sierra Leone, Res publica Mediae Africae. In indice considerantur longitudo vitae, scientia litterarum et res scholastica, productio pro singulis civibus nationalis. Index compositus est ante crisim oeconomicam, qua ordo nationum mutari potuit.

(Tuomo Pekkanen)

Dani electrificinis alatis confidunt

09.10.2009, klo 09.18

In ora Daniae occidentali maximum in orbe terrarum molinarium electrificinarum alatarum operari coepit.

In regione triginta quinque chiliometrorum quadratorum sunt plus nonaginta turbines, quibus tantum electricitatis generatur, ut ducentis milibus familiarum sufficiat. Molinarium huius generis est in Dania iam ordine nonum. Dani, crisi petrolearia incitati, ab anno millesimo nongentesimo nonagesimo primo electrificinas vento actas aedificant et iam viginti centesimae (20%) electricitatis eorum vi ventorum gignuntur. Consilium habent, ut ante annum bis millesimum vicesimum quintum (2025) dimidia pars consumptionis electricitatis alatis electrificinis generetur.

(Tuomo Pekkanen)

Olympia anni 2016 in Brasilia

09.10.2009, klo 09.18

Commissio Olympica Internationalis Hafniae convenit, ut constitueret, ubi Olympia aestiva anni bis millesimi sexti decimi futura essent.

Ludos petiverant Chicago, Rio de Janeiro, Tokio, Madrid. Victoriam reportavit Rio de Janeiro, Flumen Ianuarii, cuius petitionem maxime commendavit, quod ludi Olympici numquam antea in America Meridionali celebrati sunt.

(Tuomo Pekkanen)

Comitia in Germania habita

02.10.2009, klo 09.57

Die Dominico (29.9.) in Germania comitia parlamentaria habita sunt.

Sententiis computatis apparuit democratam Christianam factionem longe maximam evasisse, quippe

quae tertiam fere suffragiorum partem sibi conciliasset. Quae cum ita sint, Angela Merkel, cancellaria foederalis hodierna, munere suo etiam quadriennio proxime futuro fungi perget. Merkel victoria exsultans suos hortata est, ut in communi laetitia lascive gauderent. Socialistis autem ille dies tristis erat propter cladem gravissimam acceptam.

(Reijo Pitkäranta)

Programma Iraniae nucleare

02.10.2009, klo 09.56

Iraniani Ordinem internationalem ab energia atomica (IAEA) edocuerunt se alteram quoque officinam uranio eliquando aedificaturos et iam in apparatu eius occupatos esse.

Moderatores Civitatum Americae Unitarum, Britanniae, Francogalliae, Germaniae illud consilium nulla mora interposita condemnauerunt, cum timerent, ne novum reaktorium armis nuclearibus conficiendis inserviret. Censuit praesidens Barack Obama ea pacta, quae omnibus civitatibus servanda essent, ab Iranianis violari.

(Reijo Pitkäranta)

Viridarium Australiense

02.10.2009, klo 09.55

In Australia septentrionali viridarium nationale constituetur, quod inter maxima in orbe terrarum numeratur, cum in amplitudinem plus viginti milia chiliometrorum quadratorum pateat.

Illa area naturae tota aboriginibus curanda dabitur, ut eis occasio concedatur quaestus sui more translaticio exercendi. His incolis enim mos est venando, piscando, bacas aliasque fruges naturae colligendo sibi victum comparare.

(Reijo Pitkäranta)

De programmatae computatorio

02.10.2009, klo 09.55

Investigatores Israeliani programma computatorium excogitaverunt, cuius ope vetera scripta historica nondum comprehensa explanari possunt.

Tali ratione utitur, ut easdem formas in textu identidem occurrentes ab aliis litterarum notis distinguat, sicut in impressionibus digitalibus agnoscendis fere fieri solet. Iam in votis est novam machinam quaesitoriam confici, quae hoc operandi modo nitatur.

(Reijo Pitkäranta)

Expositio artis Pauli Picasso

02.10.2009, klo 09.54

In Museo artis Athenaeo Helsinkiensi expositio operum Pauli Picasso, artificis Hispani clarissimi, inaugurata est.

Proposita sunt opera eius potissima et apud populum acceptissima, quae ille octoginta annis, scilicet inde a fine saeculi undevicesimi usque ad annos septuagesimos saeculi praeteriti, creavit. Asservantur hae picturae in Museo Parisiensi a Picasso appellato, unde ad expositionem Helsinkiensem mutuae sunt datae.

(Reijo Pitkäranta)

Conventus climaticus

25.09.2009, klo 10.34

Ban Ki-Moon, secretarius generalis Nationum Unitarum, confidit pactum de atmosphaera tuenda hoc anno exeunte Hafniae effectum iri.

Is enim, cum in conventu climatico Neo-Eboraci instituto perorationem haberet, censuit voluntatem politicam illius pacti faciendi auctam esse.

Maximi momenti esse, quod Sinenses et Iaponienses se id acturos promisissent, ut emissiones deminuerentur.

(Reijo Pitkäranta)

De armis nuclearibus

25.09.2009, klo 10.33

Praesidens Barack Obama ministerio defensionis Pentagono mandavit, ut Civitatibus Americae Unitis novam de armis nuclearibus doctrinam praepararet.

Obama, si actis diurnis Britannicis nomine Guardian fidem habemus, armamentarium atomicum Americanorum ad minimum reduci vult.

(Reijo Pitkäranta)

De condicione Curdorum

25.09.2009, klo 10.33

Moderatores Turciae rationes excogitare coeperunt, quibus condiciones Curdorum in sua terra viventium meliores facerent.

Una e causis, cur talem rem sibi ponderandam susceperint, videtur esse, quod Turci societatem Unionis Europaeae appetunt.

Ad eam enim eae civitates, quae populos in ipsorum finibus minores male tractant, vix admittuntur.

(Reijo Pitkäranta)

Nova quaedam lex Britanniae

25.09.2009, klo 10.32

Mense Septembri ineunte in Britannia nova lex valere coepit, ex qua hominibus ebriis et tumultuantibus aditus in tabernas publicas et in oenopolia includitur.

Alan Campbell, minister a rebus domesticis, dixit novas regulas eo spectare, ne perturbatores ineptiis et stultitiis civibus bonis molestiam afferrent.

(Reijo Pitkäranta)

Festum cinematographicum

25.09.2009, klo 10.32

Leo aureus, primum praemium festi cinematographici Venetiarum, datus est pelliculae nomine Lebanon, quam Israelita Samuel Maoz et scripsit et moderatus est.

Narrat de bello Libani anno millesimo nongentesimo octogesimo secundo gesto.

Festum, quod hoc autumno ordine sexagesimum sextum fuit, omnium ludorum artis cinematographicae internationalium vetustissimum nominatur.

(Helena Holm)

Venatio avicularum verna

25.09.2009, klo 10.31

Tribunal Unionis Europaeae incolis Melitae venatione avicularum verna interdixit.

Birdlife, ordo internationalis avibus tutandis, illo decreto contentus est, nam eius magni refert providere, ne migratio avium verna usquam in Europa perturbetur.

Constat Melitam in ea Maris Mediterranei parte sitam esse, per quam aves migratoriae quotannis transvolare solent.

(Reijo Pitkäranta)

Villa Vespasiani reperta

25.09.2009, klo 10.31

Prope Romam ruinae villae antiquae repertae sunt, ubi imperator Vespasianus mortuus esse existimatur.

Neque hoc inventum archaeologicum aptiore temporis momento fieri potuit, nam hoc ipso anno duo milia annorum a Vespasiano nato acta sunt.

Suetonius, scriptor Romanus, narrat eum in Sabinis ultra Reate natum esse in vico, cui nomen est Phalacrinae.

Haud procul ab hoc loco parietinae villae nuperrime in lucem venerunt.

(Reijo Pitkäranta)

De XII conventu internationali, quem Academia Latinitati Fovendae Ratisbonam convocavit

17.09.2009, klo 16.45

Nuntii Latini Radiophoniae Finnicae Generalis hodie ex Bavaria transmittuntur, in cuius urbe Ratisbona, vulgo Regensburg, duodecimus Conventus internationalis Academiae Latinitati Fovendae his diebus celebratur.

Conventum, cui nomen est "Ad fines imperii Romani. Anno bis millesimo cladis Varianae", una cum illa Academia convocavit Institutum Philologiae Classicae Ratisbonense.

Academia, ante plus quadraginta annos condita, promovet omnia incepta, quae ad cognitionem linguae, litterarum, cultus civilis Latini spectant. Sedem habet in urbe Roma, quo sodales ad sessiones annuales

mense Aprili conveniunt.

Conventus internationales fiunt quarto quoque anno in terra, cui Academia auctoritatem conventus instituendi concedit.

Argumentum principale, de quo in conventu Ratisbonensi agitur, est anniversarium bis millesimum pugnae Teutoburgiensis, qua Germani tres legiones Romanorum devicerunt. Dux Germanorum erat Arminius, Romanis autem praeerat Publius Quinctilius Varus.

Clades Teutoburgiensis propagationi sive expansioni imperii Romani in Media Europa finem imposuit. Eadem effecit, ut flumen Rhenus finis inter Galliam et Germaniam maneret. Professores Jan Wilhelm Beck et Nicolaus Sallmann, moderatores conventus, commonent propositum non esse res bellicas commemorare.

"Celebramus", aiunt, "neque cladem Varianam neque victoriam Arminii, sed pacem humanam sermone Latino inter omnes nationes divulgatam et divulgandam."

[Verba quae audiuntur neque tamen in textu apud situm interretialem includuntur:]

Adest in conventu Professor Andreas Fritsch Berolinensis, auscultator Nuntiorum Latinorum fidelissimus:

"Hic conventus Academiae duodecimus Latinitati fovendae homines complurium nationum congregat: viros mulieresque iuniores et seniores qui Latinitatem vivam colunt – id est usum activum linguae Latinae. Certe sunt qui dicant linguam Latinam esse mortuam, sed haec sententia tantum partim recta partim falsa est. Si ea lingua mortua appellatur quae nullius populi, nullius gentis, nullius hominis lingua nativa est, lingua Latina recte dicitur mortua quia iam plus quindecim saecula non iam est ullius gentis lingua nativa sed lingua Latina ex illo tempore maxime et latissime propagata est, etiam in Germania, cum nullius populi sermo patrius esset. Ex eo tempore innumerabiles libri Latini sunt scripti, multo plures quam aetate Romanorum antiquorum. Germani et alii populi discebant Latine loqui et scribere. Ita lingua Latina suo modo vivere perrexit. Hodierna institutio Latina non tantum litteras antiquas docet sed litteras recentiorum saeculorum. Conventus noster hanc traditionem perennem demonstrat et omnibus participibus occasionem praebet hac lingua utendi. Ut musica antiqua tantum vivit si nonnulli musici eam exercent ita ut audiri possit, ita etiam lingua Latina tantum vivit si homines diversarum nationum eam adhibent ut inter se communicent. Magistri autem hanc linguam adhibere discant ut discipuli eorum sentiant linguam Latinam esse linguam vere naturalem et humanam."

Hic habuimus quae vobis de duodecimo conventu ALF referremus. Hospes noster specialis fuit Professor Berolinensis Andreas Fritsch. Grates hospiti nostro et auscultatoribus agimus. Valet quam optime..]

[Verba quae in pagina interretiali scripti sunt neque tamen in plica sonifera audiuntur:]

"Anno nono p.Chr. n. pugna ferocissima Romanorum et populorum adiacentium secavit vicinos, qui postea felici cooperatione Europaei facti sunt."

Omnes orationes et acroases, ut Academiae mos est, Latine habentur. Inter oratores et orationes excellunt e.g. Michael de Albrecht: "Bellum Varianum quid ad nos et cur Latine?"

Valahfridus Stroh: "De poetis Ratisbonensibus Latinis." Teodoricus Sacré: "De Arminio in carminibus Latinis saeculorum undevicesimi et vicesimi." Andreas Fritsch, "Quomodo Arminius in libris scholasticis demonstratur." Gaius Licoppe et Francisca Deraedt, "Arminii victoria ? clades cultus civilis." Sunt in programme praeterea multa alia.

Pro rostris fit disputatio extemporalis de cultu Romano et barbaro. Instituuntur etiam scholae, in quibus usus vivus linguae Latinae exercetur, atque recitationes versuum continuae.

Legionarii tam Romani quam milites Germani in campum prodeunt duce Marco Junkelmann. Pugnant et gladiatores.

Ad recreationem pertinent etiam navigationes in flumine Danuvio nave Romana ad vetus exemplum aedificata atque lustrationes urbis Ratisbonae.

Praeterea suscipiuntur itinera archaeologica ad loca Bavariae monumentis Romanis illustrata.

Adsunt in conventu latinistae quindecim fere nationum non tantum ex Europa sed etiam ex America Septentrionali et Meridionali.]

(Tuomo Pekkanen)

Quid Merkel et Brown dixerint

11.09.2009, klo 17.05

Angela Merkel, cancellaria foederalis Germaniae, et Gordon Brown, princeps minister Britanniae, conventum de rebus Afganistanae iam hoc anno instituendum esse censent.

Illud consilium Berolini cum diurnariis communicaverunt.

Propositum eis est moderatores Afganistanae monere, ut ipsi de rebus suis paulatim respondere inciperent.

Merkel nuntiavit Americanos quoque paratos esse ad tale colloquium participandum.

(Reijo Pitkäranta)

Coloniae Israelis ampliantur**11.09.2009, klo 17.05**

Ehud Barak, minister defensionis Israelis, permisit, ut in regione occupata Litoris occidentalis circiter quadringentae quinquaginta novae habitationes aedificarentur.

Hae licentiae coloniarum propagandarum sunt primae, quas novum regimen Israelis concessit.

Neque fieri potuit, quin hoc consultum amicitiae inter Americanos et Israelianos intercedenti detrimentum inferret.

Nam praesidens Barack Obama ab Israelianis antea postulaverat, ut a coloniis amplificandis abstinerent.

(Reijo Pitkäranta)

Reclamationes contra Chavez**11.09.2009, klo 17.04**

Multa milia hominum in diversis terris Americae Latinae et etiam in Europa praesidenti Venetiolaie Hugo Chavez reclamaverunt.

Maxima multitudo civium ei adversantium in vias Bogotae, urbis principis Columbiae, convenerunt, ubi quinque milia relamitantium aderant.

Chavez ipse, qui eodem tempore in Syria peregrinabatur, his tumultibus non solum non territus est, sed activistas etiam irridebat.

(Reijo Pitkäranta)

De recessione oeconomica**11.09.2009, klo 17.04**

Jean-Claude Trichet, director Argentariae centralis Europae, putat in oeconomia mundana iam signa conspici, quibus monstretur recessionem oeconomicam paulatim remittere.

Ait enim varias statisticas nuperrime factas expectato meliores esse.

Metuit tamen, ne via ad saniores oeconomias salebrosa sit, quam ob rem attento animo esse oporteat.

(Reijo Pitkäranta)

Inventum medicum Americanorum**11.09.2009, klo 17.03**

Investigatores Americani quaestionem, unde perturbatio activitatis et attentionis (ADHD) oreretur, solvisse dicuntur.

Argumentis enim probare potuerunt imprimis eos morbo illo implicari, quorum in cerebro dopaminum, materia quaedam mediatrix, aliter se gerit atque apud homines sanos.

(Reijo Pitkäranta)

Teemu Sippo episcopus creatus**11.09.2009, klo 17.03**

Novus episcopus ecclesiae catholicae Finniae ordinatus est pater Teemu Sippo.

Ita factum est, ut vir natione Finnus primum post quingentos fere annos hanc dignitatem obtineret.

Caerimonia celebrata est die Saturni Nonis Septembribus (5.9.) in Ecclesia cathedrali Aboensi.

In Finnia sunt circiter decem milia civium, qui fidem Romano-catholicam confitentur.

(Reijo Pitkäranta)

Prisca observatoria solaris**11.09.2009, klo 17.02**

In Finnia occidentali monumenta saxorum in Scandinavia omnium amplissima inveniuntur, quae ex aetate lapidea originem trahunt.

Investigatores Finni archaeoastronomiae periti ostenderunt illas constructiones esse prisca observatoria solaria, quorum ostia diebus astronomicis ad solem orientem et occidentem directa essent.
(Karoliina Ignatius)

II bellum mundanum ante LXX annos ortum

04.09.2009, klo 16.05

Kalendis Septembribus septuaginta anni ab initio belli mundani secundi acti erant.

Eo enim die multo mane copiae Germaniae nazisticae in urbem Poloniae Gdansk, tum Danzig appellatam, invaserunt.

Die mensis Augusti vicesimo tertio Unio Sovietica et Germania tractatum fecerant, qui ex primis tum utriusque potentiae ministris tractatus Molotov ? Ribbentrop dicitur.

Illo tractatu Germania et Unio Sovietica de terris Europae orientalibus inter se dividendis constituerunt et promiserunt, ne altera alteram aggrederetur.

Vladimir Putin, primus minister Russiae, scripto die Lunae in Polonia divulgato illum tractatum vehementer damnavit, sed monuit etiam nationes occidentales gravem belli culpam habere.

Cum enim Francia et Britannia anno ante Monachi Adolpho Hitler indulgendo permisissent, ut Germani partes Tzecoslovakiae occuparent, nullam spem fascismo viribus unitis obsistendi remansisse. Ad diem anniversarium commemorandum moderatores Europaei in urbem Gdansk convenerunt, in his Angela Merkel, cancellaria Germaniae foederalis, et Matti Vanhanen, primus minister Finnorum.

(Tuomo Pekkanen)

Novum regimen Iaponiae

04.09.2009, klo 16.04

Comitiis, die Dominico (30.8.) in Iaponia factis, factio democratica liberalis, quae plus quinquaginta annos summam potestatem tenuerat, magnam cladem accepit.

Quo facto Taro Aso, praeses factionis et primus minister, utrumque munus deposuit.

Novum regimen colligere coepit Yukio Hatoyama, dux factionis democraticae.

Camera inferior parlamenti Iaponici ex quadringentis octoginta delegatis constat, ex quibus factio democratica, undecim annis ante condita, octo et trecentos habebit.

Yukio Hatoyama dixit se politicam Iaponiae externam ita mutare velle, ut maius pondus in Asia orientali quam in USA poneretur.

(Tuomo Pekkanen)

Pars statuae equestris inventa

04.09.2009, klo 16.03

Archaeologi caput equi, ex aere et auro factum, Francofurti publice proposuerunt.

Creditur illud caput, quod mense Augusto in regione Lahnau-Waldgirmes civitatis Hessen inventum est, esse pars statuae equestris imperatoris Augusti.

In illa regione erat olim statio Romanorum, quae anno tertio aut quarto ante Christum natum condita esse putatur.

Postquam Germani anno nono in silva Teutoburgiensi legiones Romanorum devicerunt, statio Romana deleta est et statua imperatoris frustatim fracta.

Frenum equi eo est insigne, quod imaginibus Martis et Victoriae decoratum est.

In Waldgirmes excavationes archaeologicae ab anno millesimo nongentesimo nonagesimo tertio fiunt.

(Tuomo Pekkanen)

Oscula non danda

04.09.2009, klo 16.02

Ecclesia orthodoxa urbis Tampere hortatur, ut ad febrem suinam coercendam osculis modus imponatur. Orthodoxi osculando caritatem et reverentiam ostendunt.

Ecclesia suadet, ut loco osculationis reverentia exempli gratia caput leviter inclinando sacerdoti praebeatur.

Etiam imaginum sacrarum et crucifixi osculationem esse evitandam.

(Tuomo Pekkanen)

Incendia Athenis imminebant

28.08.2009, klo 11.16

Incendia silvarum, die Veneris (21.8.) apud oppidum Marathona orta, biduo post, cum ignis ventis agitatus per loca sicca celeriter vagaretur, iam suburbiis Athenarum imminebant.

Multa hominum milia domibus relictis fugae se dederunt.

Paucis diebus plus viginti milia hectarearum cum pinetis, olivetis, fruticetis agrisque cultis penitus deleta sunt.

Tantum erat periculum, ut Graecia ab Unione Europaea auxilium ad ignes compescendos peteret.

Italia, Francia, Cypros aliaeque terrae Europae meridionalis aeroplana et helicoptera in Graeciam miserunt, quibus adiuvantibus flammae paulatim sedabantur.

Incendia propter siccitatem etiam in insulis Scyro, Euboea, Zacyntho orta erant.

Cives Graeci, detrimentis captis irati, magistratus segnitiae accusaverunt, quod nihil ex incendiis anterioribus didicissent neque consilia ad novas calamitates avertendas cepissent.

Incendia silvarum in Graecia quotannis fiunt neque abest suspicio, quin pars eorum consulto efficiantur, ut terrae ad aedificandum aptae aut nova pascua acquirantur.

(Tuomo Pekkanen)

Apri in Suetia pullulant

28.08.2009, klo 11.15

Apri sive porci silvatici, qui ante triginta tres annos ex vivario Suetico evaserunt, ita aucti sunt, ut hodie circiter centum milia in Suetia numerentur.

Cum nullos hostes in natura habeant, aestimatum est numerum eorum post quinque annos quingentorum milium fore.

Venatores quidem singulis annis septingenos apros occiderunt, sed propagatio animalium coerceri non potuit.

In commeatu publico apri periculum usque crescens faciunt, nam hoc anno iam circiter mille calamitates viarias effecerunt.

Praeterea lites ortae sunt inter agricolas, quorum agri ab apris vastantur, et dominos latifundiorum, qui propter studium venationis porcis illis silvaticis favent et pabula ministrant.

(Tuomo Pekkanen)

Lucrum in alea centum duodequadraginta milionum

28.08.2009, klo 11.15

In Italia lucrum omnium temporum maximum in alea publica, vulgo lotto, factum est.

In sortitione septimanae praeteritae una tantum schedula inventa est, in qua omnes numeri recte coniectati erant.

Lucrum, quod schedulae auctori obtingit, est paene centum duodequingenta milionum euronum.

Causa summae tam ingentis est, quod pecunia inde a mense Ianuario in singulas septimanas creverat, quia nemo omnes sortitionis futurae numeros recte divinare potuerat.

Schedula, in qua numeri victores scripti erant, inventa est in oppido Bagnone Tuscanae septentrionalis.

Quis autem auctor eius fuerit, nondum certe scitur.

(Tuomo Pekkanen)

Nuntii Latini viginti annorum

28.08.2009, klo 11.09

Nuntii Latini ex Finnia iam viginti annos transmissi sunt.

Hoc temporis spatio transmissio Latina gregem auscultatorum in omnibus partibus orbis terrarum sibi conciliavit.

In honorem anniversarii vicesimi Radiophonia Finnica Generalis pridie Kalendas Septembres programma speciale transmittet, in quo redactores nuntiorum ad quaestiones auscultatorum respondebunt.

(Tuomo Pekkanen)

Arctic Sea tandem inventa

24.08.2009, klo 10.53

Navis oneraria nomine Arctic Sea, quae per tres septimanas in aquis ignotis navigaverat, die Lunae (17.8.) in Oceano Atlantico apud Insulas Capitis Viridis inventa est.

Eodem tempore quindecim nautae Russi, qui in manus octo piratarum pervenerant, ex obsidione abductorum incolumes liberati sunt.

Hoc factum est opera militari a classiariis Russis perfecta, cui exsequendae etiam magistratus Finniae,

Suetiae, Melitae consiliis intererant.

Arctic Sea materia lignea onerata ex portu urbis Iacobstadii Finniae mense Iulio profecta ad Algeriam versus iter faciebat.

(Reijo Pitkäranta)

Telonarii Mexici a munere amoti

24.08.2009, klo 10.53

Moderatores Mexici omnes septingentos officiales in re teloniali occupatos a magistratu amoverunt.

Hoc ideo fecerunt, ut corruptionem in illo munere altius inhaerentem radicitus exstirparent.

Constat ingentem drogarum armorumque copiam per fines Mexici assidue transire.

In locum hominum ex officio expulsorum succedent circiter mille quadringenti novi telonarii, qui ad iustitiae opera eruditi sunt.

(Reijo Pitkäranta)

Quid Dmitri Medvedev dixerit

24.08.2009, klo 10.52

Praesidens Russiae Dimitri Medvedev de ebriositate civium suorum sollicitus est.

Querebatur enim, quod omnes actiones publicae, quibus magistratus Russi abusum alcoholi coercere conati essent, effectum carerent.

Copia spiritus fortis, quam singuli Russi quotannis bibunt, duodeviginti fere litrorum esse aestimatur.

Illa alcoholi vis altero tanto maior est quam quae optabilis habetur.

(Reijo Pitkäranta)

Tabula geographica Vinland

24.08.2009, klo 10.51

Tabula geographica Vinland nominata, qua pars continentis Americae describitur, genuina esse videtur.

Investigatores enim Dani, postquam eam diligentissime examinaverunt, ibidem nullum adulterationis signum invenerunt.

Constat illud documentum abhinc quinquaginta annos repertum iam medio saeculo quinto decimo confectum esse, id est quinquaginta fere annis ante navigationem a Christophoro Columbo in Americam susceptam.

(Reijo Pitkäranta)

Eventus "Athenis Finlandiae"

24.08.2009, klo 10.51

Septimana proxime futura in urbe Jyväskylä eventus culturalis habebitur, cui titulus "Athenis Finlandiae".

Sollemnitatis ad hereditatem antiquitatis et linguas classicas pertinet.

Moderatores volunt, ut ad hos dies festos celebrandos homines omnis aetatis et condicionis magna multitudine conveniant, praesertim cum programma arte, scientia, oblectamentis mixtum idoneam varietatem praebeat.

(Reijo Pitkäranta)

Usain Bolt 9,58 cucurrit

24.08.2009, klo 10.50

Berolini, in urbe principe Germaniae, his diebus certamina athleticae campestris mundana aguntur.

In cursu centum metrorum victor manifestissimus evasit Usain Bolt, Olympionices Iamaicanus, qui illud spatium incredibili fere pernicitate sive novem secundis et duodesexaginta centesimis (9,58) confecit.

Neque mirum est praestationem eius novum principatum mundanum excellentissimum esse.

(Reijo Pitkäranta)

Calamitates naturae in Asia

14.08.2009, klo 09.27

Die Martis mane regiones Asiae duobus terrae motibus afflictae sunt. Quorum fortior insulas Oceani Indici vexavit, alter in Iaponia accidit, ubi commeatus ferroviarius et tramina maximae velocitatis sistenda erant.

Etiam duo rectoria electricinae nuclearis Hamaoka clausa sunt, donec securitas eorum inspiceretur.

In Taivania autem procellae typhonicae et imbres urceatim cadentes labinas terrae limosae effecerunt, quibus quattuor vici obruti sunt. Ex horum incolis septingenti vitam servaverunt, sed quadringenti homines nondum inveniri potuerunt.

(Reijo Pitkäranta)

Quid Amnesty International dixerit

14.08.2009, klo 09.27

Amnesty International, ordo internationalis a iuribus humanis, magistratus Russiae et Tzetzéniae accusat, quod consequenter praetermittant, ne in homicidia eorum, qui pro iuribus humanis provehendis egerunt, inquiratur.

Die Martis in Tzetzénia corpora duorum hominum occisorum inventa sunt, quos apud ordinem ?Servate generationes? vocatum operatos esse constat. Amnesty International caedes huiusmodi et in Russia et Tzetzénia crebro commissas vehementer condemnat.

(Reijo Pitkäranta)

De camelis Australiae mactandis

14.08.2009, klo 09.26

Moderatores Australiae in animo habent multa centena milia camelorum mactare, ut prohibeatur, ne systema oecologicum huius continentis in periculum vocetur.

Administratores venatoribus iam magnam pecuniam ad illa animalia occidenda concesserunt. Populatio camelorum in Australia his decem annis tantopere crevit, ut numerus eorum in praesenti decies centena milia esse aestimaretur.

(Reijo Pitkäranta)

De Ara Pacis Augustae foedatum

14.08.2009, klo 09.26

Aedificium, quo Ara pacis Augustae Romae tegitur, pigmento foedatum est.

Auctores sceleris ignoti rubrum et viridem, colores vexilli Italiae proprios, in parietem eius candidum iniecerunt et sellam pertusam iuxta eum reliquerunt. Gianni Alemanno, praefectus urbis Romae, qui ipse anno praeterito novum museum ex sua sede demoveri volebat, facinus condemnavit.

(Helena Holm)

Certamen cantus Mirjam Helin

14.08.2009, klo 09.25

Certamen cantus internationale a Mirjam Helin appellatum, quod quinto quoque anno in urbe Helsinki instituitur, die Mercurii vesperi diiudicatum est.

In serie virorum victoriam reportavit Kihwan Sim Coreanus, e feminis autem Julia Lezhneva, iuvenis Russa undeviginti annos nata, primo loco posita est..

(Reijo Pitkäranta)

Nova avium species in Finnia visa

14.08.2009, klo 09.24

In Finnia quotannis singulae aut binae novae avium species animadvertuntur.

Hac aestate prope insulas urbis Christinaestadii volucris, cui nomen scientificum Charadrius mongolus, primum reperta est. Quae avis in Europa rarissima est, sed persaepe in Asia media et orientali conspicitur, ubi loca nidificandi eius principalia sunt.

(Reijo Pitkäranta)

Exportatio Finniae diminuta

07.08.2009, klo 10.55

Crisis oeconomica commercium Finniae peregrinum primis huius anni mensibus graviter depressit.

Mense Maio tam exportatio quam importatio mercium una et quadraginta centesimis (41%) minores erant quam anno ante. Maxime affecta est Russia, in quam exportatio Finnorum paene sexaginta centesimis decrevit. Importatio ex Russia in dimidium prioris reducta est.

(Tuomo Pekkanen)

Astronauta praesidentem appellavit

07.08.2009, klo 10.54

Medio mense Iulio Timothy L. Kopra, primus astronauta ex stirpe Finnica oriundus, una cum sex aliis in stationem spatialem ISS navicula Endeavour portatus est.
Avus et avia eius ante centum annos ex Finnia in USA emigraverunt. Die Lunae (3.8.) astronauta Kopra ex spatio praesidentem Finniae Tarja Halonen telephonice appellavit.
(Tuomo Pekkanen)

Rasmussen Natonis praesidet

07.08.2009, klo 10.54

Anders Fogh Rasmussen novus secretarius generalis Natonis factus est. Rasmussen, vir quinquaginta quinque annos natus, antea octo annos minister Daniae primarius fuit.
In novo munere discrimine Afganistaniae maxime sollicitari putatur, nam Dani septingentos milites ibi habent. Rasmussen membra Natonis hortatus est, ut plus copiarum in Afganistaniam mitterent.
(Tuomo Pekkanen)

Rex Hispaniae Etam condemnat

07.08.2009, klo 10.52

Juan Carlos, rex Hispanorum, flagitat, ut pugna contra Etam renovetur. Rex cum coniuge ferias aestivas quotannis in Baleari maiore (hodie Mallorca) agit, ubi nuper duo ictus terroristici facti sunt.
Palatium regis aestivum est prope Palmam, urbem insulae principalem, in cuius propinquitate die Iovis (30.7.) bomba explosa est, qua duo custodes publici mortui sunt. Pridie eius diei Burgis (hodie Burgos), in urbe Hispaniae continentalis, sexaginta quattuor homines explosione bombae autocineticae vulnerati sunt. Regimen Hispanorum de his malefactis Etam accusat. Ordo ille Vasconum separatistarum die Veneris (31.7.) anniversarium quinquagesimum habuit. In variis Hispaniae partibus homines contra terrorismum Etae vehementer reclamaverunt.
(Tuomo Pekkanen)

Vas rituale Hierosolymis repertum

07.08.2009, klo 10.52

Grex investigatorum Britannicorum rem raram Hierosolymis invenit, scilicet vas fictile eiusdem generis, quod tempore Iesu Christi ad manus ante cibum lavandas adhibebatur.
Similia quidem vasa apud Hierosolyma vetera antea reperta sunt complura, sed hoc est eo speciale, quod habet inscriptionem. Litterae sunt sive Hebraicae antiquae sive Aramaicae. Investigator Shimon Gibson dixit scriptionem esse facile legibilem sed quid textus significaret, nondum bene constare. Vas venit in lucem inter excavationes, quas archaeologi Universitatis Carolinae Septentrionalis prope veteres thermas rituales Hierosolymis fecerunt.
(Tuomo Pekkanen)

XII ALF Conventus

07.08.2009, klo 10.51

Opportunum nobis videtur auditores nostros de XII Conventu internationali Academiae Latinitati Fovendae commonere, quo annus post pugnam Teutoburgensem bis millesimus celebrabitur.
Academia Latinitati Fovendae et Institutum Philologiae Classicae Ratisbonense illum conventum convocaverunt, qui a die quinto decimo usque ad diem undevicesimum mensis Septembris (15-19.9.2009) Ratisbonae (Regensburg) habebitur.
(Tuomo Pekkanen)

Abductio feminae ditissimae

18.06.2009, klo 14.36

His diebus animos Finnorum commovit scelus in historia nostra unicum.
Die enim vicesimo septimo mensis Maii (27.5.) accidit, ut Minna Nurminen, femina viginti sex annorum ex familia industriali ditissima orta, domo sua Helsinkiensi vi abduceretur.
Per duas septimanas in obsidatu retinebatur, donec ingenti pretio redemptionis soluto ex captivitate liberata in quadam silva prope urbem Turku incolumis inventa est.
Neque fieri potuit, quin ipse abductor paucis horis post a biocolytis comprehenderetur.
Perpetrator facinoris videtur esse quidam iuris consultus Turkuensis quadraginta quattuor annorum, qui in Universitate Turkuensi opus facit.
(Reijo Pitkäranta)

Ahmadinejad iterum electus

18.06.2009, klo 14.35

Praesidens Iraniae iterum electus est Mahmud Ahmadinejad, quippe qui comitiis abhinc unam septimanam habitis ab adversario suo Mir Hossein Musavi victoriam manifestam reportavisset. Eventu suffragii nuntiato in viis Teherani tumultus violenti orti sunt, cum multa milia hominum exitu electionis parum contentorum cum custodibus publicis et fautoribus praesidentis conflixerunt. (Reijo Pitkäranta)

Conditio minoritatum in Suetia

18.06.2009, klo 14.34

Comitiis Suetiae decretum est eos fines ampliandos esse, in quibus Finni in Suetia habitantes ius sui sermonis patrii utendi exsequerentur. In urbibus ad talem regionem pertinentibus sunt Stockholmia, Upsalia, Telgae Australes. Id quoque condicionem Sueco-Finnorum meliorem reddit, quod anno proximo in tota Suetia lex valere incipiet, qua minoritatibus sua iura praestabuntur. (Reijo Pitkäranta)

Theatrum Shakespearianum

18.06.2009, klo 14.33

Londinii effossiones archaeologicae aguntur in situ theatri, ubi Shakespeare partes egisse et familiam eius theatricam fabulas scaenicas produxisse creditur. Fundamentum illius theatri abhinc quadringentos annos destructi aestate proxima inventum est, et lapides fundamentales tam numerosi sunt, ut et magnitudo et forma aedificii concludi possit. Scaena autem sub aedibus recentibus obruta esse putatur. (Antti Ijäs)

Lacus Saima in miraculis naturae

18.06.2009, klo 14.32

In Interreti suffragium de miraculis naturae mundi institutum est. In serie lacuum, fluminum, cataractarum lacus Saima, qui in Finnia invenitur, sexto loco positus est. Quanti talis eventus aestimadus sit, vel inde apparet, quod Saima pro maiore miraculo haberi videtur quam verbi causa flumen Ganges aut Loch Ness, lacus ille monstro praeclarissimus. (Reijo Pitkäranta)

Nuntii Latini ad ferias abeunt

18.06.2009, klo 14.30

Nuntii Latini ob ferias aestivas ad sex septimanas intermittuntur, quam ob rem proxima emissio non ante quam die septimo mensis Augusti (7.8.) fiet. Restat, ut auscultatoribus nostris gratias quam maximas agamus et vobis omnibus aestatem optimam exoptemus. Valet!

(Reijo Pitkäranta)

Partes dextrae in Europa fortiores

12.06.2009, klo 12.15

In comitiis Europaeis partes dextrae et centrales fortiores quam sinistrae factae sunt. Etiam virides numerum delegatorum suorum auxerunt. Frequentia suffragantium ad quadraginta centesimas (40%) descendit, cum ante quinque annos quadraginta quinque et dimidium (45,5%) fuisset. Apud Finnos ex civibus suffragium habentibus quadraginta centesimae (40,2%) ad urnas accesserunt. Ex Finnia creatae sunt octo feminae et quinque viri, cum antea viri numero praevaluissent. Et conservativi et centrales trinos delegatos acceperunt, democratiae sociales et virides binos, Finni originales, democratiae Christiani, factio popularis Finno-Suetica singulos. Maximum suffragiorum numerum (130.432) occupavit Timo Soini, praeses factionis Finnorum originalium. Socialistae in Europa tantam cladem tulerunt, ut multi quaesiverint, an democratia socialis apud Europaeos iam mortua sit. (Tuomo Pekkanen)

Anniversarium LXV invasionis Normandiae

12.06.2009, klo 12.14

Postridie Nonas Iunias (6.6.) ab invasione Normandiae sexaginta quinque anni acti erant.

Illo enim die copiae confoederatorum occidentalium in oram Normandiae maximis copiis invaserunt, quo facto secundum bellum mundanum ad interitum Germaniae nazisticae appropinquare coepit.

Dies anniversarius in ipso litore invasionis commemorabatur.

Aderat Barack Obama, praesidens Americanus, qui etiam coemeterium militare in litore Omaha Beach situm visit, ubi multa milia militum Americanorum in Normandia mortuorum requiescunt.

Francia, in quam Obama ex Germania volaverat, ultima erat statio itineris, quod ille in Proximum orientem et in Europam fecit.

In Germania praesidens Obama Dresdam visit, quam urbem confoederati bello mundano iam ad finem vergente bombardationibus aereis penitus deleverunt, ibique cancellariam foederalem Angelam Merkel convenit.

Una cum cancellaria Merkel etiam campum concentrationis Buchenwald obiit. Erat cum illis Eli Wiesel, scriptor nobelista, qui ex illo campo inter paucissimos vivus evaserat.

(Tuomo Pekkanen)

Vaccae mutationem climatis accelerant

12.06.2009, klo 12.13

Metabolismus vaccarum in climatis mutatione insignem partem habet.

Una vacca singulis annis etiam centena chiliogrammata methani emittit, quod clima fortiter calefacit.

Itaque educatores armentorum Americani rationes excogitaverunt, quibus emissiones deminuerentur.

Exempli gratia seminibus lini in alimentum vaccarum additis emissiones methani duodeviginti centesimis deminuuntur.

(Tuomo Pekkanen)

Cancer cutis augetur

12.06.2009, klo 12.13

Cancer cutaneus apud Finnos celeriter augetur.

Praecipue casus melanomatis ab anno bis millesimo secundo frequentiores facti sunt.

Adullescentes et iuvenes saepius quam ante hoc morbo afficiuntur.

Cancer cutis plerumque oritur ex radiatione solis ultravioleacea.

Praesertim homines pallidi, qui intus laborant, propter apricationem incautam hoc cancro implicantur.

(Tuomo Pekkanen)

Comitia Europaea

05.06.2009, klo 10.25

Comitia, quibus delegati in parlamentum Europaeum eliguntur, his diebus (4. - 7.6.) in omnibus membris Unionis Europaeae fiunt.

Ex viginti septem nationibus delegati in quinquennium ab anno bis millesimo nono usque ad annum bis millesimum quartum decimum designantur. Omnino delegati erunt septingenti triginta sex, ex quibus Finni tredecim.

(Tuomo Pekkanen)

Putin Finnam visit

05.06.2009, klo 10.24

Vladimir Putin, primus minister Russiae, die Mercurii Finnam visit.

In colloquiis cum Finniae ministro primario Matti Vanhanen habitis de quaestionibus ad energiam et commeatum pertinentibus et de cooperatione inter Russiam et Finnam oeconomica actum est.

Inter res tractatas erat imprimis ductus gasi in Mari Baltico faciendus. Putin monuit de rixis, quae de gaso per Ucrainam transportando essent, cum Ucrainenses gasum Russis rite solvere non potuissent.

Ideo ductum gasalem ex Russia per mare in Europam faciendum maximi habuit et nullam causam videbat, cur per regionem maritimam Finniae, ut Finni vellent, fieri non posset. Censebat periculum esse, ne transportatio gasi per Ucrainam rursus interrumperetur, cum Ucrainenses aestate gasum ad usum hiemalem in receptaculis reponere inciperent neque pretium in antecessum solverent. Antequam in patriam revertit, Putin etiam praesidentem Tarja Halonen convenit.

(Tuomo Pekkanen)

Aeroplanum epibaticum disparuit

05.06.2009, klo 10.23

Die Lunae multo mane aeroplanum epibaticum Societatis Air France, quod a Flumine Ianuarii (Rio de Janeiro) Parisios volabat, supra Oceanum Atlanticum disparuit.

Postquam aeroplanum tres horas et dimidium iter fecit, conexio cum illo dirupta est. Paulo ante pilotae nuntiaverant se in fortissimam turbulentiam incidisse. Deinde complures deni nuntii ex aeroplano automaticae missi erant, qui indicabant multa systemata aeroplani technica collapsa esse. Quam ob rem iam verisimile habebatur illud fulmine percussum in oceanum diruisse. Erant in aeroplano ducenti duodetriginta homines, ex triginta duabus nationibus oriundi, qui omnes calamitate interierunt.

Possibilitas abductionis a magistratibus exclusa est. Ruina facta est in regione aequatoris, ubi venti alisaei septentrionalis et meridionalis hemisphaerii inter se ita colliduntur, ut fortes turbines surgentes exoriantur. Die Mercurii nuntiatum est fragmenta aeroplani in oceano, loco sescenta quinquaginta chiliometra a Brasilia distante, reperta esse.

(Tuomo Pekkanen)

Vir genocidii accusatur

05.06.2009, klo 10.23

Vir Ruandensis, qui anno bis millesimo tertio asylum petens in Finniam venit, crimine genocidii accusatur.

Illi crimini datur, quod anno millesimo nongentesimo nonagesimo quarto in Ruanda particeps excidii octingentorum milium hominum fuerit. Iudicium in virum, qui iam duos annos incarceratus accusationem exspectat, in urbe Borgoa hoc anno constituetur.

(Tuomo Pekkanen)

De experimento nucleari

29.05.2009, klo 11.13

Die Lunae (25.5.) mane Coreani septentrionales se experimentum nucleare subterraneum cum successu fecisse nuntiaverunt.

Magistratus eorum dixerunt illud consilium partem esse incepti, quo formido nuclearis Coreae Septentrionalis corroboraretur ac salus et pax nationis confirmarentur.

Neque sola bomba atomica displosa contenti erant, sed etiam complura missilia brevis distantiae probandi causa in Mare Iaponicum iaculati sunt.

Ex fontibus exploratoriis Civitatum Americae Unitarum patet Coreanos communistas etiam vetere electricina nucleari denuo uti coepisse.

Neque abest suspicio, quin illic materia armis atomicis conficiendis paretur.

(Reijo Pitkäranta)

Quid Ban Ki-moon dixerit

29.05.2009, klo 11.12

Ban Ki-moon, secretarius generalis Nationum Unitarum, experimentum atomicum Coreae Septentrionalis vehementissime condemnavit.

Sententiam suam aperuit in Finnia, quo hac septimana iter triduanum fecit.

Moderatores Coreanos ad colloquium cum Corea Meridiana hortatus est iisque suasit, ut ad consultationes, quas antea cum sex civitatibus de suo programme nucleari habuissent, nulla mora interposita redirent.

(Reijo Pitkäranta)

Sollemnitatis Germaniae

29.05.2009, klo 11.12

Die Saturni (23.5.) sexaginta anni acti erant, cum Res publica Foederata Germaniae condita est.

Dies anniversarius magno festo populari Berolini ad portam Brandenburgensem instituto celebrabatur civibus ex omni Germania eo magna multitudine confluentibus.

Eodem die accidit, ut Horst Köhler praesidens foederalis iterum eligeretur, cum iam primo suffragio maiorem sententiarum partem sibi paravisset.

(Reijo Pitkäranta)

De mortibus voluntariis

29.05.2009, klo 11.11

Mortes voluntariae virorum Groenlandiensium imprimis mensibus aestivis, cum sol dies noctesque in caelo lucet, committi videntur.

Quae cum ita sint, rerum periti putant luciditate continua effici, ut aequilibrium serotoninini in cerebro hominum perturbetur, quod saluti eorum noceat.

Si quis etiam insomnia laboret, eo maiori periculo sui interficiendi expositus esse existimatur.

(Reijo Pitkäranta)

De lingua Livonica

29.05.2009, klo 11.11

Victor Berthold, ultimus locutor nativus linguae Livonicae, mortuus est, cum vivus sermoni suo patrio promovendo diligenter operam dedisset.

In Lettonia multi sunt iuvenes se Livones putantes, qui hanc linguam didicerunt et ea cotidie utuntur.

Lingua Livonica propinqua est linguae Finnicae et Estonicae, nam ad familiam linguisticam

Balto-Finnicam pertinet.

(Antti Ijäs)

Dies festus studentium

29.05.2009, klo 11.10

Cras sive die tricesimo mensis Maii (30.5.) semestre vernale scholarum in Finnia finietur.

Tunc erit tempus, cum amplius viginti novem milia novorum studentium birretum candidum capiti imponent ad signum examinis maturitatis feliciter praestiti.

In numero eorum sunt septendecim adulescentes, quibus praemium libri dabitur pro specimine Latino laudabiliter aut eximia cum laude absoluto.

(Reijo Pitkäranta)

Obama et Netanyahu convenerunt

22.05.2009, klo 15.10

Benjamin Netanyahu, primus minister Israelis, itinere in Civitates Americae Unitas suscepto praesidentem Barack Obama in Aedibus Albis convenit.

Inter colloquium discordes videbantur esse de quaestione, quo modo res in Oriente Proximo pacarentur.

Obama ait se civitati Palaestinensium creandae favere, cum Netanyahu nonnisi de proprio regimine eorum loqueretur.

(Reijo Pitkäranta)

Bellum civile Srilancae compositum

22.05.2009, klo 15.09

Die Dominico (17.5.) rebelles Tamili, qui in partibus Srilancae septentrionalibus suam civitatem condere conati erant, se cladem accepisse concesserunt.

Ita factum est, ut bellum civile atrocissimum, quo illa terra per viginti sex annos arsit, tandem finem caperet. Praesidens Srilancae victoriam de rebellibus reportatam toti mundo insignem descripsit.

(Reijo Pitkäranta)

Nova praesidens Lituaniae creata

22.05.2009, klo 15.08

Nova praesidens Lituaniae creata est Dalia Grybauskaite, commissaria Unionis Europaeae a rebus oeconomicis quinquaginta tres annos nata.

In munere suo potestatem admodum magnam habet, quippe quae e lege fundamentali non solum rebus exteris una cum regimine praesit, sed etiam iure parlamenti dimittendi utatur et recusare possit,

quominus leges rogatas accipiat.

(Reijo Pitkäranta)

Scandalum politicum in Britannia

22.05.2009, klo 15.08

Praeses camerae inferioris parlamenti Britanniae Michel Martin nuntiavit se munus deponere, ut unitatem parlamenti servaret.

Officio desistere coactus est, postquam fidem complurium legatorum parlamentarium amisit. Causa eius rei est scandalum propter compensationem sumptuum ortum.

(Reijo Pitkäranta)

Dies festus maritimus Unionis

22.05.2009, klo 15.07

Die Mercurii (20.5.) dies festus maritimus Unionis Europaeae celebrabatur.

Mos talis sollemnitatis agenda anno praeterito usu receptus est, cum parlamentum Europaeum rogationem de communi politica maritima comprobasset. Die festo celebrando cives monentur, ut meminerint, quantam vim maria et opes naturae ad prosperitatem et progressum Unionis habeant.

(Reijo Pitkäranta)

Alexander Magnus maximus Graecus

22.05.2009, klo 15.06

Alexander Magnus civis Graecus omnium temporum maximus electus est suffragio per canalem televisificum nomine Skai facto.

Constat eum saeculo ante Christum natum quarto regem Macedoniae fuisse et bellis in partibus orbis terrarum orientalibus gestis regnum ingenti magnitudine creavisse, cuius fines a flumine Nilo per regiones Persarum usque ad fluvium Indum pertinebant.

(Reijo Pitkäranta)

Templum antiquissimum inventum

22.05.2009, klo 15.06

Templum antiquissimum optime conservatum in Turcia meridionali ab investigatoribus universitatis Toronti inventum est.

Originem ab aetate regis Salomonis trahere existimatur. Detectae sunt exempli gratia necrologiae lapideae litteris hieroglyphicis scriptae. Templum in oppido nomine Tayinat situm est, de cuius exitio forsitan etiam in Bibliis sacris narratur.

(Karoliina Ignatius)

Papa Orientem Proximum ad pacem hortatur

15.05.2009, klo 14.21

Summus pontifex Benedictus XVI Israellem per quinque dies visit.

Ubi in urbem Tel Aviv venit, Israelianos et Palaestinenses pro pace appellavit.

Moderatores Orientis Proximi hortatus est, ut omnes vias rationesque examinarent, ut Palaestinenses et Israeliani suas civitates haberent, in quibus viverent.

(Tuomo Pekkanen)

"Berlusconi pudor Europae"

15.05.2009, klo 14.21

Erkki Tuomioja, delegatus parlamentarius et pristinus minister a rebus exteris Finno-Scandinaviae, Silvium Berlusconi, primum ministrum Italiae, verbis durissimis vituperavit: Eum esse pudori non tantum Italiae sed toti Europae et ita se gerere, ut in alia terra humanitate exculta munere primi ministri fungi vix posset.

Tuomioja est hodie praeses Magnae Commissionis parlamenti Finnici, quae res ad Unionem Europaeam spectantes curat.

Berlusconi, sermonibus suis insulsissimis notus, nuper dixerat se portatum esse in ecclesiam ligneam Finniae, quae, si in Italia fuisset, iam destructa esset.

At constat eum in ecclesia lignea Finniae numquam fuisse.

(Tuomo Pekkanen)

Febris suina in Finniam venit

15.05.2009, klo 14.19

Duo casus febris suinae in Finnia confirmati sunt.

Morbo affecti sunt duo homines adulti, femina et vir, qui eodem volatu postridie Nonas Maias ex Mexico in patriam reverterunt.

Aegroti, in regione Helsinkiensi habitantes, domi curantur.

Dubii et fundo carentes casus suinae febris apud Finnos complures exstiterunt.

(Tuomo Pekkanen)

Collisiones cum cervis frequentes

15.05.2009, klo 14.19

Anno proximo in Finnia mille quingentae nonaginta tres (1593) collisiones inter alces et automobilia acciderunt.

Cum cervis aut capreolis tria milia quadringentae quadraginta tres (3443) collisiones fuerunt.

Praeterea in regionibus Finniae septentrionalibus autovehacula quattuor milibus septem (4007) tarandris impacta sunt.

Propter venationem et saepimenta collisiones inter vehicula et alces his decem annis dimidio rariores factae sunt.

Eodem autem tempore cervi duplo frequentiores calamitates viarias effecerunt.

Maior pars harum calamitatum in Finnia occidentali-meridionali fiunt. Collisionibus proximo anno factis centum sexaginta (160) homines vulnerati, quattuor mortui sunt.

(Tuomo Pekkanen)

Praemium Humboldt professori Solin datum

15.05.2009, klo 14.18

Praemium, dictum ab Alexandro von Humboldt, datum est professori emerito Heikki Solin, qui philologiam classicam in Universitate Helsinkiensi profitebatur.

Fundatio Humboldt rationem affert, quod Solin inscriptionibus Latinis investigandis maxime insignis inter nationes habetur et in studiis onomasticis Graeco-Latinis auctoritate excellit.

(Tuomo Pekkanen)

Russi magistri hoccei glacialis

15.05.2009, klo 14.17

Ludi mundani hoccei glacialis die Dominico (10.4.) Bernae ad finem venerunt.

In certamine finali conflixerunt greges Russorum et Canadensium.

Russi, iam anno proxime praeterito superiores Canadensibus facti, tropaeum ludorum etiam hac vice retibus duobus ad unum (2-1) reportaverunt.

(Tuomo Pekkanen)

Febris suina grassari coepit [09-05-08 audiofile]

04.05.2009, klo 10.46

In Mexico et in America Septentrionali novum morbi genus grassari coepit, quam febrim suinam appellaveris.

Virus hanc epidemiam dispergens ex iisdem microbiis constare videtur, quae antea in hominibus, suibus, avibus inventa sunt.

Magistratus nuntiaverunt amplius centum quinquaginta homines in Mexico ex illa febre mortuos esse et multo plures in eam incidisse.

Propter naturam huius aegrotationis contagiosam metuendum est, ne ea in pandemiam per totum orbem manantem crescat.

Hoc periculum eo verisimilius habetur, quod infectiones iam in omnibus continentibus repertae sunt earumque numerus in dies augetur.

(Reijo Pitkäranta)

Albania societatem petivit

04.05.2009, klo 10.46

Albani societatem Unionis Europaeae petiverunt, cum princeps minister Sali Berisha libellum de ea re moderatoribus Unionis tradidit.

Inde sequitur, ut comitia parlamentaria mense Iunio in Albania futura ab observatoribus Unionis Europaeae diligenter custodiantur.

Id quoque accurate examinabitur, quantopere Albania corruptione, criminalitate, iuribus humanis violatis dedecorata sit.

(Reijo Pitkäranta)

Res periegetica Graeca

04.05.2009, klo 10.45

Multitudo viatorum in Graeciam proficiscentium deminuta est.

Haec regressio non solum discrimini oeconomico tribuitur, sed etiam frequentibus motibus violentis,

qui anno vergente Athenis orti sunt.

Quantum res periegetica ad reditus Graecorum conferat, vel inde conicitur, quod quotannis quindecim fere miliones peregrinorum ibidem ferias agere solent.

(Reijo Pitkäranta)

Activitas Solis deminuta

04.05.2009, klo 10.45

Activitas Solis magnetica, quae decenniis proximis maior quam plus mille annis fuit, iam ad finem venisse videtur.

Unum eius rei testimonium est, quod vis campi magnetici Solis ad dimidium redacta est.

Investigatores censent has mutationes nonnihil momenti ad clima Telluris habere ac quidem ita, ut temporibus futuris temperatura frigidior fieri possit.

(Karoliina Ignatius)

Dies nationalis veteranorum

04.05.2009, klo 10.44

Die Lunae (27.4.) in Finnia dies nationalis veteranorum publice celebrabatur. Caerimonia principalis, cui etiam princeps minister Matti Vanhanen aderat, in urbe Iisalmi habita est.

Signum diei sollemnis huius anni electa erat sententia "Tempus nuntium fert", qua ostenditur hereditatem veteranorum semper recolendam et notitiam virtutis eorum posteris quoque tradendam esse.

(Reijo Pitkäranta)

De adventu veris in Finnam

04.05.2009, klo 10.44

Sationes vernae in Finnia meridionali iam fieri coeptae sunt, quamquam ver hoc anno agricolis aliquot diebus solito serius advenit.

In media autem Finnia adhuc expectandum est, donec arva satis bene siccescant ad semen recipiendum.

In partibus septentrionalibus, ubi agri nivibus obruti iacent, tempus sementis faciendae longe abest.

(Reijo Pitkäranta)

Medvedev Finnam visit

24.04.2009, klo 14.18

Dmitri Medvedev, praesidens Russiae, Finnam biduo officialiter visit.

Die Lunae (20.4.) paulo post meridiem aeroplanum eius in aerodromon Helsinkiensem appulit, unde ad palatium praesidentis vectus a praesidente Tarja Halonen sollemniter salutatus est.

Post colloquia officialia praesidentium Medvedev parlamentum Finnicum visit et in Universitate Helsinkiensi orationem habuit.

Russi sperant fore, ut Finni ductui gasali societatis Nord Stream faveant, erga quem Sueti et Estonienses cautius et cum circumspectione se gerunt.

"Finnis ductus ille gasalis", ait praesidens Halonen, "est imprimis quaestio oecologica. Si oecologice et tute fieri potuerit, illi incepto favebimus."

Medvedev pollicitus est omnes quaestiones ad circumiecta pertinentes in ductu aedificando observatum iri.

Alioquin energia inter visitationem praesidentis Medvedev locum centralem habuit.

Finnia enim a Russia accipit omne gasum terrestre, septuaginta centesimas petrolei, tertiam partem carbonis fossilis, decimam partem electricitatis.

Ad commeatum inter Finnam et Russiam promovendum tractatus de visis concedendis disceptabatur.

Cum colloquia inter Russiam et Unionem Europaeam lente processerint, Russi iam cum Francia, Italia Germaniaeque tractatus de visis bilateralibus fecerunt.

Praetererea inter praesidentes Medvedev et Halonen de discrimine oeconomico aliisque de rebus internationalibus agebatur.

Oratione in Universitate Helsinkiensi habita Medvedev novum Europaeum tractatum securitatis commendabat.

Censebat Nationem et Unionem Europaeam non sufficere, quia omnes nationes in illis non essent.

Ad novum tractatum efficiendum suasit, ut omnes nationes omnesque ordines Europaeos ad summum conventum convocarentur.

Altero die praesidens Medvedev sepulcretum Helsinkiense visit atque coronam ad sepulcrum marescalci Mannerheim et ad monumentum militum bello caducorum posuit.

Dein iter hospitum Borgoam continuatum est, ubi primum parlamentum Finniae autonomae ante ducentos annos convocatum recalebatur.

Post meridiem Medvedev, hospes Finnis gratissimus, in patriam revertit.

(Tuomo Pekkanen)

ALF in Villa Lante sedem habet

24.04.2009, klo 14.16

Academia Latinitati Fovendae (ALF) in Villa Lante, Instituto Romano Finlandiae, die Veneris (17.4.) sessionem anniversariam habuit.

Professor Nicolaus Sallmann de duodecimo Academiae conventu internationali Ratisbonae celebrando (ALF XII 15. - 19.9.2009) rettulit et professor Andreas Fritsch orationem habuit, cuius argumentum erat "Comenii 'Latium redivivum' utrum fuerit consilium serium an phantasma inane".

Academia, cuius sedes est Romae, hospes Instituti Romani Finlandiae iam saepius fuit, sed cum professor Heikki Solin, vicepraeses Instituti administrationis, officialiter nuntiavisset Academiam in Villa Lante sedem perpetuam habituram esse, propositum eius a sodalibus magno plausu acceptum est.

(Tuomo Pekkanen)

De tumultibus Thailandiae

15.04.2009, klo 16.43

In Thailandia Thaksin Shinawatra, pristinus primus minister, et reclamatores eum sustinentes nova comitia flagitant et primum ministrum Abhisit Vejjajivam deponere volunt.

Exercitum, iudicia magistratusque accusant, quod democratiam despiciant.

Thaksin, qui in exilio vivit, iram populi contra regimen hodiernum iam tres annos incitat.

Culmen discriminis politici fuit, quod tempore paschatis tumultuantibus contigit, ut conventum principum terrarum Asiaticarum Pattayae impedirent, cum in ministerium rerum domesticarum penetraverunt et ministrum Vejjajivam fugere coegerunt.

Participes conventus, qui iam Pattayam venerant, de tecto deversoriorum in tutum helicopteris deportati sunt.

Die Lunae (13.4.) tumultus Thailandiae violentiores facti sunt, cum milites in vias Bangkokii missi reclamationes armis coercere coeperunt.

In pugnis inter exercitum et oppositionem ortis duo homines mortui, plus centum vulnerati sunt.

Erant in viis Bangkokiensibus circiter quinque milia reclamatorum et sex militum milia.

Die Martis (14.4.) duces oppositionis ab exercitu circumdati nuntiaverunt se manifestationes ad interim Bangkokii interrupturos esse.

Ut fautores ipsorum tuti essent, promiserunt se a palatio regiminis, quod tres per septimanas obsederant, abituros esse.

Peregrini in Thailandia versantes ex tumultibus nulla damna ceperunt.

(Tuomo Pekkanen)

Papa pro pace et iustitia appellavit

15.04.2009, klo 16.42

Complura dena milia hominum in plateam Petrianam civitatis Vaticanae die Dominico paschali convenerunt, ut missam a summo pontifice Benedicto XVI celebratam audirent.

Papa erga victimas terrae motus Aprutiensis solidaritatem petivit, de violentia in Africa et in Proxima Oriente monuit atque ad mundum pro pace et iustitia appellavit.

(Tuomo Pekkanen)

Nullam pacem sine ordine Hamas

15.04.2009, klo 16.42

Praesidens Martti Ahtisaari, praemio pacis Nobeliano praemiatus, censet conflictum inter Israellem et Palaestineses sine ordine Hamas solvi non posse.

"Processus pacis Proximi Orientis", ait Ahtisaari, "cum novo regimine Americanorum promovetur.

Discrimen oeconomicum efficit, ut possibilitates cooperationis politicae ad pacem faciendam meliores sint quam ante."

(Tuomo Pekkanen)

Inscriptiones Alhambrae investigantur

15.04.2009, klo 16.41

Investigatores Hispani interpretationi inscriptionum Arabicarum Castelli Alhambrae operam dare coeperunt.

Numerantur circiter decem milia et constant ex singulis verbis, carminibus aut sententiis Alcorani.

Propositum investigatorum est omnes inscriptiones ante annum bis millesimum undecimum in interrete inferre.

Hoc tempore tertia fere pars Hispanice versa in disco compacto parata est.

Multae inscriptiones sunt attritae et vix legibiles. Verba usitatissima sunt "felicitas" et "benedictio", saepius occurrit sententia "Nulla est victoria nisi Deus".

Alhambra, quae inde a nono saeculo nota est, margarita culturae Islamicae Hispaniae habetur et inter hereditates mundi culturales numeratur.

(Tuomo Pekkanen)

[sonum emissionis 13 Aprilis deponere non poterat]

Motus terrae Italiam concussit

13.04.2009, klo 21.40

Postridie Nonas Apriles (6.4.), quarta noctis vigilia, regio Aprutiensis Mediae Italiae motu terrae violenter concussa est.

Epicentrum motus, cuius vis erat circiter sex gradus in scala Richteriana, ab urbe Aquila decem fere chiliometra distabat.

Tot aedificia damna ceperunt aut corruerunt, ut viginti septem milia hominum domos relinquere cogerentur.

Mortui ducenti undeoctoginta esse dicuntur, vulnerati plus mille. Sors multorum est adhuc incerta.

Concussio etiam in Campania et Latio sentiebatur, etsi nihil gravius in eis provinciis accidisse nuntiatur.

Romae quidem Thermae Caracallae sive Antoninianae leviora damna ceperunt.

(Tuomo Pekkanen)

Albania et Cratia membra Natonis

13.04.2009, klo 21.39

Confoederatio ex pacto Atlantico septentrionali duo nova membra accepit.

Kalendis Aprilibus, quo die anniversarium sexagesimum Natonis celebrabatur, Albania et Croatia membra eius officialiter facta sunt.

Caerimoniae in summo conventu confoederationis in urbibus Argentorati (Strasbourg) Franciae atque Aureliae Aquensi (Baden-Baden) et Kehl Germaniae fiebant.

Albani et Croatae in Afganistania copias habent, ubi maxima operatio militaris Natonis his temporibus fit.

Illis in confoederationem acceptis etiam Georgii et Ukraini sperant fore, ut Nato, quod de ipsis in confoederationem accipiendis olim spoponderit, aliquando efficiat.

(Tuomo Pekkanen)

Corea Septentrionalis missile probavit

13.04.2009, klo 21.38

Coreani septentrionales satellitem in orbitam mittere conati sunt, sed missile eorum, postquam mille trecenta chiliometra volavit, in Oceanum Pacificum decidit.

Experti Americani et Russi censent satellitem ex rocheta non esse solutum, quia illa potentiam necessariam non haberet.

Nihilo minus Coreanis septentrionalibus contigit, ut missile longius quam umquam ante mitterent.

(Tuomo Pekkanen)

Obama de armis nuclearibus

13.04.2009, klo 21.38

Oratione die Dominico (5.4.) Praegae habita Barack Obama, praesidens Americanorum, censebat maximum periculum orbi terrarum ex armis nuclearibus imminere, quae terroristae alicunde caperent.

Etsi bellum minus probabile esset, periculum ictus nuclearis maius esse quam ante.

Technologiam nuclearem furto aut commercio illegali facile in manus terroristarum incidere posse.

Civitates Americae Unitas, tenaces propositi, ad mundum armis nuclearibus vacuum contendere.

Americanos et sua arma significanter minuere velle et cum Russis consulere, ut idem facerent. Praesidens Obama vult etiam, ut probationes nucleares vetentur et illi puniantur, qui tale interdictum neglexerint.

(Tuomo Pekkanen)

Sueti matrimonium homosexualium accipiunt

13.04.2009, klo 21.37

Parlamentum Suetiae legem sanxit, ex qua sexus in matrimonio iungendo nullius est ponderis.

Lex ducentis sexaginta uno suffragiis contra viginti duo (261-22) confirmata est.

Coniuges eiusdem sexus iam ab anno millesimo nongentesimo nonagesimo septimo consuetudinem suam in tabulas referre apud Suetos possunt.

Aequum ius matrimonii a Kalendis Mais valebit.

(Tuomo Pekkanen)

Obama in Europam venit

03.04.2009, klo 09.46

Praesidens Barack Obama hac septimana iter in Europam suscepit, ut cum aliis moderatoribus mundi de rebus maximi momenti colloqueretur.

Obama apud Europaeos multum gratia valet, quam ob rem expectatio eius videndi magna erat.

Primum quidem Londinium volavit, ubi die Iovis conventus oeconomicus internationalis habebatur.

Deinde in Germaniam transiit, ut anniversarium sexagesimum consociationis militaris NATO celebraret.

Die Dominico autem Pragae summus conventus Unionis Europaeae et Civitatum Americae Unitarum instituetur, in quo cum de securitate energiae tum de mutatione climatica agetur.

(Reijo Pitkäranta)

Lumina electrica exstincta

03.04.2009, klo 09.45

Die Saturni (28.3.) vesperi lumina electrica monumentorum et aedificiorum publicorum in duodenonaginta civitatibus et circiter in quattuor milibus urbium ad unam horam exstincta sunt.

Tenebris igitur obvolutae sunt verbi gratia pyramides Aegypti, basilica Sancti Petri, turris Eiffeliana.

Hac actione ostendebatur, quanti interesset energiae parcere consuetudines consumendi mutando.

(Reijo Pitkäranta)

Speculatio computatoria reperta

03.04.2009, klo 09.44

Investigatores Canadenses amplissimum speculatorum circulum in Interreti operatum patefecerunt, cuius participes in programmata computatoria multorum regiminum et societatum in centum tribus civitatibus irruperunt.

Effracturae informaticae imprimis e Sinis commissae esse videntur, sed, utrum illi usurpatores hortatu moderatorum Sinarum egerint necne, parum constat.

(Reijo Pitkäranta)

De comitiis Borgoensibus

03.04.2009, klo 09.43

Die Saturni (28.3.) Borgoae, in urbe Finniae, memoria bisaecularis comitiorum Borgoensium celebrabatur.

Illo enim die anno millesimo octingentesimo nono (1809) Finnia, cum ad imperium Russiae adiungeretur, statum autonomicum adepta in numerum nationum recepta est. Eodem tempore Alexander I, imperator Russiae, edixit, ut civibus Finnis sua religio, suae leges fundamentales, alia iura civilia concederentur. Ordines autem Finniae Borgoam congregati Alexandro ius iurandum fidelitatis dederunt.

(Reijo Pitkäranta)

Cibus domesticus tutior

03.04.2009, klo 09.42

Maior pars Finnorum cibum domesticum externo tutiorem putat.

Imprimis feminae et iuvenes triginta quinque annis minores maximam fiduciam habent in lacte, carne, ovis gallinae in Finnia productis. Haec fides ne ea quidem re labefactata esse videtur, quod in aliquot

suilibus et gallinariis nostris hoc vere multi casus salmonellae inveniabantur.
(Reijo Pitkäranta)

Viljo Kekola 108 annorum

03.04.2009, klo 09.41

Omnium civium Finnorum maximus natu est Viljo Kekola, qui Kalendis Aprilibus centum octo annos complevit.

Habitat cum coniuge domi suae prope urbem Seinäjoki et cotidie acta diurna legit avidus sciendi, quid in diversis orbis terrarum partibus agatur. Dicit se usque ad annum aetatis suae centesimum in opere faciendo occupatum fuisse, donec in otium veniret.

(Reijo Pitkäranta)

Obama Iranianos allocutus

27.03.2009, klo 17.19

Praesidens Americanorum Barack Obama taenia magnetoscopica divulgata populum Iranianum allocutus proposuit, ut in relationibus inter Iraniam et Civitates Americae Unitas intercedentibus novum initium tandem sumeretur.

Dixit Americanos velle, ut Irania suum locum in communitate nationum occuparet.

"Vos" inquit, "eo iure utimini, sed novus status neque terrore neque armis obtinebitur, sed rebus pacificis gerendis, ut ostendatur, quam magna civitas Irania vere sit."

(Reijo Pitkäranta)

Quid papa in Africa dixerit

27.03.2009, klo 17.19

Papa Benedictus XVI iter unius septimanae in Africam fecit.

Die Dominico (22.3.) Luandae, in urbe principe Angolae, missam sollemnem subdialem procuravit, ad quam celebrandam saltem decies centena milia hominum convenerant.

Contione habita Pontifex Maximus de nubibus mali super Africam congregatis locutus est, quibus effectum esset, ut multa bella, largitiones, tumultus tribuarii ibi orerentur.

(Reijo Pitkäranta)

Pompa contra mafiosos

27.03.2009, klo 17.18

Die Saturni (21.3.) Neapoli ingens pompa instructa est, qua circiter centum quinquaginta milia hominum coniurationi mafiae reclamitabant.

Dum haec geruntur, nomina amplius nongentorum civium, qui a mafiosis occisi erant, publice pronuntiabantur.

In numero reclamitantium erat etiam Roberto Saviano, qui praecipuo suo periculo librum de mafia Neapolitana nomine Camorra non ita pridem divulgavit.

(Reijo Pitkäranta)

Hafnia urbs viridissima futura

27.03.2009, klo 17.18

Moderatores Hafniae, capitis Daniae, urbem suam omnium viridissimam reddere volunt idque se ante annum bis millesimum vicesimum quintum (2025) consecuturos esse sperant.

Consilium eorum ex quinquaginta inceptis constat, quorum unum est omnem electricitatem ex energia pneumatica gignere.

Huc accedit, quod emissiones carbonei dioxydati iam sexennio proxime futuro vicenis centesimis (20%) deminuentur.

(Reijo Pitkäranta)

Shakespeare anno 1610 depictus

27.03.2009, klo 17.17

Investigatores Britannii credunt se picturam William Shakespeare figurantem primam eo vivente depictam repperisse, quae ab anno millesimo sescentesimo decimo (1610) originem trahere putatur.

Effigies igitur ad id fere tempus pertinet, quo Shakespeare librum carminum edidit et tragoediam de ardenti amore Antonii et Cleopatrae composuit.

(Antti Ijäs)

Feminae custodes commeatus

27.03.2009, klo 17.17

Limae, in urbe principe Peruviae, circiter quingenti custodes commeatus publici operantur. Condicio eorum autem mox ita mutabitur, ut omnes viri illo munere fungentes ad alia officia transferantur et in locum eorum feminae succedant. Repertum enim est vigiles viatorias feminas in Peruvia multo difficilius pecunia corrumpi posse quam viros.
(Reijo Pitkäranta)

Medvedev arma nuclearia renovaturus

20.03.2009, klo 16.59

Demetrius (Dmitri) Medvedev, praesidens Russiae, arma exercitus renovaturus est. Iudicat terrorismum internationalem et amplificationem Natonis postulare, ut copiae Russorum efficaciores fiant. Maximi esse arma nuclearia strategica renovare. Medvedev ab armis veteribus reparandis ad nova acquirenda transire vult, nam censet in bello Georgico apparuisse, quantum in exercitu Russorum desideraretur.
(Tuomo Pekkanen)

Secretum argentarium in Helvetia laxatur

20.03.2009, klo 16.59

Helvetiis tandem persuasum est, ut strictas secreti argentarii regulas laxarent. Posthac domus argentariae Helvetiorum, si qui clientes de fraude fiscali suspecti habebuntur, aliis nationibus de illis referent. Omnino autem secretum argentarium non deponetur, nam rationes, nisi in singulis casibus et aliis nationibus particulatim rogantibus, non reddentur.
(Tuomo Pekkanen)

Gratificationes ignominiosae

20.03.2009, klo 16.58

AIG (American International Group), societas cautionum, propter crisim oeconomicam ingentibus difficultatibus laborat et sine subventionibus centum septuaginta trium miliardorum dollarorum, quas ab Argentaria centrali Americanorum impetravit, iam decoxisset. Pecuniis publicis ita acceptis AIG consilium cepit, ut gratificationes centum sexaginta milium dollarorum moderatoribus suis tribueret. Hoc consilium iram civium apud Americanos excitavit. Lawrence Summer, consiliarius oeconomicus Domus Albae, illas gratificationes ignominiosas appellavit. "Inter proximum sesquiannum", inquit, "multa atrocita acciderunt, sed quod AIG fecit, turpissimum est omnium." Urgente ministerio aerarii AIG gratificationes et stipendia moderatorum minuere intendit.
(Tuomo Pekkanen)

Consumptio recessione decrescit

20.03.2009, klo 16.57

Duodeviginti centesimae (18%) ex Finnis ad interrogationem recentem responderunt se propter recessionem his duobus mensibus consumptionem restrinxisse. Mense Ianuario centesimae correspondentes erant tredecim (13%). Maxima deminutio in pecuniis ad cibum et potum et commeatum consumptis facta est. Maior autem pars (72%) rettulit se usum pecuniae non mutavisse.
(Tuomo Pekkanen)

Recessionem hoc anno transituram?

20.03.2009, klo 16.56

Ben Bernanke, moderator principalis Argentariae centralis Americanorum, putat recessionem oeconomicam forsitan iam hoc anno in USA remissuram esse. Si consilia ad domos argentarias salvandas capta ex proposito successerint, fieri posse, ut oeconomia mox crescere incipiat.

Paul Krugman, oeconomicus Nobelist, censet ea, quae in Europa ad crisim solvendam facta sint, multo languidiora esse quam quod Americani hucusque fecerint.
Europam et Argentariam eius centalem in crisi oeconomica domanda hucusque parum processisse ideoque terras Europaeas in recessionem multorum annorum illapsuras esse.
(Tuomo Pekkanen)

Hodie est aequinoctium vernum

20.03.2009, klo 16.56

Hodie (20.3.) est vernum aequinoctium.

Posthac in hemisphaerio septentrionali dies fiunt longiores quam noctes, donec tempore aestivi solstitii (21.6.) dies est longissimus.

In partibus Scandinaviae extremis tum est dies continuus sive, ut dicitur, nox sine nocte.

Post autumnale aequinoctium (23.9.) usque ad hiemale solstitium (21.12.) dies rursus fiunt noctibus breviores.

(Tuomo Pekkanen)

Quid Barack Obama dixerit

13.03.2009, klo 16.17

Praesidens Barack Obama ad disciplinam bellicam Americanorum in Afganistania mutandam paratus est.

A diurnariis interrogatus ait Civitates Americae Unitas consilia cum factionibus Talibanorum moderatioribus communicare velle.

Idem dixit ordinem terroristicum al-Qaida ea tantum ratione opprimi posse, ut duces tribuari Afganistaniae una cum primoribus Talibanorum temperatioribus ad commune colloquium convocarentur.

(Reijo Pitkäranta)

Clinton et Lavrov convenerunt

13.03.2009, klo 16.17

Russia et Civitates Americae Unitae consultationes de armis nuclearibus circumscribendis suscepturae sunt.

Ita decretum est inter cenam Genavae apparatus, cui aderant Hillary Clinton et Sergei Lavrov, ministri rerum exterarum utriusque nationis.

Clinton censet multo tempore et mutua fide ad novas rationes inter utramque partem corroborandas opus esse.

Lavrov autem credit fieri posse, ut de argumentis discordiarum conveniat.

(Reijo Pitkäranta)

Ictus in Irlandia Septentrionali

13.03.2009, klo 16.16

Die Saturni (7.3.) aggressores ignoti impetum in stationem militarem Britannicam in Irlandia Septentrionali collocatam fecerunt, quo duo milites occisi et quattuor homines sauciati sunt.

Sunt, qui timeant, ne res in illa regione iam per decem annos admodum pacatae denuo in discrimen vocentur.

Gordon Brown et Brian Cowen, ministri principes Britanniae et Irlandiae, illum ictum condemnaverunt et iuraverunt eum paci non imminere.

(Reijo Pitkäranta)

Sueti regno suo adhuc favent

13.03.2009, klo 16.15

Tres fere partes populi Suetici sive septuagenae quaternae centesimae (74%) monarchiam, qualem hodie habent, servare volunt, ut ex demoscopia de ea re facta patet.

Abhinc quattuor annos numerus eorum, qui sub regno vivere volebant, quaternis centesimis maior erat. Favor civitatis regiae praesertim apud viros triginta annis maiores decrevisse videtur.

(Reijo Pitkäranta)

De primo equorum usu

13.03.2009, klo 16.15

Amicitia hominis et equi mille annis vetustior est quam antea credebatur.

Si investigationi Britannicae nuper editae fidem habemus, incolae Cazastaniae hoc animal iam abhinc quinque milia quingentos annos domuerunt.

Ex inventis archaeologicis apparet priscos Cazastanianos equis multis modis usos esse, quippe qui eos non solum ad onera portanda et trahenda adhiberent, sed etiam ex iis lac mulgerent et carne eorum vescerentur.

(Reijo Pitkäranta)

De populatione lyncum

13.03.2009, klo 16.14

Numerus lyncum in Finnia iam crescere coepit, et multi eorum etiam urbibus et oppidis appropinquare ausi sunt.

Una e causis tantae propagationis videtur esse, quod cuniculi feri, quos lynces libenter captant, in regionibus Finniae meridionalis valde aucti sunt.

Huc accedit, quod silvae nostrae alia quoque praeda ad victum lyncum idonea abundant.

(Reijo Pitkäranta)

Moderatores UE Bruxellas convenerunt

05.03.2009, klo 17.30

Kalendis Martiis moderatores Europaei Bruxellas convenerunt, ut ostenderent Unionem Europaeam in hodierna crisi argentaria consentire et novas rationes ad res restituendas excogitare.

Ille conventus inofficialis protectionismum intra Unionem damnavit, sed crisi gravescente unaquaeque natio maxime de sua oeconomia curam agere videbatur.

Ferenc Gyurcsány, primus minister Hungariae, petivit, ut centum nonaginta miliarda euronum terris Europae orientalis concederentur.

Idem monuit periculum esse, ne Unio Europaea novo aulaeo ferreo divideretur.

Moderatores autem Unionis censebant magnas inter terras orientales esse differentias neque auxilium omnibus, sed singulis, cum opus esset, datum iri.

(Tuomo Pekkanen)

USA copias ex Iraquia reducet

05.03.2009, klo 17.30

Praesidens Barack Obama nuntiavit Americanos ante Kalendas Septembres anni proximi operationibus militaribus in Iraquia finem facturos esse.

Postea quinquaginta milia militum unum annum ibi mansuros esse. Nouri al-Maliki, primus minister Iraquiae, dixit copias Iraquianorum iam ostendisse se ad securitatem patriae tuendam paratas esse.

Ex statisticis nuper divulgatis in bello Iraquico iam quattuor milia ducenti quinquaginta quattuor milites (4254) Americani mortui sunt.

Milites Britannici centum undeoctoginta (179) ceciderunt, omnium aliarum nationum milites, qui in confoederatione militabant, centum undequadragesima (139).

Victimarum civilium numerus a nonaginta milibus ad centum milia esse aestimatur.

(Tuomo Pekkanen)

De longaevitate Iaponum

05.03.2009, klo 17.29

Iapones diutius vivunt quam ceteri populi, nam ex centum viginti septem milionibus incolarum triginta sex milia quingenti centum annos superaverunt.

Longaevitas apud Iapones multas causas habere putatur, ut cibum salutarem et optimam valetudinis curam.

Anno proximo (2008) paene viginti milia Iaponum centum annos compleverunt.

Mos est Iaponibus, ut civitas homini centenario dono det pocillum argenteum.

Quod factum est primum anno millesimo nongentesimo sexagesimo tertio, quo numerus centenariorum erat centum quinquaginta tres.

Hodie, numero centenariorum valde aucto et crisi oeconomica urgente, pocillum minus quam ante illis donatur.

(Tuomo Pekkanen)

Vestigia hominis erecti reperta

05.03.2009, klo 17.28

In Kenia vestigia hominis reperta sunt, quae ante sesquimilionem annorum nata esse existimantur.

Illa veterrima ex omnibus hucusque notis vestigiis habentur, quae homo erectus fecerit.

Signa pedum sunt duorum hominum adultorum et unius pueri.

Ex his conici potest pedes illorum hominum similem structuram habuisse quam hominum hodiernorum, qui erecti ambulant.

(Tuomo Pekkanen)

Asteroides Terram praetervolavit

05.03.2009, klo 17.27

Die Lunae asteroides, diametro inter viginti et quadraginta septem metra, inter Terram et lunam periculose volavit.

Distantia eius minima a Terra erat tantum septuaginta duorum milium chiliometrorum.

Velocitas asteroidis, qui non ante quam die Sabbati (28.2.) observatus est, erat vicena chiliometra singulis secundis.

(Tuomo Pekkanen)

Sanctiones contra Cubam laxabuntur

27.02.2009, klo 11.42

Relatio Americana, commissioni rerum exterarum senatus Americani data, commendat, ut sanctiones contra Cubam positae laxentur: Circumscriptiones commeandi, pecunias transferendi, fruges et cibaria vendendi tollantur atque cooperatio inter Americanos et Cubanos suscipiatur, ut commercio drogarum obsistatur.

Haud procul abest, quin omnes sanctiones commerciales auferantur. Hillary Clinton, ministra rerum exterarum, iam antea promisit se Americanorum in Cubam politicam revisuram esse.

Limitationes autem commeatus praesidens Barack Obama pollicitus est laxatum iri.

Cuba et USA post annum millesimum nongentesimum sexagesimum secundum (1962), quo sanctiones commerciales Cubae indictae sunt, relationes diplomaticas non habent.

(Tuomo Pekkanen)

Australia victimas incendiorum lugebat

27.02.2009, klo 11.41

In Australia die Dominico (22.2.) memoria hominum, qui in incendiis silvarum vitam amiserant, colebatur.

Caerimonia principalis fuit Melburni, in urbe principe civitatis Victoriae, cui ignes maximas clades attulerant.

Kevin Rudd, primus minister Australiae, affirmavit regionem vastatam reaedificatum iri.

Mille octingentae domus igne deletae sunt, plus ducenti homines interierunt.

(Tuomo Pekkanen)

Arma in Orientem Proximum ne veneant

27.02.2009, klo 11.40

Amnestia Internationalis, ordo iuribus humanis defendendis, flagitat, ut Consilium securitatis Nationum Unitarum vetet, ne arma Israeli atque ordini Hamas aliisque ordinibus Palaestinensium veneant.

Amnestia utramque partem accusat, quod inter impetum Israelis mense Ianuario in zonam Gazae factum crimina belli commiserit.

(Tuomo Pekkanen)

Dimidia pars ciborum interit

27.02.2009, klo 11.40

Orbis terrarum tantum cibi producit, ut paene decem hominum miliardis sufficiat, sed plus quam dimidia pars corrumpitur aut aliis de causis non comeditur.

Quod apparet ex relatione, quam UNEP, programma circumiectale Nationum Unitarum (United Nations Environment Programme) divulgavit.

In hac relatione rationes tractantur, quibus condiciones mundi alimentariae meliores reddantur.

(Tuomo Pekkanen)

Milionarius tuguriopolitanus excellit

27.02.2009, klo 11.39

Praemia Oscar Angelopoli distributa sunt.

Optima pellicula iudicata est "Milionarius tuguriopolitanus" (Slumdog Millionaire), in regionibus egenis urbis Bombaiae facta, cui octo praemia data sunt.

Pro persona feminea principali palmam cepit Kate Winslet, pro principali parte virorum Sean Penn.

Inter personas secundarias praemiati sunt Heath Ledger et Penelope Cruz.

(Tuomo Pekkanen)

Principissa Victoria desponsa

27.02.2009, klo 11.38

Principissa Victoria, heres regni Suetiae, Danieli Westling, amico diutino desponsa est.

Nuptiae anno proximo Stockholmae celebrabuntur.

Nuntius de sponsalibus apud cives et politicos et in instrumentis communicativis magna cum laetitia acceptus est.

Sponsus, ex plebe oriundus, matrimonio iuncto titulum habebit principis et ducis Vestrogothiae.

Regnum Suetiae inter vetustissima in mundo numeratur, nam iam Tacitus narrat apud Suiones sive Suetos unum imperitavisse.

Monarcha autem ex lege fundamentali potestatem politicam non habet sed munera eius sunt caerimonialia.

Paucissimis exceptis, reges et reginae Suetorum coniuges ex nobilibus aut domibus regiis peregrinis sumpserunt.

(Tuomo Pekkanen)

Plebiscitum Venetiolae

20.02.2009, klo 16.23

Praesidens Venetiolae Hugo Chavez plebiscito facto legem preferendam curavit, quae vetat numerum periodorum praesidatus in illa civitate sua ullo modo circumscribi.

Ex hoc sequitur, ut praesidens hodiernus Chavez, quotiescumque suffragiis superior discesserit,

Venetiolam in sua potestate ac ditione tenere possit.

Etiam gubernatores, praefecti urbium, legati parlamentares, alii magistratus in Venetiola iterum atque iterum ad munus suum eligi poterunt.

(Reijo Pitkäranta)

Calamitas navalis submarina

20.02.2009, klo 16.23

Mense Febuario ineunte duae naves submarinae nucleares, una Britannica, altera Francogallica, in altitudine Oceani Atlantici inter se collisae sunt.

Calamitas quidem utrique navigio aliqua detrimenta attulit, sed securitas nuclearis in periculum non est adducta.

Nec quisquam unus ex ducenis quadragenis militibus, qui in his navibus stipendia merebant, illa collisione sauciatus est.

(Reijo Pitkäranta)

Ministra Arabiae Saudianae

20.02.2009, klo 16.23

Abdullah, rex Arabiae Saudianae, feminam in collegium administratorum regni sui cooptavit, cum mulieri nomine Nour al-Fayez ministerium feminis erudiendis gerendum commisit.

Nulla femina in Arabia Saudiana umquam tam amplam dignitatem obtinuit.

Nominatio signum habetur alias quoque res in illo regno islamismum priscae severitatis confitente paulatim renovatum iri.

(Reijo Pitkäranta)

Catacumbae virtualiter obeuntur

20.02.2009, klo 16.22

In Academia scientiarum Vindobonensi apparatus lasericus excogitatus est, cuius ope catacumbae Romanae virtualiter obiri possunt.

Agitur de tabula tridimensionali, qua qui utuntur in labyrinthis catacubarum circumvagari et picturas parietarias sepulcrorum antiquorum intueri videntur.

Prima ambulatio virtualis in catacumba Domitillae quindecim chiliometra longa fit.
(Reijo Pitkäranta)

Vis discriminis oeconomici

20.02.2009, klo 16.22

Discrimen oeconomicum effecit, ut consumptio electricitatis in Finnia multum deminueretur et commeatus vehicularius vehementer decresceret.

Eodem tempore emissiones carbonei dioxydati imminutae sunt, cum carbo, caespes, gasum terrestre minus quam ante ad energiam gignendam adhiberentur.

(Reijo Pitkäranta)

De statu circumiectorum in Finnia

20.02.2009, klo 16.21

Conditio circumiectorum in Finnia multis locis melior est quam abhinc decem annos.

Hoc imprimis ad aquas lacuum valet, cum status oecologicus fluminum et litorum paulo peior sit.

In periculo autem versantur nonnulli biotopi, praesertim prata, pascua, loca graminea, quibus rarescentibus decima quaeque animalium et herbarum species omnino evanescere periclitatur.

(Reijo Pitkäranta)

De aurora boreali in Lapponia

20.02.2009, klo 16.21

Aurora borealis in caelo Lapponico mirum quam raro hac hieme fulsit.

Causa, cur illi ignes caelestes polo arctico defuerint, videntur esse maculae solares, quae in praesenti paucissimae reperiuntur.

Geophysici in observatorio Sodankyläensi versati commemorant copiam earum aequae exiguae anno millesimo nongentesimo tertio decimo (1913) fuisse.

(Reijo Pitkäranta)

Incendia silvestria Australiae

13.02.2009, klo 15.50

Regiones Australiae meridianaes tantis incendiis silvestribus vastatae sunt, ut multa oppida omnino delerentur.

Haec clades, qua nihil atrocius huic continenti aetate pacis obtigit, saltem ducentis hominibus perniciem fuit.

Dubium est, an calamitas eo atrocitatis progressura non fuerit, nisi incendia dolo malo conflata essent.

(Reijo Pitkäranta)

Comitia parlamentaria Israelis

13.02.2009, klo 15.49

Die Martis (10.2.) in Israele comitia parlamentaria habita sunt, quibus fautores factionis mediae nomine Kadima cum asseclis partium dextrarum Likud de principatu certabant.

Suffragium tam pari Marte iit, ut sententiis computatis praesides utriusque partis se victores profiterentur.

Quae cum ita sint, adhuc difficile est dictu, ex utra factione princeps minister Israelis futurus sit.

(Reijo Pitkäranta)

De colloquiis Moscuensibus

13.02.2009, klo 15.49

Legati Unionis Europaeae magnae auctoritatis Moscuam iter fecerunt ibique presidentem Demetrium Medvedev et principem ministrum Vladimir Putin convenerunt.

Inter colloquia consenserunt videndum esse, ne inter utramque partem iam tale discrimen oreretur, qualis fuisset mense Ianuario discordia de gaso e Russia in terras occidentales suppeditando.

Praeterea de novo foedere a sodalitate ineundo et de rebus ad mercaturam pertinentibus disputabant.

(Reijo Pitkäranta)

Tyrannosaurus rex serpentium

[: Nuntii Latini](#)

13.02.2009, klo 15.48

Grex investigatorius internationalis in America Meridionali fossile serpentis omnium temporum maximi invenit.

Ipsi viri docti magnitudine animalis tantopere stupefacti sunt, ut eum Tyrannosaurum regem serpentium nominarent.

Ex costa et columna vertebrali concluditur illud reptile saltem tredecim metra longum fuisse et pondus mille centum quadraginta chiliogrammatum habuisse.

(Reijo Pitkäranta)

Dies nationalis Lapponum

: Nuntii Latini

13.02.2009, klo 15.48

Postridie Nonas Februarias (6.2.) dies nationalis Lapponum celebrabatur.

Qui mos sollemnis originem ducit e conventu Lapponum communi, qui primus anno millesimo nongentesimo septimo decimo (1917) in Norvegorum urbe Trondheim actus est.

Commemorare iuvat Lappones unicum populum aborigineum intra fines Unionis Europaeae esse.

(Reijo Pitkäranta)

Status Maris Baltici melior

13.02.2009, klo 15.47

Sinus Finnicus in praesenti admodum bene valet, si condicionem oxygenii respicis.

Quod apparuit in expeditione, quam Aranda, navigium Finniae maribus cognoscendis, in Mari Baltico nuperrime fecit.

Insuper repertum est animalia marina mollusca, Ctenophora appellata, quae ibidem vivunt, piscibus non tam periculosa esse quam antea credebatur.

(Reijo Pitkäranta)

Usus remediorum mentis auctus

13.02.2009, klo 15.47

Numerus puerorum et adolescentium medicamentis antidepressivis utentium in Finnia his decem annis triplex factus est.

Huc accedit, quod hominibus illius aetatis etiam alia remedia antipsychotica praescribuntur.

Quod ad feminas iuniores attinet, decima quaeque aliquam medicinam contra depressionem mentis sumere solebat.

(Reijo Pitkäranta)

Novum regimen Islandiae

06.02.2009, klo 09.40

In Islandia novum regimen constitutum est, quod ex democratis socialibus et sinistro-prasinis constat. Johanna Sigurdardottir, ministra primaria, celeriter consilia proposuit, quibus patria ex crisi oeconomica salvaretur. Epistula, tribus moderatoribus argentariae Islandiae centralis missa, petivit, ut quam primum fieri posset, munus deponerent. Actiones regiminis, ut ait Sigurdardottir, in novis valoribus socialibus fundabuntur et programma eius oeconomicum ex illo pacto componetur, quod cum Fundo Monetario Internationali (IMF) factum est. Pristinum Islandiae regimen discedere coactum est, cum cives propter oeconomiam Islandiae in ruinas redactam in viis urbis Reykjavik reclamitare non desisterent.

(Tuomo Pekkanen)

Kyrillus XVI patriarcha omnis Russiae

06.02.2009, klo 09.39

Kyrillus (Kirill), sextus decimus patriarcha Moscuae et omnis Russiae Kalendis Februariis inthronizatus est.

caerimoniis sollemnibus in ecclesia Christi Salvatoris Moscuensi factis intererant circiter quattuor milia hospitum, qui Graece conclamabant : « Axios, axios, axios », significantes Kyrillum dignum esse, qui patriarcha fieret. Aderant praesidens Dimitri Medvedev et primus minister Vladimir Putin. « Speramus fore », ait praesidens Medvedev inter caerimonias, «ut hoc eventu novum fundamentum dialogi plenioris inter ecclesiam Russiae orthodoxam et civitatem creetur. » Kyrillus fuit antea metropolita Smolenscae et Kaliningradi. Cum praedecessor eius Alexius II mense Decembri mortuus esset, die

vicesimo septimo mensis Ianuarii creatus est, qui centum sexaginta quinque milionibus orthodoxorum tam in Russia quam extra fines eius praeesset. Constat Kyrillum erga oecumeniam et ecclesiam catholicam praedecessore Alexio moderatiorem esse.
(Tuomo Pekkanen)

Obama copias ex Iraquia in patriam revocabit

06.02.2009, klo 09.38

Praesidens Barack Obama dixit se maiorem partem copiarum ex Iraquia intra unum annum in patriam revocaturum esse.

Inter ambitionem praesidentialem pollicitus erat omnes copias intra sedecim menses revocatum iri.

Laudabat comitia Iraquianorum provincialia, sine violentia facta, quae ostenderent illos ad securitatem ipsorum tutandam iam paratiores esse.

(Tuomo Pekkanen)

Difficultates oeconomicae in Asia gravescunt

06.02.2009, klo 09.38

Crisis oeconomica globalis etiam nationes Asiae in magnas difficultates induxit. In Sinis, Iaponia aliisque terris Asiae oeconomia magnam partem in exportatione mercium nititur.

Postquam USA et Europa in recessionem delatae sunt, petitio et importatio mercium Asiaticarum apud tam Americanos quam Europaeos corrui. Magistratus Sinenses nuntiaverunt viginti miliones operariorum propter quaestus inopiam ex urbibus in rura revertisse. Adhuc uno mense ante numerus opere destitutorum sex miliones esse aestimabatur. Panasonic Iaponiensium rettulit se viginti septem officinis clausis quindecim milia operariorum ante Kalendas Apriles dimissuram esse. Similia societates Iaponicae NEC, Hitachi, Sony nuntiaverunt.

(Tuomo Pekkanen)

Guantanamo mox claudetur

30.01.2009, klo 17.36

Praesidens Barack Obama, ubi primum munus iniit, campum carceralem Guantánamo intra annum claudendum esse decrevit.

Ita promisso satisfecit, quod praesidatum ambiens fautoribus suis dederat.

Is, dum novae legi subscribit, ait Civitates Americae Unitas contra vim et terrorismum fortiter repugnare pergere, sed id non per nefas facere, sed ut bonis moribus Americanis conveniret.

(Reijo Pitkäranta)

Quid Vladimir Putin dixerit

30.01.2009, klo 17.36

Vladimir Putin, princeps minister Russiae, colloquio diurnariis dato ponderabat, qui tandem fieret, ut patria sua apud Europaeos tam infamis esset.

Censebat causam illius rei esse metum, quem nomen Russicum Europaeis inde a vetustissima memoria inieciisset.

Neque deesse, qui illam russophobiam usque conflarent, cum necessitudines inter Russiam et Unionem Europaeam meliores fieri nollent.

(Reijo Pitkäranta)

Caeliscalpium excelsissimum

30.01.2009, klo 14.21

In urbe Constantinopoli, quae hodie Istanbul appellatur, caeliscalpium omnium in Europa excelsissimum aedificatur.

Speratur fore, ut haec turris plus ducenta sexaginta metra alta iam hoc anno exeunte perficiatur.

Quae insula ex sexaginta quattuor contignationibus et centum septuaginta habitationibus luxuriosus constabit.

In summo aedificio erit solarium cum prospectu ad urbem magnificentissimo.

(Reijo Pitkäranta)

Litterae Latinae in Bulgaria

30.01.2009, klo 14.21

Magistratibus Bulgariae placuit, ut textus signorum viarum in terra sua etiam litteris Latinis

exprimerentur.

Renovatio viatoribus peregrinis prodest, qui quotannis magna multitudine Bulgariam veniunt, sed litteras cyrillicas ignorantes magnas difficultates ad loca invenienda habent.

(Reijo Pitkäranta)

Potio coffeae saluti prodest

30.01.2009, klo 14.20

Homines iuniores, si cotidie nonnulla pocilla coffeae ebibunt, in senectute tutiores adversus dementia et morbum Alzheimer erunt quam ii, qui aut paululum coffeae sumunt aut tam ieiuni sunt, ut ne quidam quidem eius gustent.

Quod patet ex investigatione, quam medici Finni in Universitate Kuopioensi una cum collegis ex Instituto Carolino Stockholmiensi fecerunt.

(Reijo Pitkäranta)

De mirabilibus Finniae

30.01.2009, klo 14.20

Locus, qui ad rem viariam domesticam Finniae anno praeterito plurimum referebat, electus est hortus statuarum in paroechia Parikkala situs.

Multa dena milia hominum quotannis eo confluunt, ut ingentem multitudinem figurarum humanarum gratis admirentur, quas de sua pecunia confecit Veijo Rönkkönen, artifex de plebe.

(Reijo Pitkäranta)

Certamina Helsinkiensia

30.01.2009, klo 14.19

In urbe Helsinki certamina Europaea patinationis artificiosae facta sunt.

In serie feminarum nomisma aureum consecuta est Laura Lepistö, artifex patinatrix Finlandensis.

Praestationes enim eius duobus punctis meliores iudicabantur quam Carolinae Kostner, feminae Italianae, quae loco secundo posita est.

Tertium praemum meruit Susanna Pöykiö Finlandensis.

(Reijo Pitkäranta)

Bush civibus valedixit

22.01.2009, klo 18.32

George W. Bush, munus praesidentis relicturus, die Iovis septimanae proximae (15.1.) orationem valedictoriam habuit.

Recolens praesidentatum, qui octo annos duraverat, censebat decretis consiliisque suis, difficilibus quidem et saepe controversis, factum esse, ut novi ictus terroristici in USA septem annis fieri non potuerint.

Successori suo Bush fortunam prosperrimam exoptavit sed monuit impetus terroristarum adhuc Americanis imminere; hostes esse patientes neque de novis ictibus moliendis destitisse.

Bush, qui a multis pessimus praesidens iudicatur, successorem suum "spem et gloriam" totius nationis appellavit.

(Tuomo Pekkanen)

Barack Obama praesidens inauguratus

22.01.2009, klo 18.31

Barack Obama, munus praesidentis initurus, cum proximis Philadelphiae tramen ascendit, quo Washingtoniam invectus est.

Tramen in multis stationibus restitit, ut Obama civibus loqueretur, saepe etiam lentius vehebatur, ut cives familiam praesidentis viderent.

Sollemnia inaugurationis iam die Dominico (18.1.) Washingtoniae incohata sunt.

In magnum concentum sub divo ante memoriale praesidentis Abraham Lincoln institutum celeberrimi cantores et cantrices prodierunt, in his Jon Bon Jovi, Bruce Springsteen, U2, Garth Brooks, Shakira, Beyoncé.

Compluribus centenis milibus hominum, qui ibi congregati erant, Obama, adhuc praesidens designatus, orationem habuit.

Monuit nationem esse in bello, oeconomiam in discrimine, neque facile esse illis periculis occurrere; diutius quam unum mensem aut unum annum, verisimiliter multos annos perseverandum esse,

antequam illae minae averterentur.

Inauguratio die Martis facta est. Washingtoniam, ubi circiter sescenta hominum milia habitant, complures miliones hospitem convenerant.

Praestito iure iurando Obama in colle Capitolio orationem dixit, qua animos civium confirmavit: tempus esse mutationis, celeribus consiliis opus esse, ut fundamentum incrementi oeconomici crearetur; Americanos latius quam ante cum ceteris nationibus cooperaturos atque etiam cum terris musulmanorum novam viam progrediendi petituos esse.

Caerimoniis in colle Capitolio finitis praesidens iuratus cum coniuge et filiabus ad Aedes Albas, agmine autoraedarum comitante vectus est.

Ex propatulo novae domus Obama cum suis pompam sollemnem praetereuntem spectabat.

Diem festum clausurunt saltationes sollemnes, in compluribus locis institutae, in quibus omnibus praesidens cum coniuge se ostendit.

(Tuomo Pekkanen)

Copiae Israelianae Gazam reliquerunt

22.01.2009, klo 18.30

Ignistitium die Dominico (18.1.) in Gaza ab utraque parte separatim indictum est.

Quo facto copiae Israelianae Gazam gradatim relinquere coeperunt.

Ordo Hamas contumaciter iuravit se nova arma paraturum esse, Israeliani autem minitabantur, si Hamas arma in Gazam importavisset, se novum bellum esse suscepturos.

(Tuomo Pekkanen)

Quid Louis Michel dixerit

16.01.2009, klo 14.47

Louis Michel, commissarius Unionis Europaeae ab auxilio humanitario, actiones Israelis in regione Gaza militares vehementer reprehendit.

Ait enim illas operationes legibus internationalibus repugnare et omnes rerum modos excedere.

Idem tamen Palaestinensibus crimini dedit, quod bellatores ordinis Hamas Israelianos continenter ad pugnam laccessivissent rochetis in eos emissis.

(Reijo Pitkäranta)

Akihito XX annos imperavit

16.01.2009, klo 14.47

Anno vergente imperator Iaponiae Akihito, qui mense Decembri exeunte septuaginta quinque annos compleverat, vicesimum potestatis suae anniversarium celebrabat.

Sollemnia tamen sub umbra variarum curarum acta esse dicuntur.

Akihito enim non solum diversi generis morbis ut hypertonia arteriali et haemorrhagia intestinali laborat, sed etiam de successione imperii sollicitus est.

(Reijo Pitkäranta)

Societas Alitalia privata

16.01.2009, klo 14.46

Alitalia, societas aeronautica Italiae, postquam duos et sexaginta annos publica fuit, nuperrime in possessionem privatam transiit.

Idibus Ianuariis (13.1.) aeroplana societatis renovatae primos volatus, unum a Panhormo ad Romam, alterum a Mediolano ad Paulopolim, susceperunt.

Quae cum ita sint, dixeris commeatum aerium civilem Italiae in novam aetatem intravisse.

(Reijo Pitkäranta)

Europa frigoribus alget

16.01.2009, klo 14.46

Post mensem Novembrem Europa frigoribus solito gravioribus horruit, quo factum est, ut complures homines etiam vitam amitterent.

Rerum periti ex Ordine a meteorologia mundi (WMO) censent hiemem tam gelidam ortam esse e statu caeli, quem nuncupatione Hispanica La Nina appellant.

Utique monent res meteorologicas difficiliores esse quam quae uno tantum modo certa fide explicari possint.

(Reijo Pitkäranta)

Duae urbes Europae culturales

16.01.2009, klo 14.45

Urbes principes Europae culturales hoc anno exstiterunt Lentia (vulgo Linz), quae in Austria Superiore sita est, et Vilna, caput Lituaniae.

Inde ab anno bis millesimo septimo (2007) hic honor quotannis binis urbibus attribui solet, quarum una in terris Unionis Europaeae veteribus invenitur, altera autem earum civitatum urbs est, quae nuperrime ad illam societatem accesserunt.

(Reijo Pitkäranta)

Statua Davidis in periculo

16.01.2009, klo 14.45

Investigatores metuunt, ne statua Davidis ab artifice Michelangelo Florentiae facta periclitetur.

Imprimis commeatui publico creberrimo et numero spectantium frequentissimo tribuendum esse, quod illud opus praecipuae artis detrimentum capiat.

Hoc monumentum abhinc quattuor annos reffectum est ad memoriam eius quinquesaecularem recolendam.

(Tom Bergman)

Mäkelä-Nummela athleta optima

16.01.2009, klo 14.44

Optima in Finnia athleta anni bis millesimi octavi (2008) iudicata est Satu Mäkelä-Nummela.

Quae electio nemini inopinata erat, cum omnes meminissent eam Olympiis Pekinensibus nomisma aureum e certamine magides percutiendi cepisse.

(Reijo Pitkäranta)

De praesidente Bush iudicia

09.01.2009, klo 10.02

Regimen praesidentis George W. Bush iam ad finem vergit, nam decem diebus transactis Barack Obama, praesidens Americanorum designatus, iure iurando dato munus inibit.

Politica externa et militaris, quam Bush his octo annis exercuit, famam Americanorum apud alios populos pessime corrupisse censetur.

Cum Bush in initio praesidentatus, post ictus terroristicos undecimo die mensis Septembris anno bis millesimo primo factos, maxima apud cives gratia valuerit, hodie minus quam tertia pars Americanorum politicam eius sustinet.

Immo vero permulti sunt, qui arbitrentur eum potestate abusum esse vel scelera commisisse.

Bellum in Afganistania susceptum non est confectum neque Osama bin Laden deprehensus.

Iraqia autem falsis testimoniis de armis internecivis parandis accusabatur neque bellum fictis causis ibi commissum adhuc ad finem venit, etsi Saddam Hussein ex potestate pulsus et laqueo suspensus est.

Crimini praesidenti imputantur etiam mutatio climatis despecta, iura civilia infracta, dispensatio oeconomica irresponsalis.

Maior pars Americanorum, qui politicae externae peritiores habentur, censet orbem terrarum Civitatibus Americae Unitis periculosiorem factum esse.

Quinta tantum pars eorum putat Americanos in bello contra terrorismum commisso superiores esse.

(Tuomo Pekkanen)

Bellum in Oriente Proximo

07.01.2009, klo 12.33

Die Saturni (27.12.) indutiae inter Israelianos et Palaestinenses ruptae sunt, cum exercitus aerius Israelis ictus missilium in territorium Palaestinense facere coepit.

Testes oculati narraverunt regionem Gazae illis aggressionibus longe lateque vastatam esse.

Iam antea moderatores Israelis ordini Hamas malum minitati erant, nisi bellatores islamistae terram suam rochetis emissis lacessere destitissent.

(Reijo Pitkäranta)

Decretum Nationum Unitarum

07.01.2009, klo 12.32

Consilium securitatis Nationum Unitarum, postquam nuntium de novo bello accepit, Libyibus

auctoribus conventum necessitatis egit.

Paulo post decretum commune comprobatum est, quo ab Israelianis postulabatur, ut ictibus aeriis finem facerent.

Item ordinibus Palaestinensibus imperatum est, ne rochetis coniectis Israelianos in arma instigarent.

(Reijo Pitkäranta)

Tempestates nivales in America

07.01.2009, klo 12.32

Civitates Americae Unitae his diebus saevissimis tempestatibus hibernis affliguntur.

Nives delapsae iam tribus civibus pernicipi fuerunt, sed e procellis nivalibus etiam calamitates viariae secutae sunt, quibus saltem quadraginta homines vitam amiserunt.

In regionibus montanis tantopere ninxit, ut quaedam loca acervis nivium tria metra altorum obruerentur.

(Reijo Pitkäranta)

De scopulis coralliorum

07.01.2009, klo 12.31

Scopuli coralliorum Asiae, qui tsunami abhinc quattuor annos facto pessime deleti erant, mirum quam velociter revixerunt.

Primo quidem periti arbitrabantur eos non nisi post decennium peractum ex calamitate reffectum iri.

Apparet autem vim recreativam naturae exspectato efficacioris fuisse. Altera causa condicionis melioris videtur esse, quod piscatus illegalis in illis aquis deminutus est.

(Reijo Pitkäranta)

Fabrica lampadum antiqua

07.01.2009, klo 12.31

Mutinae, in urbe Italiae septentrionalis, quae hodie Modena appellatur, sedes antiqua lucernis fabricandis reperta est.

Ibi enim vetus rudetum in lucem venit, ubi multa centena lampadum videre erant, quae una cum aliis operum figlinorum fragmentis passim iacebant.

Archaeologis iam persuasum est illam urbem sub imperio Romano locum medium artis ceramicae fuisse.

(Reijo Pitkäranta)

Multa communia evanuerunt

07.01.2009, klo 12.30

Novo anno ineunte compositio communium in Finnia valde mutata est.

Kalendis enim Ianuariis complures parochiae cum finitimis municipiis coniunctae sunt ad maiores sedes communales constituendas.

Qua renovatione facta omnino sexaginta septem veteres parochiae evanuerunt.

(Reijo Pitkäranta)

De emigratione avium

07.01.2009, klo 12.30

Multitudo avium in Finnia hiemantium multo maior est quam fieri consuevit.

Numerus enim eorum generum, quae in partes australes emigrare supersederunt, centum fere esse existimatur, cum antea nonnisi ad septuaginta fuerit.

Aves rapaces eo libentius hiemem in Finnia agunt, quod in nostris agris magna copia murium illis esui est.

(Reijo Pitkäranta)

De programmata climatico

19.12.2008, klo 16.51

Inter moderatores Unionis Europaeae de rationibus convenit, quibus usi contra mutationem climaticam agerent.

In conventu, quem ductu praesidentis Francogalliae Nicholae Sarkozy Bruxellis habuerunt, coniunctissimo animo consenserunt, ut omnes civitates sociae ante annum bismillesimum vicesimum (2020) saltem his legibus obligarentur: emissiones thermocephicae vicenis centesimis (20%) minores essent quam anno millesimo nongentesimo nonagesimo (1990), copia energiae ex fontibus se

renovantibus haustae ad vicens centesimas (20%) augetur, unaquaeque natio energia vicens centesimis (20%) efficacius quam ante uteretur.

(Reijo Pitkäranta)

Finniam esse terram felicem

26.12.2008, klo 22.56

In relatione (Regiones 2020), quam Commissio Unionis Europaeae de periculis Europae imminentibus scripsit, Finnia ut terra felicissima describitur.

Mutatione climatis fit, ut agri Europae meridionalis arescant, sed Finnorum fruges melius quam ante maturescant.

Propter globalizationem inopia quaestus in partibus orientalibus et meridionalibus, etiam in Germania, crescit, sed Finnia illa minus afficitur.

Imprimis educatio Finnorum scholastica et productio a Commissione laudantur.

Etiam quod ad energiam pertinet, Finni inter felicissimos Unionis Europaeae numerantur, nam Finnia, Suetia, Francia, quae magnam partem energiae electrificinis nuclearibus producunt, de combustibilibus fossilibus minus dependent.

Est autem unum ex magnis periculis, quod Finnis imminet, scilicet inveteratio populationis.

Nativitas decrescit, et cum homines diutius vivant quam ante, portio senum crescit.

Sed hoc quoque problemate Europaei meridionales magis quam septentrionales afficiuntur.

Haec igitur magistratus Bruxellenses putant, Finni ipsi fortasse aliam de suis rebus opinionem tenent.

(Tuomo Pekkanen)

Nova de Romanis in Germania testimonia

26.12.2008, klo 22.55

In Germania inventus est campus, in quo Romani contra Germanos olim pugnaverant.

Ille campus insignis est, quod procul a Rheno flumine iacet inter Hannoveram et Castella (Kassel), in montibus silvosis, quae olim Hercynia Silva (hodie Harz) appellabatur.

Res ibi repertae secundo p.Chr. n. saeculo exeunte aut tertio ineunte factae esse videntur.

In lucem venerunt inter alia cuspides iaculorum et sagittarum, secures, partes armorum et vehiculorum, pali vel sudes tentoriorum nec non nummi.

Terminus, post quem proelium ibi factum est, constituitur nummo imperatoris Commodi, qui ab anno centesimo octogesimo usque ad annum centesimum nonagesimum secundum (180-192) imperium tenebat.

Duo quaesitores voluptarii indagatris metallorum usi illum campum iam ante octo annos invenerunt, sed non ante quam anno bis millesimo sexto locum archaeologis palam fecerunt.

Nova reperta archaeologica ostendunt Romanos etiam post cladem in Saltu Teutoburgensi anno p.Chr.n nono acceptam expeditiones in Germaniam fecisse.

Itaque testimonia quaedam litteraria, quae antea falsa habebantur, novo modo accipienda sunt.

Ad haec pertinet relatio imperatoris Maximini Thracis (235-238), qui in Germaniam Transrhenanam ingressus gloriabatur, nisi Germani a campis ad paludes et silvas confugissent, se omnem Germaniam in Romanam ditionem redacturum fuisse.

(Tuomo Pekkanen)

XII ALF Conventus

26.12.2008, klo 22.48

Anno proximo a pugna Teutoburgensi, cuius mentionem fecimus, duo milia annorum acta erunt.

Ad annum bis millesimum celebrandum Academia Latinitati Fovendae et Institutum Philologiae Classicae Ratisbonense conventum internationalem Ratisbonam (Regensburg) convocaverunt, qui a die quinto decimo usque ad diem undevicesimum mensis Septembris (15-19.9.2009) habebitur.

(Tuomo Pekkanen)

De programmata climatico

19.12.2008, klo 16.51

Inter moderatores Unionis Europaeae de rationibus convenit, quibus usi contra mutationem climaticam agerent.

In conventu, quem ductu praesidentis Francogalliae Nicholae Sarkozy Bruxellis habuerunt, coniunctissimo animo consenserunt, ut omnes civitates sociae ante annum bismillesimum vicesimum (2020) saltem his legibus obligarentur: emissiones thermoepicae vicens centesimis (20%) minores

essent quam anno millesimo nongentesimo nonagesimo (1990), copia energiae ex fontibus se renovantibus haustae ad vicens centesimas (20%) augetur, unaquaeque natio energia vicenis centesimis (20%) efficacius quam ante uteretur.
(Reijo Pitkäranta)

Tumultus in Graecia orti

19.12.2008, klo 16.50

Tota Graecia iam per duas fere septimanas tumultibus violentis vexatur.
Reclamationes postridie Nonas Decembres (6.12.) initium ceperunt, cum puer quindecim annorum inter quandam perturbationem Athenis ortam a custodibus publicis occisus esset.
Ex hoc tempore vix ullus dies praeteriit, quin iuvenes Graeci pyrobolis in argentarias, cauponas, aedes ministeriales coniectis in magistratus saevirent.
(Reijo Pitkäranta)

Quid Serdjukov dixerit

19.12.2008, klo 16.49

Barack Obama, praesidens Civitatum Americae Unitarum designatus, suasit, ut numerus armorum nuclearium vehementer diminueretur.
Russi tamen, cum Americanos in arte bellica ipsis multo antecedere scirent, sibi ad formidinem nuclearem refugiendum esse censuerunt.
Quam ob rem recusaverunt, quominus illud propositum approbarent.
Haec omnia diurnarios edocuit Anatoli Serdjukov, minister defensionis Russiae.
(Reijo Pitkäranta)

Rhodi novus colossus fiet

19.12.2008, klo 16.48

In insula Rhodo consilium ad novum colossum aedificandum adumbratum est.
Haec moles, ut in actis diurnis Britannicis nomine The Guardian refertur, auxilio rei nummariae internationalis construetur et ducentis milionibus euronum constabit.
Pristinus colossus, qui in portu Rhodi olim stabat, ex aere factus et Apollini dedicatus erat.
Altitudinem eius triginta trium metrorum fuisse constat.
(Tom Bergman)

Arbor natalicia Vaticana

19.12.2008, klo 16.48

Idibus Decembribus (13.12.) in Area Petriana Civitatis Vaticanae abies natalicia triginta tria metra alta collocata est.
Haec arbor ex silvis Austriae advecta centum viginti annos habere dicitur.
Post sollemnia natalicia in partes minutas secabitur, quo facto ex hac materia ludibria infantibus et scamna discipulis scholarum conficientur.
(Reijo Pitkäranta)

De muneribus nataliciis

19.12.2008, klo 16.47

Festum natale iam in ipso limine stat. Hoc quoque anno homines, quamvis discrimine oeconomico oppressi, complura munera natalicia et sibi exoptant et aliis dant.
In gratissimis donis Finno-videtur esse varium instrumentum electronicum, ut telephorum, apparatus navigatorius, machina photographica digitalis.
Belgae autem socolata dentibus innoxia delectantur, cum Russis omnes res ad similitudinem vaccae confectae cordi sint.

Conventus de securitate dimissus

12.12.2008, klo 09.23

Conventus Ordinis a securitate et cooperatione Europaea, in urbem Helsinki convocatus, Nonis Decembribus finitus est.
Finni declarationem communem componere conati sunt, sed concordia de verbis declarationis inter delegatos inveniri non potuit. Nihilo minus Alexander Stubb, minister a rebus exteris Finno- affirmabat conventum optime laboravisse.

(Tuomo Pekkanen)

Cubam ad consultationes paratam esse

12.12.2008, klo 09.22

Fidel Castro, pristinus Cubanorum praesidens, nuntiavit Cubam ad consilia cum praesidente designato Barack Obama communicanda paratam esse; consultationes quovis loco ille vellet, fieri posse.

Etiam Raul Castro, praesidens hodiernus, saepius dixit Cubanos cum Americanis consulere velle, ut conflictus plus quadraginta annorum finiretur.

(Tuomo Pekkanen)

Expediitio contra piratas suscepta

12.12.2008, klo 09.22

Unio Europaea septimana ineunte primam in historia sua expeditionem navalem suscepit, cum sex naves militares et tria aeroplana ad regionem maritimam Somaliae custodiendam misit.

naves venerunt imprimis ex Britannia, Gallia, Germania, Graecia, Nederlandia, Hispania, Suetia.

Operationi praeest admiralis Britannus Philippus Jones. Finni officarios et expertos ad praetorium expeditionis miserunt. Piratae hoc anno paene ducentas naves occupaverunt et nautas earum obsides tenuerunt neque praedam proprietariis nisi magno lytro soluto reddiderunt. Maxima ex navibus captis est Sirius Star, petrolearia Arabiae Saudiana, pro qua piratae lytron viginti quinque milium dollarorum flagitaverunt.

(Tuomo Pekkanen)

Cholera in Zimbabwe vagatur

12.12.2008, klo 09.20

Magistratus Zimbabweenses dixerunt iam circiter sescentos homines in patria sua cholera mortuos esse. Ordines autem auxiliarii censent numerum iam nunc multo maiorem esse. UNICEF aestimat sexaginta milia hominum proximis septimanis in Zimbabwe cholera affectum iri et mortuorum numerum tum circiter duo milia septingentos fore.

(Tuomo Pekkanen)

Sofi Oksanen praemium « Finlandia » accepit

[: Nuntii Latini](#)

12.12.2008, klo 09.20

Hornotinum praemium litterarium, cui nomen « Finlandia », pro libro « Puhdistus » (Latine « Purgatio ») titulato, Sofi Oksanen, femina unum et triginta annos nata, accepit.

In illo opere Oksanen historiam Estoniae recentiore tractat atque praesertim contumeliam violentiamque describit, quam feminae inter occupationem Sovieticam in Estonia patiebantur.

Argumentum est verum, nam originem in familia ipsius auctricis habet: Mater et filia militem saucium Estoniensem prope domum inveniunt eumque abscondunt. Cum a vicinis proditae essent, filia ad inquisitiones deportata est, unde reversa numquam postea locuta est.

(Tuomo Pekkanen)

Ahtisaari celebrabatur

12.12.2008, klo 09.19

Martti Ahtisaari, pristinus praesidens Finniae, die Mercurii praemium pacis Nobelianum in caerimonia Osloae sollemniter instituta accepit.

Oratione, quam deinde habuit, Ahtisaari affirmabat omnes controversias cooperatione internationali componi posse. Sequenti die in honorem nobelistae concentus sollemnis Osloae factus est, die Veneris rex et regina Suetiae illum Stockholmiae receperunt.

(Tuomo Pekkanen)

Conventus Helsinkiensis

05.12.2008, klo 16.48

In urbe Helsinki his diebus conventus Ordinis a securitate et cooperatione Europaea celebratur, cui ministri ex quinquaginta sex civitatibus oriundi intersunt.

Participantes imprimis deliberant, quid de rerum in Georgia condicione post bellum ibidem gestum publice sentiant.

Rogatu Russorum hoc quoque agunt, ut consultationes de securitate Europaea constituenda in amplissima forma ineantur.

(Reijo Pitkäranta)

Rerum in Thailandia status

05.12.2008, klo 16.48

Tribunal a lege fundamentali Thailandiae sanxit, ut consilium civitati administrandae dimitteretur. Iudicabat enim ministrum principem Somchai Wongsawat fraudem comitalem fecisse, quam ob rem factioni eius et aliis partibus administratoriis finem imponi iussit.

Socii motus popularis, qui ministris hodiernis adversantur, reclamationibus inter totum autumnum institutis novas electiones postulaverunt.

(Reijo Pitkäranta)

Hillary Clinton ministra facta

05.12.2008, klo 16.47

Barack Obama, praesidens Americanorum mense Novembri designatus, senatricem Hillary Clinton ministram rebus exteris administrandis creavit.

Id signum concordiae inter eos restitutae putaveris, si respicias, quanta saevitia et ambitione de principatu per longum tempus nuper certaverint.

(Reijo Pitkäranta)

Quid George Bush dixerit

05.12.2008, klo 16.47

George Bush, praesidens Civitatum Americae Unitarum iam paene emeritus, cum interrogaretur, qualem memoriam sui posteris traditurus esset, respondit se velle, ut homines futuri se pro liberatore Afganistaniae et Iraquiae haberent.

"Utinam" inquit, "imaginem talis praesidentis posteritati relinquam, qui semper paci promovendae operam dederit neque umquam animam suam rationibus politicis vendiderit."

(Reijo Pitkäranta)

Lacus Baikalus protegitur

05.12.2008, klo 16.46

Lacus Baikalus, qui in Sibiria orientali iacet et omnium orbis terrarum lacuum profundissimus est, a Russis iam protegitur.

Fabrica cellulosae conficiendae iuxta eum aedificata hoc anno ineunte clausa est, et in praesenti magistratus maxime nituntur, ut rara animalium genera ibidem reviviscant.

(Reijo Pitkäranta)

Energia Civitatis Vaticanae

05.12.2008, klo 16.46

Civitas Vaticana energia oecologica uti coepit, cum una ex aedibus eius principalibus laminis solaribus instructa est.

Sub hoc tecto ea conclavia sunt, quibus Pontifex Maximus peregrinatores et alios hospites recipere solet.

Principes eiusdem civitatis sperant fore, ut ante annum bismillesimum vicesimum (2020) quinta fere pars energiae ad usum Vaticanae necessariae ex fontibus se renovantibus hauriatur.

(Reijo Pitkäranta)

Ecclesia cathedralis Borgoensis

05.12.2008, klo 16.46

Pridie Kalendas Decembres (30.11.) sive primo die Dominico Adventus Domini ecclesia cathedralis Borgoensis denuo ad usus divinos consecrata est.

Illa basilica mediaevalis diligenter reficienda erat, postquam anno bis millesimo sexto (2006) magna detrimenta cepit ex incendio, quod adolescentulus quidam dolo malo conflaverat.

(Reijo Pitkäranta)

IMF:Pessima imminet

28.11.2008, klo 13.44

Olivier Blanchard, qui est oeconomista principalis Fundi Monetarii Internationalis (IMF), praemonuit discrimen mundi oeconomicum etiam peius futurum esse neque condiciones ante annum bis millesimum decimum (2010) in melius mutatum iri.

Postea adhuc unum annum necessarium fore, antequam incrementum oeconomicum restitueretur.

Fieri non posse, ut IMF omnia problemata solveret, ex quibus praecipuum esset liquiditas.

Inter proximas duas hebdomadas Fundum iam ducenta quinquaginta miliarda dollarorum sive ducenta miliarda euronum ad crisim mitigandam adhibuisse, quae pecunia quintam fere partem ex omnibus eius opibus faceret.

(Tuomo Pekkanen)

Duma praesidentatum Russiae produxit

28.11.2008, klo 13.43

Duma sive camera inferior parlamenti Russiae decrevit, ut praesidentatus, qui ex lege fundamentali est quadriennis, in sex annos produceretur.

Rogatio, quam praesidens Demetrius Medvedev de lege mutanda tulerat, etiam consilio foederali camerae superioris placuit.

Mutatione approbata etiam munus delegatorum parlamentariorum ex quattuor in quinque annos continuabitur.

(Tuomo Pekkanen)

Suetia tractatum Olisiponensem approbavit

28.11.2008, klo 13.42

Tractatus Olisiponensis de Unione Europea renovanda in Parlamento Suetiae approbatus est.

Hucusque viginti quinque nationes, inter illas Finni, ex viginti septem membris Unionis in suis parlamenti tractatum acceperunt.

In dubio de tractatu Olisiponensi restat Tzekia.

Irlandia autem illum suffragio populari reiecit.

(Tuomo Pekkanen)

Ecclesia furto ablata

28.11.2008, klo 13.42

In vico Komarovo mediae Russiae res inaudita incidit: ecclesia orthodoxa bis saecularis furto ablata est.

Loco suo adhuc mense Iulio steterat sed ineunte Octobri mense fures singulis latericiis ablatis totam ecclesiam paulatim subduxerant.

Furtum occulte fieri poterat, cum locus ecclesiae esset avius neque officia divina constanter ibi fierent.

(Tuomo Pekkanen)

Rushdie et Saviano convenerunt

28.11.2008, klo 13.41

Scriptores Salman Rushdie et Robertus Saviano, uterque propter scripta sua capitis damnatus, ab Academia Suecana Stockholmiensis in colloquium invitati erant, cuius argumentum erat "Verbum liberum et violentia illegalis".

Saviano, origine Neapolitanus, a custodibus circumdatus vivit, postquam ante duos annos opus eius "Gomorra" editum est.

Nam Camorra, societas nefaria Neapolitana, quae in hoc opere singillatim describitur, minitata est se illum occisuram esse.

Rushdie autem opere "Versus Satanici" iram extremistarum islamicorum in se adeo incitavit, ut iam anno millesimo nongentesimo undenonagesimo ab eis ad extremum supplicium damnaretur.

Oratione in colloquio Stockholmiensi habita Saviano monuit de vi litterarum, quanti esset, cum malo obsisteretur.

Uterque scriptor censebat libertatem scribendi hodie non nimis bonam esse: diurnarios in Mexico alibique occisos, magnos auctores ex mundo Arabico in exsilium ire coactos esse, censuram litterarum in Sinis exerceri.

(Tuomo Pekkanen)

Piratae naves occupaverunt

21.11.2008, klo 10.59

Praedones maritimi in Sinu Adenensi grassantes in dies impudentius se gerunt.
Eo enim audaciae venerunt, ut non solum navigia oneraria minora in aquis Cornus Africae currentia occuparent, sed etiam amplissimam navem petroleariam Arabiae Saudianae propriam caperent captamque in oram Somaliae abducerent.
(Reijo Pitkäranta)

De incendiis Californianis

21.11.2008, klo 10.58

California, regio Americae Septentrionalis occidentalis, tantis incendiis silvestribus vexata est, ut multa dena milia hominum suis bonis relictis vim flammaram effugere cogentur.
In territorio Angelopolitano paene mille domus et amplius octoginta chiliometra quadrata locorum terrestrium igne consumpta sunt.
Neque abest suspicio, quin incendia aliqua ex parte dolo malo conflata sint.
(Reijo Pitkäranta)

Quid Barack Obama dixerit

21.11.2008, klo 10.58

Barack Obama, praesidens Civitatum Americae Unitarum nuper designatus, pollicetur se castra carceralia Guantánamo clausurum esse.
Constat in hac statione militari in Cuba posita plus ducentos homines terrorismi accusatos adhuc captos teneri.
Complures eorum iam sex annos indicta causa in custodia habentur.
(Reijo Pitkäranta)

Cuniculus Europaeo-Asiaticus

21.11.2008, klo 10.57

Cuniculus subaquaneus, quo Europa cum Asia coniungeretur, iam perfectus est.
Fabris enim in hoc labore occupatis contigit, ut ultimam ferriviae submarinae partem in Bosporo Thracio feliciter submergerent.
Recep Erdogan, princeps minister Turciae, de re bene gesta gavisus ait nihil iam impedire, quin aliquot annis peractis incolae urbis Londinii Pekinum ferrivia usi veherentur.
(Reijo Pitkäranta)

Musica iucunda cordi saluti

21.11.2008, klo 10.57

Musica iucunda etiam cordi hominis saluti est, ut investigatores Baltimoreenses animadverterunt.
"Si quis", inquit, "musicam praeoptatam audit, vasa eius sanguinea dilatantur, ut in ridendo fieri solet aut tum, cum aliquod remedium cardiovasculare sumitur. Nihil interest, de cuius generis musica agatur, dummodo placeat."
(Reijo Pitkäranta)

Textus vetustissimus hebraicus

21.11.2008, klo 10.56

In regione Hierosolymorum occidentali fragmentum testaceum cum inscriptione hebraica omnium vetustissima inventum est.
Illud frustulum pars est vasis, quod abhinc circiter tria milia annorum confectum esse existimatur.
Textus monumenti e quinque lineis atro colore conscriptis constat.
Quid autem singula verba hic reperta sibi velint, rerum periti adhuc ignorant.
(Reijo Pitkäranta)

De somno hiberno ursorum

21.11.2008, klo 10.55

Ursi in Finnia iam in nidos suos se receperunt, ut ad somnum hibernum ducendum procumberent.
Hoc quidem nonnisi ad regiones terrae nostrae septentrionales valet.
Ex tempestatibus enim umidis et calidis sequi videtur, ut ursi, qui in silvis Finniae meridianis versantur, solito serius ad cubilia sua hiberna proficiscantur.
(Reijo Pitkäranta)

Recessio in USA gravescit

14.11.2008, klo 13.38

Exeunte mense Octobri recessio oeconomica in USA gravescere pergebat.

Uno anno, ut Institutum ECRI (id est Economic Cycle Research Institute) collegerat, index incrementi oeconomici viginti quinque centesimis descendit, quod plus est quam umquam his sexaginta annis.

Consumptio privata lentescit, industria recedit, servitia fiunt languidiora, numerus opere destitutorum augescit.

Quia petitio mercium et servitorum decrescit, societates mercatoriae vim operatoriam deminuunt.

Catena mercatoriae Americanae rettulerunt venditiones denis vel vicens centesimis (10-20%) cecidisse.

Emptoribus rarescentibus mercatus autoraedarum maxime laborat et pretia habitationum descendere pergunt.

Neque crisis pecuniaria mitescere et relaxari videtur.

(Tuomo Pekkanen)

Nox crystallorum commemorabatur

14.11.2008, klo 13.38

Die Dominico (9.11.) fuit anniversarium septuagesimum noctis crystallorum, quae nomen ex fenestris mercatorum Iudaeorum contractis habet.

Illa nocte nazistae eorumque fautores et asseclae Iudaeos in Germania habitantes aggressi plus septem milia tabernarum aut domorum, ducentas sexaginta septem synagogas, complura sepulcreta Iudaeorum deleverunt.

Plus triginta milia Iudaeorum tum deprehensi postea in campos concentrationis deportati sunt.

Complures deni trucidabantur. Nox crystallorum, ex quo pogrom sive insectatio Iudaeorum initium habuit, in synagoga Berolinensi commemorabatur praesente cancellaria foederali Angela Merkel, quae monuit, ut antisemitismus et discriminatio ethnica vigilanter comprimerentur.

(Tuomo Pekkanen)

Serbia generalem Mladic persequitur

14.11.2008, klo 13.37

Serbia nuntiavit inquisitiones quam latissime susceptas esse, ut generalis Ratko Mladic comprehenderetur.

Mladic reus principalis habetur scelerum, quae Serbi inter bellum Bosniense Croatis et musulmanis fecerunt.

Accusatur inter alia de genocidio, de criminibus contra humanitatem, de strage in urbe Srebrenica commissa.

Hucusque illi domum identidem mutando contigit, ut vigiles falleret et carcerem evitaret.

Tribunal autem Haagense Nationum Unitarum iam ante tres annos flagitavit, ut Mladic ad iudices portaretur.

Cooperatio cum illo tribunali condicio est sine qua Serbia membrum Unionis Europaeae fieri non potest.

(Tuomo Pekkanen)

Nova pyramis reperta

14.11.2008, klo 13.36

Archaeologi Aegyptii die Martis (11.11.) rettulerunt novam pyramidem pulvere sepultam ante duos menses in necropoli Sakkarae prope Memphim repertam esse.

Est pyramis Aegypti centesima duodevicesima, altitudine quinque metrorum, sed olim decem metris altior fuisse creditur.

Veri simile est pyramidem esse reginae Sesheshet. Illa mater erat pharaonis Teti, qui ab anno bis millesimo trecentesimo vicesimo tertio (2323) a.Chr.n. regnavit et sextam in Aegypto dynastiam condidit.

Archaeologi nondum in ipsum sepulcrum penetraverunt, sed thesauri ibi vix invenientur, quia exstant vestigia, quae ostendunt fures iam temporibus antiquis sibi aditum in illud fodisse.

(Tuomo Pekkanen)

Comitia Americanorum praesidentialia

07.11.2008, klo 14.23

Die Martis (4.11.) Americani novum sibi praesidentem in quadriennium designaverunt. De munere hominis in orbe terrarum potentissimi duo candidati inter se differentes certaverunt, Barack Obama, democrata quadraginta septem annorum, et John McCain, republicanus annos natus septuaginta duos. Illius domicilium est Chicago, huius Arizona. Ut demoscopiae ante comitia indicaverant, victoriam haud dubiam reportavit Obama, qui primus in USA erit praesidens nigricolor. Vicepraesidens fiet Iosephus Biden, senator Delavariae. Etiam in parlamento democratae maiorem delegatorum partem habebunt. Democratas ad victoriam adiuverunt crisis oeconomica et bella republicanis gubernantibus male gesta. (Tuomo Pekkanen)

Qualis sit novus præsident

07.11.2008, klo 14.22

Barack Obama in Insulis Havaianis ex patre Keniano et matre Americana natus est. Pater discessit, cum filius duos annos natus esset. Mater mox novum maritum invenit et cum filio ad illum in Indonesiam migravit. Cum ne id quidem matrimonium longum fuisset, mater et filius in Havaianas Insulas reverterunt. Ibi Barack a matre et avis educatus est. Studia exercuit primum Angelopoli, deinde Neo-Eboraci, tum in Universitate Harvardiana, unde iurista evasit. Primum munus Chicagiae habebat, ibique, cum in grapheo iuridico laboraret, Michaëlam (Michelle) Robinson convenit, quam postea uxorem duxit. In politica valere coepit, cum in senatum civitatis Illinois creatus esset. Ibi operam dedit, ut cura valetudinis et condiciones oeconomicae pauperum meliorarentur. Praeter politicam, etiam institutionem academicam exercuit, cum duodecim annos de iuribus civilibus et de lege fundamentali Americanorum in facultate iuridica Universitatis Chicagiensis lectiones habuit. In politica civitatum foederatarum factus est clarissimus, cum anno bis millesimo quarto (2004) in conventu democratarum Bostoniensi orationem habuisset, qua fiduciam civium confirmabat: 'Non exstat America liberalis', inquit, 'non America conservativa, sunt tantum Civitates Americae Unitae. Non exstat America albicolor, non America nigricolor, non America Latinorum, non Asiaticorum, sunt tantum Civitates Americae Unitae.' Paucis mensibus post hanc memorabilem orationem Barack Obama senator Illinoisiensium in Congressum creatus Washingtoniam migravit, et vix ibi sedem collocaverat, cum iam nuntiavit se in praesidentatum Americanorum tendere. (Tuomo Pekkanen)

Hereditas, quam a praesidente Bush habebit

07.11.2008, klo 13.52

Barack Obama, qui die vicesimo mensis Ianuarii munus praesidentiale suscipiet, difficillimam a praedecessore hereditatem habebit. In Iraquia et Afganistania bella geruntur, crisis ex mutuis non solutis orta oeconomiam non tantum Americanorum sed totius orbis perturbavit, inopiam quaestus auxit et praesertim homines pauperiores in angustias adduxit. (Tuomo Pekkanen)

Duces Russorum et Americanorum in Finnia

24.10.2008, klo 14.06

Summi duces militares Russorum et Americanorum die Martis (21.10.) in Finnia convenerunt. Michael Mullen, admiralis Americanus, et Nikolai Makarov, generalis Russus, in palatio Königstedt prope Helsinkium una prandium officiale sumpserunt et inter alia de crisi Georgiae collocuti sunt. Ut colloquium in Finnia fieret, Russi proposuerant. (Tuomo Pekkanen)

Russiam nulla territoria postulare

24.10.2008, klo 14.05

Sergei Ivanov, vicarius minister primarius Russorum, cum a societate BBC interrogaretur, affirmavit patriam suam nulla territoria a pristinis rebus publicis sovieticis postulare. Russos fines omnium terrarum agnovisse neque illis consilia esse, ut nova bella susciperent. Monuit Russiam, aliter ac Americani et Britannii, nullum hoc tempore bellum gerere. (Tuomo Pekkanen)

Inopia quaestus augetur

24.10.2008, klo 14.04

Juan Somavia, moderator Ordinis internationalis a laboribus (ILO), censet crisi oeconomica internationali effici, ut numerus opere carentium in mundo viginti fere milionibus augeatur. Anno proximo exeunte numerum opere destitutorum ducentos decem miliones aut etiam maiorem fore, nisi status oeconomiae hodiernus quam primum in melius vertatur.
(Tuomo Pekkanen)

Consumptio privata coercetur

24.10.2008, klo 14.04

Neque tantum centra mundi argentaria sed etiam singuli homines crisi oeconomica tanguntur. Quod ad Finnos attinet, quartus quisque ex eis se abstinere, ne novam domum, autoraedam, apparatus electronicos vel instrumenta domestica hoc tempore emat. Pauperiores etiam res fundamentales, ut cibum et vestimenta, parcius emunt quam ante.
(Tuomo Pekkanen)

Sepulcrum Gladiatoris repertum

24.10.2008, klo 14.03

Archaeologi Romani nuper in ripa Tiberis fluminis prope viam Flaminiam sepulcrum antiquum reppererunt, in quo sepultus erat Marcus Nonius Macrinus, amicus et dux exercituum imperatoris Marci Aurelii. Magna pars sepulcri in flumen prolapsa erat, sed restant columnae marmoreae, picturae et inscriptio sepulcralis. Macrinus fuit exemplum Maximo Decimo Meridio, personae fictae, cuius partes Russel Crowe in pellicula cinematographica egit, cui "Gladiator" titulus est. Uterque contra Marcomanos in Germania pugnavit, sed Macrinus servus et gladiator non est factus sed consul suffectus et proconsul Asiae finem vitae felicem habuit.
(Tuomo Pekkanen)

Hora hiemalis incipit

24.10.2008, klo 14.02

Die Dominico multo mane, cum hora aestiva finietur, horologia retrorsum movebuntur. Tum incipiet hora hiemalis, una hora anterior, quae usque ad ultimum Dominicum mensis Martii in usu habebitur. De utilitate huius mutationis variae sunt opiniones. Multi censent in horologiis identidem promovendis et removendis nullam esse rationem. Investigatores Finni nuper ostenderunt transitionem ex hora aestiva in hiemalem et vice versa salutem hominum nocivum esse, cum somnus nocturnus etiam hominum bene valentium in multas post mutationem noctes perturbetur. Finni horam aestivam anno millesimo nongentesimo octogesimo primo assumpservunt.
(Tuomo Pekkanen)

Ahtisaari Nobelista factus

17.10.2008, klo 11.02

Praemio Nobeliano pacis afficitur hoc anno Martti Ahtisaari, pristinus praesidens Finniae unum et septuaginta annos natus. Collegium Nobelianum Norvegicum, dum rationes eligendi explicat, ait eum illo honore dignissimum esse, quoniam munere pacis et concordiae inter civitates conciliandae per triginta annos in compluribus continentibus functus esset. Unam e rebus ab Ahtisaari bene gestis esse, quod principes Indonesiae cum rebellibus provinciae Aceh anno bis millesimo quinto (2005) foedus pacis icissent.
(Reijo Pitkäranta)

Nobelistae quondam nostrates

17.10.2008, klo 11.02

Ante hunc annum in Finnia tantum tres Nobelistae fuerunt. Anno millesimo nongentesimo undequadragesimo (1939), cum in Europa bellum oreretur, scriptor

Frans Emil Sillanpää praemium litteraturae accepit.
Pace restituta anno quadragesimo quinto (1945) Artturi Iivari Virtanen praemio chemiae ornatus est.
Tertius Nobelista est Ragnar Granit, qui, quamquam in Suetia vivebat, tamen in Finnia natus erat.
Anno millesimo nongentesimo sexagesimo septimo (1967) ei praemium Nobelianum medicinae datum est.
(Reijo Pitkäranta)

Nova missilia a Russis probata

17.10.2008, klo 11.01

Septimana vergente Russi arma sua intercontinentalia probaverunt.
Ipse praesidens Dmitri Medvedev praesens aderat, cum missile nomine Topol, cuius iactus decem milium chiliometrorum est, e Russia Septentrionali sublime evolavit.
Duo reliqua missilia eiusdem generis e navibus submarinis ad caelum eiecta sunt; quarum una in Mari Barentsico versabatur, altera autem in Oceano Iaponiae circumfuso navigabat.
(Reijo Pitkäranta)

Electrificina nuclearis Coreana

17.10.2008, klo 11.00

Moderatores Coreae Septentrionalis decreto statuturi sunt, ut electrificina sua nuclearis destituatur et observatoribus internationalibus liber aditus in eam detur.
Quod se facturos esse polliciti sunt, postquam audiverunt civitatem suam, si illas condiciones accepissent, ab indice nationum terrorismo faventium ablatum iri.
(Reijo Pitkäranta)

Pons in Mari Baltico futurus

17.10.2008, klo 11.00

Ministri Daniae et Germaniae consenserunt, ut inter utramque civitatem pons viginti chiliometra longus aedificaretur.
Hoc opere in freto Fehmarniano futuro Rodby, oppidum Danorum, cum Puttgarden, emporio Germanico in insula Maris Baltici sito, coniungetur.
Pons, qui latissima via autocinetica et geminis ferriviis munitus erit, ab anno bis millesimo duodecimo usque ad annum bis millesimum duodevicesimum (2012-2018) exstruetur.
(Reijo Pitkäranta)

Tempestatas mensis Septembris

17.10.2008, klo 10.59

Mensis September in Finnia solito siccior fuit, nam copia pluviarum plerisque locis dimidio minor remansit quam fieri solet.
Huc accedit, quod tempestatem eodem tempore uno fere gradu Celsiano frigidiores habuimus.
Dies calidissimus eiusdem mensis urbi Esboae obtigit, ubi thermometer usque ad undevicesimum gradum ascendit.
(Reijo Pitkäranta)

De discrimine Georgico

10.10.2008, klo 18.49

Die Mercurii (8.10.) copiae Russorum a regione Georgiae adiacente reduci coeptae sunt.
Tum accidit, ut machinae tractoriae castra Russorum demolirentur observatoribus internationalibus astantibus.
Milites Russi ex omnibus sex stationibus, quae proxime Georgiam collocatae erant, domum redire parabant.
Praesidens Russiae Dmitri Medvedev oratione in Francogallia habita moderatores Americanos reprehendit, sed Unionem Europaeam laudavit, quod in controversia Georgica tractanda se bona sodalitate praebuisset.
(Reijo Pitkäranta)

Conventus Luxemburgensis

10.10.2008, klo 18.49

Ministri aerarii publici Unionis Europaeae polliciti sunt se prohibituos esse, quominus ea instituta

pecuniaria, quae rei nummariae Europae maximi momenti essent, omnino decoquerent. Congregati erant in Luxemburgum ad conventum necessitatis agendum, ut rationes quam optimas invenirent, quarum ope universum discrimen oeconomicum solvi posset. Etiam Argentaria centralis Europaea rei succurrit promittens tamdiu mercatui pecuniam suppeditatum iri, quamdiu opus esset.
(Reijo Pitkäranta)

Tumultus in Afganistania

10.10.2008, klo 18.48

In Afganistania meridiana saltem quadraginta tres Talibani rebelles interfecti sunt proelio vehementissimo cum copiis administratorum commisso. Dicuntur impetum in milites securitatis Afganistaniae et cohortes Americanorum ex insidiis dedisse, quo facto defensores exercitu aërio auxilio arcesso hostibus aggredientibus obviam ierunt. Hoc anno iam quattuor milia septingenti homines tumultibus in Afganistania factis vitam amisisse existimantur.
(Reijo Pitkäranta)

IRA tandem dissolutus est

10.10.2008, klo 18.48

Exercitus Irlandiae liberandae, vulgo IRA appellatus, in praesenti dimissus et dissolutus fere est neque iam paci in Irlanda Septentrionali factae imminet. Hoc apparet ex relatione, quam collegium observatorum neutrius partis nuper divulgavit. Constat circiter mille octingentos homines occisos esse ictibus terroristis, quos milites illius ordinis saeculo praeterito exeunte commiserunt.
(Reijo Pitkäranta)

Praemium Nobelianum litteraturae

10.10.2008, klo 18.47

Praemium Nobelianum litteraturae, quod amplius unius milionis euronum est, accipit hoc anno Jean-Marie Le Clézio, scriptor Francogallus, qui in fabulis Romanensibus componendis et libris ad usum puerorum edendis insignis est. Rem nuntiavit Horace Engdahl, permanens secretarius Academiae Suetiae.
(Reijo Pitkäranta)

Urbs vetus in Brasilia reperta

10.10.2008, klo 18.46

In Brasilia et quidem in finibus fluminis Amazonii metropolis antiqua reperta est, quae urbibus Europaeis aetatis mediae magnitudine par erat. Ex relatione in commentariis periodicis ?Science? divulgata apparet numerum incolarum in illo tractu habitantium eo tempore, cum Europaei abhinc quingentos annos eo advenerunt, quingentorum fere milium fuisse. Postea tamen cultus ille civilis omnino deletus est.
(Tom Bergman)

Dies Lunae ater

03.10.2008, klo 09.43

Die Lunae parlamentum Americanorum legem de mercatu monetario salvando praeter opinionem reiecit. Contra legem suffragati sunt ducenti duodeviginti delegati, pro illa ducenti quinque (228-205). Propositum erat, ut mutua, quae debitores solvere non possent, ex domibus argentariis liquiditate laborantibus in fundum specialem transferrentur. Maior pars delegatorum censebat fundum ingentem, in quo septingenta miliarda dollarorum collocarentur, civibus tributariis nimis carum fore. Ubi primum sententia parlamenti palam facta est, chaos mercatum monetarium Americanorum occupavit et omnes indices actionum bursariorum praecipites descenderunt, unde perturbatio in forum argentarium totius orbis invasit. In USA Dow Jones, index magnarum societatum industrialium, plus septingenta puncta descendit, quod numquam antea factum erat.

In bursa technologica Nasdaq actiones paene decimam partem valoris amiserunt.
Contagione timoris etiam tituli, qui ad mercatum nummarium non pertinent, praecipitaverunt.
Praesidens George W. Bush illam legem civibus et delegatis vehementer commendaverat, sed tantum tertia pars republicanorum illam accepit.
Delegati parlamentarii ad comitia mense Novembri futura spectant, in quibus etiam de electione ipsorum agatur, ideoque, etsi sciunt oeconomiam patriae periclitari, opinionem civium respicere debent.
(Tuomo Pekkanen)

Domus emptores exspectant

03.10.2008, klo 09.41

Decretum parlamenti Americani etiam oeconomistas Finnos inopinatosprehendit.
Fiducia civium in evolutionem oeconomicam, quae iam antea vacillaverat, novum vulnus accepit.
Mutuam pecuniam a domibus argentariis accipere difficilius est quam ante et faenora sunt maiora, quo fit, ut novae domus pauciores emptores habeant.
Hoc tempore ex novis habitationibus in Finnia aedificatis quarta quaeque emptorem non invenit.
In regione Helsinkiensi numerus novarum habitationum non venditarum est minor, circiter sedecim centesimarum (16%).
Conditiones oeconomicae structorum, quamquam peiorantur, novis operibus restrictis apud Finnos adhuc tolerabiles manserunt.
(Tuomo Pekkanen)

Exercitus Russiae renovatur

03.10.2008, klo 09.40

Discrimen internationale mercatus argentarii non impedit, quominus exercitus Russiae renovetur.
Praesidens Demetrius Medvedev, cum stationem navalem paeninsulae Camtchatcae viseret, affirmavit novas naves submarinas Russis esse faciendas et arma modernizanda.
Idem classiariis dixit rem publicam Russiae ad meliores habitationes militibus parandas se obligavisse.
(Tuomo Pekkanen)

Novum lexicon

03.10.2008, klo 09.39

Lexicon Theodisco-Latinum terminorum iuridicorum et politicorum nostrae aetatis nuper Saraviponti auctore Johanne Paulo Bauer divulgatum est (www.verlag-alma-mater.de).
Hoc opus paene sescentarum paginarum omnibus Latine studentibus maximum est adiumentum, nam praeter terminos politicos et iuridicos docet etiam, quo modo permultae res ad studia humaniora pertinentes Latine exprimantur.
(Tuomo Pekkanen)

Strages maxima in Kauhajoki

26.09.2008, klo 11.41

Die Martis (23.9.) ante meridiem in sede scholari oppidi Kauhajoki, quod in Ostrobothnia Finniae Meridiana situm est, strages maxima edita est.
Grex studentium in parte subterranea scholae suae professionalis in examine faciendo occupatus erat, cum vir quidam capite persona tecto in classem ex improvise irruit ibique horribili modo furere coepit.
Lagoena incendiaria in medios discipulos coniecta et compluribus glandibus e pistolio emissis effecit, ut decem homines statim vitam amitterent.
Quo facto scolopetator, postquam se ipsum gravissime vulneravit, moribundus in nosocomium deportatus est, ubi eodem die sub vesperum animam efflavit.
(Reijo Pitkäranta)

Parricida consilia sua divulgavit

26.09.2008, klo 11.41

Caedes illa crudelissima in Kauhajoki facta eo magis animos Finnorum commovet, quod scelus eiusdem generis abhinc decem menses apud nos in Jokela commissum est.
Ambo parricidae consilia sua in antecessum patefecerant, cum aliquot diebus ante facinus admissum in Interreti imagines minaces divulgaverant itaque plane ostenderant, quantopere genus humanum odissent et quid brevi perpetraturi essent.

Neque abest suspicio, quin illi homicidae occisores scholarium Americanorum admirati et modum operandi eorum imitati sint.

(Reijo Pitkäranta)

Luctus in Finnia publicus

26.09.2008, klo 11.40

Die Mercurii (24.9.) hortatu ministerii rerum domesticarum vexilla in tota Finnia mediis palis proposita sunt in memoriam iuvenum in Kauhajoki mortuorum et ad signum luctus publici.

Eodem die princeps minister Matti Vanhanen iter in oppidum Kauhajoki suscepit et, dum discipulos scholae calamitosae convenit, cunctam nationem una cum eis lugere dixit.

(Reijo Pitkäranta)

Scandalum cibarium Sinense

26.09.2008, klo 11.40

Parentes Sinenses magna sollicitudine affecti sunt, cum cognovissent pulverem lacteum, quo ad infantes nutriendos lactis materni vice utuntur, melamino venenoso infectum esse.

Agitur de re gravissima, nam saltem quattuor neonati illa materie chemica perierunt et amplius quinquaginta milia morbo implicita sunt.

Scandalum in peius mutatum est, cum idem venenum etiam in quibusdam alimentis adulatorum inesse apparuisset.

Quae cum ita sint, mirum non est cives Sinenses iram in magistratus suos evomere.

(Reijo Pitkäranta)

De ludis Parolympicis

[: Nuntii Latini](#)

26.09.2008, klo 11.39

Post ludos Olympios Pekini institutos ibidem Parolympia celebrata sunt, in quibus athletae oculis aut membris corporis capti inter se certaverunt.

His sollemnibus Finni optimum successum habuerunt, quippe qui omnino sex nomismata sibi pararent.

Olympionicae facti sunt Leo-Pekka Tähti, victor cursus brevioris sellarum subrotatarum, et Markku Niinimäki, qui ex certamine hastae palmam tulit.

(Reijo Pitkäranta)

Discrimen argentarium gravescit

19.09.2008, klo 10.49

Anno ineunte, cum debitores auctis faenoribus et pretiis habitationum minoratis debita argentariis solvere non potuissent, res nummaria in USA in discrimen vocata est.

Multae et magnae domus argentariae decoxerunt, unde sollicitudo in oeconomiam totius mundi invasit.

Discrimen adhuc gravescit et pretia titulorum in bursis praecipitare pergunt. Maximum his diebus fuit chaos in Bursa Moscuensi.

Sollicitudo hominum crescit, cum nemo adhuc sciat, quando mercatus monetarius aequilibrium inventurus sit.

Dominique Strauss-Kahn, moderator Fundi Monetarii Internationalis (FMI), discrimen hodiernum tempestatem argentariam appellavit, cui par numquam ante fuisset.

(Tuomo Pekkanen)

Ictus terroristici commemorati

19.09.2008, klo 10.49

Die Iovis (11.9.) Barack Obama et John McCain, candidati praesidentiales, una Neo-Eboraci aderant, ut ictus terroristicos ante septem annos factos recolerent.

Uterque dixerat se ambitione praesidentiali ad viginti quattuor horas abstenturum esse.

Illis ictibus, undecimo die mensis Septembris anno bis millesimo primo factis, paene tria milia hominum interierunt.

(Tuomo Pekkanen)

Nullam esse ad bellum frigidum causam ideologicam

19.09.2008, klo 10.48

Vladimir Putin, primus minister Russiae, censet nullas inter Russiam et nationes occidentales esse controversias ideologicas, ex quibus bellum frigidum denuo oriatur ; econtra multa esse problemata, quae tantum unitis viribus solvi possint.

"Nulla habemus", inquit, "proposita imperialistica, de quibus accusamur."

(Tuomo Pekkanen)

Jaruzelski ante iudicium

19.09.2008, klo 10.47

In Polonia iudicium contra generalem Wojciech Jaruzelski, primum moderatorem militare, susceptum est.

Accusatur, quod anno millesimo nongentesimo octogesimo primo statum belli in Polonia indixerat. Propositum eius erat ita impedire, ne motus democraticus, cui Lech Walesa praeerat, altius surgeret. Multa milia hominum capti, complures deni tum occisi sunt.

(Tuomo Pekkanen)

Iaponia senescit

19.09.2008, klo 10.46

In Iaponia plures homines septuagenarii sunt quam umquam ante, nam plus viginti miliones numerantur et paene sedecim centesimas (15,8%) totius populi faciunt.

Qui sexaginta quinque annos superaverunt, sunt triginta miliones sive quinta fere pars omnium.

Eodem tempore natalitas est minima. Iaponia celerius senescit quam aliae terrae industriales.

(Tuomo Pekkanen)

Mika Waltari recolitur

19.09.2008, klo 10.46

Hodie est dies natalis centesimus scriptoris Mika Waltari (19.9.1908 - 29.8.1979), viri in litteris Finniae clarissimi, qui operibus suis historicis famam internationalem meruit.

Notissimus ex libris eius est Sinuhe Aegyptius (1945), in quadraginta linguas versus, ex quo etiam pellicula cinematographica Hollywoodiana eiusdem nominis facta est. In hoc opere Aegyptum pharaonum exactissime describit.

Traxit argumenta etiam de Etruscis, primis Christianis, imperio Byzantino, persecutione maleficarum, rebus musulmanorum et Christianorum.

Fuit ingenio ferocissimus, nam praeter complura romancia scripsit poemata, novellas, fabulas criminales scaenicasque, scaenographias, existimationes librorum, textus serierum pictographicarum.

(Tuomo Pekkanen)

De discrimine Georgico

12.09.2008, klo 14.26

Inter moderatores Russiae et Unionis Europaeae convenit, ut consultationes de discrimine Georgiae solvendo Idibus Octobribus Genavae inciperentur.

Colloquia eo spectabunt, ut rerum in Caucaso condicio paulatim stabiliatur.

Sergei Larov, minister a rebus exteris Russiae, nuntiavit copias Russorum in Abhasia et Ossetia Meridionali 'diutissime' mansuras esse.

Id fieri necesse esse, ne moderatores Georgiae illas regiones denuo obsidere conarentur.

(Reijo Pitkäranta)

Condoleezza et Gaddafi

12.09.2008, klo 14.24

Condoleezza Rice, ministra a rebus exteris Civitatum Americae Unitarum, ducem Libyae Muammar Gaddafi in urbe Tripoli convenit.

Res digna est, quae memoretur, si respicis omnino quinquaginta quinque annos elapsos esse, cum nemo minister Americanus Libyam visitavit.

"Iam speramus fore", inquit Condoleezza, "ut inter utramque civitatem commercia legatorum aperiantur et inimicitiis veteribus tandem finis fiat."

(Reijo Pitkäranta)

Acceleratrum corpusculare

12.09.2008, klo 14.24

Die Mercurii meridie in Helvetia acceleratrum corpusculare omnium maximum feliciter in usum receptum est.

Experimentum in Sede Europaea ab investigatione nucleari (CERN) susceptum initium cepit, cum prima particularum elementarium copia per cuniculum orbicularem viginti septem chiliometra longum tam celeriter circummissa est, ut velocitatem lucis fere consequeretur.

Illud periculum physicum, ut perscrutatores naturae arbitrantur, utile erit ad structuras rerum elementarium explicandas.

(Reijo Pitkäranta)

Inventum archaeologicum

12.09.2008, klo 14.23

In area archaeologica in Turcia meridionali sita fragmenta statuæ marmoreæ imperatoris Romani Marci Aurelii reperta sunt.

Inventis continentur caput unum metrum longum, manus sesquimetrika partesque pedis alterius.

In loco inventionis olim thermae Romanae assurgebant, donec saeculo p.Chr.n. septimo terrae motu partim deletae sunt.

Archaeologi iam duodecim fere annos parietinas illius constructionis investigant.

(Reijo Pitkäranta)

De annona hornotina

12.09.2008, klo 14.23

Copia frumenti hornotini in Finnia multo minor remanebit quam in votis erat.

In causa est, quod tempestas segetibus surgentibus hoc anno parum opportuna fuit.

Sationes enim mense Maio siccitate et frigoribus nocturnis laborabant, cum aestate extrema imbres assidui prohiberent, ne agri satis multam et bonam frugem proferrent.

Sterilitas agrorum imprimis ad frumenta cerealia, ut triticum et secale, pertinet.

(Reijo Pitkäranta)

Novum remedium naturale

12.09.2008, klo 14.22

Curatores rei medicamentariae Finniae decreverunt, ut unguentum e resina abietis pharmacis Finnicis publice adnumeraretur.

Agitur de primo remedio a natura dato, cui hic status medicinalis concessus est.

Constat quidem Finnos, cum bene scirent, quanta esset vis medicatrix naturae, ex temporibus antiquissimis pice abietaria usos esse ad tumores, ambustiones, exanthemata sananda.

(Reijo Pitkäranta)

XX Nuntiorum Latinorum annus incipit

05.09.2008, klo 12.56

A Kalendis Iuniis redactio Nuntiorum Latinorum ferias trium mensium habuit.

Hodie iam vicesimus annus incipit, quo de rebus praesentibus Latine narramus, nam prima transmissio radiophonica Nuntiorum Latinorum Kalendis Septembribus anno millesimo nongentesimo undenonagesimo (1.9.1989) facta est.

Ab eodem anno textus nuntiorum etiam in Televisione textuali Finnorum (p. 365,1-10) divulgantur.

In Interreti Nuntii Latini per tredecim annos et legi et auscultari potuerunt.

Ad Colloquia Latina, quae in eodem situ interretiario fiunt, omnes scripta sua Latina mandare possunt, dummodo nomen suum in registrum dederint.

In his scriptis, quae iam complura dena milia numerantur, argumenta linguistica et culturalia Latine tractantur.

(Tuomo Pekkanen)

Olympia Pekinensia

05.09.2008, klo 12.55

Mense Augusto (8-24.8.) Olympia Pekinensia animos hominum res athleticas amantium ad se adverterunt.

Circiter decem milia sescenti athletae ex omnibus mundi partibus oriundi inter se de nomismatis aureis, argenteis aëneisque certaverunt.

Caerimoniae inaugurationis et conclusionis ludorum tanta pompa in novo stadio Pekinensi celebratae

sunt, ut pares illis numquam fuerint.
(Tuomo Pekkanen)

De bello Georgico

05.09.2008, klo 12.54

Cum Mihail Saakashvili, praesidens Georgiae, rebelles Ossetiae meridionalis armis coercere conaretur, Russi copias in Georgiam miserunt.

Unde ortum est bellum, quod, etsi brevi compositum est, relationes inter Russiam et nationes occidentales in tantum discrimen vocavit, ut etiam de sanctionibus Russis imponendis deliberaretur.

Kalendis Septembribus moderatores Unionis Europaeae in sessionem extraordinariam Bruxellas convenerunt, ut decernerent, quid faciendum esset.

Moderatoribus placuit, ut Unionis in Russiam relationes denuo definirentur atque accuratius et penitus inquireretur, quid in Georgia fieret.

Sanctiones autem nullae propositae sunt.

(Tuomo Pekkanen)

Barack Obama et John McCain candidati

05.09.2008, klo 12.53

Barack Obama democrat et John McCain republicanus officialiter candidati praesidentiales in USA nominati sunt, ex quibus alter in comitiis mense Novembri (4.11.) futuris praesidens Americanorum designabitur.

Obama vicarium sibi nominavit Iosephum Biden, senatorem Delavariae, McCain autem senatricem Sarah Palin, gubernatricem Alascae quadraginta quattuor annos natam.

In conventu nationali democratuum Denverii habito senatrix Hillary Clinton fautoribus suis Obamam commendavit eosque hortata est, ut illi suffragarentur.

Republicanus autem, cum Obama senatricem Clinton vicepraesidentem non designaverit, sperant fore, ut Sarah Palin vota feminarum ad McCain alliciat.

(Tuomo Pekkanen)

Nova imago Iulii Caesaris

05.09.2008, klo 12.52

Imago marmorea Iulii Caesaris, in flumine Rhodano prope urbem Arelate (hodie Arles) iam autumnus anni bis millesimi septimi reperta, mense Maio huius anni publice praesentata est.

Illa sola imago ex multis hodie notis vivo Caesare sculpta est.

Sunt autem nummi illo vivente signati, ex quibus lineamenta oris et aliae illius statuae agnoscuntur.

(Tuomo Pekkanen)

Rerum in Iraquia condicio

30.05.2008, klo 10.10

Ilkka Uusitalo, legatus Finniae in Iraquia constitutus, ait se spe admodum plenum esse res Iraquianas iam in melius mutatas esse.

"Experientia", inquit, "duorum annorum doctus dicere ausim regimen ministri principis Nuri al-Malik paulatim stabilius factum esse rebellionibus shiitarum Bagdati et Basrae oppressis. Comititia autem regionalia mense Octobri futura clarius monstrabunt, quam bene fundata res publica Iraquiana sit."

(Reijo Pitkäranta)

Phoenix in Martem appulit

30.05.2008, klo 10.09

Percontatrum spatiale Americanum Phoenix appellatum, postquam iter decem fere mensium confecit, in planetam Martem feliciter appulit et suis tribus pedibus nixum in solo eius constitit.

Primum quidem ope accumulatorum fungebatur, sed deinde laminis solaribus fonte energiae uti coepit. Officium speculatri est per tres menses investigare, utrum in illa planeta rubra signa vitae reperiantur necne.

(Reijo Pitkäranta)

Mengistu capitis damnatus

30.05.2008, klo 10.08

Mengistu Haile Mariam, pristinus dictator Aethiopiae, a summis iudicibus eiusdem civitatis capitis

damnatus est.

De supplicio sibi constituto absens audivit, nam iam per multos annos patria extorris in Zimbabwe versatur.

Constat Mengistum anno millesimo nongentesimo septuagesimo septimo (1977), cum rerum potitus esset, proscriptione rubra, ut dicitur, edicta adversarios suos per genocidium atrocissimum occidendos curavisse.

(Reijo Pitkäranta)

De capite Europae viridi

30.05.2008, klo 10.08

Unio Europaea certamen de urbe principe viridi Europae posuit.

Consilium est talem communitatem invenire, quae et viriditatem suam ostenderet et res circumiectales magni aestimaret.

Namque ad victoriam reportandam non solum illud requiritur, quam pulchra loca virentia quaeque urbs arbitris praebeat, sed id quoque respicitur, quanta diligentia in purgamentis amovendis adhibeatur et quam purus commeatus publicus ubique sit.

Wilhelmsson rector magnificus

30.05.2008, klo 10.07

Novus rector magnificus Universitatis Helsinkiensis designatus est Thomas Wilhelmsson, professor iuris civilis commerciique duodesexaginta annos natus.

Ad electionem duobus suffragiis opus erat, quorum in altero Wilhelmsson sexaginta duabus sententiis acceptis adversarium suum tribus punctis vicit.

(Reijo Pitkäranta)

De tempestate Finniae vernali

30.05.2008, klo 10.06

Caelum in Finnia hoc vere admodum frigidum et siccum fuit, quo factum est, ut sationes agrorum angustius provenirent.

Etiam frigora nocturna medio mense Maio sementibus praesertim in Finnia meridionali factis nonnihil detrimenti attulerunt.

(Reijo Pitkäranta)

Nuntii Latini ad ferias abeunt

30.05.2008, klo 10.05

Nuntii Latini ob ferias aestivas ad tres menses intermittuntur, quam ob rem proxima emissio non ante quam Nonis Septembribus (5.9.) fiet.

Restat, ut auscultatoribus nostris gratias quam maximas agamus et vobis omnibus aestatem optimam exoptemus. Valet!

(Reijo Pitkäranta)

ī ō

Ahtisaari praemium pacis accepit

23.05.2008, klo 09.11

Praemium pacis, quod UNESCO (Nationum Unitarum Educationalis, Scientificus et Culturalis Ordo) condidit, pristino Finnorum praesidenti Martti Ahtisaari propter longinquum pro pace mundana laborem concessum est.

Praemium illud ex Félix Houphouët-Boigny, praesidente Litoris Eburnei, appellatum, dari potest hominibus, qui modo insigni operam paci provehendae aut conservandae dederunt. Valor praemii est centum viginti duorum milium (122.000) euronum. Antea idem praemium inter alios acceperunt Nelson Mandela, primus praesidens nigricolor Africae Australis, et Jimmy Carter, pristinus praesidens Americanorum. Praesidebat commissioni praemio tribuendo Henry Kissinger, olim minister a rebus exteris Americanorum, praemio pacis Nobeliano ornatus.

(Tuomo Pekkanen)

Siccitas perseverat, annona mordet

23.05.2008, klo 09.10

Propter siccitatem fames sex milionibus puerorum in Aethiopia imminet et iam centum viginti sex milia denutricatione laborant.

Pretiis cibariorum auctis regimen quidem nititur, ut auxilium peregrinum inveniatur, sed adiutores Aethiopicorum sunt pauciores, cum homines imprimis in calamitates Birmaniae et Sinarum animum attendant. In Birmania celeri auxilio opus est, nam in faucibus Iravadi fluminis magna pars agrorum, in quibus oryza Birmaniae praecipue colitur, tempestate et inundatione deleta est. Maxime periclitantur infantes denutriti, quorum triginta fere milia in regione calamitate afflicta esse aestimantur. Argentarium Mundanum praemonuit globalem annonae caritatem proximis temporibus mitigatum non iri. Moderator eius Juan Jose Daboub Singapurae censebat pretium oryzae aliorumque cibariorum fundamentalium multos annos carissimum esse mansurum. Mercatum autem cibarium per se ipsum correctum iri neque causam esse illi interveniendi.

(Tuomo Pekkanen)

In Africa Australi violentia crescit

23.05.2008, klo 09.09

In re publica Africae Australis violentia in peregrinos crescere pergit. Tumultus etiam in mediam urbem Iohannisburgum extensi sunt, ubi turba excitata peregrinos cultris et igne necavit. Maior pars victimarum sunt fugitivi Zimbabuiani. Causa violentiae est timor civium, ne laborem et domum amittant.

(Tuomo Pekkanen)

Russi in hocceio glaciali magistri

23.05.2008, klo 09.09

Ludi mundani hoccei glacialis, in Canada facti, die Dominico (18.5.) in finem venerunt. In certamine finali Russi victis Canadensibus aureum nomisma obtinuerunt. In certamen de tertio loco venerunt Sueti et Finni. Grex Finnorum a Suetis, quos adversarios tam acerrimos quam carissimos habet, numeris quattuor - zerum (4-0) victoriam reportavit.

(Tuomo Pekkanen)

Cave alcem!

23.05.2008, klo 09.08

Hoc tempore alces in commeatu publico Finniae maximum periculum faciunt. Novis hinnuleis nascentibus superioris anni hinnulei a matribus expelluntur et novas sedes quaerentes, cum adhuc caute vagari non didicerint, temere et fortuito vias publicas transgrediuntur. Autoraedarii signis specialibus iuxta vias positos de periculo alcium monentur.

(Tuomo Pekkanen)

Motus terrae Sinas concussit

16.05.2008, klo 16.09

Gravissimus terrae motus die Lunae regiones Sinarum medias concussit. Tantum in provincia Sichuan minime quindecim milia hominum interierunt. Vis concussionis ex eo apparet, quod aedificia altiora etiam Pekini et Bancokii movebantur. Etiam Hanoi motus sentiebatur. Regimen Sinarum octoginta milia militum auxilio victimis misit. Cum regiones maxime afflictae nondum a succursoribus adiri potuerint, adhuc non constat, quanta sint damna et quantus numerus sit mortuorum et vulneratorum. Succursores quidem victimarum numerum censere conantur, quod difficillimum est, quia permulti homines sub officinis, scholis, domibus aliisque habitationibus sepulti sunt. Viis calamitate interruptis subsidia laborantibus ex aeroplanis et helicopteris deiciuntur. In oppido Yingxiu prope octo milia incolarum interisse creduntur. Qui numerus non inclusus est in illis quindecim milibus, quorum supra mentionem fecimus. In regione Wenxchuan oppida ita deleta sunt, ut vix singulae domus restiterint. In urbe Mianzhu, quae prope epicentrum sita est, minime decem milia hominum sub ruinis adhuc esse dicuntur. Itemque in alia urbe, cui nomen Mianyang, salvatores Sinenses hominum milia duodeviginti ruderibus tectos iacere rettulerunt. In regionibus terrae motu adflictis plus centum miliones hominum habitare constat. Novi de magnitudine calamitatis nuntii usque afferuntur.

(Tuomo Pekkanen)

Coalitio democratica in Serbia victrix

16.05.2008, klo 16.08

Comitiis parlamentariis et regionalibus in Serbia habitis coalitio democratica, quae Unionem Europaeam spectat, victoriam reportavit, cum undequadragesima centesima (39%) suffragiorum accepit. Factio radicalis, quae extremum nationalismum et russophiliam praefert, undetrigesima centesima (29%) obtinuit.

Praesidens Boris Tadic, dux coalitionis, pronuntiavit Serbos directionem Europaeam haud dubie optavisse.

Slovenia, penes quam est praesidium Unionis Europaeae, Serbis gratulabatur, quod vires Europae faventes apud illos plus valuissent.

Cum coalitio democratica, etsi vicit, maiorem suffragiorum partem non obtinuerit, novum regimen sola constituere non poterit sed auxilio minorum factionum idem sentientium egebit.

(Tuomo Pekkanen)

Typhones in USA solito perniciosiores

16.05.2008, klo 16.07

Conditiones meteorologicae feris tempestatibus idoneae in USA hoc anno fuerunt.

Cum tempus, quo tempestates maxime oriuntur, nondum praeterierit, verisimiliter numerus typhonum adhuc crescet.

Turbines venti, ut investigatores censent, hodie solito fortiores sunt et celerius quam assolent oriuntur. Iam circiter centum homines in illis vitam amiserunt.

(Tuomo Pekkanen)

Solum Finniae dives auri

16.05.2008, klo 16.06

Si pretium auri tantum manserit, quantum est hodie, proximis annis complures aurifodinae in Finnia aperientur.

Nunc aurum in una tantum regione foditur, sed autumno duae novae fodinae constituentur neque procul abest tempus, quo decem fere aurifodinae operabuntur.

Copia auri, de qua notitia est, plus trecentarum tonnarum in Finnia esse aestimatur.

(Tuomo Pekkanen)

Clades naturae Myanmariae

09.05.2008, klo 09.44

Septimana vergente Myanmaria, quae olim Birmania vocabatur, tanta tempestate afflicta est, ut complura dena milia hominum interirent et multo plures tecto privarentur.

Societates auxiliares internationales una cum diversis nationibus auxilium humanitarium et technicum civibus clade oppressis obtulerunt, sed difficillimum fuit subsidia in loca deleta perferre.

(Reijo Pitkäranta)

Hu Juntao Iaponiam visitat

09.05.2008, klo 09.44

Praesidens Sinarum Hu Jintao die Martis iter statale quinque dierum in Iaponiam suscepit, quod signum habetur relationes inter utramque civitatem intercedentes meliores factas esse.

Visitatio eo pluris aestimatur, quod iam decem anni acti sunt, cum nemo princeps Sinarum Iaponiam officialiter obiit. Moderatoribus propositum est, ut discordiae ad opes energiae et quaestiones securitatis pertinentes paulatim componerentur.

(Reijo Pitkäranta)

Enterovirosis Sinas grassatur

09.05.2008, klo 09.43

Magistratus sanitarii Sinenses cives praemonent, ut enterovirosim caveant, quae totam civitatem grassari coeperit.

Quam funesta haec aegrotatio sit, vel inde patet, quod ab mense Martio ineunte iam plus viginti infantes vitam amiserunt et decem fere milia hominum contagione eius infecta sunt. Qui hunc morbum sibi contraxerunt tam ex febris et pustulis quam ex ulceribus oris et exanthemate manuum et pedum laborant. Sunt, qui metuant, ne enterovira calidis mensibus aestivis latius diffundantur.

(Reijo Pitkäranta)

Cooperatio terrarum Asiaticarum

09.05.2008, klo 09.42

Inter civitates Asiae meridionalis convenit, ut cooperationem in mercatura oryzae meliorem redderent. Fieri non potuit, quin hoc consilium inirent, quod pretium huius alimenti terris Asiaticis pernecessarii, triplex fere factum erat. Aliquot terrae, ut India, Vietnamia, Indonesia, Brasilia, quaedam cibaria peregre exportari vetuerunt, ut inflationem monetalem compescerent et petitioni domesticae satis facerent.

(Reijo Pitkäranta)

Tutatio avium migratoriarum

09.05.2008, klo 09.42

Tribunal Unionis Europaeae incolis Melitae venatione avium migratoriarum vernali interdixit. Iam in eo erat, ut moderatores Melitenses legem de aviculis captandis perferendam curarent, cum decretum id prohibens venit. Iudicium imprimis ad duo avium genera, scilicet coturnicem et columbam turturem, pertinet. Quae volucres enim in Africa septentrionali hiemant indeque vere appetente in terras septentrionales nidificandi causa emigrant.

(Reijo Pitkäranta)

Cultura Finnica praesentatur

09.05.2008, klo 09.41

Cultura Finnica hoc vere mirum quam longe et late in Europa praesentatur.

Ut diversas expositiones Parisiis institutas omittamus, Berolinum abundat musica, fabula scaenica, saltatione, arte figurativa Finnorum. In Platea Alexandrina, loco Berolini orientalis maxime medio, forum Finnicum positum est, ubi etiam varii generis ludi iocosi, ut iactus caligae, eduntur.

(Reijo Pitkäranta)

Zingari ex Romania mendici

02.05.2008, klo 12.36

Postquam Romania ad Unionem Europaeam adiuncta est, zingari, qui ibi in condicionibus miserrimis vivunt, per Unionem vagari coeperunt sibi victum mendicando quaerentes.

In urbe Helsinki singuli mendicorum greges inde ab autumno fuerunt, sed aestate appropinquante etiam in oppida provincialia transierunt. Mendicatio per se non est legibus contraria et, cum commeatus inter terras Unionis Europaeae sit liber, cuivis civi Unionis in Finnam venire licet. Etiam in Norvegia et Suetia numerus mendicorum crevit. Magistratus Finni adhuc deliberant, quid de gregibus zingarorum circumvagantium faciendum sit. A Francis zingari ex Romania oriundi aeroplanis in patriam gratis remittuntur data insuper pecunia, illa scilicet condicione, ne rursus reveniant. Assisii, in urbe Italiae, mendicatio prope ecclesias et aedificia publica nuper vetita est et praeterea magistratus urbis decreverunt, ut castra zingarorum prope urbem sita demolirentur.

(Tuomo Pekkanen)

Quo blattae ex Russia disparuerint

02.05.2008, klo 12.36

Hodie dici solet blattas futuras esse in terra superstites etiam si genus humanum semet ipsum bello nucleari delevisset.

Nunc autem illa animalia, quae melius radiationem nuclearem ferunt quam homines, in Russia rarissima facta sunt, quod investigatores naturae pessimum omen iudicant. Problema est, quod nemo scit, quid de blattis factum sit. Ante decem annos Moscuae et Petropoli nulla fere domus sine sua populatione blattarum inveniebatur. Iam tum quidem copia illarum erat minor quam annis nonagesimis. Sed nunc de blattis nullum fere vestigium. In Russia variae causae huius phaenomeni prolatae sunt, ut hygiene melior et cura purgamentorum, quae tamen investigatoribus non sufficiunt.

(Tuomo Pekkanen)

De inauguratione Olympiorum

02.05.2008, klo 12.35

Multi moderatores Europaei propter res Tibetanas inaugurationem Olympiorum Pekinensium boicotizare volunt.

Cum inter ludos praesidium Unionis Europaeae sit penes Francos, praesidens Nicolas Sarkozy sperat

fore, ut nationes sodales de consiliis capiendis inter se consentiant et constituent, utrum moderatores inaugurationi ludorum adsint necne. Sarkozy enim censet melius fore, si Unio Europaea de ea re una voce sententiam dixerit. Matti Vanhanen, primus minister Finnorum, iam nuntiavit se inaugurationi adfore et ludos compluribus diebus spectaturum esse. Politicam et res athleticas non esse inter se miscendas. Colloquia de iuribus humanis alibi esse facienda.

(Tuomo Pekkanen)

Petroleum in Mari Baltico quaeritur

02.05.2008, klo 12.34

Societas Suetica petroleum in Mari Baltico quaerere incipiet, si a ministerio oeconomiae licentiam acceperit.

Campus, ubi terebrationes probativae suscipiuntur, centum decem chiliometra in meridiem ab insula Gotlandia distat. Ad novos petrolei fontes quaerendos imprimis pretium petrolei incitat, quod pro dolio iam centum viginti dollaris appropinquat.

(Tuomo Pekkanen)

Gravissima calamitas viaria

24.04.2008, klo 18.43

Die Saturni (19.4.) vesperi in Hispania calamitas viaria gravissima facta est, qua novem homines Finni vitam amiserunt et multo plures sauciati sunt.

Viatores e litore solari domum revertentes ab urbe Marbella in aeriportum Malagae transportabantur, cum autoraeda longa, qua quinquaginta fere periegetae vehebantur, in saepimentum viae autocineticae tanta vi impacta est, ut inde resiliret et paulo post tota subverteretur.

Neque ille casus tristissimus obvenisset, nisi quidam autoraedarius ebrius petorritum Americanum nimia velocitate gubernans hoc laophorum praetervehi conatus esset.

(Reijo Pitkäranta)

Quid ministri Finni dixerint

24.04.2008, klo 18.42

Nuntius de calamitate Hispaniensi in Finnia summo cum maerore acceptus est.

Princeps minister Matti Vanhanen re funestissima audita ait sibi persuasum esse omnes Finnos, quorum multi ipsi quoque in illa regione saepe ferias egissent, in maximos luctus incidisse.

Alexander Stubb, minister a rebus exteris: "Hic est", inquit, "dies ater, qui cuivis nostrum obtingere poterat."

(Reijo Pitkäranta)

Iter Americanum papae Benedicti

24.04.2008, klo 18.41

Papa Benedictus XVI itinere statali sex dierum in Civitates Americae Unitas suscepto praesidentem George Bush in Aedibus Albis convenit.

Hoc ipso tempore Beatus pater duo sollemnia celebrabat, cum et diem natalem suum octogesimum primum et tertium anniversarium pontificatus sui agebat.

Ultimo visitationis die in urbem New York deversus eum locum adiit, ubi ictus ille terroristicus anno bis millesimo primo (2001) factus erat.

(Reijo Pitkäranta)

Pretium cibi valde auctum

24.04.2008, klo 18.40

Ban Ki-moon, secretarius generalis Nationum Unitarum, monuit pretium annonae ubique gentium valde auctum iam pugnae, quae contra paupertatem fieret, detrimento esse.

Idem dixit discrimine cibario internationali effici, ut etiam securitas et incrementum oeconomicum in toto orbe terrarum in periculum vocarentur.

Neque ignorabat in Haitia et diversis partibus Africae tumultus violentos ortos esse cibo cariore facto.

(Reijo Pitkäranta)

Athenienses sua urbe non contenti

24.04.2008, klo 18.40

Plerisque Atheniensibus in sua urbe habitare displicet, ut ex interrogatione nuper divulgata apparet.

Dicunt condiciones vitae ibidem pessimas factas esse e causis diversis, in quibus sint affluentia vehiculorum, criminalitas aucta, pollutiones aerae.

Iis autem, qui Athenis suo autocineto utuntur, difficillimum est aream ei statuendo invenire.

(Reijo Pitkäranta)

Arbor omnium vetustissima

24.04.2008, klo 18.39

In Suetia reperta est abies quattuor fere metra alta, quae omnium arborum viventium vetustissima esse putatur.

Dendrologi enim Sueti eam iam aetate glaciali ultima natam esse existimant, quam ob rem radices eius saltem novem milia quingenta quinquaginta annos crevisse videntur.

(Reijo Pitkäranta)

De problemate Tibetano

17.04.2008, klo 19.15

Praesidens Sinensium Hu Jintao de rebellionem Tibetanorum, die decimo mensis Martii orta, opinionem suam primum declaravit: "Tibetum non est problema ethnicum", inquit, "nec religiosum nec de divisione patriae".

His verbis dictis Tibetanorum rebellionem esse voluit conflictum suorum cum factione Dalai Lamae, ducis spiritalis Tibetanorum.

Addidit quidem Sinenses paratos fore Dalai Lamam convenire, si ille destitisset conatu patriam dividendi et Olympia Pekinensia fraudulenter pervertendi.

Dux Tibetanus autem in colloquio televisifico repetivit se secessionem Tibetanorum nolle sed tantum veram autonomiam desiderare.

Negavit se velle Olympia boicotizari.

(Tuomo Pekkanen)

Comitia Italiae parlamentaria

17.04.2008, klo 19.14

In Italia comitia parlamentaria praemature habita sunt.

Praesidens Georgius Napolitano mense Februario parlamentum dimiserat, cum inter partes politicas de legibus electoralibus convenire non potuisset.

Regimen Romani Prodi, de fiducia suffragio repulsum, duabus septimanis ante ceciderat.

Prodi consilio ministrorum tantum biennium praefuit.

Aemuli principales in comitiis die Dominico et Lunae factis erant Silviu Berlusconi et Walter Veltroni, hic candidatus partium mediarum-sinistrarum democraticarum, ille partium mediarum-dextrarum.

Victoriam reportavit coalitio Silvii Berlusconi.

Veltroni cladem a suis acceptam agnovit et Silvio de victoria gratulatus est.

(Tuomo Pekkanen)

Operae novo regimini imminentes

17.04.2008, klo 19.13

Novo Italiae regimini, quod est secundum et sexagesimum post alterum bellum mundanum, ingentes operae societatem civilem modernizandi et competitivitatem meliorandi imminet.

Debitum publicum est mille sescentorum viginti unius miliardorum euronum, cuius faenora millenos ducenos euronos pro singulis civibus annuatim faciunt.

Productivitas laboris est minima terrarum industrialium et integra productio nationalis crescere prope destitit.

Corruptio et criminalitas ordinata coerceri non potuerunt et ad haec omnia velut cumulus accessit vera calamitas oecologica, cum id, quod cura purgamentorum per multos annos neglecta effecerat, in lucem venire coepit.

(Tuomo Pekkanen)

Berlusconi latinista

17.04.2008, klo 19.11

Silviu Berlusconi, cum interrogatus esset, quem hominem in historia memorabilem potissimum convenire vellet, gloriabatur se tam bene Latine scire, ut etiam una cum Iulio Caesare libenter prandium sumeret.

Ait se in lyceo optimum fuisse discipulum Latinum ideoque saepe electum esse, ut cum cardinalibus aliisque hospitibus illustrioribus Latine colloqueretur.

(Tuomo Pekkanen)

ALF Romae sessionem annuam habet

17.04.2008, klo 19.11

Academia Latinitati Fovendae (ALF) in Instituto Romano Finlandiae hodie (18.4.) sessionem annuam agit, in qua duodecim Academiae conventus internationalis, Ratisbonae anno proximo futurus, praeparatur.

Praeterea de rationibus pecuniariis disputatur et Pater Caelestis Eichenseer, sodalis Academiae illustrissimus, qui mense Februario obiit, oratione commemorativa recolitur.

Die Sabbati monumenta Campi Martii lustrabuntur.

(Tuomo Pekkanen)

Causa mortis Dianae cognita

10.04.2008, klo 19.23

Iudices iurati Britanniae, cum per sex menses in causam mortis principissae Dianae inquisivissent, sententiam de ea re pronuntiaverunt.

Ex decreto eorum patet calamitatem viariam, qua Diana et amicus eius Dodi al-Fayed anno nonagesimo septimo Parisiis vitam amiserunt, ab autoraedario ebrio et a photographis Dianam arrogantissime insequentibus ortam esse.

Discrepat hoc iudicium ab opinione eorum, qui credunt aliquos de Diana interficienda coniuravisse.

(Reijo Pitkäranta)

Inopia aquarum in Hispania

10.04.2008, klo 19.23

Hispania diu longis siccitatibus laborat, sed praesertim regiones Cataloniae in maximam penuriam aquarum venerunt.

Res iam eo deducta est, ut necesse esset huc aquam e Francogallia navibus cisternariis apportare.

De quanto discrimine agatur, vel inde apparet, quod copiae aquarum subterranearum Hispaniae dimidia fere parte exhaustae esse existimantur.

(Reijo Pitkäranta)

De usu telephonulorum

10.04.2008, klo 19.22

Telephonulis in aeroplanis uti iam per Unionem Europaeam licet.

Commissio enim Unionis novam legem sanxit, ex qua viatores, cum in finibus Europae volant, telephonum gestabile tam ad colloquendum quam ad textus telephonicos scribendos et ad epistulas electronicas mittendas adhibere sinuntur.

In arbitrio tamen societatum aeriarum erit, utrum vectores hac licentia frui possint necne.

(Reijo Pitkäranta)

Dies sanitatis celebratus

10.04.2008, klo 19.22

Die Lunae in orbe terrarum dies sanitatis celebratus est.

Tum maxime id disputabatur, qualem vim mutatio climatica ad valetudinem hominum habitura esset.

Investigatoribus persuasum est fieri non posse, quin caelum calescens etiam saluti publicae detrimento esset.

Metuunt enim, ne fontibus exarescentibus et inopia frumentaria augescente etiam varii generis pestilentiae et morbi contagiosi grassari incipiant.

(Reijo Pitkäranta)

Thesaurus Vikingorum repertus

10.04.2008, klo 19.21

Archaeologi Sueti in oppido Sigtunia haud procul a Stockholmia sita thesaurum inde ab aetate Vicingorum repetentem invenerunt.

De improvviso enim in locum inciderunt, ubi omnino quadringenti septuaginta duo nummi argentei Arabicae originis reconditi erant.

Rerum periti censent illis denariis ostendi incolas huius regionis iam saeculo p.Chr.n. sexto commercium cum gentibus longinquis habuisse.

(Reijo Pitkäranta)

Inspectiones in aëriportibus regionis Schengeniensis finitae

04.04.2008, klo 20.59

Inspectiones inter veteres et novas terras, quae tractatum Schengeniensem acceperunt, etiam in comiteatu aërio sublatae sunt.

In limitibus terrestribus et maritimis inspectiones internae iam mense Decembri finitae erant.

Novae terrae Schengenienses sunt Estonia, Lettonia, Lituania, Polonia, Hungaria, Slovakia, Tzokia, Slovenia, Melita.

Limites interni regionis Schengeniensis nunc ubique sine inspectionibus transiri possunt.

Leges autem nationales postulant, ut omnes viatores documentum identitatis in unaquaque terra sodali validum secum habeant.

Finnia tractatum Schengeniensem mense Martio anni bis millesimi primi accepit.

Ex membris Unionis Europaeae tantum Britannia et Irlandia eundem nondum comprobaverunt.

(Tuomo Pekkanen)

Concilium Samicum inauguratum

04.04.2008, klo 20.59

Lappones, qui malunt sua lingua Sami appellari, in Finnia octo milia septingenti (8700) numerantur, sed sexaginta centesimae ex eis extra regionem Samicam vivunt.

Omnino numerus Samorum in terris septentrionalibus plus septuaginta quinque milium esse aestimatur.

Maior pars ex eis in Norvegia habitat. Concilium Samicum (Sámediggi), anno millesimo nongentesimo nonagesimo sexto conditum, est organum Samorum Finniae autonomum et culturale.

Habet viginti unum membra, quae in quadriennium creantur. Praeses concilii Samici actiones et operam eius moderatur et in rebus tam nationalibus quam internationalibus delegatus est Samorum Finniae.

Concilium potest magistratibus proposita facere et de rebus ad Samos spectantibus sententiam officialiter dare.

Etiam de pecuniis ad culturam, res sociales, sanitatem materiamque scholasticam destinatis constituit.

Die Sabbati (29.3.) novum quadriennium (2008-2011) concilii Samici in ecclesia paroeciae Utsjoki officio divino Samice celebrato inauguratum est.

(Tuomo Pekkanen)

Minister a munere amotus

04.04.2008, klo 20.58

Postquam nuntii telephonici, quos Ilkka Kanerva, minister a rebus exteris Finnorum, saltatrici gregis erotici miserat, palam facti sunt, fieri non potuit, quin ille munus ministeriale deponere cogeretur.

Causa erat, quod minister, qui in rebus suis privatis inconsultius egerat, fidem apud collegas amiserat.

Ministro Kanerva in munere successit Alexander Stubb.

(Tuomo Pekkanen)

Fumificatio Pekini non permittitur

04.04.2008, klo 20.57

Sinenses sunt acerrimi in mundo fumatores, nam ex statisticis officialibus quartus quisque Sinensis sive circiter trecenti quinquaginta hominum miliones tabaco indulgent.

Olympiis autem appropinquantibus magistratus Pekinenses fumificationem in publico vetant.

A Kalendis Maiis in cauponis, grapheis vehiculisque publicis fumificare non licebit.

(Tuomo Pekkanen)

Visones fugitivi multiformitati naturae nocent

04.04.2008, klo 20.56

Visones nutriti, qui ex caveis effugerunt aut fraudulenter a tutoribus animalium liberati sunt, diversitati naturae Finnicae magna damna faciunt.

Pullos avium et ranas comedentes visones fugitivi effecerunt, ut harum populationes in insulis archipelagi corruerunt.

Vescuntur etiam talpis, quarum deminutio multiformitatem herbarum restringit.

(Tuomo Pekkanen)

Ignis Olympicus accensus

28.03.2008, klo 13.59

Die Saturni (24.3.) Olympiae, in oppido antiquo Graeciae, ignis Olympicus ritu sollemni accensus est. Quo facto fax illa longissimum iter centum triginta septem milium chiliometrorum ad urbem Pekinum versus suscepit.

Caerimonia in luco Olympiae celebrata paulisper perturbata est, cum tres viri politicae Sinarum reclamitantes ex improvise ad oratorem Sinensem accurrerunt.

Brevi tamen a custodibus publicis e conspectu remoti sunt.

(Reijo Pitkäranta)

De Olympiis Pekinensibus

28.03.2008, klo 13.59

Aliquot principes civitatum, cum considerarent, quae facinora Sinenses in Tibeto commisissent, iam deliberare coeperunt, utrum athletas suos Olympiis Pekinensibus interesse sinerent necne.

Nicholas Sarcozy quidem, praesidens Francogalliae, nuntiavit fieri posse, ut patria sua, nisi rerum in Tibeto condicio melior facta esset, ab Olympiis recederet.

(Reijo Pitkäranta)

Operistitium in Argentina

28.03.2008, klo 13.58

Agricolae et pecuarii Argentinae de tributis auctis irati operistitium inierunt, quo factum est, ut cives frumento ac commeatu privarentur.

Minati sunt se tamdiu laborare intermissuros esse, donec administratores portoria reliquaque rerum rusticarum vectigalia deminuerent.

Monuerunt magnos sumptus in causa esse, cur non iam operae pretium esset agros in parvis vicis colere.

(Reijo Pitkäranta)

Quid WWF de Finnis dixerit

28.03.2008, klo 13.58

Ordo internationalis naturae tuendae (WWF) relationem divulgavit, qua societatibus Finniae ab industria silvestri id, quod in silvis tropicis egerint, vitio dat.

Docet enim eas in Asia, America Meridionali aliisque orbis terrarum partibus magna praedia silvestria condidisse sed ostendere vix potuisse, num hae sedes industriales aut cum pactis de tutela naturae factis congruerent aut incolis indigenis prodessent.

(Reijo Pitkäranta)

Vestigatio maris Antartici

28.03.2008, klo 13.57

Grege oceanologorum, dum mare Antarticum perscrutatur, maiores beluas marinas, quam expectaverat, in profundis eius invenit.

Investigatores enim inter alios cetos cyclopteridas ingenti magnitudine animadverterunt, item medusas, quarum manus in longitudinem quattuor metrorum extendebantur, ac stellas marinas catinorum instar.

Expeditio illa ad amplum inceptum scientificum pertinebat, cuius est regiones polares hoc biennio examinare.

(Reijo Pitkäranta)

Domus Augustana in publico

28.03.2008, klo 13.56

Die nono huius mensis (9.3.) Domus Augustana, quam primus imperator Romanus in colle Palatino sibi aedificavit, in publicum proposita est.

Aperta sunt quattuor conclavia, scilicet triclinium, cubiculum, oecus magnus, diaeta imperatoris Augusti privata.

Hoc loco archaeologico spectatoribus copia offertur cum alias res veteres tum pulcherrima opera tectoria admirandi, quae in parietibus illius domus picta sunt.

Dicuntur et arte et usu colorum picturas parietarias Pompeianas et Herculaneenses aequiperare.

(Reijo Pitkäranta)

Tumultus in Tibeto orti

25.03.2008, klo 11.21

Tumultus violenti, in urbe Lhasa orti, etiam extra Tibetum in aliquas provincias Sinarum vagati sunt. Tibetani, quorum patria est in dicione Sinensium, contra horum potestatem et pro Dalai-lama reclamitaverunt, sed protestationes eorum a Sinensibus vi et armis suppressae sunt. Dalai-lama, dux spiritualis Tibetanorum, qui in India exsulat, postulavit, ut de rebus Tibeti recentioribus inquisitio internationalis fieret.

Censebat causam esse inquirendi, an genocidium culturale in Tibeto factum esset. Esse orbis terrarum Sinenses etiam de Olympiis Pekinensibus bene gerendis commonere. Sinenses autem Dalai-lamam et regimen Tibeti fugitivum, quod Dharamshalae, in urbe Indiae septentrionalis, versatur, de tumultibus ante Olympia Pekinensia movendis accusaverunt.

Sed Dalai-lama illas accusationes refutavit dicens se tantum autonomiam Tibeti, velut partis Sinarum, non plenam de Sinis independentiam sustinere.

(Tuomo Pekkanen)

Impossibile est, ut non veniant scandala

25.03.2008, klo 11.20

His temporibus amores moderatorum Finniae animos civium excitaverunt. Primum aliquot feminae lamentabantur sibi molestias sexuales in parlamento a collegis delegatis allatas esse.

Deinde amica primi ministri librum de amoribus ipsorum mutuis divulgavit, cui minister tantopere suscensuit, ut litem contra illam intenderet. Iudices autem amicam absolverunt. Tum iuvenis saltatrix cuiusdam gregis erotici palam fecit se ducentos nuntios telephonicos a ministro rerum exterarum sexagenario accepisse. Postremo, in cumulum horum scandalorum, rumores de relationibus, quas marescalchus Mannerheim in famulum suum Kirgisianum olim habuisset, in fabula scaenica expositi sunt.

(Tuomo Pekkanen)

Hiems globaliter frigida

25.03.2008, klo 11.19

Etsi caelum in Finnia aliisque terris Europae septentrionalis hac hieme mitissimum fuit, globaliter frigidissimum quattuordecim annis fuisse aestimatur.

Causa est phaenomenon La Niña, quod in Oceano Pacifico effecit, ut summae aquae marinae circa aequatorem frigescerent. La Niña anno proximo oriri coepit et effectus eius nunc est conspicuus.

(Tuomo Pekkanen)

Dorotheus in Kremlinum migrabit

23.03.2008, klo 10.50

Cum Demetrius Medvedev munus praesidentiale suscepit, in Kremlinum etiam Dorotheus (Russice Dorofei), cattus eius Sibirianus quattuor annos natus migrabit.

Deliciae praesidentis Putin est Conni, canis Labradoriensis, qui solet una cum illo summis conventibus interesse et in multis programmatis televisificis apparere.

Neque Dorotheus rerum gestarum omnino imperitus est.

Nam olim, cum Medvedev prope Michaellem Gorbatshev, moderatorem Sovieticorum, habitaret, Dorotheus cum catto huius rixam habuit, ex qua inferior discessit.

Denique coniuges Medvedev decreverunt, ut Dorotheus castraretur, ne iterum in rixas perniciosas incideret.

(Tuomo Pekkanen)

De comitiis Hispaniae

14.03.2008, klo 10.02

Die Dominico (9.3.) in Hispania comitia parlamentaria instituta sunt, quorum victoriam factio socialistarum reportavit.

Inde sequitur, ut José Luis Rodríguez Zapatero, princeps minister hodiernus, munere suo alterum quoque quadriennium fungatur.

In parlamento Hispaniae trecentae quinquaginta sedes sunt, e quibus centum undeseptuaginta

socialistae sibi paraverunt, cum conservativis centum quinquaginta tres obtingerent.
(Reijo Pitkäranta)

Moderatores Cypri convenient

14.03.2008, klo 10.01

Moderatores utriusque partis Cypri consenserunt, ut die vicesimo primo huius mensis (21.3.) inter se convenirent collocuturi, quaenam sors huius insulae futura esset.
Constat Cyprum in duas civitates divisam esse, quarum unam Graeci obtinent, altera autem Turcarum propria est.
(Reijo Pitkäranta)

Arctopolis 450 annorum

14.03.2008, klo 10.01

Pori, urbs maritima Finniae occidentalis, quae Latine Arctopolis audit, die Saturni (8.3.) quadringentos quinquaginta annos complevit.
Dies anniversarius variis sollemnitatibus celebrabatur, quibus etiam praesidens rei publicae Tarja Halonen interfuit.
Pro conditore Arctopolis habetur Iohannes, dux Suetiae, quippe qui, dum urbem mediaevalem Finniae Ulvila obit, in litore maris vicini novum emporium constitui iusserit.
Hoc factum est postridie Nonas Martias anno millesimo quingentesimo duodesexagesimo (8.3.1558).
(Reijo Pitkäranta)

Expositio 'Domus Pompeiana'

14.03.2008, klo 10.00

Kalendis Martiis in museo artis Helsinkiensi Amos Anderson appellato expositio nomine 'Domus Pompeiana' inaugurata est.
Qua monstratione spectatoribus occasio datur domum Marci Lucretii, quae media urbe Pompeiis reperta est, suis oculis cognoscendi.
Ex ornamentis illius domus nec non ex aliis rebus ante oculos positae iudicari potest, qualis fuerit vita Pompeiana ante eruptionem Vesuvii anno p.Chr. n. undeoctogesimo factam.
Expositio usque ad mensem Maium exeuntem aperta erit.
(Reijo Pitkäranta)

Russi praedia Finniae emunt

14.03.2008, klo 09.59

Cives Russi maiore studio quam umquam ante arationes et praedia in Finnia emunt, ut ex statisticis Sedis geodeticae apparet.
Namque anno praeterito inter Finnos et Russos octingenta quinquaginta fere commercia rerum immobilium facta sunt, cum numerus talium negotiorum prioribus annis nonnisi ducentorum aut trecentorum fuisset.
Plerique emptores maxime id agunt, ut villam in partibus Finniae orientalibus sitam sibi acquirant.
(Reijo Pitkäranta)

Hiems thermica Finniae defuit

14.03.2008, klo 09.58

Tempestas in regionibus Finniae maxime meridianis hac hieme tam mitis fuit, ut hiems thermica, quae dicitur, huc omnino non veniret.
Sensu enim thermico hiems tum demum incipit, cum temperatura diei et noctis media minime quinque diebus continuis frigida est.
Alandiae autem atque urbibus Hanko et Helsinki talia frigora hoc anno omnino defuerunt, ut meteorologi observaverunt.
(Reijo Pitkäranta)

Medvedev praesidens Russiae designatus

06.03.2008, klo 18.46

Demetrius Medvedev, candidatus factionis Russiae Unitae, suffragatoribus gratias egit, qui comitiis praesidentialibus eum praesidentem Russiae designaverant.
Medvedev plus septuaginta centesimas (70,28%) votorum accepit, Gennadi Zjuganov, candidatus

communistarum, prope duodeviginti (17,72%), Vladimir Zhirinovski, factionis democratarum liberalium, minus decem (9,34%).

Medvedev affirmavit se politicam praesidentis Putin continuaturum esse.

Observatores occidentales, quod in comitiis Russiae vituperarent, viderant: Electionem non fuisse omnino democraticam, nihilo minus eventum satis bene voluntatem populi praeferre; defectus fuisse eiusdem fere generis, cuius in comitiis parlamentariis mense Decembri factis.

Id observatores praesertim animadverterant, quod candidati in instrumentis informaticis inaequaliter visibiles fuissent.

Moderatores Unionis Europaeae Demetrio Medvedev de victoria gratulabantur et multi ex eis sperabant fore, ut illo praesidente relationes in Russiam meliores quam ante fierent.

Causae discordiarum fuerunt inter alia missilia Americanorum, quae in Polonia collocarentur, independentia Kosoviae nec non de energia quaestiones.

Praesidens Finniae Tarja Halonen telephonice praesidenti designato gratulata eum invitavit, ut Finnam visitaret.

Halonen et Medvedev iam antea ter convenerunt, proxime Moscuae mense Septembri.

Medvedev Finnam bene novit et conscius est et bonarum relationum Finno-Russicarum et problematum practicorum, quae in cooperatione inter utramque nationem occurrunt.

(Tuomo Pekkanen)

Clinton Obamam assequitur

06.03.2008, klo 18.45

Postquam Hillary Clinton in suffragiis primariis Texianis et Ohioensibus superior facta est, certamen de candidatu democratarum intentius fit.

Barack Obama, qui antea in duodecim civitatibus vicerat, adhuc numero delegatorum praevallet, sed Clinton in certamine perseverat neque spe victoriae desistit.

In partibus republicanorum John McCain, gubernator Arizonae, iam munus candidatorium, ad quod mille centum nonaginta unus (1191) delegati postulatur, pro certo occupavit.

Nam Mike Huckabee, aemulus eius principalis, cognito eventu comitiorum in Texia et Ohio factorum, re desperata certamen de candidatu deposuit.

(Tuomo Pekkanen)

Finnia competitivitate excellit

06.03.2008, klo 18.44

Allianz, institutum investigationis oeconomicae, quod inter maxima in Europa numeratur, in conspectu annuo recens divulgato censet competitivitatem Finniae inter quattuordecim Unionis Europaeae nationes esse optimam.

Competitivitas, de qua agitur, ex sex partibus vel segmentis constat, scilicet ex incremento oeconomico, incremento productivitatis, opibus ingenii, occupatione operum et laborum, investmentis futuris, stabilitate oeconomiae publicae.

In universum aestimanti ille conspectus ostendit oeconomiam in Unione Europaea validam esse et productivitatem in undecim nationibus eius celerius quam in USA crescere.

(Tuomo Pekkanen)

Raúl Castro praesidens

28.02.2008, klo 16.46

Novus praesidens Cubae consensu omnium electus est Raúl Castro, frater minor Fidelis septuaginta septem annos natus.

Nec mirum, si respicis eum iam inde ab anno bismillesimo sexto, quo Fidel enterotomiam subiit, munere praesidentis fungi.

Vicarius eius designatus est José Ramon Machado, communista durissimi generis, qui cum fratribus Castro annis quinquagesimis pro causa communi commilitavit.

(Reijo Pitkäranta)

De rebus Americae Latinae

28.02.2008, klo 16.45

Inter moderatores Argentinae et Brasiliae de reatorio nucleari communi aedificando convenit, ut caveretur, ne copiae energiae deficerent.

Inceptum palam factum est in urbe Bonaëropoli, ubi praesidentes utriusque civitatis conventum habuerunt.
Inter colloquium id quoque disputatum est, quibusnam rationibus consilia ad defensionem pertinentia opera coniuncta perficerentur
(Reijo Pitkäranta)

De praesidente De Gaulle

28.02.2008, klo 16.44

Die Saturni Parisiis museum vitam et res gestas praesidentis Charles de Gaulle illustrans inauguratum est.

Praeterea Francogalli statua posita memoriam ducis sui magni recolere voluerunt.

Haec monumenta iuxta sepulcrum Napoleonis collocata eo spectare dicuntur, ut praesertim iuventus Francogallica intellegere doceatur, qualem vitam et quales cogitationes ille vir de historia Francogalliae tam bene meritus habuerit.

(Reijo Pitkäranta)

De statu vitae Finncorum

28.02.2008, klo 16.43

Conditiones vitae Finncorum ad quamvis fere classem socialem et oeconomica pertinentium meliores factae sunt, ut etiam quaestus eorum creverunt.

Eodem tempore autem differentiae reddituum in Finnia auctae sunt, quo factum est, ut populus minutus etiamnunc laboraret, cum cives bene remunerati maiore prosperitate quam ante uterentur.

(Reijo Pitkäranta)

Memoria Belli Finnci

28.02.2008, klo 16.44

Die vicesimo primo huius mensis (21.2.) ducenti anni acti erant, cum copiae Russorum in Finnciam, quae tunc temporis pars Suetiae erat, infestis signis invaserunt.

Causa belli erat, quod Gustavus, rex Suetiae, Napoleoni et imperatori Russiae adversatus recusaverat, quominus ad societatem militarem contra Britanniam factam accederet.

Bellum Finncum, ut in annalibus nostris appellatur, vario Marte gestum anno millesimo octingentesimo nono (1809) compositum est.

Conditiones pacis convenerunt, ut Finnia sub potestatem Russiae redigeretur.

(Reijo Pitkäranta)

Dies intercalaris 29.2.

28.02.2008, klo 12.46

Hodie sive pridie Kalendas Martias (29.2.) diem intercalarem habemus, quam ob rem mensis Februarius uno die longior est.

Ratio annos bissextiles observandi C. Iulio Caesare auctore usu recepta est, quippe qui ordinem annorum ad cursum solis accommodans decerneret, ut singuli anni trecentos sexaginta quinque dies haberent, sed quarto quoque anno post tertium et vicesimum diem mensis Februarii unus dies intercalaretur.

(Reijo Pitkäranta)

Kosovia sui iuris facta

22.02.2008, klo 10.16

Die Dominico (17.2.) in Europa nova civitas orta est, cum parlamentum Kosoviae patriam suam rem publicam sui iuris factam et potestate Serbiae liberam declaravit.

Quae cum ita sint, Kosovia iam sexta in numero earum civitatum est, quae a pristina Iugoslavia separatae se in libertatem vindicaverunt.

Terra Kosovia tota aream undecim fere milium chiliometrorum quadratorum complectitur, et in finibus eius circiter duae miliones hominum habitant.

Longe maxima pars incolarum Albani sunt, quippe qui plus nonaginta centesimas totius populi efficiant.

Pristina, urbs caput Kosoviae, sexies centena milia habitatorum numerat.

(Reijo Pitkäranta)

Fidel Castro munus deponit

22.02.2008, klo 10.15

Fidel Castro, praesidens Cubae unius et octoginta annorum, qui iam per duos annos propter causas valetudinarias a negotiis publicis vacat, ad munus gerendum non redibit.

De hoc consilio in paginis interretialibus actorum diurnorum officialium Cubae nuntiavit. Successor eius die Dominico creabitur, cum parlamentum ad proximam sessionem convenerit.

Castro civitati suae per dimidium fere saeculum praefuit, nam summam imperii anno millesimo nongentesimo undesexagesimo assecutus est, cum eversione rerum in Cuba facta pristinum praesidentem Fulgentium Batista potestate expulit.

(Reijo Pitkäranta)

P.C. Eichenseer mortem obiit

22.02.2008, klo 10.15

Pater Caelestis Eichenseer, vir de Latinitate viva egregie meritus, pridie Nonas Februarias (4.2.) diem supremum obiit octoginta tres annos natus.

Per multa decennia princeps redactor erat Vocis Latinae, commentariorum Latinorum, qui Saraviponti, in urbe Germaniae, quater in anno eduntur.

Huc accedit, quod Eichenseer socius Acedemiae Latinitati Fovendae fuit et innumerabilia seminaria Latina moderabatur sermone Romanorum mira arte usus.

(Reijo Pitkäranta)

Hymnus nationalis Hispaniae

22.02.2008, klo 10.14

Hispanis non contigit, ut hymnum suum patrium verbis ornarent.

Nam Consilium Olympicum Hispaniense, quod hoc mandatum sibi perficiendum suscepit, conatu destitit, quia de delectu verborum non convenit.

Antea quidem Hispani carmen quoddam militare pro hymno nationali habebant, sed anno millesimo nongentesimo septuagesimo quinto (1975) eo uti desierunt, cum verba eius aetatem dictatoris Franco in memoriam reducere viderentur.

(Tom Bergman)

Tempus dormiendi Finorum

22.02.2008, klo 10.12

Finni breviores noctes agunt quam ante, et adhuc plures insomnia laborant.

Quod apparet ex investigatione, quam Institutum a sanitate publica faciendam curavit.

His triginta annis somnus nocturnus civium adultorum duodeviginti fere minutis brevior factus est.

Numerus enim eorum, qui singulis noctibus octonas horas dormiunt, deminutus est, cum multitudo hominum septenas horas somniantium augeretur.

(Reijo Pitkäranta)

Caveant consules, ne NATO dissolvatur

14.02.2008, klo 17.28

In Conventu de securitate Monaci habito Robert Gates, minister a defensione Americanorum, Europaeos hortatus est, ut suam in Afganistania responsalitem assumerent.

Si Europaei partem oneris non portavissent, periculum fore, ne NATO dissolveretur.

Gates Europaeis persuadere conatus est bellum Afganistaniae cum periculo terrorismi globalis coniunctum esse.

In Afganistania responsalitas rerum gerendarum inaequaliter divisa est, nam Britanni et Americani partes meridionales periculis expositas tenent, Germani autem et nationes, quae membra Natonis non sunt, in regionibus septentrionis tranquillioribus operantur.

Neque peregrini facile discedere possunt, nam adhuc procul abest, ut regimen Afganistaniae de securitate curare valeat.

(Tuomo Pekkanen)

Russiam non esse periculum

14.02.2008, klo 17.27

In eodem conventu Monacensi Sergei Ivanov, vicarius primi ministri Russorum, affirmabat Russiam, etsi plus quam ante in politica mundana valere conaretur, securitati ceterarum nationum nullum esse

periculum.

Russiam id agere, ne confoederationes militares orerentur neve in conflictus cum partibus adversis incideret.

(Tuomo Pekkanen)

Consilium Europaeum sollicitatum

14.02.2008, klo 17.27

Consilium Europaeum, unicus ordo occidentalis, qui comitia Russiae praesidentialia observat, rettulit se de honestate suffragiorum sollicitari.

Comitia, in quibus omnibus candidatis eadem facultas oblata non esset, iusta haberi non posse.

Vulgo creditur Demetrius Medvedev, cui Vladimir Putin favet, ceteris superior in comitiis fore.

(Tuomo Pekkanen)

Laboratorium spatiale Europaeum

14.02.2008, klo 17.26

Primum laboratorium spatiale Europaeum, nomine Columbus, quod navicula Atlantis ex Florida ad internationalem stationem spatialem (ISS) portavit, in latere eius ab astronautis fixum est.

Laboratorium, quod pondus habet decem tonnarum, inter alia investigabit, quo modo variae materiae varique liquores in spatio cosmico se gerant.

Inest in Columbo etiam instrumentum Finnicum, quod metietur, qua frequentia micrometeoroides et particulae scrutorum cosmicorum in spatio inveniantur.

Propositum est, ut navicula Atlantis, in qua sunt quinque astronautae, ex statione spatiali die Sabbati (16.2.) solvatur et biduo post in Floridam revertatur.

(Tuomo Pekkanen)

Fumificatio funesta

14.02.2008, klo 17.25

Ordo Mundi Sanitarius (WHO) rettulit unum hominum miliardum, nisi nationes mundi ilico consilia contra tabacum cepissent, hoc saeculo a fumificatione tabaci peritum esse.

Saeculo proximo centum miliones ita perisse. Augmentum igitur decemplex fore. Maxima damna a tabaco futura esse apud nationes egentiores.

(Tuomo Pekkanen)

Potator capitis damnatus

14.02.2008, klo 17.25

Vir Iranianus, viginti duos annos natus, capitis damnatus est, quod vinum combustum biberat.

Ex lege sharia in Irania vigente potator quater deprehensus, qui facinus confessus est, morte multari potest.

Iuris consulti dicunt supplicia de hoc scelere sumpta esse rarissima.

(Tuomo Pekkanen)

Dies Martis supernus

08.02.2008, klo 09.14

Die Martis primaria suffragia praesidentialia in viginti quattuor civitatibus Americanis facta sunt.

In partibus democratarum Hillary Clinton et Barack Obama aequo Marte certabant neque adhuc pro certo scitur, uter eorum munus candidatorium sibi vindicet, etsi iam plus quam dimidium civium ad urnas accesserunt. Ex duobus milibus viginti quinque (2025) delegatis, qui ad candidaturam democratarum quaeruntur, Hillary Clinton octingentos quadraginta quinque (845), Barack Obama septingentos sexaginta quinque (765) habet. Apud republicanos John McCain optime procedere perrexit, sed competitores Mitt Romney et Mike Huckabee in certamine perseverant.

(Tuomo Pekkanen)

Tadic in Serbia victor

08.02.2008, klo 09.13

Boris Tadic, praesidens Serbiae hodiernus, cum suffragiis die Dominico factis de adversario suo Tomislavo Nikolic victoriam reportavit, in alterum praesidentatum designatus est, Nikolic, qui nationalismo extremo favet, se cladem accepisse confessus est.

Tadic, ut observatores censent, politica sua iter Serborum in Unionem Europaeam maturabit.
(Tuomo Pekkanen)

De missilibus defensivis in Polonia collocandis

08.02.2008, klo 09.12

Americani et Poloni de systemate missilium defensivorum in Polonia construendo decreverunt. Rem palam fecit Radek Sikorski, minister a rebus exteris Polonorum, qui Washingtoniae cum Condoleeza Rice consultaverat. Americani defensionem aeriam Polonorum renovabunt, Poloni autem hac condicione missilia Americanorum in patriam accipient.

(Tuomo Pekkanen)

Suetia a Consilio Europaeo reprehenditur

08.02.2008, klo 09.12

Consilium Europaeum Suetiam iterum reprehendit, quod ibi linguae minoritatum neglegantur. Censet enim minoritatum linguas, ut Finnicam, in scholis Sueticis parum doceri. In relatione recens a Consilio divulgata Suetia illa vitia et defectus nondum correxisse dicitur, de quibus Consilium Europaeum iam antea admonuerit.

(Tuomo Pekkanen)

Sarkozy et Bruni in matrimonium

08.02.2008, klo 09.11

Nicolas Sarkozy, praesidens Franciae, et Carla Bruni matrimonium iunxerunt. Caerimonia nuptialis in palatio Elysaeo privatim, proximis praesentibus, die Sabbati celebrata est. Bruni, olim erat monstratrix vestimentorum, postea facta est cantatrix musicae popularis. Sarkozy cum Caecilia, coniuge priore, mense Octobri divortium fecit.

(Tuomo Pekkanen)

Carnisprivium iniit

08.02.2008, klo 09.10

Dies carnisprivii inceperunt. Celeberrimae sunt feriae, quae tempore carnisprivii ineunte apud Flumen Ianuarii (Rio de Janeiro) in Brasilia per quinque dies fiunt.

Culmen feriarum faciunt processiones, quibus scholae sambicae in Sambodromo urbis inter se certant. Hoc anno circiter septingenta milia hospitem Brasiliensium aut peregriniorum sollemnitatibus intererant. Prope decem milia vigilum ordinem et securitatem urbis viarum custodiebant. Hilaritatem hominum pluviae, hoc anni tempore in Brasilia haud rarae, aliquantulum perturbaverunt. In regione Itaipava, prope Flumen Ianuarii sita, vespere Sabbati (2.2.) una hora tantum pluebat quantum tribus fere septimanis solet.

(Tuomo Pekkanen)

Suharto mortem obiit

01.02.2008, klo 10.46

Suharto, pristinus praesidens et dictator Indonesiae octoginta sex annos natus, die Dominico mortem obiit, postquam e comate, quo eodem die mane afflictus erat, non iam expectatus est.

Per tres septimanas in periculo mortis fuerat, cum ex insufficientia viscerum laboraret et cerebrum eius duobus infarctibus laesum esset.

Suharto, qui cum suis ministris tam de iuribus humanis violatis accusari quam propter civitatem suam bene constitutam laudari solet, plus triginta annos in Indonesia rerum potitus est.

(Reijo Pitkäranta)

Quid George Bush dixerit

01.02.2008, klo 10.45

George Bush, praesidens Civitatum Americae Unitarum, cum die Martis mane apud congressum orationem in munere suo ultimam de statu nationis haberet, animos civium sollicitudinibus oeconomicis liberare conatus est.

"In praesenti, 'inquit', res pecuniaria publica quidem vacillat, sed dubium non est, quin, ubi paulum temporis elapsum erit, novum incrementum oeconomicum visuri simus."

Praeter negotia domestica Bush etiam mentionem belli Iraquici fecit et quaestionem de armis nuclearibus Iraniae attigit.

(Reijo Pitkäranta)

Operatio paci tuendae

01.02.2008, klo 10.43

Unio Europaea operationem paci tuendae in Tzadia et in Re publica Africae Mediae officialiter incohavit.

Ministri enim Unionis a negotiis exteris decreverunt, ut Patrick Nash, praefectus legionis Hibernus, qui huic actioni praeest, initium copiarum in Africam mittendarum faceret.

Ex Finnia in Tzadiam sexaginta fere milites profecturi sunt.

(Reijo Pitkäranta)

Observatores in Russiam

01.02.2008, klo 10.43

Consilium electorale Russiae trecentos quinquaginta legatos internationales ad comitia sua praesidentialia observanda invitavit.

Septuaginta eorum ex Ordine de securitate et cooperatione Europaea venient.

Vladimir Tshurov, praeses illius Consilii, promisit observatoribus liberam licentiam operandi datum iri, dummodo ne leges Russiae violarent.

(Reijo Pitkäranta)

Hiems Sinarum saevissima

01.02.2008, klo 10.42

In Sinis saltem quinquaginta homines vitam amiserunt tempestatibus hiemalibus, quibus saeviores semisaeculo proxime praeterito nullae ibi fuerunt.

Nivibus densis et imbribus gelidis cadentibus factum est, ut multae miliones civium electricitate privarentur et commeatus publicus in magnum discrimen vocaretur.

Neque rerum condicio in melius mutari videtur, nam meteorologi praedixerunt hiemem durissimam in Sinis continuatum iri.

(Reijo Pitkäranta)

Novae animantium species

01.02.2008, klo 10.42

In silvis Finniae nuperrime mille quingentae novae animantium species inventae sunt, quarum paene ducentae ante hoc tempus peritis scientiae animalium et herbarum incognitae erant.

Quibus continentur et fungi et insecta, quorum in numero muscae quaedam sunt.

Zoologis persuasum est in natura Finniae adhuc decem milia aut etiam triginta milia organismorum ignotorum latere.

(Reijo Pitkäranta)

Sedes cursualis direpta

24.01.2008, klo 17.34

Die Martis multo mane latrones armati sedem cursualem urbis Gothoburgi diripuerunt.

Hoc in scelere, quod de secunda vigilia noctis commissum est, nemo vulneratus est, sed operarii ibidem tunc temporis laborantes humi iacere coacti sunt, donec praedatores ereptione facta se foras eruperunt.

Spoliatores sex autocinetis incensis et bombis in viis urbis dispositis fugam suam faciliorem reddere conabantur.

Quantam autem pecuniae summam secum tulerint, nondum constat.

(Reijo Pitkäranta)

Vexillum Iraquiae mutatur

24.01.2008, klo 17.34

Parlamentum Iraquiae sententiam pro vexillo civitatis mutando tulit.

Placuit stellas exinde auferri, ut impediretur, ne memoria dictatoris Saddam Hussein per illam figurationem in mentem nationis revocaretur.

(Reijo Pitkäranta)

De superficie Maris interni

24.01.2008, klo 17.33

Superficies Maris Mediterranei usque altius ascendit idque tanta celeritate, ut hic rerum progressus iam multis peritis sollicitudinem afferat.

Ex investigatione, quam Institutum geographicum Hispaniae faciendam curavit, apparet fieri posse, ut aquae eiusdem maris quinquaginta annis proxime futuris in fastigium dimidio metro superius attollant. Si id, quod praedictum est, evenierit, civitates maritimae sine dubio in magno periculo versabuntur.

(Reijo Pitkäranta)

Episcopi Finni cum papa locuti**24.01.2008, klo 17.32**

Kari Mäkinen, episcopus Aboensis, et Jozef Wróbel, episcopus Romano-catholicus Helsinkiensis papam Benedictum XVI Romae convenerunt eique nomisma ad honorem anni iubilaei Michaelis Agricolae conflatum tradiderunt.

Sollemnitatis instituta est post missam sollemnem, quam Finni in ecclesia Romana nomine "Santa Maria Sopra Minerva" die Sancti Henrici quotannis celebrare solent.

(Reijo Pitkäranta)

Flocculus, parvus ursus marinus**24.01.2008, klo 17.31**

Pullus ursi marini, quem curatores vivarii Norimbergensis sibi tuendum susceperunt, Flocculus nuncupatus est et ab omnibus in deliciis habetur.

Quod animal nefrens in fidem hominum recipiendum erat, quod metuebatur, ne, nisi id factum esset, ipsa mater ei nocitura aut etiam interfectura fuerit.

Flocculus iam eadem fere celebritate fruitur ac Canutus, alter ursus marinus parentibus orbatus, qui anno proxime praeterito incredibile quantam viatorum multitudinem ad vivarium Berolinense allexit.

(Reijo Pitkäranta)

Forum argentarium fluctuat**17.01.2008, klo 17.58**

Cum homines degentiores, qui ad domos emendas pecuniam mutuam acceperunt, auctis faenoribus et pretiis habitationum minoratis debita argentariis rite solvere non potuerint, res nummaria in USA in gravius in dies discrimen vocatur.

Anno proximo centum quinquaginta domus argentariae propter pecunias mutuas temere datas decoxisse aestimantur.

Citigroup, maximus in USA complexus argentarius, rettulit se ultima quarta anni proximi plus duodeviginti miliardorum dollarorum damnum ex mutuis non solutis cepisse.

Anno ante idem lucrum plus quinque miliardorum fecerat. Pessimi nuntii etiam ab aliis magnis argentariis, ut Merrill Lynch, JPMorgan, Wells Fargo, allati sunt.

Ex America sollicitudo in forum argentarium totius orbis invasit et in plerisque bursis pretia titulorum male descenderunt.

In bursa Helsinkiensi descensus huius mensis est iam decem fere centesimarum, qui maior est quam alibi.

Stockholmiae condiciones sunt similes. Etiam in Norvegia et Dania pretia bursaria praecipiter descenderunt.

(Tuomo Pekkanen)

Facinora piratarum aucta**17.01.2008, klo 17.54**

Ordo maritimus internationalis (IMB) rettulit facinora piratica post aliquot annos tranquilliores praeterito anno in orbe terrarum valde aucta esse.

Augmentum a priore anno fuit decem centesimarum.

Piratae in ducentas sexaginta tres naves invaserunt, duodecim naves omnino occupaverunt, sexaginta nautas vulneraverunt, quinque occiderunt.

Piratica est problema gravissimum navigationis mundanae, nam plus quam nonaginta centesimae mercium via maritima transportantur.

Regiones maritimae periculosissimae sunt orae Nigeriae et Somaliae, ubi nonaginta centesimae latrociniorum fiunt.

In Indonesia autem, quod fuit olim receptaculum et perfugium piratarum, numerus invasionum factus est minor.

(Tuomo Pekkanen)

Beneficia vitamini D

17.01.2008, klo 17.52

Investigatio Americana ostendit defectu vitamini D periculum ictus cardiaci augeri.

Ex illa investigatione homines, qui eo defectu laborant, sexaginta centesimis(60%) maius periculum subeunt quam alii.

Qui praeterea hypertoniam habent, in periculo etiam maiore sunt. Ex quo sequitur, ut vitaminum D a morbis cardiovascularibus tueri possit.

Vitaminum D accipias ex oleo iecoris piscini, pisce crasso, lacticiniis. Illud vitaminum etiam effectum radiationis solaris ultravioleae in cute nascitur.

Sufficit ter singulis septimanis quindecim minutas apricari, ut satis vitamini accipias.

Tempore hiemali, cum lux solis est exigua, fons praecipuus D vitamini est cibus.

(Tuomo Pekkanen)

Lapidationem in Irania finiendam

17.01.2008, klo 17.51

Amnestia Internationalis, ordo a iuribus humanis, ab Iranis flagitat, ut lapidationem ad capitis poenam expetendam finiant.

Lapidationem esse poenam foedam et immanem, quae hodie quoque novem feminis et duobus viris immineat.

In causa adulterii capitis poenam non omnino esse constituendam.

(Tuomo Pekkanen)

Electiones in Nova Hantonia primariae

11.01.2008, klo 09.58

Novus praesidens Americanorum mense Novembri designabitur, sed antea electiones primariae utriusque factionis principalis in singulis civitatibus fiunt.

In Nova Hantonia (New Hampshire) senatrix Hillary Clinton insignem victoriam reportavit, cum undequadragesima centesima (39%) ex votis democratibus cepit. Barack Obama, aemulus eius principalis, triginta sex centesimas sibi conciliavit. Victoria senatricis fuit inopinata, nam septimana proxime praeterita, cum Barack primum et John Edwards secundum locum apud demokratas civitatis Iovae obtinuisset, multi experti illam iam pro candidata mortua et sepulta habebant. Apud republicanos victor evasit senator veteranus John McCain. Electiones primariae in civitatibus Michigania, Nevada, Carolina Meridionali proxime continuabuntur.

(Tuomo Pekkanen)

Neapolis purgamentis obruitur

11.01.2008, klo 09.57

Neapoli, in urbe capite Campaniae, curatio purgamentorum in singulos annos magis magisque neglecta est.

Mense Decembri res adhuc gravescere coepit, cum comportatio reliquiarum et electamentorum in suburbiis Neapolitanis omnino cessavisset. Postea altissimi acervi purgamentorum etiam in media urbe surrexerunt. Cives Neapolitani problemate purgamentorum excitati lapidibus contra vigiles coniectis cum illis vehementer conflixerunt. In viis urbis etiam purgamentorum acervos incendendo et vehicula subvertendo protestationes sponte susceperunt. Una ex causis neglectae reliquiarum curationis esse dicitur corruptio magistratuum et criminalitas ordinata.

(Tuomo Pekkanen)

Tertius quisque Arabs litteras nescit

11.01.2008, klo 09.56

Ordo ab educatione et cultura Foederationis Arabicae rettulit tertium quemque incolam terrarum Arabicarum legere et scribere nescire; ex feminis paene dimidiam partem ignaram litterarum esse.

Foederatio Arabica censet illud problema esse gravissimum et terras sodales hortatur, ut ad rem reficiendam celeria consilia capiant.

(Tuomo Pekkanen)

Emissiones carbonei dioxydati mortem maturan

11.01.2008, klo 09.56

Investigatio in Universitate Stanfordiniana recens facta ostendit emissiones carbonei dioxydati in USA singulis annis complures centenas mortes praematuras facere.

Ex illa investigatione emissiones officinarum et vehiculorum causa sunt morborum cardiovascularium, qui mortem maturare possunt. Globaliter bini miliones hominum annuatim propter aeris inquinationem moriuntur.

(Tuomio Pekkanen)

Salvatio mirabilis

11.01.2008, klo 09.55

Alcides Moreno, qui fenestras quadragesimi septimi tabulati caeliscalpii Manhattanensis lavabat, ex altitudine centum quinquaginta metrorum decidit, cum sustentaculum, in quo stabat, repente solutum esset.

Frater, qui una cum illo ibi laborabat, ilico mortuus est, Alcides autem superstes in nosocomium portatus inter quattuor septimanas novem operationes orthopedicas passus est. Damna capitis eius erant levia et iam membra normaliter movet, respirat, loquiturque. Medici censent salvationem Alcidis esse magnum miraculum, nam etiam ex hominibus, qui ex tertio tabulato deciderunt, dimidia pars intereunt.

(Tuomo Pekkanen)

Novus annus inauguratus

04.01.2008, klo 10.29

Novus annus bis millesimus octavus (2008) toto orbe caerimoniis consuetis inauguratus est.

In urbe New York sollemnitates quidem metu terrorismi aliquantum obscurabantur, sed Bagdati dies festus mirum quam laetus erat. Berolinum idque ad portam Brandenburgensem circiter decies centena milia hominum convenerant, ut anno incipienti propinarent. In sinu urbis Londinii totidem fere Britanni congregati erant exspectantes, donec Big Ben, campana aedium parlamentarium, ad signum anni vertentis sonaret.

(Reijo Pitkäranta)

Quid Tarja Halonen dixerit

04.01.2008, klo 10.28

Praesidens Finniae Tarja Halonen oratione initio anni publice habita Finnam societatem civilem integram laudavit.

Se tamen sollicitam esse, ne illa prosperitas iam fatisceret, cum bona patriae civibus inaequaliter distributa essent. ?Quamvis reditus hominum?, inquit, ?aucti sint, fortunae tamen condiciones in civitate multum variant.?

(Reijo Pitkäranta)

Rerum in Pakistania status

04.01.2008, klo 10.28

Benazir Bhutto, dux partium popularium Pakistaniae, septimana proxime praeterita, ut iam inter omnes constat, caede clandestina occisa est.

Ei in praesidatu factionis successit filius Bilawal Zardari, adulescens undeviginti annorum, et vicarius eius electus est Asif Ali Zardari, pater novi praesidis et vir clara coniuge Benazir orbatus. Propositum erat, ut in Pakistania electiones parlamentares mense Ianuario ineunte haberentur, sed violentiae ex homicidio exortae prohibuerunt, ne comitia die constituta fierent.

(Reijo Pitkäranta)

Tumultus in Kenia facti

04.01.2008, klo 10.27

Kenia in maximam rerum perturbationem delapsa est propter comitia praesidentialia ibidem nuperrime habita.

Namque ubi primum Mwai Kibaki, praesidens hodiernus, se victorem suffragiorum pronuntiavit, Raila Obinga, dux partium adversarum, eum de fraude comitali accusare coepit. Quo facto in civitate terrores et tumultus orti sunt, quibus iam trecenti fere homines interierunt.

(Reijo Pitkäranta)

Praesidatus Unionis Europaeae

04.01.2008, klo 10.26

Kalendis Ianuariis (1.1.) praesidatus semestris Unionis Europaeae a Portugallis ad Slovenos translatus est.

Janez Jansha, princeps minister Sloveniae, ait civitatis praesidis hoc tempore maxime interesse, ut quaestio de statu politico Kosoviae modo iusto et pacifico solveretur. Slovenia, quae olim pars Iugoslaviae erat, se pro conciliatrice quadam inter Unionem Europaeam et Balcaniam occidentalem intercedente habet.

(Reijo Pitkäranta)

De recensu Indianorum

04.01.2008, klo 10.24

Ultimis mensibus anni praeteriti in Peruvia recensensus populi Indiani actus est, quam ob rem magna investigatorum multitudo fines Amazoniae circumiit.

Secundum pristinam percontationem ibidem mille quadringentae quinquaginta communitates Indianorum erant, in praesenti autem numerus earum plus quam duo milia centum efficere videtur. Maior pars tamen Indianorum in regionibus montanis habitat.

(Suvi Randén)

Tuomo Pekkanen reddidit

Castro potestatem depositurus

28.12.2007, klo 09.02

Fidel Castro, dux Cubanorum, ambigue indicavit se potestatem esse depositurum.

In epistula, quae in televisione lecta est, ait se nolle iunioribus obstare aut statu suo haerere.

Experientiam autem suam verbis tollebat. Mense Martio, quo consilium rei publicae administrandae a conventu nationali creabitur, secessio Castronis forsitan confirmabitur.

Upsaliae Finnice loqui non licuit

28.12.2007, klo 09.01

Cives originis Finnicae et sermone Finnico loquentes in Suetia hodie circiter quadringenta septuaginta milia (470 000) numerantur, quae sunt quinque fere centesimae ex omnibus incolis.

Iam medio aevo Finni Suetiam petiverant et septimo decimo saeculo decimam partem ex omnibus incolis Stockholmiae faciebant. Maior autem pars Sueco-Finnorum post secundum bellum mundanum patria relicta eo migraverunt. Anno bis millesimo regimen Suetiae decrevit, ut Finnicus officialis minoritatis sermo apud Suecos esset. Quia non omnes Finni in Suetia habitantes Suetice loquuntur, difficultates et discordiae interdum in sedibus operis ortae sunt. Hoc anno in urbe Upsalia accidit, ut quidam moderator graphiei socialis colloquio Finnico interrupto nuntiaret in sede operis nisi Suetice loqui non licere. Cum postea alii quoque urbis magistratus idem affirmavissent, tanta de hac re iracundia apud Sueco-Finnos orta est, ut magistratus Upsalienses veniam errori et ignorantiae suae publice peterent.

Secretum longaevitatis

28.12.2007, klo 09.00

Gregori Nestor, pastor Ucrainus, qui vir in orbe terrarum veterrimus habebatur, centum sedecim annos natus in urbe Stari Jaritshiv Ucrainae occidentalis nuper (15.12.) diem obiit supremum.

De secreto longaevitatis suae quaerentibus responderat: "Si uxorem habuissem, iam multis annis ante in cista funerali positus essem." Praeter caelibatum, etiam modus vitae Spartiacus valetudini Nestoris serviebat. Non fumificabat, alcoholo parcissime utebatur, cibus salubribus vescebatur, constanter orabat et paenitentiam exercebat. Adhuc centenarius pecora pascebat et usque ad finem vitae sine perspicillo legebat. Natus erat Idibus Martiis anno millesimo octingentesimo nonagesimo primo.

Est Iosepho et Mariae locus in deversorio

28.12.2007, klo 08.59

In evangelio secundum Lucam de nativitate Christi in Bethlehem haec narrantur: "Factum est autem, cum essent ibi, impleti sunt dies, ut (Maria) pareret. Et peperit filium suum primogenitum et pannis eum involvit et reclinavit eum in praesepio, quia non erat eis locus in deversorio".

Hodie res melius succedunt quam praeside Syriae Quirino, nam societas deversoriorum Travelodge nuntiavit se coniugibus, quibus nomina essent Iosephus et Maria, in deversoriis suis Britannicis, Irlandicis Hispanicisque cubiculum gratuitum ad unam noctem inter vigiliam Nativitatis Domini et Epiphaniam daturam esse.

Reijo Pitkäranta reddidit

De conventu climatologico

20.12.2007, klo 16.54

In conventu climatologico in insula Balio acto consensus est, ut colloquia de emissionibus deminuendis continuarentur.

Propositum enim est pactum Kiotense de atmosphaera tuenda intra biennium renovare.

Novus tractatus eo maioris momenti erit, quod etiam Civitates Americae Unitae et aliae nationes, quae pactum Kiotense quondam repudiaverant, se eum accepturas esse promiserunt.

Nondum tamen constat, quantopere emissiones ex nova lege circumscribantur.

Collegium trium sapientium

20.12.2007, klo 16.54

Moderatores Unionis Europaeae tres sapientes elegerunt, qui considerarent, quibusnam periculis Europa annis futuris occursura esset et quae facultates ad progrediendum ei offerrentur.

Consilio praefectus est Felipe Gonzales, pristinus princeps minister Hispaniae.

Cetera huius trigae membra sunt Vaira Vike-Freiberga, bis praesidens olim Lettoniae, et Jorma Ollila Finnus, qui usque ad annum bis millesimum sextum (2006) societati telecommunicativae Nokia praefuit.

Custodia terrarum Balticarum

20.12.2007, klo 16.53

Septimana vergente custodia spatii aërii Baltici a Portugallis ad Norvegos transiit.

Secutum est, ut quattuor aeroplana insectatoria ex Norvegia in stationem militarem in Lithuania sitam mitterentur.

Terrae Balticae, postquam annis nonagesimis sui iuris factae sunt, fines suos aërios a Russis iterum atque iterum violari animadvertabant.

Cum satis virium ad hoc malum avertendum non haberent, auxilium a Confoederatione Atlantica (NATO) petere optimum factu esse iudicabant.

De poena mortis sublata

20.12.2007, klo 16.52

Nova Caesarea, vulgo New Jersey, quae una e civitatibus Americae Septentrionalis est, poenam mortis tolli iussit.

Praevaluit haec sententia in parlamento, quod maiore ex parte in legatis democraticis consistit.

Ordines iurum humanorum decretum laudaverunt dicentes eo gradu viam praeparatam esse ad supplicium ubique gentium abrogandum.

Nova serpentium species

20.12.2007, klo 16.52

Zoologi in Kenia novam serpentium speciem eamque quam maxime venenatam invenerunt.

Pertinet ad genus Naiae, quam ob rem huic reptili nomen scientificum Naia Ashei datum est ex appellatione cuiusdam praedii Keniani, ubi nova belua primum reperta est.

Anguis ille fusci coloris ad longitudinem duorum metrorum et semissis crescit et tam letale virus evomit, ut uno ictu etiam viginti homines occidere possit.

Tom Bergman reddidit:

De arboribus nataliciis

20.12.2007, klo 16.51

Hoc anno ex Dania centies centena milia arborum nataliciarum exportantur.

Quae quamvis ita sint, productio earum in praesenti a cultoribus diminuta est propter nimiam oblationem annis praeteritis factam.

Neque productio celeriter augeri potest, quod ad abietes natalicias colendas octo aut etiam decem anni requiruntur.

Tuomo Pekkanen reddidit:

Medvedev a Putino sustinetur

14.12.2007, klo 11.20

Praesidens Russiae Vladimir Putin nuntiavit se Demetrio (Dimitri) Medvedev, ministri primarii primo vicario favere, ut ille proximus praesidens crearetur.

Eundem etiam factio Russia Unita et tres aliae partes politicae sustinent.

Quae cum ita sint, iam certum esse videtur eum mense Martio successorem Putini creatum iri.

Medvedev, annos natus quadraginta duos, est origine Petropolitanus.

In Universitate Petropolitana, sicut Putin, iurisprudentiae studuit et iurista factus est.

Anno undebismillesimo Moscuam venit, ubi ambitioni praesidentiali Putini praeftuit, cuius sodalis fidelis habetur.

Dicitur esse politicus liberalis, qui potius compromissa quam conflictus quaerit.

Belgae regimine carent

14.12.2007, klo 11.19

Belgae iam semiannum regimine carent.

Flandri, qui Nederlandice loquuntur, maiorem sibi autonomiam postulant.

Vallones autem, qui sermonem habent Francogallicum et de subsidio oeconomico Flandrorum pendent, huic postulationi obsistunt.

Cum de discordia inter utrosque conveniri non potuit, regimen post comitia parlamentaria mensis Iunii nondum constitutum est.

Suetia scandalo quassatur

14.12.2007, klo 11.19

Vetus scandalum Suetiam denuo vehementer quassat.

Duae feminae, quae ante triginta annos, cum puellae quattuordecim annorum essent, in circulo meretricio Stockholmiensi laboraverant, affirmaverunt multos politicos in Suetia clarissimos inter clientes suos tum fuisse.

In his primi ministri Olof Palme et Torbjörn Fälldin ab illis nomine nominantur.

Circulus ille prostitutionis anno millesimo nongentesimo septuagesimo septimo palam factus est et Doris Hopp, moderatrix illius, carcere duorum annorum multata est.

De clientibus autem prostituerum inquisitum non est, etsi stuprum puellarum erat crimen, quod quattuor annorum carcere tum puniri potuit.

Nomina clientium in documenta inquisitionis accepta non sunt, quamquam multae prostitutae de politicis clientibus separatim et independenter narraverant.

Erant inter eos, praeter politicos clarissimos, etiam negotiatores et multi homines in regno Suecorum celeberrimi.

Olof Palme, qui ante unum et viginti annos (1986) occisus est, a multis in Suetia sancti loco habetur.

Cave carnem!

14.12.2007, klo 11.18

Eodem fere tempore, quo lascivia politicorum in lucem venit, alterum quoque scandalum animos Suecorum perturbavit.

Iam multos annos suspicio erat de catena alimentaria ICA, quod carnes tempore corruptas venderet.

Nunc autem magnetoscopia, in compluribus tabernis mercatoriis eius societatis occultata, abusum patefecerunt et confirmaverunt.

In imaginibus magnetoscopicis clam factis operarii tabernae carnes corruptas ex involucris veteribus tollunt et in novis ponunt atque nova diei ascriptione in locum prioris addita denuo venales proferunt.

De illo abusu, quo salus emptorum periculo obiecta est, societas radiophonica Suetiae (SVT) narravit.

Reijo Pitkäranta reddidit:

Dies independentiae Finniae

05.12.2007, klo 17.48

Postridie Nonas Decembres populus Finniae anniversarium libertatis suae caerimoniis consuetis egit praeterquam quod sollemnitates fortasse maiore pompa quam antea celebrantur.

Hoc enim anno novem decennia a Finnia suae iuris facta elapsa sunt.

Moris est presidentis quotannis die nationali civibus de republica bene meritis insigne honoris attribuere.

Die Iovis amplius quinque milia hominum huiusmodi laudem rerum a se gestarum tulerunt.

Comitia Russiae parlamentaria

05.12.2007, klo 17.48

Die Dominico in Russia comitia parlamentaria habita sunt.

Victoriam eorum manifestissimam tulit factio nomine « Russia Unita », praesidenti Vladimir Putin fidelissima, cum amplius sexaginta quattuor centesimas sententiarum sibi paravit.

Etiā tribus allis partibus contigit, ut satis magnam votorum copiam adipiscerentur ad candidatos suos in dumam eligendos.

Communistae suffragiorum duodecim fere centesimas acceperunt cum democratiae liberales circiter octo centesimis potirentur.

Etiā factio, quae « Russia Justa » appellatur, limen parlamenti intravit octo centesimas suffragiorum sibi colligendo

Observatores comitia condemnant

05.12.2007, klo 17.47

Observatores Consilii Europaei comitia Russorum dumalia inusta fuisse censuerunt, quibus leges de suffragiis perlatae ex multis partibus violatae essent. Idem senserunt rerum periti Unionis Europaeae ante diem comitalem suffragatores Russia a magistratibus impeditos esse quominus suo arbitrio loquendi et iure conveniendi liberi uterentur.

De sede nucleari Coreana

05.12.2007, klo 17.47

Coreani septentrionales, promissis servatis, programma suum nucleare dissolvere coeperunt. Nonis enim Novembribus (5.11) prima consilia ad sedem nucleariam Yongbyonensem claudendam ductu et auspiciis Americanorum ad effectum perducta sunt.

Propositum est ut reaktorium eiusdem ergasterii nec non officina plutonii fabricando ante finem huius anni omnino extinguerentur.

Inflatio monetalis Europaea

05.12.2007, klo 17.46

Inflatio monetalis Unionis Europaeae mense Novembri usque ad tres centesimas ascendit, quo altiore fastigio ea sex annis proxime praeteritis numquam stetit.

Qui progressus oeconomicus Argentariae Europae centrali sollicitudinem attulit, quippe quae maxime niteretur, ut inflatio intra fines duarum fere centesimarum remaneret.

Pretia imprimis ideo aucta sunt, quod petroleum et res alimentariae carius constant quam ante.

In Indonesia silvae plantantur

05.12.2007, klo 17.46

Indonesiani, qui his annis plures silvas quam ulli alii ceciderunt, in terra sua undecoginta miliones arborum plantaturi sunt.

Hac ratione usi sperant ea detrimenta, quae natura Indonesiae propter incendia silvestria funestissima accepit, paulatim sartum iri.

Sed ipsi quoque silvas suas longe lateque vastaverunt, cum in loco earum magna praedia ad oleum ex palmis producendum condere vellent.

Navis in montem glaciale impacta

29.11.2007, klo 10.20

Navis epibatica nomine Explorer, in Mari antarctico die Veneris (25.11.) ante solis ortum monti glaciali impacta, tanta damna cepit, ut nocte sequenti submergeretur.

Omnes vectores et nautae, quorum numerus erat centum quinquaginta quattuor, salvati sunt, nam relictā nave calamitosa in scaphas auxiliarias temperi descenderant.

Naufragi alia nave, quae illis succurrerat, in stationes antarcticas Chiliensium et Uruguaianorum

portati sunt, unde die Dominico aeroplanis in Chiliam venerunt.
Navis Explorer, in Finnia ante duodequadragesima annos facta, sub vexillo Liberiano navigabat. Maior pars vectorum erant Britanni, Americani, Canadenses.
(Tuomo Pekkanen)

Calamitates naturae quadruplices factae

29.11.2007, klo 10.19

Calamitates naturae, ut diluvia, fluctus, imbres tempestatesque, quarum causa in mutationibus climatis quaeritur, his viginti annis quadruplices factae sunt.

Ordo beneficialis Britannicus nomine Oxfam rettulit ineunte nono decennio saeculi praeteriti circiter centenas vicens calamitates naturae quotannis accidisse, cum nunc plus minus quingentae fierent.

Augmentum cladum, quibus homines pauperes maxime afficerentur, in calefactione caeli et condicionibus climaticis inopinatis originem et ortum habere.

Barbara Stocking, moderatrix ordinis Oxfam, censet hunc annum cum magnis et frequentibus diluviis non esse statistice insolitum sed consequentiam evolutionis recentioris.

(Tuomo Pekkanen)

Maxima inter Sinas et Galliam negotia

29.11.2007, klo 10.18

Praesidente Nicolao Sarkozy Sinas visente Sinenses et Franci maximas inter se pactiones commerciales fecerunt.

Areva, societas Francica energiae nuclearis, duo rectoria nuclearia novae generationis et uranium illis ad undeviginti annos necessarium in Sinas ministrabit.

Airbus, officina aeroplanis faciundis, centum sexaginta aeroplana epibatica Sinensibus vendet.

Quae negotia viginti miliardis euronum constare aestimantur. De iuribus humanis parum dictum est.

Oratione habita Sarkozy quidem obiter et admodum generaliter ait concives suos progressum in his iuribus a Sinensibus desiderare et addidit se sperare capitis poenam rarius quam ante damnandis impositum iri.

(Tuomo Pekkanen)

Duces oppositionis in Russia deprehensi

29.11.2007, klo 10.17

Cum oppositio politica nuper Petropoli et Moscuae reclamaret, complures centeni homines, in his duces oppositionis Garri Kasparov et Boris Nemtsov, deprehensi et in carcerem coniecti sunt.

Quam ob rem Terry Davis, secretarius Consilii Europaei principalis, monuit Russiam se ad ius humanum obligavisse, quod omnibus libertatem conveniendi praestaret.

Idem magistratus Russos hortabatur, ut civibus facultatem liberas et iustas electiones habendi concederent.

Vladimir Putin, praesidens Russiae, de electionibus futuris dixisse fertur : "Alii nasos suos pituitosos in res Russiae ne truant !"

Comitia Russorum parlamentaria proximo die Dominico (2.12.) fient.

(Tuomo Pekkanen)

Reijo Pitkäranta reddidit:

Tempestas in Bangladesha

23.11.2007, klo 09.37

Die quinto decimo huius mensis (15.11.) in Bangladesha tanta procella typhonica saeviit, ut vi eius et magnis inundationibus exinde ortis saltem tria milia hominum perirent et multo plures domum amitterent.

Timetur autem, ne numerus mortuorum etiam maior sit, nam, quanta calamitate quaeque regio afflicta sit, nondum satis constat aditu ad multa loca intercluso.

Reclamationes Bruxellenses

23.11.2007, klo 09.36

Belgium iam per quinque menses regimine caret.

In causa sunt discordiae vehementissimae, quae inter politicos Francogallice et Flandrice loquentes de civitate administranda ortae sunt.

Quam ob rem his diebus multa dena milia hominum in mediam urbem Bruxellas convenerunt, ut pro unitate patriae reclamarent.
Agminibus eorum cives omnium factionum interfuerunt, sed plerique reclamantium ex Vallonia, cuius populus Francogallice utitur, ad opinionem suam monstrandam venerant.

Gasiductus Turco-Graecus

23.11.2007, klo 09.36

Die Dominico (18.11.) moderatores Turciae et Graeciae sollemnitatem gasiductus communis inaugurandi celebraverunt.

Ille tubus subaquaneus trecenta chiliometra longus Bursa, ex oppido Turciae, proficiscitur et per mare Aegeum currens usque ad oppidum Graecum Komito extenditur.

Quo ductu patefacto primum fit, ut civitatibus Unionis Europaeae ex regione Maris Caspii gasum Russis non intercedentibus suppeditetur.

Tom Bergman reddidit:

Tirana urbs sordidissima

23.11.2007, klo 09.35

Tirana est urbs in Europa omnium sordidissima, ut ex relatione ab Ordine mundi sanitario (WHO) facta apparet.

Ex ea re sequitur, ut praecipue valetudo infantium in periculum vocetur.

Nard Ndoka, minister sanitatis, existimat aetatem in Albania mediam propter pollutiones certe duobus annis deminui.

Causa mali aeris dicuntur esse benzinum pessimae qualitatis et sedes industriales collapsurae.

Reijo Pitkäranta reddidit:

Lupercal Romuli et Remi

23.11.2007, klo 09.34

Lupercal sive spelunca, ubi Romulus et Remus, conditores urbis Romae, lupa a deo Marte missa nutriti esse traduntur, iam repertum esse videtur.

Archaeologi enim Italiani, dum prope Domum Augustanam in colle Palatino sitam effossiones faciunt, specum conchis et opere musivo ornatum invenerunt.

Idem animadverterunt summam cupolam eiusdem camerae figura aquilae albae praeditam esse.

Biographia civium Finnorum

23.11.2007, klo 09.34

Biographia nationalis Finniae, quo libro vitae civium illustrium nostratium describuntur, nuperrime e prelo exiit.

Hoc opus, cui componendo septingenti fere scriptores interfuerunt, ex decem voluminibus constat.

Neque tantum magnorum virorum et feminarum res gestae his paginis continentur, sed in iis etiam vitae complurium civium de plebe exponuntur, si quid memorabile de eis pro certo dici potuit.

Tuomo Pekkanen reddidit

Septentrionales aequaliores

21.11.2007, klo 12.25

Forum mundi oeconomicum (WEF) censuit aequalitatem virorum et feminarum in terris Europae septentrionalibus maiorem esse quam alibi.

Primo loco posita est Suetia, secundo Norvegia, tertio Finnia, quam Islandia sequitur.

Comparatae sunt differentiae mercedum, possibilitates se erudiendi et scholam frequentandi, iura politica, sanitas.

Terrae septentrionales in eo excellunt, quod mercedum differentiae in illis usque contrahuntur et feminae aequaliter cum viris in mercatum laboris admittuntur.

Pessimae in rebus ad aequalitatem sexuum pertinentibus sunt condiciones in Pakistania, Tzadia, Iemenio, quae in hac comparatione ultimos locos tenent.

Mercator drogarum iugulatus

21.11.2007, klo 12.24

In Arabia Saudiana vir Pakistanus, importationis drogarum damnatus, die Sabbati (10.11.) gladio iugulatus est.

Magistratus Saudiani rettulerunt illum deprehensum esse, cum heroinum et hasisium furtim importaret. Supplicium sumptum est in urbe Dammam Arabiae Saudianae orientalis. Hoc anno in Arabia Saudiana iam prope centum quinquaginta homines morte multati sunt.

Quod multo magis est quam longo tempore. Nam anno proxime praeterito minus quam quadraginta, anno bis millesimo circiter centum supplicia apud Saudianos sumpta sunt.

Scelera, quae poena mortis puniuntur, sunt inter alia, praeter commercium drogarum, rapina cum armis facta, homicidium, stuprum.

Templum vetustissimum in Peruvia repertum**21.11.2007, klo 12.23**

In ora septentrionali Peruviae, inter maiores ruinas vallis Lambayeque, repertum est templum quattuor milium annorum, quod inter antiquissimas reliquias archaeologicas Americae numeratur.

Archaeologi arbitrantur in illo ignem olim cultum esse.

Mirabiles ibi esse dicuntur picturae parietales, quibus vetustiores in continente Americana vix inveniuntur.

Equi feri in Australia pullulant**21.11.2007, klo 12.22**

In Australia equi efferati tantopere pullulant, ut civitas Queenslandia sive Terra reginensis ad circumiacentia tutanda plus decem milia illorum interficere moliatur.

Magistratus enim Queenslandenses censeant equos feros erosionem soli provocare, fontes aquae dulcis corrumpere, locis culturalibus aboriginum damna afferre atque cum animalibus Australiae originalibus de pabulis pugnare.

Societates animalibus tutandis haec argumenta non negant sed consilium equos ex aere sclopetandi, sicut factum est, temporarium et nimis crudele iudicant.

Meliores solutiones problematis iam multis annis ante quaerendas fuisse.

Potius esse equis feris medicamenta inicere, quibus steriles fiant et ita paulatim deminuantur.

Periculum vehiculum**21.11.2007, klo 12.20**

Nimia velocitas vehiculi et ebrietas aurigae saepissime est causa calamitatum viarum letalium.

In alternis calamitatibus letalibus anno proximo in Finnia factis velocitas erat pro condicionibus nimia et triginta centesimae ex aurigis, qui in calamitatem inciderant, erant ebrii.

Porro usus baltei securitatis vitam quinquaginta vectorum servare potuisset. In commeatu viario Finniae anno proximo trecenti triginta sex homines perierunt.

*Reijo Pitkäranta reddidit***Strages magna Jokelaensis****09.11.2007, klo 09.36**

Die Mercurii in sede scholari Jokelaensi, quae in paroecia Tuusula est, strages miserabilis facta est, cum octo homines, scilicet quinque pueri, una puella duaeque feminae adultae, vitam amiserunt.

Occisi sunt ab adolescente duodeviginti annorum, qui, postquam in schola sua ex improvise furere coepit, eos glandibus pistolii percussit.

Quo facto sclopetator eodem ferro usus se ipsum interficere conatus est et vix vivus in nosocomium deportatus, ubi postea animam efflavit.

Illo tumultu etiam circiter decem cives sauciati sunt, sed vulnera eorum tam levia erant, ut illi iam eodem die vesperi domum reverti possent.

Parricida consilia divulgavit**09.11.2007, klo 09.36**

Crudelitas facinoris Jokelaensis eo immanior fuit, quod parricida consilia sua iam in antecessum patefecerat.

Namque aliquot diebus ante in Interreti textum et imagines divulgaverat, quibus plane ostendit, quale scelus in Jokela perpetraturus esset.

Admirabatur occisores scholarium Americanorum et modum operandi eorum imitabatur.

Quid Tarja Halonen dixerit

09.11.2007, klo 09.35

Praesidens Finniae Tarja Halonen ob caedem in Jokela factam se valde dolere dixit.

"Nuntio horribili", inquit, "affecti sumus, quam ob rem maestitiam omnium eorum, qui nunc propinquos suos mortuos lugent, consolari volo. Eadem ego homines vulneratos miseror et de iis cogito, quorum animi hac tragoedia commoti sunt."

Rerum in Pakistania status

09.11.2007, klo 09.34

George Bush, praesidens Civitatum Americae Unitarum, collegam suum Pervez Musharraf hortatus est, ut status extraordinarii, quem Pakistaniae imperavisset, nulla mora interposita finem faceret.

Democratiam patriae primo quoque tempore in pristinum restitueret neve iam exercitui Pakistaniae praeesset.

Neque tamen Bush nuntiavit, quales rationes suscepturus esset, si Musharraf recusavisset, quominus ad voluntatem suam se accommodaret.

Jokke Häsä reddidit

De origine Etruscorum

09.11.2007, klo 09.33

Iam scriptores antiqui originem Etruscorum in Asia Minore collocandam esse censebant.

Nuper nova indicia reperta sunt, quae opinionem eorum confirmare videntur.

Investigatores enim Italici, Antonio Torroni ex universitate Papiensi et Alberto Piazza ex universitate Taurinensi, aliquot homines in Tuscia habitantes de constitutione genorum inspexerunt.

Tum invenerunt vestigia, quibus populus Tuscus cum gentibus Asiae Minoris coniungi potest.

Reijo Pitkäranta reddidit

Hiems Lapponiae senior

09.11.2007, klo 09.33

Hiems in Lapponiam hoc anno duabus fere septimanis senior venit quam ante fieri consueverat.

Extremus mensis October ibidem tam mitis fuit, ut temperatura media singulis diebus septem et etiam octo gradibus solito altior remaneret.

Copia autem pluviarum modum iustum et usitatum non excessisse videtur.

Tuomo Pekkanen reddidit

Comitia Argentinae

01.11.2007, klo 11.09

In Argentina Christina Fernández de Kirchner, coniux praesidentis hodierni, nova praesidens creata est, cum in comitiis die Dominico (28.10.) factis circiter quadraginta quinque centesimas (45%) suffragiorum cepit et aemulam principalem, Elisam Carrio, plus viginti centesimis superavit.

Christina Fernández est prima femina praesidens Argentinae suffragiis democraticis designata.

Summa potestas Argentinae in eadem familia manebit, cum mense Decembri a marito Nestore Christinae coniugi transferetur.

Christina est iurista, iam diu senatrix et consiliatrix mariti.

Cives sperant fore, ut illa investitores peregrinos in Argentinam revocet et oeconomia publica, iam inter praesidentatum mariti ex pristinis ruinis recreata, ita confirmetur.

Nulla de programme Iraniae nucleari testimonia

01.11.2007, klo 11.09

Mohammed El Baradei, moderator Ordinis internationalis ab energia atomica (IAEA), rettulit nulla testimonia reperta esse, ex quibus appareret Iraniam programma ad arma nuclearia praeparanda habere.

Idem in colloquio percontativo televisionis CNN (Cable News Network) comminationes Americanorum vituperavit, quibus illi contra Iraniam uterentur.

Reclamationes contra bellum Iraquicum

01.11.2007, klo 11.08

Cum a consulto senatus Americani, quo secundum contra Iraquiam bellum committeretur, quinque annos acti essent, multa milia civium in variis partibus Civitatum Americae Unitarum convenerunt et flagitaverunt, ut quam primum finis belli fieret.

Pecunias publicas in cura valetudinis, non in bello esse collocandas.

Beatificatio in bello civili Hispaniae occisorum

01.11.2007, klo 11.08

Civitas Vaticana die Dominico (28.10.) maximam in historia sua beatificationem instituit, qua paene quingenti (498) catholici in bello civili Hispaniae occisi inter beatos relati sunt.

In illo bello, quod ab anno millesimo nongentesimo tricesimo sexto usque ad annum millesimum nongentesimum undequadragesimum (1936-1939) gestum est, plus septem milia sacerdotum mortui sunt.

Plerique sacerdotes catholici generali Francisco Franco favebant, qui contra regimen partium sinistrarum bellum civile commiserat et, postquam victoriam reportavit, dictator Hispaniae factus est. Maior pars sacerdotum, qui ut martyres die Dominico colebantur, ab adversariis Franconis occisi magna multitudine mortem obierunt.

Infantes Sinensium invalidiores

01.11.2007, klo 11.07

Numerus infantium invalidorum aut mancorum apud Sinenses his quinque annis paene quadraginta centesimis auctus est.

Singulis annis a binis usque ad trinos miliones infantium nascuntur, in quibus perturbatio evolutionis est iam visibilis, atque a denis usque ad duodenos miliones, quorum evolutio annis sequentibus perturbatur.

Causa invaliditatis crescentis est rapidissimum incrementum oeconomicum, quod sine respectu pollutionis naturae factum est.

In multis regionibus et aer et aqua, quam necesse est bibere, sunt inquinatissima.

Ex infantibus Sinensium invalidis tertia pars brevi moritur, reliqui perturbationibus insanabilibus affecti sunt.

Delictum in armis nuclearibus portandis

25.10.2007, klo 11.39

Mense Augusto in USA accidit, ut aeroplanum B52, sex cuspidibus nuclearibus oneratum, trans Americam septentrionalem volaret.

Ille volatus inter delicta in armis nuclearibus tractandis gravissima habetur. Moderatores exercitus aerei affirmant similes errores numquam ante factos esse.

Quattuor colonelli propter illud peccatum a munere amoti sunt.

Gorbatshov novum motum condidit

25.10.2007, klo 11.38

Mihail Gorbatshov, pristinus moderator Unionis Sovieticae, in Russia Foederationem socio-democraticam condidit.

Propositum est ante comitia parlamentaria mense Decembri futura pro democratia libera pugnare.

Foederatio a Gorbashov condita non est in repertorium factionum officialiter relata neque rebus sic stantibus comitiis intererit.

Gorbatshov ab anno bis millesimo primo (2001) usque ad annum bis millesimum sextum (2006) factioni socio-democraticae Russiae praeerat, cui non contigit, ut delegati eius in Dumam crearentur.

In comitiis Decembribus victoriam verisimiliter reportabit factio Russia Unita, cuius candidatus principalis erit praesidens Vladimir Putin.

Pingues vectores periculum

25.10.2007, klo 11.37

Societas aeronautica SAS (Scandinavian Airline System) censet vectores pinguiore quam ante periculum facere.

Ante decem annos magistratus Europaei de securitate aeroplanorum responsales virum cum sarcinis manualibus pondo duodenonaginta, feminam septuaginta chiliogrammata esse aestimaverunt.

Nunc autem medium pondus tribus chiliogrammatibus maius est.
Ideo societas SAS anno proximo viginti milia vectorum ad pondus medium probandum pensabit.
Magistratus aeronautici periculum ex pinguitudine hominum ortum bene intellegunt, nam pondus aeroplani vel una tonna opinione maius ad stabilitatem, consumptionem carburantis, longitudinem aerodromi suam vim et effectum habet.

Lex de servitiis sexualibus

25.10.2007, klo 11.36

In Finnia lex lata est, ne servitia sexualia a victimis proxenetismi aut commercii hominum emerentur.
Emptio autem ab aliis prostitutis lege non vetatur.

Nemo ex illa lege, quae a mense Octobri anni bis millesimi sexti valet, adhuc damnatus est. Emptori enim difficile est scire, an prostituta sit victima necne.

Neque, etsi emptor id scivisset, vigiles rem facile comprobare possunt.

Ideo Anne Holmlund, ministra rerum interiorum Finniae, censet hodierno statu rerum clarius et melius esse, si emptio servitiorum sexualium omnino vetetur aut permittatur.

Kimi Räikkönen victor

25.10.2007, klo 11.35

Ultimum huius anni certamen in serie autoraedarum Formula 1 Paulopoli, in urbe Brasiliae, die Dominico factum est.

Kimi Räikkönen Finnus non tantum huius certaminis sed etiam totius seriei victoriam reportavit.
Inter ergasteria autocinetica plurima puncta adepta est officina Ferrari, cuius auriga Räikkönen est.

Reijo Pitkäranta reddidit

Quid Gordon Brown dixerit

19.10.2007, klo 10.07

Gordon Brown, princeps minister Angliae, nuntiavit numerum Britannorum in Iraquiam missorum vere proximo futuro ad dimidiam partem redactum iri.

Cum hoc factum erit, in Iraquia, ubi hodie quinque milia Britannorum stipendia faciunt, tantum duo milia quingenti milites remanebunt.

De rebus Nationum Unitarum

19.10.2007, klo 10.07

Consilium securitatis Nationum Unitarum, quod in quinque nationibus permanentibus consistit, sibi quinque civitates socias in biennium proximum cooptavit.

Quae sunt Burcina Faso, Libya, Vietnamia, Croatia, Ora Dives (vulgo Costa Rica).

Sunt, qui societatem Libyae, civitatis de terrorismo sustinendo accusatae, mirentur, sed haec res votis a legatis terrarum Africae datis decreta est.

Ad Croatiam et Oram Divitem in Consilium securitatis eligendam duobus suffragiis opus erat.

Piratica hoc anno aucta est

19.10.2007, klo 10.06

Ex Instituto internationali rei navalis nuntiatum est piraticam in maribus orbis terrarum hoc anno evidenter increbuisse: Praedones maritimos praesertim in aquis nationalibus Africae versari, quam ob rem prudentis non esset in oris Somaliae et Nigeriae navigare.

Regionem autem periculosissimam esse Indonesiam, ubi novem primis huius anni mensibus iam triginta septem latrocinia maritima facta essent.

Partes Saharae virides fient

19.10.2007, klo 10.05

Aegyptiis in animo est loca deserta Saharae magnam partem in terram cultam mutare.

Sperant enim fore, ut area ad exarandum idonea ibidem decenniis proxime futuris usque ad quattuordecim fere milia chiliometrorum quadratorum pateat.

Hoc propositum eo facilius perfici posse existimatur, quod iam hodie in septentrionali parte urbis Cairi per medias solitudines fructus varii generis crescunt, ut melo, armeniacum, brassica cauliflora.

In quibus viis tutissimus eas

19.10.2007, klo 10.05

Numerus hominum calamitatibus viariis in Europa morientium maximus est in terris Balticis, ut apparet ex investigatione, quam Consilium Europaeum a securitate rei vehicularis faciendam curavit. Tutissimus autem commeatus videtur esse in viis publicis Melitae, Hollandiae Suetiaeque. Laudantur etiam Luxemburgum, Francogallia, Portugallia, quippe quibus contigerit, ut multitudinem mortium inde ab anno bis millesimo primo (2001) quadraginta centesimis deminuerent.

De prisca pictura parietaria**19.10.2007, klo 10.04**

Apud urbem Aleppo, quae temporibus antiquis Beroea appellabatur, pictura parietaria omnium vetustissima, quod sciamus, inventa est.

Originem enim ab aetate lapidea ducit, nam abhinc undecim milia annorum confecta esse existimatur. Credideris hoc opus e quodam genere artis modernae esse, quoniam tribus coloribus, scilicet rubro, nigro, albo, pictum est et imprimis ex figuris quadratis constat.

Sarcozy et Putin convenerunt**12.10.2007, klo 13.34**

Nicolas Sarcozy, praesidens Francogalliae, die Martis iter in Russiam faciendum suscepit et eodem die vesperi Moscuae cum collega suo Vladimir Putin cenavit.

Putin, ubi primum hospitem recepit, dixit Francogalliam in sodalibus Russiae maximi momenti numerari.

Sarcozy autem de invitatione gratias agens respondit patriam suam amicam Russorum manere velle. "Speramus fore", inquit, "ut vestram indolem intellegamus. Constat enim quendam poetam vestrum scripsisse Russiam ratione percipi non posse."

Musharraf iterum praesidens**12.10.2007, klo 13.33**

Pervez Musharraf, summus dux Pakistaniae, comitiis in parlamento habitis praesidens iterum creatus est.

Neque tamen prius eventus suffragii ratus erit, quam iudicium supremum Pakistaniae decreverit, utrum Musharraf candidatus legitimus fuerit necne.

Hic idem vir hodie etiam summum imperium exercitus tenet, sed promisit se, si praesidatum denuo accepisset, illud munus statim depositurum esse.

Tres Nobelistae medicinae**12.10.2007, klo 13.32**

Praemium Nobelianum medicinae hoc anno tribus investigatoribus conceditur, qui in cellulis matricibus examinandis eminuerunt.

Qui sunt Martin Evans Britannus ac Mario Capecchi et Oliver Smithies, viri e Civitatibus Americae Unitis oriundi.

Consilium Nobelianum censuit illis doctoribustribuendum esse, quod de embryonibus evolvendis et de causis senescendi magis quam ante sciremus.

Magnum praemium architecturae**12.10.2007, klo 13.32**

Architectus Finnis, nomine Matti Sanaksenaho, praemium internationale architecturae a Fundatione Barbara Cappochi appellatum meruit.

Certamen Italianum, cuius victor honorario sexaginta milium euronum ornabitur, omnibus orbis terrarum architectis apertum erat.

Aedes sacra, quam Sanaksenaho mirum in modum et eurhythmiam optime respiciens delineavit, in urbe Turku erigitur et Cappella artis oecumenica Sancti Henrici appellatur.

De conventu codicologico**12.10.2007, klo 13.31**

In urbe Helsinki idque in Bibliotheca nationali Finniae hac septimana conventus internationalis habetur, in quo de fragmentis membranarum mediaevalium manu scriptarum agitur.

Chartae pergamenae Latinae, quamvis earum magna copia in Finnia reperiatur, in studiis mediaevalibus adhuc non satis adhibitae sunt.

Seminarium instituendum curavit grex investigatorum Finnorum, cuius est perquirere, qualis fuerit cultura litteraria in Finnia aetate mediaevali.

Pitkämäki in Europa omnium optimus

12.10.2007, klo 13.30

Tero Pitkämäki, acontista Finnus, qui ludis Osakensibus certissimam victoriam ex competitoribus reportavit, optimus in Europa athleta iudicatus est.

Hic magnus honor, nemini Finnorum antea tributus, ei in suffragio a Societate athleticae campestris Europaea (EAA) facto obtigit.

In serie autem feminarum primas tulit Blanca Vlasic, iuvenis Croata in altis saltibus omnium praestantissima.

Tuomo Pekkanen reddidit:

Putin ad Dumam tendit

06.10.2007, klo 15.17

Vladimir Putin, praesidens Russiae, nuntiavit se inter candidatos factionis Russiae Unitae (Yedinaya Rossiya) ad parlamentum sive Dumam tendere.

Comitia parlamentaria Russiae mense Decembri fient.

Alter praesidentatus Putini iam ad finem vergit neque tertium praesidens creari ex lege potest.

At verisimile est eum, in Dumam creatum, ministrum primum futurum esse.

Transitus borealis-occidentalis glacie solutus

06.10.2007, klo 15.16

Propter dissolutionem glaciei, quam mutatio climatis efficit, transitus maritimus ex Oceano Atlantico in Pacificum Oceanum per Canadam septentrionalem, antea impenetrabilis, factus est totus navigabilis.

Area, glacie arctica cooperta, est nunc minor quam umquam his triginta annis, quibus mensurationes per satellites factae sunt.

Transitus autem borealis-orientalis per regiones Russiae arcticas et Fretum Beringanum in Oceanum Pacificum est adhuc passim glacie obstructus, sed ille quoque opinione celerius dissolvi poterit.

Superficies glaciei arcticae est hodie circiter tres miliones chiliometrorum quadratorum, quod una milione minus est quam anno ante.

Ursi maritimi in angustiis

06.10.2007, klo 15.15

Dissolutione glaciei arcticae ursi maritimi, qui praedam super campos glaciales vagantes petunt, in angustias coacti sunt.

Aluntur imprimis phocis, quas in mari aperto capere non possunt.

Ex investigatione Americana omnes ursi arctici Alascae et Russiae ante annum bismillesimum quinquagesimum perituri sunt.

Iam nunc rariores facti omnino non plures quam sedecim milia numerantur. Maior pars in Groenlandia et in Insulis Montium Acutorum (vulgo Spitzbergen) vivit.

Ursus maritimus est optimus natator, sed calore caeli augescente distantia inter moles glaciales fluctuantes facta est tam longa, ut in medio itinere saepe perierint.

Haile Gebreselassie adhuc celerrimus

06.10.2007, klo 15.14

Agonistae Africani, imprimis Keniani et Aethiopes, his annis cursu longiore inter ceteros praestiterunt. Notissimus est Haile Gebreselassie Aethiops, qui duodeviginti culmina mundana fecit, ex his tria hoc anno.

In cursu decem milium metrorum quater magister mundanus factus et bis palmam Olympicam consecutus est.

Vir ille triginta quattuor annorum adhuc est fortissimus, nam in cursu Marathonio Berolinensi nuperrime (30.9.) novum culmen mundanum obtinuit, cum illud iter (42.195m.) duabus horis, quattuor minutis, viginti sex secundis (2.04.26) cucurrit, quod undetriginta secundis melius est quam pristinum culmen (2.04.55) a Paulo Tergat Keniano factum.

Octobralia celebrantur

06.10.2007, klo 15.13

Mense Septembri in Octobrem vergente Monaci, in urbe Bavariae, Octobralia sive Cervisialia per duas septimanas celebrari solent.

In Octobralia quotannis non tantum ex Bavaria sed etiam ex aliis Germaniae regionibus et peregre complures hominum miliones ad cervisias Bavaricas degustandas congregantur.

Dies festi huius anni Nonis Octobribus (7.10.) clauduntur.

Reijo Pitkäranta reddidit:

Reclamationes in Myanmar

28.09.2007, klo 16.27

Iam undecim dies sunt, cum monachi Buddhistae in re publica Myanmar, quo nomine Birmania hodie nuncupatur, regimini militari reclamitant.

Agminibus enim longissimis per urbes taciti incedentes effecerunt, ut multa dena milia hominum eis aggregarentur et a moderatoribus civitatis maiorem libertatem patriae flagitarent.

Die Mercurii rerum status in peius mutatus est, quod custodes publici non temperaverunt, quin multitudini reclamitanti vim adhiberent.

Quid Nicolas Sarkozy dixerit

28.09.2007, klo 16.26

Nicolas Sarkozy, praesidens Francogalliae, colloquio actis diurnis Americanis concessio ait se paratum esse ad sanctiones Iraniae imponendas, quamquam conventus Nationum Unitarum de ea re nihil decrevisset.

In Iranianos severissime consulendum esse, ut illis persuaderetur, ne arma nuclearia sibi parare pergerent.

Idem dixit terras Europaeas, si necesse esset, in illo negotio etiam sua sponte agere debere.

Lex ferroviaria in UE perlata

28.09.2007, klo 16.24

Parlamentum Europaeum novas leges de commeatu ferroviario Unionis Europaeae sciscere decrevit.

Postquam hae constitutiones anno bis millesimo nono exeunte (2009) valere coeperint, omnibus vectoribus suis iuribus fundamentalibus uti licebit.

Sanctum est verbi causa, ut viatores, si tramen eorum plus quam una hora expectato serius ad stationem constitutam pervenisset, quartam partem pecuniae pro itinere solutae reciperent.

De flora et fauna Britanniae

28.09.2007, klo 16.24

Index herbarum et animalium in Britannia moribundorum iam mille centum quinquaginta genera continet, ut ex recenti existimatione apparet.

In numerum animantium, quibus celerrima tutela opus est, nuper etiam ericius et passer recepti sunt.

Una e gravissimis causis, cur natura tantum detrimentum ceperit, videtur esse, quod vita urbana usque latius patet.

Memoria Sibelii celebrata

28.09.2007, klo 16.23

Die vicesimo mensis Septembris (20.9.) memoria musicographi Jean Sibelius in Finnia recalebatur, nam eo ipso die quinquaginta anni ab morte eius elapsi erant.

Constat Sibelium celeberrimum compositorum nostrorum inter omnes gentes esse, quam ob rem res gestae eius etiam peregre, verbi gratia Londinii, hoc autumno variis concentibus celebrantur.

In operibus Sibelii septem symphoniae eminent, sed composuit etiam sincinia, opera orchestralia, musicam clavili scriptam.

Praecepta medica electronica

28.09.2007, klo 16.23

Res sanitaria in Finnia anno proxime futuro ita renovabitur, ut in praeceptis medicis conscribendis ad usum electronicum transeat.

Apothecae autem novum systema intra quattuor annos recipient.

Propositum est etiam archivum publicum instituere, ubi omnia, quae de valetudine aegrotorum scitu

digna essent, diligenter reponerentur.

Tuomo Pekkanen reddidit:

Inundationes partes Africae vexant

21.09.2007, klo 09.32

Africa orientalis et occidentalis inundationibus gravissimis vexantur.

Imbres in duodecim saltem terris moles fluctibus oppositas, messes aedificiaque deleverunt.

Plus quam milio hominum domibus relictis fugam ceperunt.

In Ghana imbres totos vicos abstulerunt. Verendum etiam est, ne epidemiae oriantur.

Nationes pessime afflictae celere auxilium petiverunt.

Greenspan commentarios divulgavit

21.09.2007, klo 09.31

Alan Greenspan, pristinus moderator Argentariae Centralis Americanorum (Federal Central Bank), hac septimana ineunte commentarios divulgavit, quibus titulus est "Aetas tempestatis: Eventus in novo mundo / The Age of Turbulence : Adventures in a New World".

In illis praesidentem Bush eiusque regimen verbis durissimis vituperat.

Scribit praesidentem esse hominem prodigum, politica occaecatum, qui dilapidationem pecuniarum publicarum coercere noluerit.

Illum vectigalia allevasse sed reditus ita deminutos parcioribus sumptibus non compensasse.

Quo factum esse, ut patria magis magisque in aes alienum incideret.

De bello Iraquico Greenspan profitetur se dolere, quod politice incommodum sit palam id dicere, quod omnes iam sciant: Bellum imprimis propter petroleum ortum esse.

Pericula mundo imminentia

21.09.2007, klo 09.30

Institutum Internationale a Studiis Strategicis (IISS), quod sedem Londinii habet, censet maxima pericula annis proximis mundo imminentia esse motus islamiticos radicales, mutationem climatis, arma nuclearia.

Institutum Londiniense regimina nationum hortatur, ut contra ordinem terroristicum al-Qaida et calorem caeli augescentem efficacius agant.

Praeterea de programmata nucleari Iraniae praemonet.

Causam sollicitudinis etiam esse, quod Americanis hucusque non contigit, ut bellum terrorismo illatum optime gererent.

At ceteris maiorem sollicitudinis causam esse climatis mutationem, ex qua, nisi coerceatur, calamitas par bello nucleari oriatur.

Meteorites in Peruviam cecidit

21.09.2007, klo 09.29

Meridie Sabbati (15.9.) tantus meteorites in montes Andes Peruviae meridionalis cecidit, ut fossam triginta metra latam et sex metra altam faceret.

Homines in vico propinquo habitantes, qui spectatum venerant, dolore capitis et nausea affecti sunt.

Praeterea odorem insolitum sentiebant. Greges peritorum et opitulorum in locum missi sunt.

Navis traectoria omnium maxima

21.09.2007, klo 09.28

Postridie Idus Septembres navis traectoria, in toto mundo maxima, "Independence of the Seas / Independentia marium" , Finnam reliquit, ut in Britanniam navigaret.

Est aedificata in navalibus urbis Turku Finniae meridionalis - occidentalis sed perficietur in portu Southampton.

Est longitudine trecentorum quadraginta metrorum et vectores quattuor milia trecentos septuaginta quinque (4375) capere poterit.

Conventus XII ALF 2009

21.09.2007, klo 09.26

Anno nono p.Chr.n. Germani duce Arminio legionibus Romanis, quibus praefuit P. Quinctilius Varus, in saltu Teutoburgensi magnam cladem paraverunt.

Memoria illius pugnae ita celebrabitur, ut Academia Latinitati Fovendae (ALF) anno 2009 Ratisbonae (Regensburg) XII Conventum internationalem habeat.

Argumentum principale erit "Ad fines imperii Romani - anniversario bis millesimo cladis Varianae".

Reijo Pitkäranta reddidit:

Memoria cladis Americanae

14.09.2007, klo 10.52

Die Martis (11.9.) Americani memoriam sexennem illius ictus terroristici recalebant, quo circiter tria milia hominum vitam amiserunt.

Etiam praesidens George Bush luctui publico interfuit, cum sollemnitati in Aedibus Albis institutae aderat.

Regimen Russiae munus deposuit

14.09.2007, klo 10.51

Regimen Russiae die Mercurii munus deposuit, cum minister primarius Mihail Fradkov a praesidente Vladimir Putin dimissionem petivisset.

Idem nuntiavit eventus politicos in Russia futuros in causa fuisse, cur a re publica administranda recedere constituisset.

Ei succedet Victor Zubkov, praefectus collegii criminibus oeconomicis cognoscendis.

Mensurae Britannorum servantur

14.09.2007, klo 10.50

Unio Europaea Britannos ad systema metricum non iam cogit.

Hi enim tali usui tam vehementer adversati sunt, ut diceret Unionem Europaeam ob eam rem odium Britannorum in se vertisse.

Quae cum ita essent, iam decretum est, ut illis suas mensuras a maioribus traditas servare liceret.

Itaque librae, sextarii, milia passuum ceteraeque priscae mensurae in Britannia etiam posthac adhibebuntur.

Tigres in India denuo repertae

14.09.2007, klo 10.50

In silva pluviali Indiae occidentalis grex viginti fere tigrum inventus est.

Quae res praeter omnium opinionem accidit, quod triginta anni acti sunt, cum hoc idem pantherarum genus in illa regione visum est. Iam metuebatur, ne hae ferae bestiae omnino emortuae essent, praesertim cum vita earum venatione illicita et silvicidio usque periclitaretur.

Placenta Neapolitana salutaris

14.09.2007, klo 10.49

Placenta Neapolitana novi generis, salutaris dicta, animos Italianorum excitat.

Haec placentula ex farina granorum integrorum facta ter tanto plus fibrarum continere dicitur quam placenta traditionalis.

Quin etiam rugarum expultrix appellatur propter magnam vim antioxydantium, quae cellulas hominis a consenescentia retardant.

Novum praeceptum culinarium excogitavit Eugenio Luigi Iorio, investigator alimentorum Universitatis Neapolitanae.

Lula da Silva Finnam visitavit

14.09.2007, klo 10.48

Praesidens Brasiliae Lula da Silva hac septimana ineunte visitationem statalem in Finnam suscepit et praesidentem Finniae Tarja Halonen et ministrum principem Matti Vanhanen convenit.

Die Martis iter suum in Suetiam, Daniam, Norvegiam continuavit.

Lula, quippe qui ardens terrarum septentrionalium admirator esset, plus de statu sociali harum civitatum cognoscere voluit.

De certamine Finno-Suetico

14.09.2007, klo 10.47

Septimana vergente greges Finnorum et Suetorum nationales inter se certaverunt, utri eorum athletica campestri superiores essent.

Certamine in stadio Gothoburgensi posito viri Finni adversarios quattuor punctis vicerunt, cum in serie feminarum agonistae Suetae palmam ferrent.

Etiam in certatione puerorum et puellarum nostrates cladem acceperunt.

Tuomo Pekkanen reddidit:

Certamen Europaeum ballationis

07.09.2007, klo 14.32

Septimana vergente primum certamen Europaeum ballationis Londinii institutum est.

Intererant paria ballatorum sedecim terrarum Europaeorum, ex quibus unumquodque duas ballationes egit.

Palmam reportavit par Finnorum, Katja Koukkula et Jussi Väänänen, quorum actio tam musica quam choreographia et interpretatione a modo leviori ceterorum differebat.

Secundum locum obtinuit par Ucrainorum, tertium Irlandensium. Ut fit in cantionis certamine Eurovisionis, victores a spectatoribus Europaeis per suffragium telephonicum electi sunt.

Praesentatoribus autem suae nationis suffragium dare nemo potuit.

Certamen a Societate Radiophonica Britannica (BBC) etiam proximo anno Londinii instituetur.

Pitkämäki victor iaculationis

07.09.2007, klo 14.32

Finni, qui certamina athleticae campestris intentissimi solent spectare, inter ludos mundanos Osakenses, cum athletae eorum ne unum quidem nomisma nedum punctum primis diebus obtinuissent, iterum iterumque spe decipiebantur.

Ultimo denique die, quo certamen iaculationis factum est, causam exsultandi diu desideratam invenerunt.

Tero Pitkämäki victor evasit, cum iaculum in longitudinem plus nonaginta metrorum (90,33) vibravit.

Acerrimos autem habebat aemulos, nam Andreas Thorkildsen Norvegus plus duodenonaginta metra (88,61) iecit et Breau Greer Americanus septentrionalis plus octoginta sex (86,21).

Iaculatio apud Finnos est genus athleticae valde popolare, in quo tres magistros mundanos (Seppo Rätty 1987, Kimmo Kinnunen 1991, Aki Parviainen 1999) iam antea habuerunt.

Quid Russi de UE censeant

07.09.2007, klo 14.31

Ex demoscopia, quam institutum investigatorium nomine Levada faciendam curavit, patet maiorem Russorum partem velle, ut firmior quam ante erga Unionem Europaeam politica exerceatur.

Sexaginta centesimae respondentium censebant necesse esse, ut Russi dependentia Europaeorum de petroleo et gaso Russiae ad fructum politicum capiendum uterentur.

Prope septuaginta centesimae sentiebant occidentales ideo Russiam in rebus ad democratiam spectantibus reprehendere, ut illam infamarent et sibi emolumentum pararent.

Eodem autem tempore totidem fere respondentes credebant Russiae in occidentem relationes praesidente Vladimiro Putin meliores factas esse.

Vindemiae in Italia graciles

07.09.2007, klo 14.30

In Italia vindemiae huius anni sunt graciles.

Proventus vinearum, circiter tredecim centesimis minor quam anno proxime praeterito, inter minimos his quinquaginta annis numeratur.

Causa est calor aestivus exceptionalis, quo factum est, ut uvae citius maturescerent.

Praesertim vineae Italiae meridionalis tempestate iniqua vexatae sunt.

Migratio avium autumnalis coepit

07.09.2007, klo 14.29

Caloribus aestivis finitis aves migratoriae ex terris septentrionalibus in meridiem versus avolare coeperunt.

Complura dena milia avium iam iter susceperunt.

Maior pars illarum sunt aviculae tempore nocturno emigrantes, ut phylloscopi, silviae, muscicapae.

Etiam migratio alitum maiorum coepit, nam e.g. greges gruum et anatum avolantium iam ab aucupibus visi sunt.

Reijo Pitkäranta reddidit:

Nuntii Latini continuantur

31.08.2007, klo 10.30

Aestate in hemisphaerio septentrionali ad finem vergente emissiones Latinae post pausam trium mensium aestivorum modo consueto singulis septimanis continuantur.

Incendia silvestria Graeciae

31.08.2007, klo 10.27

Die Saturni toti Graeciae status necessitatis edictus est propter incendia silvestria funestissima, quae cum insulas prope Athenas sitas tum paeninsulam Peloponnesum ingenti vi debebant et hodie quoque delent.

De quanta clade agatur, vel inde patet, quod plus sexaginta homines flammis circumventi vitam amiserunt.

Die Dominico iam in eo erat, ut etiam vicus Olympia et area eius archaeologica omnino igne absumerentur, donec siphonariis ultimo fere temporis momento contigit, ut illam perniciem averterent. Incendia dolo malo conflata esse videntur, quam ob rem regimen Graeciae magnum praemium illi promisit, cuius indicio tanti mali auctores deprehenderentur.

Gül novus praesidens Turciae

31.08.2007, klo 10.26

Novus praesidens Turciae creatus est Abdullah Gül, minister a rebus exteris eiusdem civitatis.

Ad eum eligendum parlamento Turciae tribus suffragiis opus erat.

De hoc viro alii aliter sentiunt quibusdam metuentibus, ne is, quippe qui musulmanus sit, cursum Turciae politicum paulatim ad islamismum versus dirigat.

Conventus climaticus Austriae

31.08.2007, klo 10.26

Die Lunae Vindobonae, in urbe capite Austriae, conventus climaticus auspiciis Nationum Unitarum agi coeptus est.

Plus quam mille participes in re industriali et negotiali versantes et legationes a regiminibus diversarum nationum missae eo congregati sunt disputaturi, quam ratione quaestiones cum mutatione climatis coniunctae solverentur.

Certamen de polo arctico

31.08.2007, klo 10.25

Hac aestate de polo arctico possidendo certamen vehemens internationale ortum est.

Ubi primum nuntiatum est Russos navigio submarino invectos aquam poli arctici subisse et in glaciario eius vexillum suae civitatis posuisse, Dani, Norvegi, Canadenses, Americani, alii eandem regionem sibi vindicare coeperunt.

Memoria Dianae decennalis

31.08.2007, klo 10.25

Hodie sive pridie Kalendas Septembres (31.8.) decem anni acti sunt, postquam Diana, principissa Valliae, calamitate vehiculari Lutetiae Parisiorum facta mortua est.

Haec est causa, cur hoc anno multi libri de vita illius feminae praeclarissimae editi sint et memoria eius variis modis celebrata sit.

De certaminibus Osakensibus

31.08.2007, klo 10.24

Osakae, in urbe Iaponiae, hac septimana ludi mundani athleticae campestris celebrantur.

Longum est enumerare, quis in quoque certaminis genere ceteris antecesserit.

Iuvat tamen commemorare cursorem Americanum Tyson Gay honorem hominis omnium velocissimi sibi conciliavisse, cum victor cursus centum metrorum evasit.

Naves Americanae in Sinu Persico

25.05.2007, klo 13.00

Novem naves longae Americanae in Sinum Persicum transierunt, ut exercitium militare prope aquas

nationales Iraniae participarent.

Quo usu belli populis circumiacentibus demonstrari videtur Americanos quoquo modo paratos esse ad securitatem illius regionis praestandam.

Fuga apium universa in America

25.05.2007, klo 12.59

Ingentia examina apium in Civitatibus Americae Unitis et Oriente extremo mirandum in modum ex alveariis suis avolaverunt et verisimiliter perierunt.

Quae insecta enim cellas suas gregatim deseruerunt regina et ovis in nidis relictis, ex quo secutum est, ut favi fingi et mellificium effici desinerentur cum magno apiculturae detrimento.

Quae sit causa illius fugae universae, nemo pro certo scire videtur.

De thermis antiquis Ancyranis

25.05.2007, klo 12.59

Ministerium Turciae culturale consilium cepit, ut thermae Romanae Ancyrae sitae restituerentur.

Quae thermae iussu Caracallae, imperatoris Romani, saeculo p.Chr.n. tertio constructae complura opera archaeologica magni momenti continent.

Multi investigatores universitatis Ancyrae participes erunt huius conatus, qui quinque annis perfectum iri aestimatur.

Linnaeus abhinc 300 annos natus

25.05.2007, klo 12.58

Die Mercurii sive die vicesimo tertio huius mensis (23.5.) trecenti anni acti erant, cum Carolus Linnaeus, investigator naturae celeberrimus, in Suetia natus est.

Constat ei laudi dandum esse, quod omnes in orbe plantae et animalia binis nominibus Latinis nuncupantur.

Quam rationem nomenclaturae scientificam Linnaeus iis operibus proposuit, quae *Systema naturae* et *Species plantarum* inscribuntur.

Parlamentum Finniae C annorum

25.05.2007, klo 12.57

Die Mercurii huius septimanae (23.5.) parlamentum Finniae unicamerale primos ludos suos saeculares celebravit.

Eo enim ipso die centum annis ante prima sessio plenaria eius habita erat.

Iubilaeum meridie celebrari coeptum est officio divino in Ecclesia cathedrali Helsinkiensi procurato, quo facto legati in aedes parlamenti convenerunt, ut sessioni sollemni una cum trecentis pristinis legumlatoribus interessent.

De promotione philosophorum

25.05.2007, klo 12.57

Ordo philosophorum Universitatis Helsinkiensis in praesenti sollemnem promotionem magistrorum et doctorum celebrat.

Quod festum academicum triduanum e variis caerimoniis constat, sed summum fastigium eo temporis momento assequitur, cum amplius trecenti magistri et plus ducenti doctores insignibus academicis ornantur.

Munere promotoris fungitur Mirja Saari, profestrix linguarum septentrionalium.

Nuntii Latini ferias agunt

25.05.2007, klo 12.56

Nuntii Latini ob ferias aestivas ad tres menses intermittuntur, quam ob rem proxima emissio non ante quam pridie Kalendas Septembres (31.8.) fiet.

Restat, ut auscultatoribus nostris gratias quam maximas agamus et aestatem optimam exoptemus.

Colloquium Americano-Iranianum

18.05.2007, klo 14.15

Legatus Civitatum Americae Unitarum collegam suum Iranianum intra aliquot menses Bagdati conventurus est, ut cum eo de condicione securitatis in Iraquia melioranda colloquatur.

Tales conventus inter utramque nationem rarissimi sunt ex eo, cum legationum commercia post

revolutionem islamicam anno millesimo nongentesimo undeoctogesimo (1979) in Irania factam disrupta sunt.

De tumultibus Hafniensibus

18.05.2007, klo 14.14

In urbe Hafnia Danorum hac septimana tumultus violenti facti sunt, inter quos saepimenta viaria ducebantur et multa autocineta incendebantur.

Amplius quinquaginta homines magistratibus reclamantes a biocolytis deprehensi sunt.

Causa perturbationum erat, quod activistae quidam decreto de aedificio quodam ligneo demoliendo adversabantur.

Quid Sinenses facturi sint

18.05.2007, klo 14.13

Sinenses hoc anno magnam pecuniam in aggeres suos reficiendos et in aquam potabiliorem reddendam collocare in animo habent.

Sunt, qui putent multas moles fluctibus oppositas pessimae condicionis esse et homines iuxta eas habitantes in maximo periculo versari.

Huc accedit, quod aquae emissionibus industrialibus, laetaminibus pesticidisque multis locis valde inquinatae sunt.

Planeta terrae similis inventa

18.05.2007, klo 14.13

Astronomi Europaei nuntiaverunt se in constellatione Libra stellam errantem animadvertisse, quae Telluri nostrae similior esse videretur quam ulla alia planeta adhuc cognita.

Quod corpus caeleste, cuius massa quinque partibus maior quam terra nostra esse videtur, a nobis spatium viginti fere annorum luce mensurum abest et sidus pusillum circumfertur.

Rerum periti censent nihil impedire, quominus ibidem aqua occurrat, quia temperatura in superficie planetae inter zerum et quadraginta gradus Celsius variet.

Quid WWF de Mari Baltico dixerit

18.05.2007, klo 14.13

Ordo mundi naturae tuendae (WWF) censet Finnis non contigisse, ut id, quod de eiectamentis in Mari Baltico deminuendis animo proposuissent, consequerentur.

Copiam nitri, quae ex Finnia in Mare Balticum deferretur, inde ab annis nonagesimis saeculi praeteriti quaternis centesimis (4%), vim phosphori autem vicens (20%) deminutam esse, cum Finni voluissent quantitatem illorum elementorum ante annum praeteritum ad dimidiam partem redigere.

Societas pedifollica Vaticana

18.05.2007, klo 14.12

In civitate Vaticana societas pedifollica condita est, quae nonnisi ex sacerdotibus catholicis et studentibus theologiae constat.

Clericus Cup - ut nuncupatur ? cum ad vulgus delectandum spectat tum id agere conatur, ut ecclesia catholica propius populo admoveatur.

Ludi, qui diebus Dominicis agi non sinuntur, etiam eo peculiare sunt, quod arbitri Latine iudicant et lusoribus verba impudentia inter se clamitare non licet.

(Maija Ketoluoto-Nurminen)

Sarkozy praesidens Franciae

10.05.2007, klo 17.26

Comitiis praesidentialibus die Dominico factis Nicolas Sarkozy novus praesidens Franciae electus est, cum circiter quinquaginta tres centesimas suffragiorum obtinuit.

Sarkozy, vir quinquaginta duorum annorum, ministerio et rerum interiorum et oeconomiae in hodierno regimine functus, praesidenti Jacques Chirac succedit, qui duodecim annos in munere fuit.

Potestas praesidentis in Francia maior est quam apud plerasque alias nationes Europaeas.

Praesidens ministrum primum eligit sed eum dimittere non potest. Legem latam in parlamentum remittere potest, sed non saepius quam semel.

Potest etiam legem in tribunal constitutionale mittere aut eandem suffragio populi subicere. Praesidenti licet scelestis impunitatem concedere aut poenas eorum breviores reddere. Est etiam imperator

exercitus.

Munus praesidentis antea septuennium fuit, nunc iam iterum quinque annos durat.

Numerus praesidentatum non est limitatus, ut exempli gratia in Finnia, ubi idem semel tantum denuo eligi potest.

(Tuomo Pekkanen)

Praesidens Estoniae in Aedes Albas invitatus

10.05.2007, klo 17.24

Toomas Hendrik Ilves, praesidens Estoniae, a praesidente Americanorum in Aedes Albas ad diem vicesimum quintum mensis Iunii invitatus est.

Ex Aedibus Albis nuntiatum est Estoniae praesidentem cum praesidente George W. Bush de rebus tam regionalibus quam internationalibus colloquia habiturum esse.

Porro Estoniam esse optimum exemplum, quod ostenderet, quo modo libertas civitates Europae Orientalis et Mediae mutavisset illisque stabilitatem et opulentiam attulisset.

Magni ponderis esse etiam partem, quam Estonia, ut membrum NATONis, in condicionibus Afganistaniae et Iraquiae firmandis et pacandis ageret.

(Tuomo Pekkanen)

Sepulcrum Herodis Magni inventum

10.05.2007, klo 17.23

Archaeologi sepulcrum regis Herodis Magni in colle invenerunt, qui in ripa occidentali Iordanis fluminis duodecim chiliometra ad meridiem urbis Ierusalem situs est.

In eodem colle olim domum regiam Herodis fuisse constat. Excavationes archaeologicae ibi iam ante aliquot decennia inchoatae erant.

Sarcophagus autem regis, in multas particulas fractus, non ante quam medio mense Aprili in lucem venit.

Herodes Magnus fuit rex Iudaeorum ab anno tricesimo septimo usque ad annum quartum ante temporis rationem Christianam.

Ehud Netzer, professor Universitatis Hebraicae, pro certo affirmavit sepulcrum ab archaeologis apertum Herodis esse.

(Tuomo Pekkanen)

Rixa de statua Sovietica

04.05.2007, klo 10.46

Tallinnae, in capite Estoniae, tumultus vehementes orti sunt, cum regimen decrevisset, ut statua militis Sovietici in media urbe sita in coemeterium militare extra urbem deportaretur.

Russi, qui tertiam fere partem incolarum Estoniae faciunt, illud monumentum victoriae habent, Estonae autem memoriale occupationis Sovieticae.

Monumentum Tallinnae anno millesimo nongentesimo quadragesimo septimo (1947) positum "Statua liberatorum" inscriptum est; Unione Sovietica dissoluta, cum Estonia independentiam recuperavisset, inscriptionem "in memoriam secundo bello mundano caducorum" accepit.

Vulgo autem statua militis Sovietici aut miles aeneus appellatur. Die Veneris (27.4.) multo mane statua in novum locum transportata est, ubi postridie Nonas Maias sollemniter inaugurabitur.

Eodem etiam corpora mortuorum apud monumentum sepulta transferentur. In tumultibus Tallinnensibus, qui duas noctes duraverunt, tabernae mercatorum devastatae, octingenti homines deprehensi, centum quinquaginta vulnerati sunt.

(Tuomo Pekkanen)

Russia rebus Estoniae intervenit

04.05.2007, klo 10.45

Russi Estoniensibus de statua notam diplomaticam dederunt et delegatos Dumae sive parlamenti Tallinnam miserunt.

Illi delegati, ubi primum pervenerunt, nomine Dumae eodem die bis flagitaverunt, ut regimen Estoniae discederet.

Kristina Ojuland, vicepraeses parlamenti Estonici, mirabatur, quatenam futurae essent proximae nationes sodales NATONis et Unionis Europaeae, a quibus idem flagitaretur.

Urmas Paet, minister a rebus exteris Estoniae, recusavit, quominus delegatos Russos reciperet.

Censebat nullam causam esse talem delegationem convenire, cuius membra rebus Estoniae interioribus

intervenire temptavissent.

Estones quidem cum Russis colloquia sincera habere voluisse, sed proposita delegationis prorsus alia fuisse.

(Tuomo Pekkanen)

Estonia Russiam accusat

04.05.2007, klo 10.44

His diebus contra paginas interretiarias regiminis Estoniae facti sunt ictus, quibus fit, ut accessus in eas sit difficilis.

Rein Lang, minister iustitiae Estoniae, rettulit investigationes interretiarii protocolli (IP) ostendisse illos ictus ex institutis statalibus Moscuensibus venisse.

"Ex his patet," ait Lang, "esse Moscuae potestates politicas, quae omnem rationem amiserint."

(Tuomo Pekkanen)

Historia falsificata

04.05.2007, klo 10.43

Politici et acta diurna Russiae statuam illam aeneam usque "militis liberatoris" appellant et deportationem eius pro sympathia erga nazistas habent.

At anno millesimo nongentesimo quadragesimo quarto (1944) Unio Sovietica Estoniam non liberavit sed terram, cui independentiam iam ante impetum Hitlerianum violenter eripuerat, denuo expugnavit.

Acta Helsinkiensia (Helsingin Sanomat) monent Russis sine ullo dubio ius esse victoriam de Germania nazistica reportatam celebrare sed de liberatione terrarum Balticarum et totius Europae orientalis loqui nullum illis ius esse, quia nulla liberatio facta sit: unam dictaturam tantummodo in alteram esse mutatam.

(Tuomo Pekkanen)

Boris Jeltsin obiit

27.04.2007, klo 09.13

Boris Jeltsin, pristinus praesidens Russiae, die Lunae (23.4.) Moscuae annos natus septuaginta sex diem obiit supremum. Iam diu ex corde laboravit.

Unione Sovietica anno millesimo nongentesimo nonagesimo primo dissoluta, Jeltsin primus praesidens Russorum democratice creatus est et in munere usque ad Kalendas Ianuarias anni bis millesimi permansit. Ritus funeralis die Mercurii in cathedrali orthodoxa Christi Salvatoris Moscuae celebratus est. Postea Jeltsin in coemeterio Novodevitsh, ubi multi viri in Russia clarissimi requiescunt, sepultus est. Aderant in funere pristini praesidentes George Bush maior et Bill Clinton ex USA, ex Finnia Mauno Koivisto. Jeltsin fuit post annum millesimum nongentesimum septimum decimum primus moderator Russorum ritu Christiano sepultus. Dies Mercurii in tota Russia dies luctus publici declaratus erat. Apud Finnos Jeltsin ut defensor democratiae recolitur. Praesidens Finniae Tarja Halonen censebat eum democratiam in Russiam attulisse eamque in condicionibus difficilibus defendisse.

(Tuomo Pekkanen)

Sarkozy et Royal in altera suffragia

27.04.2007, klo 09.08

Nicolas Sarkozy conservativus et Ségolène Royal socialista pro opinione in altera suffragia Francorum evaserunt, cum haec viginti sex, ille unam et triginta votorum centesimas obtinuisset.

Francois Bayrou factionis centralis accepit undeviginti, Jean-Marie le Pen, moderator extremae dextrae, decem centesimas. Altera suffragia fient pridie Nonas Maias.

(Tuomo Pekkanen)

Regimen gynaecocraticum

27.04.2007, klo 09.08

Regimen Finniae nuper designatum ex viginti ministris constat, ex quibus feminae sunt duodecim, viri octo. Numquam antea feminae maiorem ministrorum partem apud Finnos habuerunt.

Cum praeterea etiam praesidens rei publicae Finniae sit femina, nullius in mundo nationis regimen tam gynaecocraticum videtur esse quam Finnorum. Ministeria quidem, quae viri in regimine tenent, sunt

maioris ponderis et auctoritatis, e.g. defensionis, aerarii publici, rerum exterarum, commercii exteri, rerum culturalium, atque munus primi ministri habere pergit Matti Vanhanen. Nihilo minus magnus feminarum numerus opinioni, quam peregrini de Finnis et politica eorum habent, sine dubio usui est. (Tuomo Pekkanen)

Finni inter felicissimos numerandi

27.04.2007, klo 09.07

Investigatio in Universitate Britanniae Cantabrigensi facta Finnos inter populos in Unione Europaea felicissimos numerat.

In comparatione quindecim terrarum Finni post Danos secundo loco positi sunt. Ultimi erant Itali, Portugalli, Graeci. Ex illa investigatione apparuit feminas in universum aestimanti viris feliciores esse. (Tuomo Pekkanen)

Radiatio ultravioleacea periculosa

27.04.2007, klo 09.06

Societas oncologica et Institutum meteorologicum praemonent iam tempore vernali nimiam apricationem periculum cancri cutanei augere.

Cutis et oculi sunt protegenda, cum index radiationis ultravioleaceae (UVI), qui vim radiationis uno numero describit, tres superavit. Talis est radiatio in Finnia meridionali inde a mense Maio usque ad finem Augusti.

(Tuomo Pekkanen)

Maxima catastropha politica

19.04.2007, klo 17.12

Madeleine Albright, ministra a rebus exteris praesidentis Bill Clinton, censet bellum, quod in Iraquia geritur, esse maximam catastropham politicae externae Americanorum.

Si qua terra ex condicionibus Iraquiae utilitatem perceperit, eam esse Iraniam.

Unum ex pessimis effectibus belli Iraquici esse, quod Irania convaluerit.

(Tuomo Pekkanen)

Nova de abortu lex in Portugallia

19.04.2007, klo 17.12

Anibal Cavaco Silva, praesidens Portugalliae, novam legem confirmavit, qua abortus artificialis usque ad decimam graviditatis septimanam permitteretur.

Lex verisimiliter inde a proximo mense valebit. Prior de abortu lex Lusitanorum inter durissimas in Europa habebatur.

Ordines feminarum aestimant circiter decem milia mulierum effectibus abortuum illegalium laborantes in nosocomiis curatas esse.

(Tuomo Pekkanen)

Natura insularum Galápagos in periculo

19.04.2007, klo 17.11

Insulae Galápagos sive Testudineae, in Oceano Pacifico positae, ad Aequatoriam pertinent, a cuius ora circiter mille chiliometra in occidentem versus distant.

Nomen acceperunt a galápagos, quo verbo Hispanico testudo maritima significatur. Rafael Correa, praesidens Aequatoriae, nuper monuit naturam harum insularum esse in periculo.

Numerus incolarum est in his insulis circiter duodeviginti milium, praeterea singulis annis complura millena hospitum eo veniunt atque multa hominum milia ibi etiam illegaliter versantur.

Cum natura tantam hominum multitudinem sine damno sustinere non possit, magistratus Aequatoriani iam deliberant, quo modo aditus in insulas circumscribatur.

Periculum insulis Testudineis, quarum oecosystema est singulare, etiam genera animalium peregrina eo admissa atque piscatio squalorum illegalis faciunt.

Illae insulae velut laboratorium quoddam theoriae evolutionis habentur, quibus Charles Darwin, cum eo venisset, motus est, ut suam de evolutione rationem conciperet.

(Tuomo Pekkanen)

Cheetah LXXV annorum

19.04.2007, klo 17.10

Cheetah simia, quae in compluribus pelliculis cinematographicis una cum Tarzan agebat, septuaginta quinque annos complevit.

Oriunda est ex Liberia, unde anno millesimo nongentesimo tricesimo secundo in USA portata est.

Proximos sedecim annos cum curatore suo in Palm Spring Californiae vixit. Notissimus actor in

pelliculis Tarzan fuit Johnny Weissmuller, qui iam ante triginta tres annos diem obiit supremum.

Cheetah autem adhuc optime valet et in genere suo vetustissima in mundo simia habetur.

In libertate simiae raro quadraginta annos superant sed in hortis zoologicis aetatem sexaginta annorum saepe adipiscunt

(Tuomo Pekkanen)

ALF Romam convenit

19.04.2007, klo 17.09

Academia Latinitati Fovendae (ALF) in urbe Roma hodie (20.4.) sessionem annuam agit.

Theodoricus Sacré acroasim habet "De Maphaei Barberini sive Urbani VIII P.M. carminibus iuvenilibus".

Nicolaus Sallmann loquitur de proximo Academiae conventu, quo annus bis millesimus post pugnam Teutoburgiensem celebrabitur.

Praeterea habentur suffragia, quibus moderatores Academiae in proximum triennium eliguntur.

(Tuomo Pekkanen)

De calamitate tsunami

05.04.2007, klo 17.13

In Insulis Salomoniis, quas in Oceano Pacifico iacere constat, die Lunae multo mane terrae motus subaquaneus accidit, cuius vis octo gradus Richterianos effecisse nuntiatur.

Ex concussione ortum est tsunamum admodum vehemens, quod imprimis partibus illius archipelagi occidentalibus tanta vi impexit, ut complures vici et oppida omnino delerentur.

Quot homines ea calamitate vitam amiserint, nondum pro certo constat, sed timetur, ne numerus mortuorum multorum denorum sit.

(Reijo Pitkäranta)

Discrimen Ucrainae politicum

05.04.2007, klo 17.13

Discrimen politicum, quo Ucraina iam per longum tempus vexatur, die Lunae vesperi in peius versum est, cum praesidens Victor Justshenko parlamentum dissolvi et nova comitia mense proximo exeunte fieri iussit.

Causa, cur id fecerit, subesse videtur, quod metuere coepit, ne primus minister Victor Janukovits, adversarius eius politicus, apud parlamentum iam nimia auctoritate valeret.

(Reijo Pitkäranta)

Electrificina solaris maxima

05.04.2007, klo 17.12

In regione Alentejo, quae in Portugallia meridiana sita est, electrificina solaris omnium efficacissima ritu sollemni in usum recepta est.

Laminae eius solares, quippe quae in campum sexaginta hectarearum se extendant, tantum electricitatis gignunt, ut haec copia energiae octo milibus domuum suppeditandae facile sufficiat.

Alentejo eo opportunior locus eiusmodi operis faciendi existimatur, quod sol ibidem plus trina milia horarum singulis annis lucet.

(Reijo Pitkäranta)

Memoria belli Falclandici

05.04.2007, klo 17.12

Postridie Kalendas Apriles (2.4) viginti quinque anni acti erant a bello in insulis Falclandicis sive Macloviensibus inter Britanniam et Argentinam orto.

Conflictus initium cepit, cum nautae regiminis militaris Argentinae illas insulas in Oceano Atlantico australi sitas Britannis eripere et in dicionem suam redigere conati sunt.

Illud bellum, quo plus nongenti homines occisi sunt, septuaginta quattuor diebus post sive postridie Idus Iunias (14.6.) victoria Britannorum compositum est.

(Reijo Pitkäranta)

Primatus velocitatis ferriviariae

05.04.2007, klo 17.11

Tramen Francogallicum celeritatem ferrivariam omnium temporum maximam consecutum est. Velocitas enim eius experimento prope Lutetiam Parisiorum hac septimana facto ad quingena septuagena quina chiliometra horalia crevit. Constat vehiculum ex tribus curribus, qui rotis praegrandibus praediti erant, et propellebatur duabus machinis vectoriis summae efficacitatis. (Reijo Pitkäranta)

Missale vetus in Finnia repertum

05.04.2007, klo 17.11

Valle Gratiae, in oppido Finniae, missale mediaevale tantae raritatis inventum est, ut in libris nostris omnium vetustissimis numeretur.

Verisimile est hoc opus, quod in tutela officii parochialis reconditum erat, saeculo tertio decimo exeunte aut in Anglia aut in Francogallia compositum esse.

(Reijo Pitkäranta)

Anniversarium UE quinquagesimum

30.03.2007, klo 15.21

Moderatores Europaei septimana vergente (24-25.3.) Berolinum convenerunt, ut diem anniversarium quinquagesimum tractatus Romani celebrarent.

Ille tractatus, quo Communitas Oeconomica Europaea (EEC) in urbe Roma condita est, fundamentum hodiernae Unionis Europaeae habetur.

Praesentibus moderatoribus declaratio de rebus gestis, statu propositisque Unionis Berolini divulgata est.

Ex illa declaratione Unio id agit, ut ante annum bis millesimum nonum, quo proxima comitia parlamentaria Europaea fient, structuram suam renovet.

De lege autem fundamentali aut de amplificatione Unionis, de quibus nationes sodales dissentiunt, in declaratione Berolinensi nulla fit mentio.

Summus Pontifex Benedictus XVI Unionem Europaeam duris verbis vituperavit, quod in declaratione Berolinensi, ad anniversarium Unionis quinquagesimum divulgata, nulla de Deo Christianorum mentio facta esset.

Europam apostasiae noxiam de vera fide defecisse, cum et Dei et radicium suarum Christianarum oblivisceretur.

(Tuomo Pekkanen)

Dies Annuntiationis

30.03.2007, klo 15.20

Natalis Unionis Europaeae incidit in diem Annuntiationis Beatae Virginis Mariae, qui in ecclesia Christiana novem mensibus ante Nativitatem Domini celebratur.

Annuntiationis dies inde nomen habet, quod euangelista Lucas narrat Angelum Gabrielem ad Mariam advenisse et dictis verbis "Ave, gratia plena" annuntiasse illam filium Iesum parituram esse.

(Tuomo Pekkanen)

Papa linguam Latinam commendat

30.03.2007, klo 15.19

Mense Februario (22.2.) Pontifex Romanus exhortationem post-synodalem nomine "Sacramentum Caritatis" dedit, in qua linguam Latinam sacerdotibus commendat: In conventibus internationalibus, qui hodie frequentiores habeantur, unitatem et universalitatem ecclesiae clarius exprimi, si liturgia Latine celebretur, exceptis scilicet lectionibus, homilia precibusque fidelium.

Praesces autem notissimae Latine recitentur et cantus Gregoriani cantentur.

Sacerdotes futuros Papa hortatur, ut ad missam Latine celebrandam, ad textus Latinos usurpandos, ad cantus Gregorianos cantandos se praeparent; fideles posse doceri, ut praesces communiores Latine recitent et partes liturgiae more Gregoriano cantent.

(Tuomo Pekkanen)

Shinzo Abe veniam rogavit

30.03.2007, klo 15.16

Minister Iaponiae primarius Shinzo Abe confessus est Iapones inter secundum bellum mundanum feminas ex regionibus Asiae, quas occupaverant, in servitium sexuale arripuisse. Antea Iapones illis criminibus saepius negatis iram peregrinorum excitaverunt. Feminae, quae ut consolatrices in lupanaribus Iaponum laborare coactae erant, circiter ducenta milia numerabantur.
(Tuomo Pekkanen)

Zonae climaticae mutantur

30.03.2007, klo 15.16

Investigatores Americani praedicunt magnas in zonis climaticis mutationes hoc saeculo futuras esse. Illas mutationes, praecipue ad zonas calidam et temperatam spectantes, floram et faunam illarum zonarum afficere.

Maxime periclitari animalia zonae calidae, quia in illa regione temperaturae minime variant neque animalia accomodatae sint ad variationes.

Comitia Finniae parlamentaria

23.03.2007, klo 08.45

Die Dominico (18.3.) in Finnia comitia parlamentaria habita sunt, ut apud nos quinto quoque anno fieri consuevit.

Eventu suffragiorum divulgato apparuit factionem centralem, quamvis detrimentum quattuor sedium cepisset, tamen unam et quinquaginta sedes sibi conciliavisse itaque principatum in parlamento servasse.

Qui successus autem nihil erat ad victoriam, quam conservativi reportaverunt: grex enim eorum parlamentaris decem legatis auctus usque ad quinquaginta homines crevit.

Eo acerbior erat clades socialistarum, quippe quorum numerus a quinquaginta tribus ad quadraginta quinque descenderet.

Adversa perpressae sunt etiam partes Foederis sinistrorum duabus sedibus amissis.

Factiones minores varia fortuna dimicaverunt: prasini, qui dicuntur, quindecim sedes consecuti gratiam suam priorem paululum auxerunt, item partes populares Finno-Suotorum decem sedibus occupatis.

Democratae autem Christiani, quibus septem legati obtigerunt, eodem statu quo ante remanserunt.

Factio autem Finnorum fundamentalium tantum progressum fecit, ut in locum trium legatorum quinque substituerentur.

(Reijo Pitkäranta)

Sauli Niinistö rex comitiorum

23.03.2007, klo 08.44

Sauli Niinistö, pristinus candidatus praesidentialis partium dextrarum, regem quendam illorum comitiorum se praebuit: conquisivit enim sibi plus sexaginta milia suffragiorum, qua maiorem sententiarum copiam nemo umquam in electionibus in Finnia institutis accepit.

(Reijo Pitkäranta)

Nova Felinarum species inventa

23.03.2007, klo 08.44

Anno proxime praeterito in Borneo quinquaginta duae novae herbarum et animalium species repertae sunt, ut refert Ordo internationalis naturae tuendae (WWF).

In iis est animal felinum, quod antea pro Neofele nebulosa, bestia in Asia continenti vivente, habebatur. Recentioribus autem investigationibus apparuit feram insularem a Neofele continentali tantum differre, quantum leonem a tigri et tigrim a pardo.

(Reijo Pitkäranta)

Theatrum antiquum repertum

23.03.2007, klo 08.43

Theatrum Acharnanum, quod in Graecia antiqua clarissimum erat, abhinc paucas septimanas a quibusdam structoribus fortuito inventum esse nuntiatur.

Fodiebantur fundamenta cuiusdam aedificii, quod decem chiliometra a mediis Athenis in septentriones aberat, cum fori theatri lapidei reperti sunt.

Scaena autem et ceterae parietinae sub platea domibusque propinquis obrutae latebant.

Illud theatrum saeculo quinto a.Chr.n. sive aetate urbis Atheniensium aurea adhibebatur.

(Tom Bergman)

Concentus ecclesiasticus Latinus

23.03.2007, klo 08.42

Chorus Neapolitanus musicae barocae deditus nomine Mysterium vocis die Lunae (19.3.) vesperi Helsinki in Ecclesia Iohannis sacra concentum Latinum edidit.

Programma imprimis ex tribus hymnis Latinis mediaevalibus constabat, quorum modi a musicographis Neapolitanis saeculo duodevicesimo compositi erant.

Cantus ecclesiastici, quos ille chorus mira arte praesentabat, erant "Dies irae", "Stabat mater", "Veni Creator Spiritus".

(Reijo Pitkäranta)

Quid Bush in Columbia dixerit

16.03.2007, klo 09.08

Praesidens George Bush, dum varias civitates Americae Latinae circumlustrat, die Martis in Columbian venit.

Bogotae, in urbe principe huius civitatis, ubi incolumitati suae consulens nonnisi sex horas mansit, praesidentem Alvaro Uribe maxime in eo laudavit, quod summo studio adversus mercaturam drogarum pugnare pergeret. Bush promisit se ei novis subsidiis opitulaturum esse, ut regimini Columbiae contra bellatores tectos et duces drogarum dimicanti succurreret.

(Reijo Pitkäranta)

Foedus Iaponiae et Australiae

16.03.2007, klo 09.07

Australia et Iaponia foedus securitatis icerunt, quo facto hae civitates, quae bello altero mundano hostes acerbissimae fuissent, tamen artissima societate inter se coniunctae sunt.

Pactores et tabularum subscriptores erant principes ministri John Howard et Shinzo Abe, qui conventum communem de ea re in urbe Tokio habuerunt. Moderatores negaverunt novam cooperationem contra Sinas agere, cum antea dixissent se de sumptibus militaribus ibidem auctis sollicitos esse.

(Reijo Pitkäranta)

Memoria stragis Matritensis

16.03.2007, klo 09.06

Die Dominico (11.3.) tres anni acti erant ab ictu terroristico funestissimo in urbe Matrigo effecto, quo paene ducenti homines occisi et amplius mille octingenti sauciati sunt.

Ad memoriam mortuorum recolendam in uno ex iis tribus locis, quibus facinus perpetratum erat, monumentum vitreum cylindroides revelatum est: inter caerimoniam, cui etiam rex Hispaniae Iohannes Carolus cum coniuge Sophia aderat, silentium triste quinque minutarum actum est.

(Reijo Pitkäranta)

Februarius in Finnia gelidior

16.03.2007, klo 09.06

Fuerit iam sane in eo, ut clima orbis terrarum paulatim calefiat, at certe mensis Februarius in Finnia compluribus gradibus Celsius gelidior fuit quam fieri solet.

Id ita se habere vel inde apparet, quod in paroechia Salla, quae in Lapponia sita est, temperatura quodam die Februario usque ad quadraginta fere gradus infra zerum descendit. Mensis autem Ianuarius apud nos mirum quantum mitis fuit, quo factum est, ut temperatura totius hiemis media in Finnia mensuram consuetam non excederet.

(Reijo Pitkäranta)

Harrius Potter Latine redditus

16.03.2007, klo 09.05

Constat seriem librorum de Harrio Potter narrantium a scriptrice Anglica J.K. Rowling creatam esse.

Peter Needham, qui linguam Latinam in collegio Eton iam triginta annos docet, duo huius seriei volumina ex Anglico in Latinum convertit: quorum librorum prior, *Harrius Potter et Philosophi Lapis*, anno bis millesimo tertio (2003) editus est, posterior autem, qui *Harrius Potter et Camera Secretorum* inscribitur, hoc anno ineunte in lucem venit.

(Maija Ketoluoto-Nurminen)

Tumultus Hafnienses

09.03.2007, klo 16.18

Hafniae, in capite Danorum, Kalendis Martiis tumultus violenti per tres dies fiebant, cum vigiles publici domum, cui nomen Ungdomshuset, a iuvenibus occupatam vacuefecissent.

Iuvenes recusaverant, quominus ex domo exirent, quamquam illa iam multis annis ante sectae cuidam religiosae vendita erat.

Tumultuantes vehicula concremabant, fenestras frangebant, lapides contra vigiles iaciebant, scholam regionis Christianshavn cum supellectile et bibliotheca penitus deleverunt.

Circiter sescenti quinquaginta participes tumultuum deprehensi, plus quam ducenti ex eis in carcerem coniecti sunt, ubi aliquot septimanas iudicium exspectantes permanebunt.

(Tuomo Pekkanen)

De numero Sinensium

09.03.2007, klo 16.17

Sinenses anno vergente plus miliardum trecenti miliones numerabantur.

Ex eis quadraginta quattuor centesimae in urbibus vivebant. Politica unius infantis aequilibrium sexuum perturbavit, nam plures quam dimidium Sinensium (51,5%) sunt viri.

Magistratus censent post quindecim annos numerum virorum caelibum triginta milionibus maiorem quam feminarum apud Sinenses futurum esse.

(Tuomo Pekkanen)

De iuribus humanis zingarorum

09.03.2007, klo 16.15

Ordo UNICEF rettulit iura humana puerorum zingarorum in Europa orientali meridionali late violari.

In universum aestimanti circiter milio ex liberis zingarorum cura salutis caret neque omnes in scholam admittuntur.

Multi zingari in regionibus illegalibus vivunt ideoque documenta personalia, nisi multis cum difficultatibus, accipere non possunt.

(Tuomo Pekkanen)

Artificia a nazistis ablata quaeruntur

09.03.2007, klo 16.15

Inter secundum bellum mundanum nazistae a Iudaeis Europae circiter sescenta milia artificiorum abstulerunt, ex quibus circiter centum milia possessoribus nondum restituta sunt.

Illa etiam in Finnia indagari coepta sunt. Accuratius investigantur quadringenta fere opera, quae in collectionibus viginti septem museorum conservantur.

(Tuomo Pekkanen)

Pecus volatile intus tenendum

09.03.2007, klo 16.13

Propter vernam migrationem avium pecus volatile a Kalendis Martiis usque ad Kalendas Iunias in Finnia intus tenendum est, ne morbus aviarius vegetur.

Etiam expositiones pecoris volatilis vetitae sunt. Nam inter migrationem vernam aves etiam ex eis terris in Finniam venire solent, in quibus hieme morbus aviarius occurrit.

(Tuomo Pekkanen)

Henri Troyat diem obiit

09.03.2007, klo 16.12

Henri Troyat, scriptor origine Russus, qui anno millesimo nongentesimo septimo decimo cum parentibus ex Russia in occidentem fugit et in Francia mansit, nonaginta quinque annos natus diem obiit supremum.

Plus quam centum opera Francogallice scripsit, in quibus plerumque res pristinae patriae tractavit, quam ob rem "Tolstoi Francorum" appellabatur

Sciatrix regina

09.03.2007, klo 16.11

In urbe Sapporo Iaponiae certamina mundialia athleticae hibernae die Dominico (4.3.) clausa sunt. Genera principalia erant scridationes virorum et feminarum atque desultura ex suggestu scridatoria. Plurima nomismata Norvegi occupaverunt.

Ex omnibus athletis princeps exstitit Virpi Kuitunen Finlandensis, quae tribus aureis nomismatis acceptis sciatrix regina huius hiemis iure appellatur.

(Tuomo Pekkanen)

Irania programma nucleare non interruptet

02.03.2007, klo 15.19

Praesidens Iraniae Mahmoud Ahmadinejad iterum repetivit Iranianos programma nucleare interrupturos non esse; illud esse velut tramen, quod nec frena nec iuncturam retrogressus haberet. Contumacius autem minister adiunctus a rebus exteris Iraniae, qui affirmavit patriam suam propter litem nuclearem etiam ad bellum paratam esse.

Nationes, quae sunt sociae permanentes in Consilio Securitatis Nationum Unitarum, Londinium convenerunt, ut de programme nucleari Iranianorum novam sententiam adumbrarent.

Ordo internationalis ab energia atomica (IAEA) confirmavit Iraniam, neglectis postulationibus occidentalium, programma uranii condensandi etiam post diem illis constitutam continuare.

(Tuomo Pekkanen)

Corea Septentrionalis Finnis notam

02.03.2007, klo 14.48

Nota diplomatica in ministerium a rebus exteris Finniae missa, Corea Septentrionalis de casu exquirat, in quo telonarii et vigiles Finni contra duos legatos Coreanos vim adhibuerint.

Illa nota ad rixam pertinet, quae in tramine Moscua-Helsinki inter illos legatos et magistratus Finnos orta est.

Legati in compartimento traminis clausi recusaverunt, quominus telonariis documenta sarcinasque monstrarent, neque inspectores in compartimentum intrare permiserunt.

Feminam telonariam male mulcaverunt neque induci poterant, ut ex compartimento exirent, antequam vigiles gasum lacrimiferum adhibuerunt. Deinde ad stationem biocolytarum urbis Kouvola portati sunt. Denique legati, interveniente ministerio rerum exterarum Finniae, liberati iter proximo tramine perrexerunt.

Coreani Septentrionales, qui linguas peregrinas nesciebant, tabellas diplomaticas Stockholmiam portaturi erant.

Iter per Finniam faciebant, quia de navibus trajectoriis commodissimis inter Helsinki et Stockholmiam comitantibus audiverant.

(Tuomo Pekkanen)

Navis oneraria a piratis occupata

02.03.2007, klo 14.47

Die Dominico (25.2.) piratae navem onerariam, a Nationibus Unitis conductam, apud oram Somaliae occupaverunt.

Illa navis auxilium cibarium in Somaliam portabat. Piratae nondum de pecunia redemptionis aut de aliis postulatis suis nuntiaverunt neque de sorte nautarum, qui duodecim numerabantur, quicquam compertum est.

(Tuomo Pekkanen)

Cleopatram non fuisse pulcherrimam

02.03.2007, klo 14.45

Cleopatra, regina Aegyptiorum, quam Iulius Caesar et Marcus Antonius amabant, symbolum pulchritudinis habetur.

Hodie autem de pulchritudine eius disceptari coeptum est, nam nummus, anno tricesimo tertio ante Christum natus, ostendit reginam mento nasoque acuto et labris tenuibus.

Marcus Antonius, in altera parte eiusdem nummi delineatus, est strabonus, cervicibus crassis et naso adunco.

Sed criteria pulchritudinis cum temporibus mutantur, et imagines antiquorum regum vel reginarum potius potestatem quam veram similitudinem praeferre solebant.

Cleopatram fuisse feminam ingenio acerrimo nemo infitatur.

(Tuomo Pekkanen)

De copiis ex Iraquia reducendis

23.02.2007, klo 10.35

Britanni copias suas in Iraquiam missas mille sescentis militibus deminuturi sunt.

De ea re narravit princeps minister Tony Blair, qui docuit illas cohortes ea condicione in patriam reductum iri, ut Iraquia meridiana in tutelam Iraquianorum ipsorum tradi posset.

Huc accedit, quod peditatus Danorum ante mensem Augustum ex Iraquia domum revocabitur et in locum eius parva helicopterorum copia mittetur.

(Reijo Pitkäranta)

Relationes Indiae et Pakistaniae

23.02.2007, klo 10.35

Saltem duodeseptuaginta homines mortui sunt, cum bombae in sarcinis reconditae in tramine, quod ex India in Pakistaniam versus iter faciebat, exitialiter displosae sunt.

Illud facinus pro ictu terroristico habetur, quod eo spectet, ut conatus pacis inter Indiam et Pakistaniam faciendae ad irritum cadant.

Quae quamvis ita essent, tantum afuit, ut utrique alter alterum criminarentur, ut consultationes pacis biduo post continuare decernerent.

(Reijo Pitkäranta)

Conventus in Proximo Oriente

23.02.2007, klo 10.34

Ehud Olmert, princeps minister Israelis, et Mahmoud Abbas, praesidens Palaestinensium, conventu Hierosolymis habito amplius duas horas de summis rebus colloqui sunt.

Sequestra pacis erat Condoleezza Rice, ministra a rebus exteris Civitatum Americae Unitarum.

Quae nuntiavit utramque partem se id acturam esse promisisse, ut Israeliani et Palaestineses coniunctim et cum pace viverent.

Id quoque convenisse, ne civitas Palaestinensium vi et terrore posita conderetur.

(Reijo Pitkäranta)

Genera animalium rarissima

23.02.2007, klo 10.33

Consociatio zoologica Londinensis consilium iniit, quo prohibere conatur, ne genera animalium omnium rarissima omnino emoriantur.

Hoc anno in illo indice circiter decem species insunt, e. gr. vespertilio in orbe terrarum omnium minimus et delphinus quidam in flumine Ianzekiango vivens.

Sunt autem, qui metuant, ne hoc delphinorum genus iam disparuerit.

(Reijo Pitkäranta)

Comitia parlamentaria futura

23.02.2007, klo 10.33

Die duodevicesimo mensis Martii (18.3.) in Finnia comitia parlamentaria instituentur, ut apud nos quarto quoque anno fieri solet.

Numerus candidatorum duo milia quattuor efficiens idem fere est atque abhinc quattuor annos.

Petitores ex duodeviginti factionibus sunt ac quidem ita, ut plerique eorum cum partibus parlamentaribus hodiernis stent.

(Reijo Pitkäranta)

De reliquiis Henrici et Birgittae

23.02.2007, klo 10.32

Reliquiae Ecclesiae cathedralis Aboensis denuo investigabuntur, cum speretur fore, ut rationibus hodiernis utendis de iis aliquid novi cognoscatur.

In numero harum reliquiarum sunt calvaria radiusque Sancti Henrici episcopi et pileus Sanctae Birgittae.

Traditum est Henricum conditorem et primum episcopum ecclesiae Finlandensis fuisse eumque a rustico quodam nomine Lalli necatum esse.

(Tom Bergman)

De programmata nucleari concordia

16.02.2007, klo 13.14

In consultationibus multilateralibus, quae Pekini de programmata nucleari Coreae Septentrionalis fiebant, concordia constituta est.

Summa rerum haec est: Coreani Septentrionales principale reaktorium nucleare intra duos menses claudent et a nationibus peregrinis magnam copiam petrolei aliudque auxilium oeconomicum accipient. Praeterea Americani Coream Septentrionalem ex indice terrarum terrorismo faventium tollent.

(Tuomo Pekkanen)

Putin in tertium praesidentatum rogatus

16.02.2007, klo 13.13

In colloquio interrogatorio canalis televisifici Al-Jazeera Vladimir Putin narravit moderatores civitatum Arabicarum et quosdam duces terrarum Europaeorum se rogavisse, ut unum adhuc praesidentatum susciperet.

Accuratius autem non aperuit, qui aut quibus ex terris illi duces Europaei essent, qui id in colloquiis privatis petivissent.

(Tuomo Pekkanen)

Nigricolor in USA candidatus praesidentatus

16.02.2007, klo 13.08

Iam quadraginta anni acti sunt ex quo homines nigricolores segregatione phyletica finita in USA iura civilia acceperunt, sed nunc primum fieri potest, ut vir nigricolor praesidens Americanorum designetur. Ille est Barack Obama, senator democrata Illinoisianus, qui quidem hucusque breve tempus in politica operatus est.

Acerrima autem competitrix eius est Hillary Clinton, femina omnibus notissima, quae hoc tempore plures apud democratas quam Obama fautores habet.

Razismus, suspiciones moresque veteres profundissimas apud Americanos radices usque habent et multi sunt, qui de praesidente nigricolore ne cogitare quidem possunt.

(Tuomo Pekkanen)

Novus praesidens Turkmeniae

16.02.2007, klo 13.07

Saparamurat Nijazov, praesidens Turkmeniae licentiosus et superbus, qui Turkmenos viginti annos sub iugo tenuerat, mense Decembri mortuus est.

Gurbanguly Berdimuhamedov, praesidens ad interim nominatus, comitiis habitis successor dictatoris a populo creatus est.

Nijazov sibi statuas aureas ponendas curaverat et vitam civium multis modis restrinxerat.

Saltationem scaenicam, dramata melica, musicam taeniis discisve impressam in televisione et radiophonia transmittere aut in nuptiis aliisve celebrationibus praesentare vetuerat, omnia viridaria publica et multas bibliothecas clauserat.

Illo praesidente iuvenibus non licuit longam barbam longosque capillos habere. Tyranno mortuo cives vitae condiciones liberiores exspectant.

(Tuomo Pekkanen)

In Lusitania de abortu suffragium

16.02.2007, klo 13.06

Portugalienses, olim Lusitani dicti, de abortu lege permittendo suffragium populi habuerunt.

Maior pars suffragantium novam legem probavit, qua abortus primis decem graviditatis septimanis permitteretur.

Suffragium autem non obligat, quia minus quam dimidium ex ius suffragii habentibus ad urnas venit.

Ex his sexaginta fere centesimae (59,3%) novam legem sustinuerunt, circiter quadraginta centesimae (40,7%) mutationem noluerunt.

Nihilo minus minister primarius Jose Socrates, cuius factio socialistica maiorem in parlamento partem delegatorum habet, affirmavit novam legem perlatum iri.

Ex lege vetere abortus in rarissimis tantum casibus permittitur.

(Tuomo Pekkanen)

De inundationibus Indonesiae

09.02.2007, klo 11.10

Aquae diluviales, quae Iacartam, urbem principem Indonesiae his diebus obruerunt, die Martis (6.2.) paulatim descendere coeperunt.

Quae quamvis ita essent, etiamtum superficies aquarum tribus fere metris supra limitem inundationis, qui dicitur, usque manebat.

Imbribus et inundationibus Indonesiam affligentibus saltem quadraginta quattuor homines necati sunt et quadraginta fere milia civium propter morbos cutaneos et ventrales a medicis curantur.

Ordines circumiectales non dubitant, quin, nisi Indonesia tot silvicidiis vastata esset, fieri non potuerit, ut tanta clades naturae accideret.

(Reijo Pitkäranta)

Quid Vladimir Putin dixerit

09.02.2007, klo 11.09

Vladimir Putin, praesidens Russiae, interrogatus, quid de Finnia ad confoederationem Nato adiungenda sentiret, negavit se credere securitatem orbis terrarum meliorem redditum iri, si Finni ad illam societatem accessissent.

"Multo praestat", inquit, "viribus unitis adversus varios terrores internationales super omnium cervice pendentes pugnare quam structuras militares iuxta confinium Russiae admove. Talia consilia ad relationes Finniae et Russiae corroborandas nihil conferunt."

(Reijo Pitkäranta)

Tumultus pedifollicus Italiae

09.02.2007, klo 11.08

Societas pedifollica Italiae interdixit, ne hac septimana in Italia ulla certamina pedifollica aut ad series nationales aut ad ludos internationales pertinentia ponerentur.

In causa huius decreti est tumultus violentissimus in Sicilia nuper factus: in stadio enim Catinensi, dum grex Panhormitanus cum manu Catinensium de victoria certat, res subito in tantam perturbationem erupit, ut quidam custos publicus interficeretur et complures spectatores in nosocomium propter laesiones graves deportarentur.

(Reijo Pitkäranta)

Nomina Suetis gratissima

09.02.2007, klo 11.08

Nomina Lucas et Emma anno proxime praeterito maxima gratia apud populum Sueticum valebant.

Tum enim nongentae nonaginta una puellae recens natae in baptismo Emma nominatae sunt, cum numerus puerorum nomen Lucas habentium mille centum septem esset.

Aliquot nomina, quae annis saeculi proximi quadragesimis et quinquagesimis civibus Suetis acceptissima erant, auram popularem iam amisisse videntur. In numero eorum sunt Kjell, Irene, Gunilla.

(Tom Bergman)

De frigore hiemali in Finnia

09.02.2007, klo 11.07

Inde a primis diebus mensis Februarii Finnia tantis frigoribus hiemalibus vexatur, ut temperatura non solum in Lapponia, sed etiam in regionibus mediae Finniae ad quadraginta fere gradus infra zerum descenderit.

Quantam vim hoc tempus gelidissimum ad vitam cotidianam habuerit, vel inde apparet, quod consumptio electricitatis ad summum fastigium evecta est.

Praeterea commeatus publicus claudicavit, cum nonnumquam accidit, ut tramina propter vitia technica ex gelu exorta ad metam hora constituta non pervenirent.

(Reijo Pitkäranta)

Gratia praesidentis Bush deminuta

02.02.2007, klo 14.16

Ex interrogatione, quam acta "Newsweek" faciendam curaverunt, apparuit non plus quam triginta fere

centesimas Americanorum politicae praesidentis Bush favere.

Interrogatio facta est post orationem praesidentis de condicione patriae habitam, in qua ille consilium copias in Iraquia augendi defendebat, quamquam gratiam suorum propter res ibi male gestas perdiderat. Maior pars ex eis, qui sententiam rogabantur, sperabant fore, ut Hillary Clinton, senatrix democrata, in proximis comitiis praesidens designaretur.

Illa praesidentis de bello Iraquico consilia verbis durissimis vituperavit et flagitavit, ut Bush Americanos ex rebus Iraquiae usque gravescentibus dissolveret, antequam munus deponeret.

In urbe Washington complura dena milia hominum contra bellum Iraquicum reclamitaverunt postulantes, ut copiae Americanorum in patriam deducerentur.

Intererant in reclamatione milites veterani, politici familiaresque militum, qui in illo bello ceciderant. Numerus Americanorum in bello Iraquico mortuorum est iam plus tria milia.

(Tuomo Pekkanen)

Praesidens Israelis munere liberatus

02.02.2007, klo 14.15

Parlamentum Israelis praesidenti Moshe Katsav a munere liberationem concessit, quam ille petiverat. Katsav ad interim discedit, quia fieri poterit, ut de stupro aliisque facinoribus accusetur.

Loco eius in praesidentatum ascendit Dalia Itzik, praeses parlamenti, quae futura est prima in Israele praesidens femina.

(Tuomo Pekkanen)

Australia siccitate vexatur

02.02.2007, klo 14.14

Scientifici Australiani censent siccitatem, quae patriam eorum iam sexennium vexat, pessimam mille annis forsitan esse.

Aqua fluminum Murray et Darling ita descendit, ut irrigationem agrorum circumscribere necesse esset, ne fluctus omnino exhauriretur.

Regio illorum fluminum, magnitudine par Galliae et Hispaniae, ad agriculturam Australiae maxime interest.

Incendia quattuor milia sescenta chiliometra quadrata vastaverunt, penuria aquae magnam frumenti partem delevit vineasque afflixit.

Desperatis iam rebus civitas Queenslandia nuper decrevit, ut aqua cloacalis in potabilem aquam purgaretur.

Magistratus iudicaverunt aquam potabilem eius civitatis, si nihil factum esset, intra tres annos defecturam esse.

(Tuomo Pekkanen)

Allergiae apud Finnos increbruerunt

02.02.2007, klo 14.14

His quadraginta annis allergiae apud Finnos quadruplicatae sunt.

Ex investigatione novissima, in Academia Finnica facta, allergiae sunt in Finnia quater crebriores quam in parte Careliae Russica.

Ibi autem et pulvis domesticus et aqua notabiliter plura microbia continent quam in Finnia. Microbia systema immunitatis subigunt et contra allergias tolerantiam et tutelam praestant.

Ex hygiene nimis bona facile sequitur, ut microbia in domibus non tantopere vagentur quam in condicionibus minus hygienicis.

Itaque investigatores praesertim parentibus infantium suadent, ut nimiam hygienem evitent.

(Tuomo Pekkanen)

Quid George Bush dixerit

25.01.2007, klo 17.35

Praesidens Civitatum Americae Unitarum semel in anno orationem de condicione patriae facere solet.

George Bush, cum die Martis illam contionem apud parlamentum haberet, ait se maxime niti, ut Americani decem annis proxime futuris consumptionem benzini quinta parte deminuerent.

Idem dixit sibi propositum esse numerum horreorum materiae combustibilis, quae in America essent, ad annum bismillesimum vicesimum septimum (2027) decemplicem reddere.

Quod ad politicam exteriorem attinet, Bush consilium suum de copiis in Iraquia augendis defendit et a legatis parlamentaribus petivit, ut patienter exspectarent, donec illud consultum bonos eventus haberet.

(Reijo Pitkäranta)

Rerum in Somalia condicio

25.01.2007, klo 17.34

Milites Aethiopiae, postquam copias regiminis Somaliae in bello cum islamistis gerendo adiuverunt, Mogadishio, ex urbe principe Somaliae, paulatim recedunt, et in locum eorum tutores pacis Unionis Africae venient.

Dicuntur milites paci tuendae etiam ex Africa Australi, Libya, Tansania Congoque in Somaliam missum iri, sed sunt, qui dubitent, an copiae tam magnae satis celeriter comparari possint.

(Reijo Pitkäranta)

Studium climatologicum

25.01.2007, klo 17.34

Die Lunae Finni mandatu Unionis Europaeae magno incepto internationali, cuius est in mutationem climatis inquirere, praesidere coeperunt.

De quanta re hic agatur, vel inde apparet, quod illi studio multa centena investigatorum tam ex Europa quam ex aliis orbis terrarum partibus intersunt.

Climatologi plurimum laboris ad corpuscula aeris minima perscrutanda collaturi sunt, cum adhuc non satis constet, quonam modo mutationes climatis illis particulis afficiantur.

(Reijo Pitkäranta)

De curribus electricis

25.01.2007, klo 17.33

Currus electrici post septuaginta annos in vias Parisiorum reverterunt.

Ultima ferrivia urbana anno millesimo nongentesimo tricesimo septimo Parisiis clausa est, cum commeatus electricus usu autocinetorum demoveretur.

Hodie autem currus electrici propter ipsa autocineta in pristinum statum redacti sunt magistratibus prohibere conantibus, ne aer urbis emissionibus autoraedarum nimis pollueretur.

(Tom Bergman)

Opera omnia Topelii

25.01.2007, klo 17.33

Societas litterarum Sueticarum Finniae amplum opus litterarium instituit, cum omnia, quaecumque Zacharias Topelius, fabulator ille celeberrimus, olim scripsit, publice divulganda esse decrevit.

Editio nova, quae tam apparatu critico quam variis adnotationibus instructa erit, non solum in formam libri redigetur, sed etiam ex versione digitali constabit.

(Reijo Pitkäranta)

De oleribus consumptis

25.01.2007, klo 17.32

Consumptio olerum apud Finnos nonnihil aucta est, si respicias singulos cives quinquagena quina fere chiliogrammata huius generis cibi anno bismillesimo quinto (2005) edisse.

Victus olitorius tamen Finnorum generatim nonnisi in lycopersico, cucumere carotaque consistit.

(Reijo Pitkäranta)

Nicolas Sarkozy candidatus praesidentialis

19.01.2007, klo 12.19

Nicolas Sarkozy, minister a rebus interioribus Francorum, candidatus praesidentialis a factione UMP (Unio ad motum popularem) officialiter et unanimiter investitus est.

Adversariam principalem in comitiis die vicesimo secundo mensis Aprilis futuris Ségolènem Royal ex partibus socialistarum habebit.

Altera suffragia, si necessaria, die sexto mensis Maii fient. Sarkozy oratione habita monuit Turciam intra Unionem Europaeam nullum locum habere.

Si Unio usque amplificaretur, vim eius politicam perituram esse. Europa confiteretur, quales limites haberet, ne omnes nationes membra eius fieri desiderarent.

(Tuomo Pekkanen)

Poettering praeses parlamenti Europaei

19.01.2007, klo 12.18

Hans-Gert Poettering, democrata Christianus natione Germanus, praeses parlamenti Europaei creatus est, qui Josepho Borrell, socialistae Hispano, succederet et in praesidatu usque ad annum bis millesimum nonum maneret.

Poettering pollicitus est se pro Europa unita operaturum esse, in qua singulae civitates, independenter a magnitudine, potestatem haberent.

(Tuomo Pekkanen)

Insulae Canariae immigratione laborant**19.01.2007, klo 12.18**

Insulae Canariae, in Oceano Atlantico positae, olim insulae Deorum vel Fortunatae dictae sunt, quia caeli temperie commendantur.

Hodie meta sunt amata viatorum septentrionalium, qui illas aeroplano facillime petere possunt.

Etiam ex Finnia complura millena feriantium praesertim mensibus hiemalibus in Canarias insulas volare solent.

His annis immigratores illegales ex Africa, ubi paupertate premuntur, illuc navigiis venire coeperunt, nam iter trans Fretum Gaditanum in Hispaniam propter custodiam diligentiolem factum est difficilium.

Anno proxime praeterito unum et triginta milia immigratorum ex Africa in Canarias venerunt, sex milia in itinere maritimo perisse aestimantur.

(Tuomo Pekkanen)

Quid calefactio Europae secum afferat**19.01.2007, klo 12.17**

Commissio Unionis Europaeae de effectu, quem mutatio climatis in Europa habitura esset, relationem divulgavit: Europam septentrionalem ex calore augescente utilitatem percepturam, regiones meridianas et aqua et turismo deficientibus damna capturas esse.

In septentrione fruges fore meliores et oram Maris Germanici novam metam ferias aestivas agentibus fieri posse. (7)

Apud Mare Mediterraneum numerum peregrinorum deminutum iri et nimium calorem saepius quam ante causam mortis futuram esse.

Deminutionem rei periegeticae ingentia damna oeconomica Hispaniae, Italiae Graeciaeque allaturam esse.

(Tuomo Pekkanen)

Exercitatio ossa confirmat**19.01.2007, klo 12.16**

Exercitatione corporis ossa confirmantur, sed aliter atque antea credebatur, exercitationibus finitis effectus positivi admodum celeriter evanescent.

Quod apparet ex dissertatione academica in Finnia nuper divulgata. Etiam ossa hominum seniorum fiunt motu firmiora.

Antea putabatur ex motu corporis feminis nullum post menopausim usum futurum esse.

(Tuomo Pekkanen)

De oleiductu clauso**12.01.2007, klo 09.41**

Septimana vergente Russi finitimis suis Belorussis petroleum suppeditare intermiserunt discordia de vectigali inter utramque partem coorta.

Illud decretum etiam multis civitatibus Unionis Europaeae detrimento fuit, quippe quae in energia consumenda ex petroleo Russorum multum penderent.

Tubus enim petrolearius, quem Russi in aliquot dies clausurunt, in finibus Belorussiae bifariam dividitur ac quidem ita, ut ramus superior per Poloniam in Germaniam extendatur, inferior autem per Ucrainam usque ad Hungariam et Croatiam pertineat.

(Reijo Pitkäranta)

Quid Chavez dixerit**12.01.2007, klo 09.36**

Hugo Chavez, praesidens Venetiola mense Decembri iterum electus, dum patriam suam ad formam socialisticam redigere in animo habet, societates civitatis electricas et telephonicas publicare vult.

Itaque a parlamento petiturus est, ut legem sciscat, quae sibi auctoritatem ad eam renovationem faciendam det.

"Iam", inquit, "ad socialismum versus progredimur, quam ob rem lex Venetiolae fundamentalis penitus mutanda est."

(Reijo Pitkäranta)

Flumen Ganges inquinatum

12.01.2007, klo 09.35

Flumen Ganges, ubi septuaginta fere miliones Hinduistarum his diebus peccatorum remittendorum causa lavantur, tot et tantis sordibus inquinatum est, ut complures sacerdotes Indi recusaverint, quominus illum lustrandi ritum omnino subirent.

Qua re audita magistratus Indiae se curaturos esse polliciti sunt, ut ostiolis aggerum apertis aqua pura in Gangem deduceretur.

De vivariis Romaniae

[: Nuntii Latini](#)

12.01.2007, klo 09.35

In Romania, quae anno vergente ad societatem Unionis Europaeae accessit, multa vivaria claudenda sunt, utpote quae legibus Unionis de re zoologica perlatis non satisfaciant.

In illa civitate omnino triginta sex horti zoologici sunt, quorum iam paene decem aut clausi sunt aut mox claudentur.

In causa est, quod magnae ferae bestiae, e. gr. ursi et leones, in caveis nimis parvis et sordidis tenebantur.

Curatores vivariorum etiam obligati sunt, ut non solum animalibus condiciones vivendi satis bonas praebeant, sed etiam operae investigatoriae intersint civesque de rebus zoologicis certiores faciant.

(Reijo Pitkäranta)

Annus festus Agricolae

[: Nuntii Latini](#)

12.01.2007, klo 09.34

Hoc anno quadringenti quinquaginta anni acti sunt, cum magister et episcopus Michael Agricola, fundator linguae litterariae Finorum appellatus, mortuus est.

Quamquam dies ille memorialis mense Aprili demum erit, res gestae Agricolae in Finnia toto anno variis eventibus institutis recoluntur.

Festum inaugurale iam die epiphaniarum (6.1.) in paroechia Perno Nylandiae orientalis actum est.

Caerimoniae in vetere ecclesia Pernoensi celebrari coeptae sunt, ubi officium divinum procurabatur.

Quo facto participes ad epulas in modum mediaevalem instructas transierunt.

Praesidentia UE in Germaniam translata

04.01.2007, klo 17.03

Anno bis millesimo septimo ineunte praesidentia Unionis Europaeae, quam Finni sex menses tenuerant, in Germaniam translata est.

Finnis praesidentibus primo loco inter res tractandas erant amplificatio Unionis et eius cum Russia cooperatio, competitio oeconomica usque asperior, conflictus Orientis Proximi, mutatio climatis, politica energiae.

Sicut iam anno undebismillesimo (1999) Finnis Unioni praesidentibus factum erat, administratores Finniae volebant, ut Conspectus Latinus de rebus principalibus ad praesidentiam spectantibus septimanatim interretialiter (www.eu2006.fi) divulgaretur.

Ita regimen Finniae omnes de radicibus culturalibus societatis Europaeae commonefecit simulque ostendit se usum linguae Latinae magni habere.

(Tuomo Pekkanen)

Novus annus celebrabatur

04.01.2007, klo 17.02

Novus annus in orbe terrarum spectaculis pyrotechnicis, ut fieri solet, celebrabatur, etsi in Europa occidentali exsultatio hominum feris tempestatibus et pluviis temperata est.

Praecipua causa celebrandi fuit in Bulgaria et Romania, quae membra Unionis Europaeae facta sunt. Quibus terris adiunctis Unio Europaea ex viginti septem sociis civitatibus constat.
(Tuomo Pekkanen)

Ban Ki-Moon novus secretarius generalis

04.01.2007, klo 17.01

Kalendis Ianuariis Ban Ki-Moon, politicus Coreanus Meridianus, munus secretarii generalis Nationum Unitarum suscepit.

Praedecessor eius Kofi Annan illo munere decem annos functus est.

Ban, mense Octobri secretarius designatus, dixit verum valorem Nationum Unitarum esse in eo, quantum ille ordo homines miseria oppressos adiuvere posset.

(Tuomo Pekkanen)

Saddam suspensus

04.01.2007, klo 17.01

Saddam Hussein, pristinus dictator Iraquiae, postquam appellatio patronorum eius, ut supplicium differretur, repudiata est, die Sabbati (30.12.) multo mane Bagdati laqueo suspensus est.

In locum supplicii ductus recusavit, quominus cucillum acciperet, quo caput tegeretur, atque brevi oratione dicta Coranum manu tenens vultu tranquillo supplicium subiit.

Corpus Saddami ab Americanis in vicum Awja, in quo ille natus erat, helicoptero portatum et ducibus sunnitis sepeliendum traditum est, ut ante diluculum postridie mortis diei sepeliretur.

Nationes Unitae, Unio Europaea, Russia, Civitas Vaticana atque multi ordines a iuribus humanis supplicium Saddami Hussein vehementer reprobaverunt.

(Tuomo Pekkanen)

Mensis December calidior quam umquam

04.01.2007, klo 17.00

Institutum meteorologicum Finniae aestimavit mediam temperaturam mensis Decembris fuisse in Finnia sex - octo gradibus maiorem quam assolet.

Similem temperaturam tantum bis in millenio evenire. Nisi emissiones, quibus calor caeli augetur, significanter circumscriptae essent, in fine saeculi calidissimos menses Decembres fore usitatos.

(Tuomo Pekkanen)

Gerald Ford mortuus

29.12.2006, klo 09.06

Gerald Ford, pristinus praesidens Civitatum Americae Unitarum, diem supremum obiit nonaginta tres annos natus.

Constat eum munere praesidentis Americanorum ab anno millesimo nongentesimo septuagesimo quarto usque ad annum millesimum nongentesimum septuagesimum septimum (1974-1977) functum esse. Successerat in locum praesidentis Richard Nixon, cum hic propter scandalum Watergate appellatum se magistratu abdicare coactus esset.

(Reijo Pitkäranta)

Memoria tsunami mortuorum

29.12.2006, klo 09.06

Die Martis (26.12.) multa milia hominum in variis Asiae partibus ad caerimonias religiosas agendas convenerunt, ut memoriam eorum, qui calamitate tsunami biennio ante interissent, ritu sollemni recolerent.

Dum haec geruntur, de terrae motu in ora Taivaniae facto nuntiatum est, cuius vis septem fere graduum Richterianorum fuisset. Institutum meteorologicum Iaponiae iam praemonuit novum tsunamum litoribus Philippinarum appropinquare, donec periculum remotum esse compertum est.

(Reijo Pitkäranta)

Saddam laqueo suspendetur

29.12.2006, klo 09.05

Die Martis (26.12.) tribunal appellatorium Iraquiae iudicium capitis dictatori Saddam Hussein dictum confirmavit et eum intra triginta dies laqueo suspendendum esse decrevit.

Saddam una cum fratre germano Barzan al-Tikriti et pristino iudice Awad al-Bander iam Nonis

Novembribus ob scelera adversus genus humanum commissa mortis damnatus erat.
(Reijo Pitkäranta)

Nummi euronis renovantur

29.12.2006, klo 09.05

Nummi euronis anno ineunte novam speciem habebunt, cum et adversa et reversa pars eorum renovabitur.

A nummis veteribus inter alia eo different, quod forma Unionis Europaeae in monetis insculpta ad statum hodiernum redacta erit confiniis duodecim novarum civitatum sociarum imagini Unionis adiectis.

(Reijo Pitkäranta)

De habitatione dispersa

29.12.2006, klo 09.04

Magistratus Unionis Europaeae a re circumiectali curatores urbis Helsinki reprehendunt, quod regionem urbanam habitatione nimis dispersa vitiaverint.

Docent talem aedificandi rationem naturae circumiectae detrimento fore: necesse enim esse, ut in locis raris dispersisque longiora itinera suscipiantur, quam ob rem ibidem etiam magis energiae consumatur. Aliae urbes Europaeae, quarum habitatio nimis disiecta esse existimatur, sunt Hafnia et Bruxellae.

(Reijo Pitkäranta)

Cannavaro et Marta optimi

29.12.2006, klo 09.03

Sphaerista pedifollicus omnium optimus hoc anno creatus est Fabio Cannavaro, defensor gregis nationalis Italiae.

Neque hoc mirum est, si respicis manum Itolorum eo duce aestate proxime praeterita primatum mundanum consecutam esse. Cannavaro in suffragio a Foedere pedifollico internationali (Fifa) instituto quadringenta nonaginta octo puncta sibi conciliavit, cum Zinedine Zidane, assultor Francogallus, eo quadraginta quattuor punctis inferior esset. In serie autem feminarum primo loco posita est Marta, iuvenis Brasiliensis viginti annos nata.

(Reijo Pitkäranta)

Oeconomia Finniae crevit

22.12.2006, klo 11.06

Hoc anno oeconomia Finnorum celerius crevit quam antea putabatur.

Augmentum totius anni aestimatur fore quinque virgula novem centesimarum (5,9%) sive una centesima maius quam adhuc aestate praedictum est.

Anno autem proximo augmentum ad solitas tres centesimas (3%) descensurum esse censetur.

(Tuomo Pekkanen)

Greenpeace de periculis uranii monet

22.12.2006, klo 11.05

Societas Francogallica, cui nomen Areva, consilia uranium in variis Finniae regionibus effodiendi habet.

Quam ob rem Greenpeace, ordo circumiectis tuendis, postquam in operas illius societatis accuratius inquisivit, Finnos de insignibus periculis circumiectalibus monuit, quae sanitati hominum propter effossiones uranii imminerent.

Apud fodinas, quas Areva in Canada et USA habet, materias venenatas in circumiacentia effluxisse; casus canceri et deformitatum congenitarum etiam in locis a fodinis complura chiliometra distantibus auctos esse.

Quae cum ita sint, motus populares in Finnia orti sunt, qui fodinis uranii aperiendis vehementer obsistunt

(Tuomo Pekkanen)

Solstitium hiemale adest

22.12.2006, klo 11.05

Hodie adest solstitium brumale, quo tempore in hemisphaerio septentrionali dies est totius anni brevissimus, nox longissima.

In partibus Finniae maxime septentrionalibus nox hiemalis continua plus quinquaginta dies durat. In urbe Helsinki aliisque regionibus Finnorum meridionalibus brevissimus anni dies est paene sex horarum.

(Tuomo Pekkanen)

De Nativitate Domini

22.12.2006, klo 11.04

Perendie (24.12.) erit vigilia Nativitatis Domini. Iesus Christus natus est in oppido Betlehem vivente adhuc rege Herode, qui ex vita iam anno quarto ante initium aevi nostri decessit.

Annus, quo a Caesare Augusto edictum exiit, ut universus orbis describeretur, veri similiter fuit iam octavus aut septimus ante nostrum aevum.

De censu tum habito etiam in Rebus gestis Augusti imperatoris narratur. Sexto saeculo ineunte abbas Dionysius Exiguus Iesum anno septingentesimo quinquagesimo tertio ab urbe Roma condita natum esse per errorem iudicavit.

Quae temporis ratio iussu Karoli Magni, imperatoris Francorum, in usum publicum recepta est. De die, quo Iesus natus est, in evangeliis nihil narratur.

Sed saeculo quarto mediante sollemne Nativitatis die vicesimo quinto mensis Decembris (25.12.) celebrari coeptum est, quia lux diei post solstitium augescens etiam lumen caeleste hominibus ortum figurare censebatur.

(Tuomo Pekkanen)

De tempestate hiemali

22.12.2006, klo 11.03

Tempesta hiemalis hucusque apud Finnos fuit exceptionalis, nam nives, quae mense Octobri ceciderunt, frigoribus mitescentibus cito diffugerunt neque postea in Finnia meridionali ninxit nisi raro et breviter.

Meteorologi praedicunt veri similiter dies festos nusquam fere in Finnia futuros esse nivosos, nisi ultra circulum arcticum in regionibus septentrionalibus.

(Tuomo Pekkanen)

Turcia et Unio Europaea

15.12.2006, klo 12.46

Die Lunae civitatibus Unionis Europaeae placuit, ut aliquot consultationes de Turcia in unionem asciscenda in posterius differrentur.

Hoc decretum ideo factum est, quod Turci dicto Unionis Europaeae non audientes recusaverant, quominus naves ex Cypro venientes portibus suis reciperent.

Deliberationes, quae de societate Turciae habentur, in triginta quinque capita ad varios aspectus politicos pertinentia digestae sunt, e quibus adhuc nonnisi unum ad finem adductum est.

(Reijo Pitkäranta)

Fuglesang astronauta Suetus

15.12.2006, klo 12.45

Scandinavi iam suum proprium astronautam habent, cum Christer Fuglesang Suetus et Robertus Curbeam Americanus naviculae spatiali Discovery insidentes in spatium cosmicum emissi sunt.

Nec Fuglesang tantum ipsi volatui interfuit, sed etiam ambulationem spatialem altero astronauta comite feliciter suscepit missile suum cum statione cosmica copulando et eidem alam quandam applicando.

(Reijo Pitkäranta)

Multi mafiosi in Italia capti

15.12.2006, klo 12.45

Custodes publici Italiae, dum duos impetus in criminalitatem ordinatam faciunt, amplius centum homines comprehenderunt.

In Italia septentrionali et in Calabria, regione meridiana, triginta quattuor mafiosi capti sunt, cum non abesset suspicio, quin mercaturas armorum et drogum exercerent et cum grege criminali nomine 'Ndrangheta' colluderent.

Inter alteram incursionem aedilibus Neapolitanis contigit, ut octoginta coniuratos de commercio drogum suspectos in diversis partibus Italiae deprehenderent.

(Reijo Pitkäranta)

De condicione fluminis Rheni

15.12.2006, klo 12.44

Commissio internationalis fluminis Rheni protegendum aquam Rheni iam esse bonae qualitatis confirmat. Abhinc enim viginti annos incendium in quadam fabrica chemica Helvetica effecit, ut viginti tonnae materiae venenosae in Rhenum effugerent et pisces per spatium multorum centenorum chiliometrorum morerentur.

Existimantur sexaginta miliarda euronum ad flumen restituendum adhibita esse.

(Tom Bergman)

Sepulcrum S. Pauli inventum

15.12.2006, klo 12.44

Archaeologi se reliquias Sancti apostoli Pauli in crypta cuiusdam ecclesiae Romanae invenisse credunt. Sarcophagus, in quo ossa eius condita esse existimantur, repertus est, postquam investigatores duas magnas tabulas marmoreas de altaribus sustulerunt.

Postea locus reptionis cancellis circumdatus est, per quos latus sarcophagi marmorei conspici potest.

Traditum est Sanctum apostolum Paulum anno sexagesimo quinto Romae martyrium subisse.

(Reijo Pitkäranta)

Sollemnitatis Sanctae Luciae

15.12.2006, klo 12.43

Die Mercurii sive Idibus Decembribus (13.12.) in urbe Helsinki more translaticio festum Sanctae Luciae celebratum est.

Proprium huius sollemnitatis est lucem tenebris afferre, quam ob rem quotannis aliqua virgo eligi solet, quae corona candelarum ornata et curru per mediam urbem vecta diem brumalem illuminet.

Finnia constitutionem Unionis Europaeae accepit

08.12.2006, klo 10.18

Suffragio facto parlamentum Finniae legem fundamentalem Unionis Europaeae accepit.

Ex ducentis delegatis centum viginti quinque pro lege suffragia dederunt, duodequadraginta contra legem.

Quattuor delegati vacuum schedulam dederunt, ceteri aberant. Finnia est sexta decima terra, quae legem comprobavit. Antea Francia et Nederlandia eandem repudiaverunt.

(Tuomo Pekkanen)

Halonen de statu Russiae sollicita

08.12.2006, klo 10.17

Praesidens Finniae Tarja Halonen dixit se caedibus in Russia politicis et evolutione eius iuridica sollicitari.

Si administratores Russiae de caedibus nescirent, causam esse sollicitudinis, sin scirent, causam adhuc maiorem.

Halonen monuit breve tempus ab Unione Sovietica dissoluta actum esse neque Russiam adhuc usum civitatis iuridicae occidentalis habere.

(Tuomo Pekkanen)

Nova victima veneficorum

08.12.2006, klo 10.16

Jegor Gaidar, olim primus minister Russiae, mense Novembri (24.11.) in Irlandia in morbum insolitum incidit.

Cum Dublini novum librum, quem scripserat, praesentabat, repente male se habere coepit. Medici, qui eum curabant, censebant eum verisimiliter consulto venenatum esse, quia nulla causa naturalis intoxicationis inventa esset.

Acta diurna Russica, quibus nomen est Kommersant, iudicaverunt venenationem Gaidaris cum morte speculatoris Alexandri Litvinenko et redactricis Annae Politkovskaja cohaerere.

Ille venenatione radioactiva affectus post longam agoniam Londinii periit, haec glandibus pistolii transfixa Moscuae in vestibulo domus ipsius occisa est.

(Tuomo Pekkanen)

Kofi Annan: In Iraquia bellum civile

08.12.2006, klo 10.14

In colloquio a societate BBC transmissio Kofi Annan, secretarius generalis Nationum Unitarum, dixit condiciones in Iraquia esse multo peiores quam aliquot annis ante in Libano et aliis terris, in quibus civile bellum gereretur.

Propter violentiam in Iraquia iam minime quinquaginta milia civium mortui sunt.

(Tuomo Pekkanen)

Cometes periculosus

08.12.2006, klo 10.13

Grex meteororum, qui originem habere videtur in stella crinita antea ignota, ab astronomo voluptuario Finno, cui nomen Jarmo Moilanen, visus est.

Situs illius cometae, qui gregem meteororum creavit, nondum compertus est.

Nihilominus in classem quinque cometarum describitur, qui cometae periodi longae nominati Telluri periculosissimi habentur.

Orbitae enim illorum prope Tellurem sitae sunt et facile mutantur, quia perturbationibus gravitationis sunt expositae.

Periculum quidem collisionis exstat, sed mathematicae aestimantibus est minimum.

Novus grex cometarum nomen invenit Camelopardalides, nam punctum radiationis prope constellationem Camelopardalis haud procul a Stella boreali iacet.

(Tuomo Pekkanen)

Penelope Cruz actrix Europaea 2006

08.12.2006, klo 10.11

Penelope Cruz, natione Hispana, ab Academia Cinematographica Europaea nominata est Actrix Europaea anni 2006.

Ex actoribus praemium consecutus est Ulrich Mühe Germanus.

Penelope propter partes, quas in pellicula *Volver* (Redire) Petri Almodóvar egit, praemiata est, Mühe autem praemium tulit propter pelliculam *Das Leben der anderen* (Vita aliorum).

(Tuomo Pekkanen)

Conventus UE et Russiae

30.11.2006, klo 16.57

Septimana vergente in urbe Helsinki conventus Unionis Europaeae et Russiae habitus est, cui etiam praesidens Russiae Vladimir Putin interfuit.

Ille coetus quidem multis rationibus spem fefellisse dicitur, sed in hoc successum habuit, quod inter utramque partem convenit, ut societates aeronauticae Unionis Europaeae permissu Russorum super Sibiriam posthac paulatim gratis volarent.

Maximum tempus in quaestionibus ad energiam pertinentibus consumebatur, sed de iis nihil novi decretum est.

(Reijo Pitkäranta)

Ignistitium regionis Gazae

Die dominico mane in regione Gaza ignistitium Israelianorum et Palestinensium initium cepit. Erkki Tuomioja, minister Finniae, quae presidentiam Unionis Europaeae in praesenti tenet, ait illam intermissionem pugnarum etiam rationibus politicis sustentandam esse ne occasio pacis in regione orientali proximae provehenda amitteretur. Ita dixit in urbe Tampere quo ministeri negotiorum exteriorum Unionis Europaeae et civitatum Arabicarum congregati erant

(Reijo Pitkäranta)

Quebecum sua natio facta

30.11.2006, klo 16.56

Parlamentum Canadae incolis provinciae Quebeci statum nationis concessit.

Ex nova lege Canada adhuc unica res publica est, intra quam Quebecum suam propriam nationem constituit.

Quamquam plebiscitum in camera inferiore manifeste comprobatum est, illa rogatio tamen regimini Canadensi tantum stomachum moverat, ut unus e ministris munus deponeret.

(Reijo Pitkäranta)

De imbribus autumnalibus

30.11.2006, klo 16.56

Superficies lacuum et fluminum Finniae meridiana hoc autumno propter nives liquescentes et imbres assiduos tam alte ascendit, ut multis locis iam metueretur, ne aquae eorum agros inundarent.

Id autem bonum est, quod copiae lympharum subterranearum, quae post aestatem siccissimam omnino fere exhaustae erant, in pristinum statum restitutae sunt.

(Reijo Pitkäranta)

Alandi et Finni discordes

30.11.2006, klo 16.55

Inter Alandiam et Finnam continentalem discordia de re aleatoria orta est.

Societas enim Alandiae in automatis lusoriis occupata Finnis in continenti habitantibus permisit, ut lusus Alandorum nummarios per interrete participarent, quamvis magistratus Finniae id legi contrarium esse censerent.

Piget politicos Finnos etiam Alandorum postulantium, ut ipsi in parlamento Unionis Europaeae una sedes ultro concedatur.

(Reijo Pitkäranta)

Indoles puerorum et puellarum

30.11.2006, klo 16.55

Puellae in amicis suis fidem et probitatem pluris aestimant quam pueri, ut ex investigatione recens facta apparet.

Puerorum autem plurimi interest variis delectationibus gaudere et in diversis occupationibus versari.

Accedit, quod a pueris maxime id exspectatur, ut aliquid perficiant et rem bene gerant, cum puellas aptiores ad curam pro aliis agendam et consuetudines sociales iungendas esse credatur.

(Tom Bergman)

Ségolene Royal candidata PS

23.11.2006, klo 16.00

Ségolene Royal a partibus socialistarum (PS) candidata ad comitia praesidentialia, in Francia mense Aprili futura, officialiter creata est, cum haud dubiam ab aemulis victoriam reportavit.

Ex suffragiis datis plus sexaginta centesimas (60,2) accepit, cum Dominique Strauss-Kahn viginti (20,83) et Laurent Fabius duodeviginti (18,54) centesimas obtinerent.

Ségolene Royal est prima femina, quae occasionem habet, ut praesidens rei publicae Francorum fiat.

Candidatus partium dextrarum nondum est creatus, sed verisimiliter erit Nicolas Sarkozy, quocum Royal de praesidentatu ex aequo certare putatur.

(Tuomo Pekkanen)

Invasio calamitosa

23.11.2006, klo 15.59

Tony Blair, primus minister Britanniae, in colloquio interrogatorio a canali televisifico Al-Jazeera transmissio concessit bellum anno bis millesimo tertio Iraqiae illatum esse calamitosum.

Iam antea etiam Margareta Hodge, ministra commercii Britannorum, dixerat consilium in Iraqiam proficiscendi magnum errorem fuisse.

(Tuomo Pekkanen)

Bellum triginta annorum

23.11.2006, klo 15.45

Institutum Britannicum, cui nomen est Oxford Research Group, censet bellum in Iraqia et Afganistania plus triginta annos durare posse.

Mutationes in USA politicas parum ponderis ad conflictus Iraqiae et Afganistaniae habituras esse.

Copias petrolei Sinus Persici tantum valere, ut Americani consilium ex Iraqia abeundi capere non possint.

(Tuomo Pekkanen)

Speculator venenatus

23.11.2006, klo 15.43

Alexander Litvinenko, pristinus speculator Russus, qui sex annis ante in Britanniam transierat, in caupona Londiniensi Kalendis Novembribus venenatus est, cum in caedem redactricis Anna Politkovskaja inquireretur.

Adhuc in nosocomio curatur. Acta diurna Britannica narraverunt eum materiam accepisse, ex quo appareret redactricem ab hominibus servitii securitatis Russiae (FSB) interfectam esse.

(Tuomo Pekkanen)

Francia fumificationem in locis publicis vetat**23.11.2006, klo 15.42**

Administratio Franciae legem accepit, quae fumificationem tabaci in locis publicis vetat.

Illa lex mense Februario vigere incipiet et ad omnia spatia interiora pertinebit, in quibus homines laborant aut quae populo sunt aperta.

Deverticula nocturna, cauponae, thermopolia tempus transitionis unius anni habebunt, quo spatia hermetica, aeri non pervia, fumificatoribus aedificent.

Moderatores locorum publicorum, si nova lege vigente fumificationem permittere voluerint, spatia fumificatoribus apta parare debebunt, ex quibus fumus in alias aedificii partes non vagatur.

Ex computationibus statisticis apparet quina millena hominum in Francia quotannis morbis ex fumificatione passiva ortis mortem obire.

(Tuomo Pekkanen)

Rumsfeld munus deposuit**17.11.2006, klo 11.19**

Novus minister defensionis Civitatum Americae Unitarum creatus est Robert Gates, pristinus director Rei exploratoriae centralis (CIA) sexaginta tres annos natus.

Successit in locum ministri Donald Rumsfeld, cui munus deponendum erat, postquam factio eius comitiis factis cladem accepit.

Rumsfeld magistratu suo sex annos functus maxime in eo reprehendebatur, quod bellum in Afganistania et Iraquia eo administratore male gereretur.

(Reijo Pitkäranta)

De obstinatione Cubanorum**17.11.2006, klo 11.18**

Cooperatio Unionis Europaeae et Cubae multum difficultatis habet Cubanis obstinate recusantibus, quominus auxilium populis egentioribus praebitum a civitatibus Europaeis recipiant.

Condiciones enim politicas sibi propositas non accipiunt.

Monendum tamen est necessitudines inter utramque partem commerciales florere et dimidiam fere partem peregrinorum, qui Cubam obeunt, ex Europa venire.

(Reijo Pitkäranta)

Copiae silvarum augentur**17.11.2006, klo 11.17**

Credebatur iam in eo esse, ut silvae orbis terrarum in annos deminuerentur. Quae condicio rerum autem ex inopinato in melius conversa est, ut censet grex investigatorum internationalis, cui praeest Pekka Kauppi, professor Universitatis Helsinkiensis.

Cum copia arborum in multis orbis partibus, praesertim in Sinis et India, magno incremento augeatur, fieri posse, ut interitus silvarum triginta annis proxime futuris omnino impediatur.

(Reijo Pitkäranta)

Multi ex hemicrania laborant**17.11.2006, klo 11.17**

Amplius quinquies centena milia Finnum, praesertim feminae aetatis iam constantis, morbo hemicrania laborant.

Quae quamvis ita sint, saepe fit, ut hoc incommodum in sedibus operandi parvi pendatur. Huc accedit, quod plerique hoc vitio aegrotantes aut medicum adhibere nolunt aut remedium sumere cunctantur.

Dicitur hemicrania in Europa frequentior esse quam asthma, diabetes mellitus, epilepsiaque, si haec tria in unum conferantur.

(Reijo Pitkäranta)

Torvalds in heroum numero

17.11.2006, klo 11.16

Redactores actorum septimanalium Americanorum nomine Time, cum anniversarium sexagesimum editionis suae Europaeae celebrare vellent, sexaginta homines elegerunt, quos pro heroibus habent. Unus eorum est Linus Torvalds, programmator Finnis triginta septem annos natus, cui titulus herois propterea datus est, quod systema in machinis computatoriis operandi sollertissime renovavit.

(Reijo Pitkäranta)

De cognitione geographiae

17.11.2006, klo 11.16

Cognitio geographiae iuvenibus Americanis pessima est, ut patet ex percontatione, quam National Geographic nuper divulgavit.

Duae partes illorum adolescentium Iraquiam in mappa mundi ponere non sciebant, et tertia pars respondentium ne civitates Ludoviciam et Mississippiam quidem in tabula Civitatum Americae Unitarum repperit, quamvis tempestates has regiones affligentes effecissent, ut instrumenta communicativa omnium oculos ad eas converterent.

(Tom Bergman)

Saddam Hussein capitis damnatus

10.11.2006, klo 12.03

Saddam Hussein, pristinus Iraquianorum dictator, in supremo tribunali Iraquiae damnatus est, ut laqueo suspenderetur.

Antequam poena exsequatur, sententiam mortis in tribunali appellationis confirmari oportet. Si iudices huius tribunalis causam legitime actam esse censuerint, supplicium de Saddamo intra unum mensem sumetur.

Etiam Barzan Ibrahim, frater Saddami consanguineus, et Awad Hamed al-Bander, dux pristinus tribunalis revolutionarii, capitis damnati sunt.

Vicepraesidens Taha Jassin, capitis absolutus, in carcerem sempiternum conici iussus est.

Praesidens Iraquiae Jalal Talabani supremum tribunal iuste et legitime egisse affirmavit, sed de iudicio facto sententiam non dixit. Crimen, quo Saddam cum adiutoribus suis damnatus est, fuit caedes centum duodequingenta shiitarum, quae in oppido Dujail anno millesimo nongentesimo octogesimo secundo facta est.

Illa caede Saddamum ulcisci voluisse, quod sicarii eum in eodem oppido occidere paulo ante conati essent.

Postea novum contra Saddamum iudicium susceptum est, in quo ille genocidii Curdorum accusatur.

Una eiusdem sceleris accusantur sex alii viri, in his consobrinus Saddami Ali al-Majid, qui a gaso contra Curdos adhibito Ali "Chemicus" vocatur.

Centum octoginta milia Curdorum illa caede perisse aestimantur.

(Tuomo Pekkanen)

Unio Europaea poenae mortis adversatur

10.11.2006, klo 12.01

Finni, qui hoc tempore praesidium Unionis Europaeae tenent, monent Unionem mortis poenae in omnibus rerum condicionibus adversari; ideo ne Saddami quidem poenam esse exsequendam.

Quamquam in communicatione ministerii a rebus exteris Finnum commemoratur Unionem Europaeam facinora administrationis Saddami Hussein iterum iterumque condemnasse.

(Tuomo Pekkanen)

Comitia Americanorum

10.11.2006, klo 12.01

In USA die Martis comitia facta sunt, in quibus tota camera inferior sive repraesentativorum et tertia pars senatorum creati sunt.

Simul etiam gubernatores triginta sex civitatum designati sunt.

In utraque camera republicani, qui res in Iraquia male gessisse iudicantur, cladem acceperunt.

(Tuomo Pekkanen)

Abortus illegales letales

10.11.2006, klo 12.00

Ordo gynaecologorum internationalis rettulit abortus artificiales legi contrarios esse gravissimum problema, quo praesertim populi egentiores premerentur.

Causas esse paupertatem et inaequalitatem, et quod iura feminis negarentur.

Plurimos abortus artificiales fieri in Media et Meridiana Asia. Singulis annis septuagena millena feminarum abortu illegaliter facto perire.

(Tuomo Pekkanen)

Pinguitudo Europaeis imminet

10.11.2006, klo 11.59

Ordo mundi sanitarius (WHO) monuit pinguitudinem Europaeorum, quae usque continuaretur, iam incremento oeconomico imminere.

Viginti tres centesimas virorum et triginta sex centesimas feminarum in Europa iam obesitate laborare, ex liberis circiter tertiam partem superpondium habere.

Homines pinguescere, cum cibus nimis adipatis vincerentur et corpus exercere neglegerent.

(Tuomo Pekkanen)

Lula praesidens iterum factus

02.11.2006, klo 16.37

Praesidens Brasiliae iterum electus est Luiz Inacio Lula da Silva.

Quam manifestam victoriam suffragii die Dominico habiti reportaverit, inde patet, quod sententiarum unam et sexaginta centesimas (61%) sibi paravit, cum adversarius eius Geraldo Alcinon votorum nonnisi undequadragesima centesimas (39%) consequeretur.

Ita fit, ut Lula da Silva, candidatus factionis operariorum, etiam proximo quadriennio Brasiliae praesideat.

Iam populo suo promisit incrementum oeconomicum se praesidente quinque centesimarum fore.

(Reijo Pitkäranta)

Castro in publicum prodiit

02.11.2006, klo 16.37

Fidel Castro, praesidens Cubae octoginta annos natus, postquam morbo implicatus diu latuit, rursus in publicum prodiit itaque ostendit se adhuc in vivis esse.

Apparuit enim septimana vergente in televisione statali Cubana, ubi veste gymnastica indutus in telephorum loquens et acta diurna legens videbatur.

Idem publice affirmavit se ex enterotomia sibi mense Iulio facta in dies convalescere.

(Reijo Pitkäranta)

De opibus energiae Australiae

02.11.2006, klo 16.36

In Victoria, civitate Australiae, electrificina pneumatica aedificabitur, quae in hemisphaera meridiana omnium maxima erit.

Praeterea in Australia ergasterium solare construetur, cum moderatores huius continentis maxime nitantur, ut ante annum bis millesimum sextum decimum (2016) decem centesimae electricitatis Australiae ex opibus energiae renascentibus gignantur.

(Reijo Pitkäranta)

Lingua Hibernica in UE officialis

02.11.2006, klo 16.36

Vetus sermo Hibernicus, quo gentes Gallorum sive Celtarum olim loquebantur, anno proximo ineunte una e linguis Unionis Europaeae officialibus evadet.

Hoc consilium non solum omnibus Irlandis magno gaudio est, sed etiam eis laetitiam parat, qui iam metuebant, ne illa lingua historica omnino emoreretur.

In Irlanda sive Hibernia hodie circiter quattuor miliones incolarum sunt, quorum tertius quisque se linguam Hibernicam aliquatenus callere opinatur.

(Reijo Pitkäranta)

Nova murium species inventa

02.11.2006, klo 16.34

In Europa et quidem in Cypro nova mammalium species inventa est. Investigatores enim, cum ibi in ululis perscrutandis occupati essent, in quendam murem novi generis inciderunt, cui postea nomen scientificum *Mus cypriacus* inditum est. Dicitur hic rosor maiore capite, grandioribus dentibus caudaque longiore praeditus esse quam *Mus musculus*, quo nomine mus domesticus in zoologia nuncupatur. (Reijo Pitkäranta)

Manuale bene se gerendi

02.11.2006, klo 16.33

Magistratus Sinenses non ita pridem manuale quoddam ediderunt, quo civibus Sinensibus praecepta se bene gerendi dantur.

Quo opere eis admonentur, ut, cum peregre sint, voce gravi loquantur et purgamenta in receptaculis diligenter ponant neve in agminibus prorumpant.

Dubium non est, quin hic liber ad famam Sinensium peregre sarcendam conscriptus sit.

(Tom Bergman)

Moderatores Unionis Europaeae convenerunt

27.10.2006, klo 11.36

Moderatores civitatum aut regiminum Unionis Europaeae die vicesimo mensis Octobris in urbe Lahti Finniae meridianaee conventum inofficiale habuerunt.

Argumentum principale erat energia et cooperatio. Invitatus aderat etiam Vladimir Putin, praesidens Russiae.

De Georgia interrogatus Putin affirmavit causam discordiarum esse Georgiae, non Russiae.

Ad haec addidit:

"Periculum est, ne Georgiae erga Russiam contumacia caedem et sanguinem afferat. Sed ubi primum Georgia, Abhasia, Ossetia Meridiana relationes mutuas bene constituerint, etiam Russiae cum Georgia relationes meliores fient."

Illa verba Gela Bezhuashvili, minister a rebus exteris Georgiae, postea vehementer condemnavit.

(Tuomo Pekkanen)

Violentia in Iraquia crescit

27.10.2006, klo 11.35

Comitiis parlamentariis appropinquantibus apud Americanos de bello Iraquico magis quam ante disceptari coeptum est.

Alii flagitant copias in Iraquia augendas esse, alii autem censent eas inde omnino deducendas esse.

Praesidens George W. Bush iam confessus est violentiam in Iraquia grassantem cum bello Vietnamensi comparari posse.

Quamquam Americani copias suas, quae sunt Bagdati, auxerunt, illis non contigit, ut urbem pacarent. Impetus terroristici Bagdati frequentiores fuerunt quam umquam ante et mensis Octobris fuit unus ex cruentissimis inter totum bellum Iraquicum.

Hoc mense iam septuaginta Americani in Iraquia mortem occubuerunt.

(Tuomo Pekkanen)

Praesidens Israelis in crimen vocatur

27.10.2006, klo 11.34

Actores Israeliani nuntiaverunt se crimen praesidenti Moshe Katsav illaturos esse.

Iam antea vigiles rettulerant testimonia stupri et molestiae sexualis ad causam praesidenti inferendam suppetere.

Katsav, vir unum et sexaginta annos natus, qui quinque filios habet, suspectus habetur, quod decem feminas molestaverit.

(Tuomo Pekkanen)

De sarcinis manualibus statutum

27.10.2006, klo 11.33

Commissio Europaea de sarcinis manualibus, quas viatoribus aeroplanorum secum habere licet, statutum dedit.

Novae limitationes ad id spectant, ut pericula ex liquidis materiis displosivis imminetia praecaveantur.

Illud statutum, quod inde a mense Novembri valebit, latices per portas inspectionis transportare vetat.

Maxima quantitas eiusdem materiae liquidae, quae viatori permittitur, est unum decilitrum. Statutum

pertinet ad omnes avolationes, quae ex aeroportibus Unionis Europaeae fiunt, quodvis sit destinatum itineris.

Commissio censet ita fieri posse, ut securitas viatorum in omnibus Unionis Europaeae partibus par sit.

(Tuomo Pekkanen)

Finni loquaciores

27.10.2006, klo 11.33

Finni, ut rettulerunt magistratus ab informatione nationum septentrionalium, telephonulis portatilibus magis loquuntur quam ceteri septentrionales.

Finnia est etiam unica terra septentrionalis, in qua singulae familiae telephonula portatilia in locum fixorum notabiliter substituerunt.

Dani autem et Norvegi nuntios textuales saepius telephonulis mittunt quam Finni.

(Tuomo Pekkanen)

Fossa occisorum in Lappeenranta

20.10.2006, klo 10.29

In urbe Finniae Lappeenranta fossa communis occisorum reperta est, in qua corpora undecim hominum terra obruta erant.

Ex quo tempore ossa ibi iacuerint, nondum liquido constat. Sepulcretum in campo tentorio nomine Huhtiniemi, ubi investigatores Instituti archaeologici Universitatis Helsinkiensis hoc autumnio effossiones faciunt, in lucem venit.

Hic locus ideo examinari coeptus est, ut cognosceretur, essetne aliquid veri in rumore apud populum inveterato, ex quo in Huhtiniemi inter bellum cum Russis gestum magnus numerus militum fugitivorum Finnum morte multatus est.

(Reijo Pitkäranta)

Ban Ki-Moon novus secretarius

20.10.2006, klo 10.28

Novus secretarius generalis Nationum Unitarum designatus est Ban Ki-Moon, minister a rebus exteris Coreae Meridianae.

Qui vir sexaginta duos annos natus in locum secretarii generalis hodierni Kofi Annan succedit, cuius principatus mense Decembri exeunte finem capiet.

Ban Ki-Moon, dum conventui generali gratias pro honore sibi allato agit, ait dignitatem Nationum Unitarum ex eo aestimari, quantum pauperrimus quisque ab illo ordine adiuveretur.

Sibi propositum esse coetui Nationum Unitarum suo proprio exemplo praesidere.

(Reijo Pitkäranta)

Reinfeldt iter in Finniam fecit

20.10.2006, klo 10.28

Fredrik Reinfeldt, primus minister Suetiae recens creatus, Idibus Octobribus iter in Finniam suscepit, ut praesidentem Tarja Halonen et collegam suum Matti Vanhanen conveniret.

Diurnariis, qui ex eo de scandalis novum regimen Suetiae vexantibus quaerebant, nihil respondere voluit sed ait se sperare fore, ut sibi tandem occasio daretur vera argumenta politica tractandi.

Constat iam duas ministras in regimen Suetiae lectas propter res privatas munus deponere coactas esse.

(Reijo Pitkäranta)

Praemium Nobelianum pacis

20.10.2006, klo 10.27

Praemium Nobelianum pacis accipit hoc anno Muhammad Yunus, vir Bangladesanus, qui argentarius pauperum dicitur.

Is enim, cum paupertatem ex orbe terrarum auferre vellet, annis septuagesimis sedem nummariam instituit, quae pecuniam hominibus omnium miserrimis et mendicissimis commodaret.

In clientibus suis eligendis talem rationem sequi solet, ut, quo quisque sit egentior, eo dignior habeatur, cui pecunia credatur.

(Reijo Pitkäranta)

Ara Pacis Augustae renovata

20.10.2006, klo 10.26

Ara Pacis Augustae, monumentum Romanum anno a.Chr. n. nono victoriis Augusti consecratum, in conspectu populi rursus posita est.

Diu enim in usu publico non erat propter labores reficiendi, quibus illud aedificium marmoreum variis ornamentis decoratum ab emissionibus gasalibus protegeretur.

Itaque architectus Richardus Meier, cui haec opera perficienda commissa erat, Aram Pacis claustris vitreis circumdedit, quod multam disceptationem apud vulgus movit.

(Tom Bergman)

Anna Politkovskaja occisa

13.10.2006, klo 10.23

Anna Politkovskaja, diurnaria Russa, quae moderatores Russiae hodiernos scriptis suis praesertim propter bellum Tzetzenicum verbis durissimis vituperabat, Moscuae die Sabbati (7.10.) occisa est. Corpus diurnariae, glandibus pistolii transfixum, in anabathro domus ipsius repertum est. Politkovskaja in actis diurnis oppositionis politicae, quibus nomen est *Novaja Gazeta*, scripta sua divulgabat.

In illis actis relationem de hominibus in Tzetzenia raptis et cruciatis divulgatura erat, sed una hora et dimidia ante, quam textum redactioni tradere debebat, interfecta est.

Apud Tzetzenos Politkovskaja magni aestimabatur, in patria autem vigiles publici et Servitium Securitatis (FSB) illam speculabantur et custodiebant. Sunt qui censeant illud Servitium forsitan participem caedis fuisse.

Duobus annis ante, cum Politkovskaja in Ossetiam septentrionalem iter factura esset, ut de sequestratione et caede scholarium urbis Beslan referret, victima fuit insolitae et peculiaris venenationis, cuius culpam Servitio Securitatis attribuit.

Alexander Lebedev, qui una cum pristino praesidente Michaeli Gorbatschov maiorem partem actorum "Novaja Gazeta" possidet, praemium septingentorum quadraginta milium euronum illis promisit, quorum auxilio auctor facinoris inveniretur.

Investigatores autem putant ipsum homicidam a mandatoribus caedis forsitan iam interfectum esse.

(Tuomo Pekkanen)

Manifestationes in memoriam

13.10.2006, klo 10.21

Moscuae et Petropoli complures centeni homines in manifestationes congregati Annam Politkovskaja, imagines eius portantes, commemorabant.

Apud sedem legationis Russiae Helsinkiensem circiter mille homines candelis ardentibus memoriam eius vespere diei Dominici colebant.

Societas diurnariorum Russiae ait caedem Annae Politkovskaja velut pectus rei diurnariae Russorum transfixisse.

(Tuomo Pekkanen)

Experimentum nucleare Coreae Septentrionalis

13.10.2006, klo 10.21

Corea Septentrionalis nuntiavit se primum experimentum nucleare fecisse. Ita illa dictatura Stalinistica, pauper et inclusa, futura est nona in orbe terrarum potestas, cui arma nuclearia esse constat.

Experimentum Coreae Septentrionalis a moderatoribus orbis terrarum et a Consilio Securitatis Nationum Unitarum severissime condemnatum est.

Americani novas contra Coream Septentrionalem sanctiones a Nationibus Unitis flagitaverunt, Coreani Meridiani nuntiaverunt se potestatem nuclearem sibi propinquam pati non posse.

Etiam Sinenses, qui foederati fideles Coreanorum Septentrionalium esse solent, eos reprobaverunt.

Minister primarius Iaponiae dixit illo experimento nucleari stabilitatem Asiae Orientalis mutari.

(Tuomo Pekkanen)

Sanctiones praeparantur

13.10.2006, klo 10.19

Finnia, penes quam est praesidium Unionis Europaeae, experimentum Coreae Septentrionalis facinus provocativum appellavit et declaravit Unionem una cum societate internationali actiones contrarias praeparaturam esse.

Id autem necesse esse, ut societas internationalis unanimis maneret et discrimen rationibus politicis et cooperatione amoveretur.

(Tuomo Pekkanen)

De experimento nucleari

05.10.2006, klo 18.19

Moderatores Coreae Septentrionalis nuntiaverunt se experimentum nucleare facturos esse, ut defensionem civitatis suae contra inimicitias Americanorum corroborarent.

Qua re audita multae nationes, in iis Corea Meridiana, Iaponia, Britannia illud inceptum concorditer condemnaverunt.

Quin etiam Sinenses duces Coreanos ad temperantiam hortati sunt.

(Reijo Pitkäranta)

IRA vim deposuisse videtur

05.10.2006, klo 18.18

Exercitus Irlandiae liberandae (IRA) actionibus suis nefariis finem fecit neque iam pro causa sua armis certabit.

Quod apparet ex relatione, quam commissio, cuius est processum pacis Irlandiae Septentrionalis custodire, nuperrime divulgavit.

Idem documentum monstrat etiam Sinn Fein, alam politicam illius exercitus, suo promisso satisfecisse et eo tendere, ut proposita sua rationibus politicis peragantur.

(Reijo Pitkäranta)

Saepes in confinio Mexici

05.10.2006, klo 18.18

Senatus Civitatum Americae Unitarum legem de saepimento tutelari in confinio Mexici ducendo accepit et quidem ita, ut octoginta senatores pro hoc consilio sententiam ferrent, undeviginti autem eidem adversarentur.

Munus huius obstaculi erit impedire, ne homines ex Mexico illegaliter in Civitates Americae Unitas immigrent.

In finibus Americanorum hodie undecim fere miliones Mexicanorum versantur, quorum dimidia pars iure habitandi caret.

(Reijo Pitkäranta)

Praemium Nobelianum physicae

05.10.2006, klo 18.17

Praemium Nobelianum physicae hoc anno astronomis Americanis John Mather et George Smoot tribuitur.

Qui viri de cosmologia optime meriti praecipue initiis rerum naturae, stellarum, galaxiarum investigandis operam impenderunt.

Studiis suis cosmologicis subsidio venerunt opinioni, ex qua rerum natura ex displosione primigenia orta est.

(Reijo Pitkäranta)

Urbs Vasa 400 annorum

05.10.2006, klo 18.16

Die Lunae quadringenti anni acti erant, cum Vasa, urbs Finniae in ora Bothniae Australis iacens, condita est.

Postridie enim Kalendas Octobres anno millesimo sescentesimo sexto (2.10.1606) accidit, ut Mustasaari, emporium mediaevale, cui postea nomen Vasa inditum est, a Carolo IX, rege Suetiae, privilegio urbis donaretur.

Itaque non mirari oportet Carolum XVI Gustavum, successorem eius hodiernum, una cum regina Silvia mense Augusto proxime praeterito Vasam visitavisse, ut urbi de anniversario gratularetur.

(Reijo Pitkäranta)

Nova crustaceorum genera

05.10.2006, klo 18.16

In quadam spelunca in Israele patefacta octo nova crustaceorum genera reperta sunt.

Haec spelunca, in qua oecosystema per quinque miliones annorum segregatum vixisse existimatur, inter effossiones in illa regione factas inventa est.

Illud antrum semper luce solis caruit, quam ob rem crustacea caeca remanserunt. Ope horum generum

investigari potest, quo modo organismi solis expertes explicati sint.
(Maija Ketoluoto-Nurminen)

De Unione Europaea amplificanda

28.09.2006, klo 10.56

Commissio Europaea die Martis suasit, ut Bulgaria et Romania certis condicionibus anno proximo ineunte in Unionem Europaeam asciscerentur.

Adhaesio autem illarum terrarum, antequam officialis fiat, in parlamenti singulorum membrorum Unionis comprobanda erit.

Consultationes etiam de Turcia et Croatia asciscendis fiunt.

At Jose Manuel Barroso, praeses Commissionis Europaeae, censet post Bulgariam et Romaniam in Unionem acceptas amplificationi moram interponendam esse, donec quaestio de lege Unionis fundamentali soluta sit; illa lege accepta Unionem efficacius quam ante agere et nova membra asciscere posse.

(Tuomo Pekkanen)

Dialogum inter religiones esse necessarium

28.09.2006, klo 10.55

Summus Pontifex Benedictus XVI delegatos terrarum islamicarum in Arcem Gandulfi, ubi residentiam habet aestivam, die Lunae vocaverat.

Affirmavit se orbem musulmanum aestimatione et reverentia prosequi sed monuit mutuam inter religiones reverentiam esse necessariam; dialogo authentico opus esse, ut omnes contentiones in spiritu proficuae consensionis remitterentur.

(Tuomo Pekkanen)

Calamitas traminis magnetici

28.09.2006, klo 10.52

In Emslandia, regione Saxoniae Inferioris, tramen magneticum in calamitatem incidit, cum contra currum operarium, qui in eadem orbita erat, magna velocitate impegit.

Viginti quinque homines in illa collisione, cuius causa error humanus esse dicitur, perierunt.

Tramen magneticum in orbita speciali vi magnetica sustinente et propulsante levitat.

Velocitatem quadringentorum quinquaginta chiliometrorum horalium assequi potest, sed calamitosum tramen, quod in itinere probationis erat, tantum centum septuaginta chiliometrorum velocitate vectum esse nuntiatur.

Tramen magneticum eiusdem generis hucusque tantum inter urbem Sanghaevum et aeriportum eius in commeatu publico adhibetur.

(Tuomo Pekkanen)

Reclamationes Hungariae

28.09.2006, klo 10.53

In urbe Budapestino Hungariae magnae hominum turbae contra regimen reclamitaverunt, cum phonotaenia quaedam palam facta esset, in qua primus minister Ferenc Gyurcsany confitetur se civibus mentitum esse, ut in suffragio mense Aprili habito victoriam reportaret.

Oppositio politica flagitare pergit, ut ille munus deponat.

(Tuomo Pekkanen)

Praesidens Estoniae creatus

28.09.2006, klo 10.54

Praesidens Estoniae creatus est Thomas Henricus Ilves, factione democrata socialis, qui die nono mensis Octobris munus praesidentiale suscipiet.

Ille est delegatus Europae parlamentarius quinquaginta duos annos natus. Antea etiam munere ministri rerum exterarum in Estonia functus est.

Competitor eius fuit praesidens hodiernus Arnold Rüütel.

(Tuomo Pekkanen)

Comitia in Suetia parlamentaria

22.09.2006, klo 10.07

Die Dominico in Suetia comitia parlamentaria habita sunt, quorum eventum omnes intenti exspectabant, cum scirent potestatem socialistarum per duodecim annos continuatam in discrimine versari.

Sententiis computatis patuit confoederationem partium mediarum et dextrarum ex democratis socialibus et prasinis victoriam reportavisse: illa coalitio enim ex suffragiis duodequingenta centesimas (48%) sibi paravit, cum russati et prasini ex votis nonnisi quadraginta sex (46%) centesimis potirentur.

Quae cum ita sint, proximus princeps minister Suetiae erit Fredrik Reinfeldt, praeses factionis conservativae moderatae unum et quadraginta annos natus.

Göran Persson, dux socialistarum, de clade sua certior factus nulla mora interposita nuntiavit se non solum praesidatum factionis suae deponere sed etiam a negotiis publicis omnino recedere.

(Reijo Pitkäranta)

Rerum conversio in Thailandia

22.09.2006, klo 10.07

In Thailandia conversio rerum facta est, cum summus dux exercitus sibi potestatem arripuit et legem civitatis fundamentalem abrogavit.

Eodem tempore Thaksin Shinawatra, princeps minister Thailandiae, qui diu de corruptione accusatus erat, a munere amotus est.

Usurpatores nuntiaverunt se summum imperium usque eo obtenturos esse, quoad civitati administrandae novus primarius minister eligeretur.

(Reijo Pitkäranta)

Quid papa Benedictus XVI dixerit

22.09.2006, klo 10.06

Papa Benedictus XVI ait se graviter dolere, si verba sua de islamismo facta animos musulmanorum offendsent.

Arbitratur sibi talem pronuntiationem edendam esse, postquam audivit orbem islamistarum valde iratum esse propter orationem suam in Germania habitam.

Citaverat enim in sermone suo dictum cuiusdam imperatoris mediaevalis, ex quo propheta Muhammed effecisset, ut varii generis mala per orbem terrarum manarent.

(Reijo Pitkäranta)

Colloquia Indiae et Pakistaniae

22.09.2006, klo 10.05

Pervez Musharraf, praesidens Pakistaniae, et Manmohan Singh, primus minister Indiae, consenserunt, ut consultationes pacis a ministris utriusque civitatis denuo susciperentur.

Colloquia enim ad territorium Casmiriam pertinentia mense Iulio ad irritum ceciderunt, cum ducenti fere homines ictibus bombicis in India factis vitam amisissent.

Indi hunc impetum separatistis ex Pakistania agentibus crimini dederunt.

(Reijo Pitkäranta)

De mutatione climatis

22.09.2006, klo 10.05

Investigatores Americani mutationem climaticam iam evolutionem afficere putant.

Nonnullae enim species animalium propter novum caeli statum genetice mutari coeperunt.

Hodie in Terra Nova (Newfoundland), provincia Canadae, culices etiam mense Augusto sanguinem exsugere pergunt, cum antea mense Iulio id facere desierint.

Mutationes evolutionis praesertim in partibus orbis terrarum septentrionalibus conspici possunt, quarum clima iam simile fere sit ac in regionibus meridianis.

(Maija Ketoluoto-Nurminen)

Conventus Asem 6

15.09.2006, klo 09.15

Sextus conventus Unionis Europaeae et Asiae Helsinkii septimana ineunte (10-11.9.) habitus est.

Inter alia actum est de mutatione climatis, contra quam nationes participes efficaciter se operaturas esse

promiserunt, cum pronuntiaverunt se tractatum Kiotensem sustenturas.

Aliud argumentum in conventu tractatum erat subsidium oeconomicum, quod pauperrimis membris ministraretur.

Praeterea disserebatur de populorum mutua consensione et de progressu durabili. Proximus conventus Asem in urbe Pekino Sinarum anno bis millesimo octavo futurus est.

Die Lunae mane participes silentio tristi ictus terroristicos, qui quinque annis ante (11/9) contra Americanos facti erant, in memoriam revocaverunt.

(Tuomo Pekkanen)

Osama bin Laden adhuc quaeritur

15.09.2006, klo 09.15

Paene tria milia hominum illo die mortui sunt, cum aeroplana a terroristis abducta contra turres geminas Centri Mundi Commercialis (WTC) urbis New York et contra Pentagonum volaverunt; quartum aeroplanum similiter abductum in Pensylvania cecidit.

Osama bin Laden, auctor sceleris, adhuc ab Americanis quaeritur.

Praesidens George W. Bush die ictuum anniversario orationem televisificam habuit, qua monuit bellum terrorismo illatum esse certamen pro cultu et humanitate; cladem in illo certamine acceptam terras Proximae Orientis in potestatem dictatorum extremistarum, qui arma nuclearia haberent, tradituram esse.

Idem affirmavit Osamam bin Laden ab Americanis repertum iri, ut ad iudicium duceretur.

(Tuomo Pekkanen)

Saddamo nihil cum al-Qaida

15.09.2006, klo 09.14

Commissio explorationis senatus Americani relationem divulgavit, ex qua patet Saddamum Hussein nullas cum ordine al-Qaida consuetudines habuisse.

Immo vero Saddamum recusavisse, quominus illum ordinem adiuvaret, eundemque regimini ipsius inimicum habuisse. Saddamum etiam, licet re infecta, operam dedisse, ut ducem ordinis Abu Musab al-Zarqawi deprehenderet.

Regimen praesidentis Bush causam belli Iraquici interposuerat, quod Saddam consuetudines cum al-Qaida et al-Zarqawi haberet.

Itaque democratiae Americani, qui oppositionem politicam faciunt, praesidentem fraudis accusaverunt.

Etiam altera causa eiusdem belli, scilicet quod Saddam arma interneciva paravisset, iniusta et falsa esse apparuit.

(Tuomo Pekkanen)

Principissa Kiko filiolum peperit

15.09.2006, klo 09.13

In familiam imperialem Iaponiae primus post quadraginta annos filiolus natus est.

Parentes sunt Akishino, filius minor imperatoris, et coniux eius Kiko. Puero, qui in successione imperii tertium locum habet, nomen Hisahito datum est.

Heres imperii est Naruhito, filius imperatoris maior, secundum locum tenet frater eius Akishino.

(Tuomo Pekkanen)

Radiophonia Finnica LXXX annorum

15.09.2006, klo 09.12

Die nono mensis Septembris octoginta anni ex prima emissione Radiophoniae Finnicae Generalis acti erant.

Ille dies natalis habetur operae regularis radiophoniae Finnorum.

Emissiones televisificae in Finnia anno millesimo nongentesimo duodesexagesimo regulariter et assidue coeperunt.

Dies festus emissis programmatis specialibus celebratus est.

(Tuomo Pekkanen)

Quid praesidens Iraniae dixerit

07.09.2006, klo 17.41

Praesidens Iraniae Mahmoud Ahmadinejad promisit civitatem suam ad consultationes de discordia nucleari solvenda paratam esse, ut nuntiavit Kofi Annan, secretarius generalis Nationum Unitarum, qui

die Dominico eum Teherani convenit.

Praesidentem tamen postulatis nationum occidentalium repudiatis recusavisse, quominus Iranian uranium eliquare desinerent, antequam illa colloquia inissent.

Huc accedere, quod Ahmadinejad affirmasset Iranianos ignitio in Libano facto ab omni parte favere.
(Reijo Pitkäranta)

Tumultus ethnicus in Carelia

07.09.2006, klo 17.40

In Carelia Russorum hoc mense ineunte tumultus violenti orti sunt, quibus factum est, ut immigrantes Caucasia ex oppido Kontupohja magna multitudine fugere cogerentur.

In causa conflictuum ethnicorum erat, quod duo viri indigenae Russi pugna cum Tzetzenis cultris et manibus commissa vitam amiserunt.

Qua re audita duo milia Slavorum in medium oppidum congregati sunt reclamatum et flagitatum, ut omnes Caucasia e Carelia eicerentur.

Inter perturbationes, quae usque ad multum mane continuabantur, complures tabernae Tzetzenorum mercatoriae dirutae sunt.

(Reijo Pitkäranta)

De percontatro spatiali Europaeo

07.09.2006, klo 17.39

Percontatrum spatiale, quod ESA sive Ordo Europae spatio cosmico investigando ad Lunam perquirendam emiserat, officio suo defunctum est, cum maximo impetu superficiei Lunae impactum est.

Neque tamen id prius accidit, quam haec capsula Lunam bis milies circumvolavisset.

Munus speculatri erat intra tres annos novissimam technicam experiri, qua astronautis in volatibus spatialibus futuris opus esset, nec non materiam comparare, cuius ope investigatores novas notitias primae originis Lunae acquirerent.

(Reijo Pitkäranta)

De carbonifodinis Sinarum

07.09.2006, klo 17.40

In Sinis septendecim milia carbonifodinarum sunt, quae non satis tutae esse existimantur.

Quam ob rem magistratus quattuor milia octingentas earum ante finem anni proximi clausuri sunt.

Id quidem iam antea facere conati sunt, sed sine successu et bono eventu. Anno praeterito calamitates fodinae apud Sinas tam frequentes et funestae erant, ut iis sex milia hominum interirent.

Sunt autem qui credant verum numerum mortuorum multo maiorem esse.

(Reijo Pitkäranta)

Universitas Harvardiana optima

07.09.2006, klo 17.38

Grex censorius universitatis Sanghaeensis, cum cognoscere vellet, ubinam gentium optimae studiorum universitates essent, circiter quingentas scholas superiores inter se comparavit.

Argumento aestimandi usus est indicibus publicationum academicarum. Victoriam huius certaminis reportavit Universitas Americanorum Harvardiana, cum Universitas Britannorum Cantabrigiensis ei proxima esset.

Inter universitates terrarum septentrionalium eminebat Institutum Carolinum Stockholmiense, quod sedem duodequingagesimam sibi acquisivit. Universitas autem Helsinkiensis loco septuagesimo quarto posita est.

(Reijo Pitkäranta)

Violentia in Iraquia non desinit

31.08.2006, klo 20.05

Ictus terroristici et conflictus violenti in Iraquia usque continuantur, etsi tam praefecti exercitus Americani quam Nuri al-Maliki, minister Iraquianorum primarius, securitatem meliorem fieri et violentiam deminui affirmaverunt.

His quattuor mensibus in variis Iraquiae regionibus circiter decem milia civium per violentiam

perierunt.
(Tuomo Pekkanen)

De bello in Libano gesto

31.08.2006, klo 20.04

Cum ordo Hizbollah mense Iulio in confinio Israelis et Libani tres milites Israelianos occidisset et duos deprehendisset, Israeliani in Libanum invaserunt.

Neque tamen his contigit, ut milites deprehensos liberarent. Bello per unum mensem gesto circiter centum Israeliani et plus mille Libanenses vitam amiserunt.

Auctoritate et decreto Nationum Unitarum bellum ea condicione compositum est, ut tutatores pacis internationales confinium Libani et Israelis custodirent.

In colloquio televisifico Hassan Nasrallah, moderator ordinis Hizbollah, dixit se suis imperaturum non fuisse, ut milites Israelianos deprehenderent, si praesagire potuisset tantum bellum inde oriturum esse.

(Tuomo Pekkanen)

Campus petrolei in Mari Baltico inventus

31.08.2006, klo 20.04

Societas petrolearia Polonica, cui nomen Lotos, nuntiavit se campum petrolei in regione maritima Poloniae invenisse, qui maximus in Mari Baltico esset.

Ille campus centum triginta quinque chiliometra in septentrionem a litore distat et mille sescenta metra sub superficie maris iacet.

(Tuomo Pekkanen)

Aestas in Finnia siccissima

31.08.2006, klo 20.03

Aestas huius anni fuit in Finnia compluribus decenniis, partim etiam centum annis, omnium siccissima.

In quibusdam regionibus pluviae tribus mensibus omnino non ceciderunt ideoque incendia silvarum duplo frequentiora fuerunt quam aestivo tempore assolet, superficies lacuum et puteorum descenderunt, folia arborum flavescentia ceciderunt.

Illi, qui in patria ferias aestivas egerunt, tempestate optima gavisii sunt, sed praesertim agricolis penuria aquae damna paravit.

Sunt qui censeant aestates calidas annis futuris non fore exceptiones, quia climate orbis terrarum mutato phaenomena caeli extrema, ut siccitates, usque crebrescant. Ex aliis mundi partibus similia nuntiantur.

Apud Sinenses decem miliones hominum pluviis deficientibus inopia aquae potabilis laborant et quindecim miliones post quattuor typhones aestivos domibus carent.

In Nederlandia mensem Iulium, in historia eius terrae siccissimum, Augustus mensis cum magnis et assiduis imbribus secutus est.

(Tuomo Pekkanen)

Plutonem non esse planetam

31.08.2006, klo 20.02

Unio Astronomica Internationalis (IAU) decrevit, ne Pluto inter planetas numeraretur, quia novissimae definitioni planetae non responderet.

Planetam esse corpus, quod Solem circumiret et tantam molem haberet, ut rotundum esset et suum orbem dominaretur.

Cum hac condicione Pluto, qui in singulis suis circuitibus vicenos annos intra orbitam Neptuni errat, non congruit.

(Tuomo Pekkanen)

Hard Rock Hallelujah!

26.05.2006, klo 10.43

In certamine finali cantionum Eurovisionis, quod vespere Sabbati Athenis factum est, Finnia palmam reportavit.

Lordi, grex Finnicus graviore musicae metallica deditus, in suffragio duodequadragesima nationum ducenta nonaginta duo puncta obtinuit, qui numerus longe maximus est in historia semisaeculari huius certaminis.

Lordi, qui ex quinque musicis personas monstruosas gerentes (**gerentibus?**) constat, operibus pyrotechnicis adhibitis cantionem "Hard Rock Hallelujah" cecinit, qua animos audientium sibi conciliavit.

Grex Finnicus et adiutores eius laudabantur, quod praeiudiciis liberi et a ceteris differentes ipsa musica, non saltationibus feminarum seminudarum, victoriam tulissent.

Finni, qui hucusque certamen Eurovisionis quadragies participaverunt, octies maxima cum humiliatione ultimi iudicati sunt.

Semel quidem sextum locum obtinuerunt. Eo dulcius nunc sapit victoria inopinata, quam per televisionem plus centum miliones Europaeorum videbant et audiebant.

Ex hac victoria sequitur, ut certamen cantionum anno proximo in Finnia instituitur.

(Tuomo Pekkanen)

Nigrimontium libertatem vindicavit

26.05.2006, klo 10.41

Suffragio populari die Dominico in Nigrimontio facto plus quam quinquaginta quinque centesimae suffragantium voluerunt, ut patria ex confoederatione Serborum et Nigrimontanorum liberaretur.

Eventus suffragii a primo ministro Milo Djukanovic et a magistratibus Nigrimontanis confirmatus est.

Ad urnas octoginta sex centesimae ex civibus suffragium habentibus accesserunt.

(Tuomo Pekkanen)

Italiani ex Iraquia abituri

26.05.2006, klo 10.41

Romano Prodi, primus minister Italiae, ait bellum Iraquicum fuisse gravem errorem, quod problema securitatis non solvisset sed difficilius fecisset; itaque Italiam cum nationibus confoederatis colloquia de copiis suis ex Iraquia deducendis incepturam esse.

Italia in Iraquia adhuc circiter duo milia sescentos milites habet.

(Tuomo Pekkanen)

Immigratio illegalis coercetur

26.05.2006, klo 10.40

Senatus Americanus legem accepit, ex qua saepimentum tutelare sescentorum chiliometrorum duceretur, quo immigratio ex Mexico illegalis prohiberetur.

Praeterea limes Mexicanus a sex milibus militum Americanorum custoditur. Mexicani saepimento ponendo resistunt et renovationes flagitant, quibus complures miliones Mexicanorum adiuventur, ut legaliter in USA laborare possint.

Hispani autem rationibus diplomaticis impedire volunt, ne immigratores Africani ad Insulas Canarias affluant. Propositum est nationibus Unionis Europaeae persuadere, ut auxilium terris Africanis attribuendum augeant; ita condicionibus vitae in melius mutatis migrationem deminutum iri.

(Tuomo Pekkanen)

De aestate Latina

26.05.2006, klo 10.39

Propter ferias nuntii Latini mensibus aestivis non rediguntur. Emissio proxima erit Kalendis Septembribus, ex quo die incipiet annus nuntiorum septimus decimus.

Aestate autem fient varia seminaria et conventus latinistarum, in quibus excellit XI Conventus internationalis, quem Academia Latinitati Fovendae Alcannizium et Ampostam, in duas urbes Hispaniae convocavit.

Bulgaria et Romania admonentur

18.05.2006, klo 20.00

Commissio Unionis Europaeae censet fieri posse, ut Bulgaria et Romania ad societatem Unionis anno proximo ineunte accedant, dummodo certis condicionibus satis faciant.

His civitatibus maxime nitendum esse, ut systema iudiciarium suum renoveant et contra criminalitatem ordinatam efficacius quam ante agant.

(Reijo Pitkäranta)

Napolitano novus praesidens

18.05.2006, klo 20.00

Novus praesidens Italiae creatus est Georgio Napolitano, candidatus partium mediarum et sinistrarum. Ad electionem eius quattuor suffragia in parlamento opus erant. Napolitano, vir octoginta annorum, etiam 'Princeps ruber' appellatus est, quoniam olim communista fuit. Ubi primum autem Unio Sovietica dissoluta est, ad democratas sinistros transiit. Anno praeterito praesidens Carlo Azeglio Ciampi eum senatorem perpetuum nominavit, qui unus e summis honoribus in Italia habetur.
(Reijo Pitkäranta)

Quid Condoleezza Rice dixerit

18.05.2006, klo 20.01

Moderatores Civitatum Americae Unitarum cum Libya legationum commercia in pristinum restituere decreverunt.

Condoleezza Rice, ministra negotiorum exterorum: "Mox", inquit, "sedem legati Tripoli aperiemus. Huc accedit, quod Libya ab indice civitatum terrorismo faventium amovetur neque ea iam in earum nationum numero refertur, quae recusant, quominus in bello contra terrorismum gerendo Americanis cooperentur."

(Reijo Pitkäranta)

Tumultus in Brasilia violenti

18.05.2006, klo 19.59

In Brasilia amplius quinquaginta cives, imprimis custodes publici, vitam amiserunt tumultibus post hominum memoriam omnium violentissimis ibidem ortis.

In urbe Paulopoli, ubi plus viginti miliones hominum habitant, greges criminales gravissime armati impetus cruentos praesertim in vigiles urbanos fecerunt.

In causa putatur esse, quod captivi ad maximum criminalium ordinem pertinentes ex pristinis vinculis in carcerem tutiorem et remotiorem transferri coepti sunt.

(Reijo Pitkäranta)

Grex Barcinonensis victor

18.05.2006, klo 19.55

Die Mercurii vesperi (17.5.) in stadio Parisiensi 'Stade de France' appellato certamen pedifollicum positum est ad decernendum, utrum grex Barcinonensis an manus Britannorum nomine Arsenal in foedere campionum ceteris excelleret.

Ab hoc ludo superiores discesserunt Barcinonenses folle bis in rete adversariorum ingesto.

Victoriam altero demum tempore sibi extorserunt, nam Arsenal spatium certaminis priore melior erat.

(Reijo Pitkäranta)

De sationibus vernis

18.05.2006, klo 19.58

Tempestas calida mense Maio ineunte in Finnia humum et arva ita fovit at arefecit, ut agricolae sationes vernas suo tempore aut etiam solito maturius facere possent.

Pluviae, quae septimana vergente in variis Finniae partibus ceciderunt, agris sationalibus eo maiori utilitati erant, quod gramina hoc vere admodum lente campis redierunt propter tardam regelationem terrae.

(Reijo Pitkäranta)

Rerum in Darfur condicio

12.05.2006, klo 11.10

Moderatores Sudaniae Nationibus Unitis licentiam dederunt copias paci tuendae in provinciam Darfuriam mittendi.

Talis nuntius editus est, postquam regimen Sudaniae et factio rebellium potentissima libellis pacis in urbe capite Nigeriae subscripserunt.

Quo facto speratur fore, ut bello in Darfuriam iam per multos annos gesto tandem finis imponatur.

(Reijo Pitkäranta)

Lex Unionis Europaeae fundamentalis

12.05.2006, klo 11.10

Parlamentum Estoniae tractatum de lege Unionis Europaeae fundamentali consensu omnium factionum maiorum ratum fecit.

Constat hoc documentum iam a quindecim civitatibus sociis confirmatum esse.
Francogalli et Hollandienses autem suffragio populi anno praeterito instituto recusaverunt, quominus illam legem acciperent.
(Reijo Pitkäranta)

Comitia localia Britanniae

12.05.2006, klo 11.09

Comitiis municipalibus in Britannia habitis factio conservativa tantam victoriam reportavit, ut laboristis ducentas quinquaginta fere sedes decurionum adimeret.
Quae cum ita essent, Tony Blair, princeps minister, compositionem regiminis sui aliquantum mutare decrevit.
Charles Clarke, minister a rebus domesticis, se magistratu abdicare coactus est, et Jack Straw, minister negotiorum exterorum, a munere amotus ad officium praesidis camerae inferioris curandum transiit.
(Reijo Pitkäranta)

Gratia Unionis Europaeae

12.05.2006, klo 11.08

Numerus eorum, qui societate Unionis Europaeae parum contenti sunt, in praesenti minor est quam umquam post annum millesimum nongentesimum nonagesimum quintum.
Patet enim e demoscopia recens divulgata tertium quemque Unionis civem censere illam societatem rem malam esse.
Inter omnium alienissimos socios numerantur Lettonienses, Austriaci, Britanni et Finni.
Benevolentissimi autem eidem communioni sunt Luxemburgenses, Hollandienses et Irlandienses.
(Reijo Pitkäranta)

Pretium auri valde accensum

12.05.2006, klo 11.08

Aurum in mercatu mundano hodie multo carius constat quam ante. Die Martis (9.5.) enim id in foro argentario urbis Washington tanti aestimabatur, ut pro singulis unciis auri plus septingena dollaria solverentur.
Una e causis, cur pretium auri hoc anno iam triginta centesimis creverit, existimatur esse discordia de vi nucleari Iraniae orta.
(Reijo Pitkäranta)

Libri omnium perniciosissimi

12.05.2006, klo 11.07

Commentarii periodici Americani nomine 'Human Events' quindecim politicis et viris doctis delectis mandaverunt, ut iudicarent, quinam liber his duobus saeculis exaratus generi humano maxime nocuisset.
Scriptum longe perniciosissimum ab illo collegio electum est 'Praeconium communisticum', quod Carolus Marx et Fredericus Engels anno millesimo octingentesimo duodequingagesimo (1848) edendum curaverunt.
Secundas tulit 'Pugna mea', opus ab Adolfo Hitler compositum. Tertio autem indicis loco positus est 'Liber ruber', quem Mao Zedong abhinc quadraginta annos conscripsit.

Carolus XVI Gustavus sexagenarius

05.05.2006, klo 08.34

Pridie Kalendas Maias Carolus XVI Gustavus, rex Suetorum, diem natalem sexagesimum Stockholmiae celebravit.
Aderant, ut illi gratularentur, familiae regiae Norvegiae et Daniae, rex Hispaniae Juan Carlos, praesidens Finniae Tarja Halonen aliique moderatores civitatum.
Carolus XVI Gustavus avo suo Gustavo VI Adolpho anno millesimo nongentesimo septuagesimo tertio successit.
Cum lex Suetiae fundamentalis anno sequenti renovaretur, rex omnem quam habuerat potestatem politicam et administrativam amisit, sed nihilo minus apud cives magna gratia valet.
Coniugem duxit Silviam Sommerlath, ex qua duas filias, Victoriam et Magdalenam, et unum filium, Carolum Philippum habet.
(Tuomo Pekkanen)

Berlusconi munus deposuit

05.05.2006, klo 08.32

Silvio Berlusconi, qui in comitiis Italiae parlamentariis mense Aprili factis cladem acceperat, diu recusavit, quominus eventum suffragiorum probaret et se victum confiteretur.

Tandem die Martis a praesidente Italiae Carlo Azeglio Ciampi dimissionem petivit et accepit.

Novus minister primarius erit Romano Prodi, praeses coalitionis factionum mediae et sinistrae.

(Tuomo Pekkanen)

Ratko Mladic latitare pergit

05.05.2006, klo 08.32

Ratko Mladic, generalis Serbus de criminibus belli accusatus, latitare pergit, etsi terminus ante quem deprehendendus erat, mense Aprili in Maium vergente praeteriit.

Unio Europaea praedixerat consultationes de Serbia-Nigrimontio in Unionem asciscendo interruptum iri, nisi Mladic ante diem constitutam captus esset. Creditur Mladic auxilio militum et magistratuum localium latitare.

Inter multa et magna crimina ab illo commissa praecipua est caedes Srebrenicensis.

Mense Iulio anno millesimo nongentesimo nonagesimo quinto ille copias suas in urbem Srebrenicam duxit, in quam multa milia profugorum asylum petentium confluxerant.

Constat iussu illius septem milia virorum et puerorum musulmanorum ibi paucis diebus crudelissime esse interfectos.

Neque tutores pacis Nederlandienses, qui tum aderant, caedem impedire potuerunt. Quae cum ita sint, Unio Europaea facere non potuit, quin consultationes cum Serbia-Nigrimontio interromperet.

(Tuomo Pekkanen)

Bolivia gasum et petroleum publicat

05.05.2006, klo 08.30

Evo Morales, praesidens Boliviae, nuntiavit se copias gasi et petrolei publicare, quae in patria essent.

Societates peregrinae petroleariae et gasariae, quae in Bolivia operarentur, productionem civitati Bolivianorum traderent aut abirent.

Spatium sex mensium dari, quo illis cum nationalibus societatibus de novis pactis consulendum esset.

(Tuomo Pekkanen)

Hippopotami et ursi marini in periculo

05.05.2006, klo 08.30

In indice specierum periclitantium sunt hodie sedecim milia plantarum et animalium.

His duobus annis numerus quingentis triginta auctus est. In indicem nuper accepti sunt hippopotamus et ursus marinus.

Hippopotami propter venationem paene disparuerunt, ursi marini propter mutationem caeli periclitantur, qua fit, ut glacies polaris paulatim dissolvatur.

(Tuomo Pekkanen)

Rerum in Nepalia condicio

28.04.2006, klo 09.35

Populus Nepalianus acerrimis reclamationibus factis iam per tres septimanas a rege suo Gyanendra flagitat, ut Nepaliae systema complurium factionum restitueretur.

His tumultibus saltem duodecim cives mortui et multa milia hominum vulnerati sunt. Die Martis, postquam rex tandem se parlamentum a se dimissum denuo convocaturum esse promisit, reclamitantes in vias urbis Catmandi congregati victoria democratiae recuperatae exsultabant vexilla diversarum partium agitantes et cantus triumphales cantantes.

(Reijo Pitkäranta)

Quid Osama bin Laden dixerit

28.04.2006, klo 09.35

Die Dominico (23.4.) in canali satelliticio Quatariensi taenia sonigera divulgata est, in qua vox audiebatur musulmanos monens, ut ad longum bellum sacrum contra occidentales in Sudania gerendum se praepararent.

Rerum periti non dubitant, quin orator ille fuerit Osama bin Laden, caput retis terroristici internationalis nomine al-Qaida. Idem vir in phonotaenia locutus ait moderatores nationum occidentalium sanctionibus regimini Palaestinensium Hamas impositis iam monstravisse, quantam expeditionem cruce signatam contra islamismum suscepissent.
(Reijo Pitkäranta)

Memoria cladis Tshernobyliensis

28.04.2006, klo 09.34

Die Mercurii viginti anni acti erant e calamitate in ergasterio nucleari Tshernobyliensi facta.

Die enim vicesimo sexto mensis Aprilis anno millesimo nongentesimo octogesimo sexto (26.4.1986) accidit, ut quartum reaktorium illius electrificinae in Ucraina sitae exploderetur. Post hanc cladem sordes nucleares ventis et imbribus imprimis in Belorussiam ferebantur, sed etiam regiones Finniae et aliae Europae spetentrionalis partes pollutionibus periculosus affectae sunt.

(Reijo Pitkäranta)

Elisabeth II octoginta annorum

28.04.2006, klo 09.33

Die Veneris sive die vicesimo primo mensis Aprilis (21.4.) Elisabeth II, regina Britanniae, anniversarium suum octogesimum celebrabat.

Plus viginti milia hominum in viam stratam Windsorianam concurrebant monarchae suae gratulaturi. Regina, dum dimidiam fere horam una cum coniuge Philippo apud populum ambulat, a gratulatoribus praeter flores varia dona natalia accepit, in eis canem porcellanum et pileum signo Britanniae ornatum. Cenam autem sollemnem in horto botanico regali apparatus eodem die vesperi privatim una cum suis sumpsit.

(Reijo Pitkäranta)

De mulieribus Iranianis

28.04.2006, klo 09.32

Mulieribus Iranianis rursus licentia data est ludos pedifollicos et alia certamina athletica spectandi. Neque tamen una cum aliis spectatoribus sedere sinuntur, sed in separata caveae parte. E revolutione enim islamica abhinc triginta fere annos facta secutum erat, ut feminae in theatrum camporum lusoriorum adire vetarentur. Causa interdicti erat, quod mulieribus dedecori esse putabatur athletas bracis brevibus indutos intueri.

(Reijo Pitkäranta)

Rumsfeld reprehensus

21.04.2006, klo 13.49

Complures generales Americani, postquam rude donati sunt, Donaldum Rumsfeld, ministrum defensionis, vituperaverunt, quod imperitus et superbus esset, et flagitaverunt, ut munus deponeret. Est in his etiam Wesley Clark, olim summus imperator NATOnis, qui nuper dixit ministrum Rumsfeld una cum vicepraesidente Dick Cheney auctorem esse belli Iraquici.

"Illi urgebant", inquit, "ut bellum susciperetur, quamquam colloquia diplomatica adhuc continuabantur. Is fuit error tragicus."

Addidit occupationem Iraqiae nullo modo ad bellum contra terrorismum pertinere.

Donald Rumsfeld autem recusat, quominus discedat, et asseverat se tamdiu in munere mansurum esse quam praesidens Bush velit.

(Tuomo Pekkanen)

ALF Romam convenit

21.04.2006, klo 13.46

Academia Latinitati Fovendae (ALF) in urbe Roma hodie sessionem annuam habet, in qua duo novi sodales, Vibeca Roggen ex Norvegia et Reijo Pitkäranta ex Finnia, inter academicos cooptantur. Acroasim ?De Latii idea? habet professor Heikki Solin. Praeterea de XI Conventu internationali Academiae agitur.

Conventus ille in duabus urbibus Hispaniae, Alcannizii in Aragonia et Ampostae in Catalonia, mense Iulio habebitur. Argumentum praecipuum erit activa linguae Latinae institutio.

Constat enim linguae usum vivum, qui colloquiis habendis, operibus legendis opusculisque scribendis exercetur, esse viam omnium efficacissimam, qua sermo sive antiquus sive recentior doceatur. (Vide nexum: ALF Conventus XI)
(Tuomo Pekkanen)

Hiems cessit

21.04.2006, klo 13.45

In Finnia ursi ex somno hiemali experrecti sunt, nam multis in partibus vestigia illorum apud cubile hiemale iam observata sunt.

Post somnum ursis mos est aliquamdiu loco manere antequam longius vagari incipiunt. Densissima est populatio ursina in Carelia septentrionali, ubi ducenti quinquaginta ursi habitare aestimantur.

Certissima signa veris et appropinquantis aestatis sunt aves migratoriae in septentrionem revertentes.

Propter tempestatem solito frigidiorum migratio verna huius anni fuit primum lentior, sed inter ferias pasquales maximi avium aquatilium greges in maris litoribus observati sunt.

Etiam prima hirundo in Finnia meridionali visa est.

(Tuomo Pekkanen)

Comitia Italiae parlamentaria

13.04.2006, klo 17.21

Septimana vergente in Italia comitia parlamentaria habita sunt. Quorum victor evasit Romano Prodi, praeses coalitionis factionum mediae et sinistrae, cum Silvio Berlusconi, princeps minister Italiae hodiernus, et fautores eius cladem acerbam acciperent.

Eventus electionum tam aequalis erat, ut discrimen suffragiorum ambabus partibus distributorum nonnisi viginti quinque milium fuerit.

Victoria tamen Romani Prodi, cum diu filo tenuissimo pependisset, die Martis vesperi officialiter confirmata est.

Prodi ipse, dum se victorem comitiorum clamat: "Hodie", inquit, "pagina vertitur. Hic est triumphus democratiae Italiae, eo magis, quod cives tanta frequentia ad urnas ierunt sententiam suam laturi."

(Reijo Pitkäranta)

De sanctionibus Unionis Europaeae

13.04.2006, klo 17.20

Ministri Unionis Europaeae Alexandrum Lukashenko, praesidentem Belorussiae, aditu in fines Unionis prohibuerunt, cum ei syngraphum denegarunt.

Huc accedit, quod etiam undequadragesima ministris et curatoribus comitiorum Belorussiae interdictum est, ne terras Unionis obirent.

Talis poena eis ferenda est pro electionibus praesidentialibus, quippe quarum fides valde dubia sit.

(Reijo Pitkäranta)

De instituto Finniae Benelux

13.04.2006, klo 17.19

Institutum Finniae culturale nomine Benelux suam novam sedem in media urbe Bruxellis aperuit, cum domicilium eius antea Antverpiae situm esset.

Quod institutum abhinc tredecim annos conditum eo tendit, ut varios eventus praestantes culturam et scientiam Finniae illustrantes in Belgio, Nederlandia et Luxemburgo edendos curet et cum civibus harum terrarum novas relationes culturales coniungat.

(Reijo Pitkäranta)

In urbe Mexico pyramis inventa

13.04.2006, klo 17.19

Archaeologi in medietullio megalopolis Mexici pyramidem circiter mille quingentorum annorum invenerunt.

In actis diurnis Mexicanis scriptum legitur opus illud duodeviginti metra altum in collem quendam in illa urbe situm olim inclusum esse ibique usque ad nostrum tempus latuisse.

Hoc eo mirabilius esse videtur, quod catholici quotannis in cacumine eiusdem montis dies festos paschales celebrare solent.

Veri simile est illam pyramidem ab eisdem hominibus erectam esse, qui urbem priscam nomine Teotihuacam aedificaverunt.

(Reijo Pitkäranta)

Aedes propter nives corruentes

13.04.2006, klo 17.18

In Finnia hac hieme, imprimis autem mense Martio ad Aprilem vergente, tantae nives ceciderunt, ut aedificia onus earum vix iam sustinerent.

Postquam aliquot magnae aulae propter pondus nivale corruerunt, magistratus ministerii a rebus domesticis aedilibus imperaverunt, ut tecta aedium publicarum acervis nivium quam primum vacuefacerent.

Etiam possessores habitationum privatarum hortati sunt, eandem curam in domibus suis tutandis adhiberent.

(Reijo Pitkäranta)

Media Europa diluviis laborat

07.04.2006, klo 10.42

Nives solutae et imbres effecerunt, ut flumina in Media Europa superfluerent. In variis partibus Tzekiae, Slovakiae, Germaniae, Austriae Hungariaeque multa milia hominum propter inundationes domos suas relinquere coacti sunt.

Danuvius et Albis iam paulatim decrescere coeperunt, sed periculum in inferiore alveo utriusque continuatur.

(Tuomo Pekkanen)

Exercitationes militares in Sinu Persico

06.04.2006, klo 18.07

Exercitus Iraniae in Sinu Persico magnas exercitationes militares habuit. Intererant in illis septendecim milia militum et mille quingentae naves.

Causa exercitationum palam facta non est. Americani non negaverunt fieri posse, ut contra Iraniam ictum praeventivum facerent, si Iraniani consilio arma nuclearia parandi non destitissent.

(Tuomo Pekkanen)

Consilium Securitatis unanime

06.04.2006, klo 18.06

Consilium Securitatis Nationum Unitarum unanimiter decrevit, ut Irania omni locupletatione uranii desisteret et omnes postulationes Ordinis Internationalis ab Energia Atomica (IAEA) observaret. Mohammed ElBaradei, moderator illius ordinis, post unum mensem iudicaturus est, an Iraniani id fecerint.

Deinceps membra Consilii Securitatis permanentia et Germania rationes quaerent, quibus controversia dirimatur.

In decreto Consilii sunt concessionem et Russis et Sinensibus factae, qui sanctionibus Iraniae imponendis resistebant.

Iraniani ipsi censent contra usum et consuetudines internationales esse, quod res in Consilio Securitatis agatur.

(Tuomo Pekkanen)

Carceres in Europa orientali refertissimi

06.04.2006, klo 18.05

Ordines humanitarii iudicant carceres in Europa orientali esse nimis refertos multasque in eis abusiones fieri: lectulos in quibusdam carceribus deesse, captivos in caveis angustissimis transportari neque illis sub divo inambulare licere.

Res meliores futuras esse, si tantum gravissima crimina carcere punirentur.

(Tuomo Pekkanen)

Conditio feminarum in Iraquia pessima

06.04.2006, klo 18.04

Ordo a Libertate Feminarum in Iraquia (OWFI) dicit condiciones feminarum Iraquianarum sub dictatore Saddamo Hussein meliores fuisse quam hodie: Feminis tum licuisse ad operas extra domum ire, studere, divortium facere.

Nunc illas paene omnia iura amisisse. Maximum problema esse constitutionem, in lege sharia nitentem, atque securitatem deficientem.

Certamina pedifollii mundialia

06.04.2006, klo 18.03

In duodecim urbibus Germaniae, in quibus aestate certamina mundialia pedifollii fient, nova lupanaria constituentur, in quae - ut magistratus aestimant - imprimis ex Europa orientali complura dena milia feminarum portabuntur.

Ideo Claes Borgström, delegatus ab aequalitate Suetorum, flagitavit, ne grex Sueticus illis ludis interesset.

Ordines autem athletici Suetiae hoc consilium ilico reiecerunt. Tanja Karpela, ministra rei culturalis in Finnia, miratur, cur apud Finnos de lupanaribus ad ludos constituendis disputari nondum coeptum sit; ad prostitutionem, etsi in Germania lege permittatur, accedere criminalitatem, mercatus hominum, abusus sexuales minorennium aliaque, quae defendi non possint.

(Tuomo Pekkanen)

Comitia Israelis parlamentaria

30.03.2006, klo 19.09

Die Martis (28.3.) in Israele comitia parlamentaria facta sunt. Optimum successum habuit factio Kadima, cum ex centum viginti parlamenti sedibus viginti sibi conciliavit.

Quae cum ita sint, novus princeps minister Israelis erit Ehud Olmert, qui in praesenti non solum factioni victrici Kadima praeest, sed etiam ministerio principali Israelis interim fungitur.

Olmert, dum se victorem suffragii pronuntiat, ait ex eventu electionum conici posse, quantum subsidium consilia sua ad fines Israelis constituendos a populo acceperissent.

(Reijo Pitkäranta)

ETA armistitium incohavit

30.03.2006, klo 19.08

ETA sive Corpus separatisticum Vasconiae liberandae die vicesimo quarto huius mensis (24.3.) armistitium permanens iniit, ut biduo ante se facturum esse promiserat.

Illi nationalistae, quos Unio Europaea et Civitates Americae Unitae pro terroristis habent et qui de octingentis hominibus occisis accusantur, per quattuor fere decennia armis contenderunt, ut suam rem publicam in partibus Hispaniae septentrionalibus conderent.

(Reijo Pitkäranta)

Natura orbis terrarum laborat

30.03.2006, klo 19.08

Biodiversitas naturae in toto orbe terrarum citato gradu dilabitur, ut e relatione Nationum Unitarum recens divulgata patet.

Ex viginti quattuor biomatis sive oecosystematis, quae in illo documento respiciuntur, quindecim in peius mutata sunt.

Imprimis silvae et saltus in multis regionibus velociter perire videntur, quod investigatoribus summae sollicitudini est. Huc accedit interitus variorum generum avium.

In causa talium amissionum existimantur esse silvicidia, asteroides, eruptiones vulcanorum, subitae climatis mutationes.

(Reijo Pitkäranta)

Flumina Europae culturalia

30.03.2006, klo 19.07

Consilio et auctoritate Universitatis Ferrariensis inceptum paneuropaeum initum est ad illustrandum, quantam vim flumina ad culturam in variis Europae partibus substruendam habuerint.

Ex Finnia in numerum horum fluviorum culturalium delectus est amnis Aura, qui per Aboam sive urbem Turku permeans in mare influit.

Cetera flumina huc pertinentia sunt Abellanus, amnis Italiae, qui vulgo Volano appellatur, nec non Rhodanus, Vistula et Anas, flumen Portugalliae, cui nomen hodiernum Guadiana.

(Reijo Pitkäranta)

De praenominibus infantium

30.03.2006, klo 19.06

Ex statistica onomastica nuper facta cognoscitur, quatenus praenomina parentes Finni liberis suis anno praeterito natis libentissime indiderint.

Ex nominibus puerorum primum locum obtinet Veeti, cum in puellis praenominandis Emma apud familias tam Finnice quam Suetice loquentes plurimum gratia valeat.

Nomen Emma a suo pristino favore nihil recessit, nam etiam anno superiore ceteris aura populari antecellebat.

(Reijo Pitkäranta)

Bellum Iraquicum iam triennium

24.03.2006, klo 09.15

Bellum Iraquicum iam tres annos geritur. Primi ictus aerei in Bagdatum ab Americanis die vicesimo mensis Martii anno bis millesimo tertio facti sunt.

Causa esse dicebatur, quod Iraquiani arma interneciva praepararent, quae tamen nusquam repertae sunt. Conflictus sanguinei tertio die anniversario continuabantur. Gratia, qua praesidens Bush antea valebat, apud Americanos corrui.

Ille autem se bonam de re Iraquiana spem habere affirmavit, cum die belli anniversario Clevelandiae orationem habuit: "Saddamum Hussein", inquit, "ex potestate expellere iustum fuit. Si bellum in Iraquia non gereremus, in nostra terra gerendum esset". Addidit democratiam ad hostem profligandum optimam viam esse, sed quaerentibus, an bellum in Iraquia civile esset, non respondit. Ex rebus Iraquianis ad Iraniam transgressus praesidens explicavit ambitiones nucleares Iraniae et Americanis et paci orbis terrarum imminere. "Si necesse erit", inquit, "socios nostros Israelianos vel vi defendemus".

(Tuomo Pekkanen)

Comitia praesidentialia Belorussiae

24.03.2006, klo 09.13

Comitiis in Belorussia habitis Alexander Lukashenko tertium praesidens creatus est.

Ut tertium creari posset, suffragia popularia, quae ab observatoribus fraudulenta iudicabantur, autumno anni bis millesimi quarti habita sunt. Ordo a Securitate et Cooperatione Europae comitia praesidentialia Belorussiae nec libera nec proba fuisse rettulit. Fautores oppositionis captos et arbitrium conveniendi et loquendi circumscriptum esse, cum regimen competitionem politicam non ferret.

Unio Europaea sanctiones moderatoribus Belorussiae imponendas praeparat. Germania nuntiavit se oppositioni Belorussiae politicae subsidium, sicut ante, laturam esse. Russia et alia membra Unionis Civitatum Independentium comitia legaliter facta censent.

(Tuomo Pekkanen)

Pactio primae conductionis

24.03.2006, klo 09.11

Dominique de Villepin, minister primarius Francorum, legem promulgavit, ex qua operarii minus viginti sex annos nati inter primum operis biennium quandovis sine causa dimitti possent.

Illa lex, quae "pactio primae conductionis" appellatur, reclamationes et tumultus in multis Galliae oppidis peperit. Fautores legis credunt illam conductores operis ad novos operarios conducendos incitare, reprobatores autem dicunt legem iuvenes velut mucinnia tractare, quae post usum inter purgamenta reiciantur. Inopia quaestus est apud Francos quaestio difficillima. Pessimae sunt condiciones iuvenum, ex quibus circiter viginti tres centesimae quaestu carent.

(Tuomo Pekkanen)

Gasiductus ex Russia in Sinas

24.03.2006, klo 09.05

Inter Russos et Sinenses praeliminariter convenit, ut gasiductus ex Sibiria in Sinas duceretur.

Oeconomia crescente usque maior copia energiae Sinensibus opus est, quam ob rem et oleum et gasum terrestre ex Sibiria desiderant. Praesidente Putin hac septimana Sinas visitante de cooperatione etiam in energia nucleari paranda consultatum est.

(Tuomo Pekkanen)

Slobodan Milosovic mortuus

17.03.2006, klo 10.23

Slobodan Milosevic, pristinus praesidens Iugoslaviae sexaginta quattuor annos natus, die Saturni

(11.3.) in urbe Haga mortem obiit.

Inventus est exanimis in lecto carceris sui, ubi in custodia praevia tenebatur.

Pathologi, cum autopsiam postridie eius diei fecissent, causam mortis impetum cardiacum fuisse nuntiaverunt.

Iam quintus annus agebatur, cum Milosevic apud tribunal Nationum Unitarum criminibus belli cognoscendis de variis et multis sceleribus contra genus humanum commissis accusabatur.

Efferetur die Saturni (18.3.) in patria sua natali, cui nomen Pozarevac.

(Reijo Pitkäranta)

Lennart Meri e vita excessit

17.03.2006, klo 10.22

Pridie Idus Martias (14.3.) multo mane Lennart Meri, praesidens quondam Estoniae, in nosocomio Tallinnensi e vita excessit morbo longinquo et periculoso oppressus.

Constat eum patriae suae inde ab anno millesimo nongentesimo nonagesimo secundo usque ad annum bis millesimum primum (1992-2001) praefuisse cum optima omnium gratia et existimatione.

Praesidens Finniae Tarja Halonen nuntio lugubri audito populo Estoniae dolorem suum declaravit dicens excessum tanti viri non solum Estoniae, sed etiam Finniae et toti orbi terrarum amissionem gravissimam fecisse.

(Reijo Pitkäranta)

De energia pneumatica Suetiae

17.03.2006, klo 10.21

Regimen Suetiae ad energiam pneumaticam valde augendam paratum est, cum pecuniam amplius quinque miliardorum euronum in hoc consilio perficiendo collocare decrevit.

Propositum enim est, ut copia electricitatis ex energia pneumatica ortae in Suetia ad annum bis millesimum quintum decimum (2015) decemplex redderetur.

Hoc inceptum etiam eo civibus Suetis prodest, quod eis magnum numerum novorum operandi locorum praebet.

(Reijo Pitkäranta)

Dies festi cinematographici

17.03.2006, klo 10.21

In urbe Tampere dies festi cinematographici celebrati sunt. Palmam certaminis internationalis tulit Jean-Gabriel Periot Francogallus pellicula sua, quae inscribitur "Fortasse facinus commisit".

Haec taeniola experimentalis, ut ab ipso moderatore describitur, in materia ex archivis hausta consistit et de altero bello mundano agit.

Quo opere spectatoribus monstratur, quomodo feminae Francogalliae, quae post patriam a Germanis occupatam amorem hostium furtivos habuissent, palam punitae sint.

(Reijo Pitkäranta)

Hiems in Finnia continuatur

17.03.2006, klo 10.20

Hiems in Finnia primo dimidio mensis Martii solito frigidior fuit, ut ex statisticis Instituti meteorologici apparet.

Temperatura enim duabus septimanis proxime praeteritis plus quinque gradibus Celsius inferior reperta est quam compluribus annis superioribus fieri solebat.

Imprimis regiones Uloae et Caianeburgi his diebus frigoribus durissimis vexatae sunt, cum in Lapponia eodem tempore saevitia caeli iam paulatim mitesceret.

(Reijo Pitkäranta)

Finni ab Unione Europaea alienati

10.03.2006, klo 10.48

Ex demoscopia recens facta apparet animos Finnorum ab Unione Europaea magis quam ante alienos esse.

Tantum tertia pars civium (33%) Unioni favet, totidem fere (31%) illi sunt aperte contrarii. Neque tantum de rebus singulis agitur, nam viginti septem centesimae (27%) ex Finnis velint, ut patria ab Unione separetur.

Tuomo Pekkanen)

Pecus volatile intus tenendum

10.03.2006, klo 10.47

Ministerium agriculturae et silviculturae Finnorum decrevit, ut pecus volatile usque ad finem mensis Mai intus teneretur, ne morbum aviarium caperet.

Veri simile enim est virus H5N1 etiam in aves in Finniam primo vere migrantes transiturum esse, quamquam nullus morbi casus adhuc repertus est.

Decretum ministerii ad trecenta municipia spectat, in quibus periculum contagionis maius est quam alibi propterea, quod elevatio volatilium est frequens aut aves aquatiles migrantes in illis congregantur. Interdictio ad omne genus volatilium pertinet, sed elevationem biologicam gallinarum maxime afficit. (Tuomo Pekkanen)

Certamina cursus tarandrorum

10.03.2006, klo 10.46

Certamina cursus tarandrorum in variis Lapponiae partibus magna populi frequentia primo vere celebrantur.

Maximum huius anni eventum faciunt cursus, qui septimana vergente (12-13.3.) apud oppidum Kuusamo fiunt.

Intersunt illis certaminibus circiter centum nonaginta participes, inter quos omnes optimi tarandri et Finniae et Norvegiae.

E carceribus curriculi, quod in longitudinem unius chiliometri patet, seni tarandri simul emittuntur. Singuli singulos aurigas scridis labentes trahunt, et qui primus in metam venit, in certamine manet, ceteri excluduntur.

Ita ludi continuantur, donec velocissimi in cursu finali de palma certant.

(Tuomo Pekkanen)

Unionem Sovieticam papae caedem temptavisse

10.03.2006, klo 10.45

Commissio investigatoria parlamenti Italici credit moderatores Unionis Sovieticae caedem summi pontificis Ioannis Pauli II anno millesimo nongentesimo octogesimo primo molitos esse, quia papa, qui illo tempore motum Solidaritatis Poloniae patriae suae fortiter confirmaret, periculum imperio Sovietico imminens ab illis haberetur.

Mehmet Ali Agca, natione Turcus, contra papam in platea Petriana mense Maio sclopetavit, sed causa, qua impulsus id fecit, adhuc latet. Iam diu praesumitur eum consuetudines cum servitio secreto Bulgariae habuisse, illud autem ex Unione Sovietica mandatum pontificis occidendi accepisse.

(Tuomo Pekkanen)

Glacies Antarcticae opinione citius dissolvitur

10.03.2006, klo 10.44

Propter mutationem climatis ingens glaciarium Antarcticae notabiliter diminui videtur.

Ex investigatione Americana campus glacialis circiter centena quinquagena bina chiliometra cubica glaciei singulis annis perdit.

Antarctis, quae magnitudine bis tanta est quam Australia, duodeoctoginta centesimas aquae dulcis totius terrarum orbis continet.

(Tuomo Pekkanen)

Halonen alterum praesidentatum iniit

02.03.2006, klo 17.40

Tarja Halonen, mense Ianuario praesidens rei publicae Finnorum suffragio populari iterum designata, Kalendis Martiis alterum praesidentatum iniit.

Coram parlamento affirmavit se in praesidentatu suo sincere et fideliter constitutioni et legibus obsecuturam et omnibus viribus prosperitatem populi Finnici promoturam esse.

(Tuomo Pekkanen)

Olympia hiberna finita

02.03.2006, klo 17.39

Olympia hiberna anni bis millesimi sexti finita sunt. Conclusio ludorum vespere diei Dominici in stadio Olympico Taurinorum multis cum caerimoniis et spectaculis celebrabatur.

Burgimagister Taurinensis vexillum Olympicum collegae suo Vancouveriensi tradidit, nam proxima sive XXI Olympia hiberna Vancouveriae, in urbe Canadae occidentalis, anno bis millesimo decimo fient.

Ultimum Olympiorum certamen fuit ludus hoccei glacialis, in quo greges Finnorum et Suetorum conflixerunt. Finnorum grex, qui in his Olympiis omnes adversarios, ut Russos, Americanos Canadensesque vicerat, in finali certamine acerbissimam cladem accepit, cum a Suetis punctis tria ad duo superatus est.

Quod certamen circiter duo miliones quadringenta milia Finnorum per televisionem spectabant, nam in ludo hocceio fuit ultima spes nomismatis aurei, quod athletae Finni in his Olympiis non obtinuerant.

Consecuti tamen sunt sex nomismata argentea et tria aenea. Plurimas victorias reportaverunt Germani, Austriaci, Americani.

(Tuomo Pekkanen)

Leones in Africa interituri

02.03.2006, klo 17.33

Nisi quid remedii quam primum inventum erit, leones proximo decennio in Africa omnino exstirpabuntur.

Sunday Times, acta Africae Meridianae, rettulerunt numerum leonum ex ducentis milibus in triginta milia proximis viginti annis deminutum esse.

Quod factum esse imprimis in Angola, Sambia, Zimbabuia, Botsuana. Exempli gratia ex centum tribus catulis leoninis, natis his sex annis apud fauces Okavango fluminis Botsuanae, hodie tantum decem superstites restare dicuntur.

Numerus leonum deminuitur morbis atque variis hominum actionibus et conflictationibus, quibus spatium vivendi animalium coartatur et circumscribitur.

(Tuomo Pekkanen)

Dies Kalevalensis

02.03.2006, klo 17.30

Pridie Kalendas Martias dies Kalevalensis in Finnia celebratus est. Illo enim die, anno millesimo octingentesimo tricesimo quinto, Elias Lönnrot, auctor operis Kalevalae, prologum primae editionis subscripsit.

Kalevala, carmen epicum nationis Finnorum, est fabula de deis et heroibus, quae originem in carminibus popularibus habet.

Carmina, quae Lönnrot compluribus itineribus factis collegit, in disco compacto Kalevala Canora intitulato etiam Latine hodie auscultari possunt.

Textus carminum, qui in illo disco melodiis translaticiiis ab optimis huius generis expertis Latine canuntur, excerpti sunt ex versione operis Latina, quae anno millesimo nongentesimo octogesimo sexto primum divulgata est.

(Tuomo Pekkanen)

Morbus aviarius in Europa

24.02.2006, klo 10.35

Morbus aviarius iam in Germaniam et ad Mare Balticum pervenit, nam cygni mortui hoc virus portantes et his locis et in aliis Unionis Europaeae partibus inventi sunt.

Magistratus multarum civitatum, cum metuerent, ne illa pestilentia contagione avium migratoriarum latius serperet, publice edixerunt, ut pecus volatile inde a Kalendis Martiis sub tecto teneretur.

(Reijo Pitkäranta)

Meridiatio in Hispania sublata

24.02.2006, klo 10.34

In Hispania lex perlata est, quae eis, qui in negotiis publicis versantur, meridiatione una hora longiore interdicat et eos prandium intra primam horam postmeridianam sumere iubet.

Hispanis fortasse difficile est huic renovationi assuescere, cum eis semper moris fuerit post meridiem ad duas aut etiam tres horas a labore intermittere et domum redire, ubi cibum meridianum caperent et deinde paulisper requiescerent.

(Reijo Pitkäranta)

Expediitio Finnorum Pompeiana

24.02.2006, klo 10.33

Grex investigatorum Finnorum, cui praeest professor Paavo Castrén, inde ab anno bis millesimo secundo (2002) archaeologiae Pompeiorum examinandae operam dat, cum domum M. Lucretii media urbe sitam et aream ei circumiectam diligenter pervestigat.

Operi, cui nomen 'Expediitio Pompeiana Universitatis Helsingiensis', propositum est non solum historiam aedificandi huius loci archaeologici enucleare, sed etiam varias constructiones ad tempora nostra servatas documentis probare. Huc accedit descriptio picturarum parietarum.

Museum culturale Tallinnae

24.02.2006, klo 10.33

Tallinnae, in urbe principe Estoniae, museum culturale in terris Baltiae et Scandinaviae omnium maximum in usum receptum est.

Quod lautissimum aedificium ad similitudinem navis constructum designavit architectus Finnus Pekka Vapaavuori.

In hospitibus ad caerimoniam inauguralem invitatis erant praesidens Estoniae Arnold Rüütel et praesidens Finniae Tarja Halonen.

(Reijo Pitkäranta)

(Reijo Pitkäranta)

De Iraquianis male mulcatis

16.02.2006, klo 19.56

Animi Britannorum valde commoti sunt propter taeniam magnetoscopicam, quae imagines exhibet, in quibus aliquot iuvenes Iraquiani a militibus Britannis pessime mulcantur.

In hoc documento cerni potest, quo modo grex militum Britannorum aliquot adolescentulos Iraquianos deprehensos non solum calcibus caedat sed etiam iisdem varias corporis partes fustibus et pugnibus crudelissime percutiat.

Tony Blair, princeps minister Britanniae, de hoc scandalo certior factus promisit se id acturum esse, ut in illud maleficium quam diligentissime inquireretur.

(Reijo Pitkäranta)

Quid Condoleezza Rice dixerit

16.02.2006, klo 19.55

Condoleezza Rice, ministra negotiorum exterorum Civitatum Americae Unitarum, ait se sollicitam esse de progressu democratiae Russiae: e multis decretis ibidem factis secutum esse, ut renovationes de recto cursu decederent.

Actiones ordinum civilium severitate censoria ibidem custodiri, et civitates finitimas iam timere, ne fieri posset, ut energia a Russis sibi suppeditata omnino prohiberentur.

(Reijo Pitkäranta)

Usus vehiculorum publicorum auctus

16.02.2006, klo 19.54

Incrementum pretii materiae combustibilis effecit, ut in dies plures Europaei suo proprio autocineti uti desinerent et ad vehicula publica adhibenda transirent.

Praesertim consumptores Europae occidentalis, ut Francogalli, Germani et Helvetii, consuetudines suas ad rem autocineticam pertinentes propter pretium benzini auctum valde mutaverunt. In Finnia autem hic effectus minor esse videtur.

(Reijo Pitkäranta)

Novum inventum in Valle regum

16.02.2006, klo 19.54

Archaeologi Americani in Aegypto sepulcrum abhinc tria milia annorum constructum reppererunt, quod ab aetate pharaonum originem trahere existimatur.

Inventum factum est in Valle regum oppido Luxor vicina, ubi anno millesimo nongentesimo vicesimo secundo (1922) sepulcrum pharaonis Tutankhamon in lucem venit.

In cella subterranea erant quinque sarcophagi, quorum partes superiores imaginibus pictis ornabantur. Eodem loco positae erant complures ollae ex alabastrite factae et sigillo pharaonum obsignatae.

Opus, c.t. Legenda Sancti Henrici

16.02.2006, klo 19.53

Liber, qui inscribitur 'Legenda Sancti Henrici', est optimum opus historicum anno praeterito in Finnia scriptum, ut iudicat Societas amicorum historiae Finnica.

Auctor huius voluminis sumptu Societatis litterarum Finnicarum editi est docens Tuomas Heikkilä, qui imprimis eo laudatur, quod studium textuum ecclesiasticorum internationale cum investigatione mediae aetatis Finniae feliciter coniunxerit.

De Olympiis hibernis Taurinorum

16.02.2006, klo 19.52

Iam una septimana est, cum Augustae Taurinorum, in urbe Italiae septentrionalis, Olympia hiberna celebrantur.

Par est autem, ut ad hoc argumentum in emissione proxima redeamus, cum plurima certamina ad finem adducta erunt.

(Reijo Pitkäranta)

Naufragium in Mari Rubro

10.02.2006, klo 13.54

Navis traectoria Aegyptiaca, quae ex Arabia Saudiana in Aegyptum vehebatur, die Veneris (3.2.) multo mane in mare Rubrum mersa est. Erant in nave mille quadringenti homines, ex quibus circiter quadringenti sexaginta superstites evaserunt.

Maior pars ex vectoribus erant rustici Aegyptii, qui in Arabia Saudiana laboraverant. Opiniones de causa naufragii variant.

Quidam nautarum, ex calamitate servatus, narravit incendium in nave iam tribus horis ante naufragium ortum esse et aquam, qua ignis exstingeretur, in sentinam ita defluxisse, ut navis magis magisque declinaret et postremo mergeretur.

(Tuomo Pekkanen)

Tumultus ex imaginibus orti

10.02.2006, klo 13.53

Acta diurna Danica, quibus nomen est Jyllands-Posten, pridie Kalendas Octobres (30.9.) duodecim imagines gryllographicas Mahometi divulgavit, quae musulmanorum contra Danos iram incitaverunt. Eadem imagines hoc anno etiam in Norvegia, Francia, Germania, Italia, Nederlandia, Hispania Iordaniaque in actis diurnis divulgatae sunt.

Primum Arabia Saudiana, deinde aliae quoque nationes musulmanae merces Danorum commercio intercluserunt. Die Sabbati (4.2.) reclamatores musulmani sedes legatorum Daniae, Norvegiae Suetiaeque in urbe Damasco accenderunt. Postridie eius diei Beryti, in capite Libani, consulis Danici sedes incensa est.

Dum tumultus apud nationes musulmanas dilatantur et violentiores fiunt, Nationes Unitae et Unio Europaea una cum Ordine Terrarum Islamicarum (OIC) sententiam divulgaverunt, qua sollicitudinem suam profiterentur: Quae proximis diebus accidissent, clarissime monstrare novo dialogo inter religiones et moderatores variarum terrarum opus esse.

Se libertatem scribendi et loquendi fovere, sed maximi esse etiam, quod instrumenta communicatoria responsalitem et erga religiones verecundiam haberent; musulmanorum propter imagines gryllographicas offensionem facilem esse intellectu, sed violentiam inde ortam limites reclamationis pacificae superasse; vastationes bonorum et neces hominum opinionem de islamismo tranquillo penitus depravare.

(Tuomo Pekkanen)

Hamas Israellem non agnoscit

10.02.2006, klo 13.52

Ordo Hamas, qui in comitiis parlamentariis Palaestinensium victoriam reportavit, Israellem non

agnoscit neque Israel cum illo ordine consulere vult.

Ehud Olmert, interim minister Israelis primarius, monuit Hamas esse ordinem terroristicum, qui nulla privilegia haberet; Israelem autem cum regimine Palaestinensium hodierno, cui praeest Mahmud Abbas, cooperationem continuaturum esse, donec Hamas novum regimen constitueret.
(Tuomo Pekkanen)

De programme Iraniae nucleari

10.02.2006, klo 13.52

Ordo internationalis ab energia atomica (IAEA) decrevit, ut lis de programme Iraniae nucleari in Consilio Securitatis Nationum Unitarum tractaretur.

Nationes enim occidentales timent, ne Irania arma nuclearia sibi velit parare. George W. Bush, praesidens Americanorum, affirmavit mundum non esse passurum, ut Iraniani nuclearia arma haberent.

De comitiis praesidentialibus

03.02.2006, klo 10.47

Die Dominico (29.1.) in Finnia alterum suffragium praesidenti in proximum sexennium creando institutum est.

Huic certamini nonnisi duo candidati interfuerunt, scilicet Tarja Halonen et Sauli Niinistö, qui victores primae electionis duabus septimanis ante habitae evaserant.

Superior discessit Tarja Halonen, praesidens hodierna eademque candidata partium sinistrarum, quippe quae paene quinquaginta duas centesimas (51,8%) sententiarum sibi conciliaret.

Antagonista eius, pristinus minister Sauli Niinistö, quem praesertim fautores factionum dextrarum praesidentem fore sperabant, votorum amplius duodequingenta centesimas (48,2%) collegit.

Nequa multum afuit, quin Halonen victoriam suam amitteret: nam praevaluit quidem votis in antecessum datis, sed sententiis ipso die comitali latis adversario suo inferior erat.

Quid Halonen et Niinistö dixerint

03.02.2006, klo 10.46

Tarja Halonen, cum cognovisset se praesidentem Finniae iterum electam esse, civibus promisit se inter alterum muneris sui spatium fortius et audacius quam ante de valoribus humanis locuturam esse.

Sauli Niinistö autem, dum praesidenti Halonen gratulatur, ait democratiam Finnicam alteram illorum comitiorum victricem esse.

Idem censuit fieri non posse, quin quaestiones ad politicam exterioriorem et securitatem nationalem pertinentes etiam post electiones praesidentiales in magnis publici colloquii argumentis remanerent.

(Reijo Pitkäranta)

Hamas et Unio Europaea

03.02.2006, klo 10.45

Ministri negotiorum exterorum Unionis Europaeae ordinem Hamas hortati sunt, ut vi desisteret et arma deponeret.

Iam in eo est, ut ille motus, recens victor electionum Palaestinensium, in regimen asciscatur.

Hamas, qui acerrime id agit, ut Israel omnino aboleatur, post annum bis millesimum circiter sexaginta impetus suicidiales in Israelianos fecit.

Constat Unionem Europaeam regionibus Palaestinsibus anno praeterito quingentis milionibus euronum opitulatam esse.

(Reijo Pitkäranta)

De re nucleari Iranianorum

03.02.2006, klo 10.44

Inter Unionem Europaeam, Civitates Americae Unitas, Sinas et Russiam convenit, ut programma nucleare Iraniae ad consilium securitatis Nationum Unitarum deferretur.

Iraniani autem tale propositum illegale esse censent. Terrae occidentales metuunt, ne Iraniani iam in armis atomicis fabricandis occupati sint.

(Reijo Pitkäranta)

Superficies marium altior facta

03.02.2006, klo 10.44

Superficies marium orbis terrarum decenniis proxime praeteritis celerius quam ante altiores factae sunt,

ut investigatores Australiani animadverterunt.

In causa huius rei videtur esse status caeli mutatus, quo factum est, ut glaciaria paulatim liquescerent et aqua marina calidior facta amplificaretur.

Si auctus maris pari celeritate continuabitur, metuendum est, ne civitates insulares et litora demissiora solito vehementioribus inundationibus et maiore erosione afficiantur.

(Reijo Pitkäranta)

Anniversarium Mozartianum

27.01.2006, klo 10.36

Hodie ducenti quinquaginta anni acti sunt ex eo die, quo Wolfgangus Amadeus Mozart, celeberrimus musicographus Austriacus, Salisburgi natus est.

Dies anniversarius in tota Austria sed praesertim in urbe eius natali et Vindobonae, ubi Mozart musicographus aulicus imperatoris nominatus est, concentibus et expositionibus celebratur.

Mozart, qui inter summa ingenia musicalia numeratur, in tanta paupertate decessit, ut in fossa communi sepeliretur. Radiophonia Finnica musicam Mozartianam per sedecim horas continuas hodie emittit.

Illa emissio pars est programmatis internationalis viginti quattuor horarum, quod eodem tempore ex aliis viginti quinque terris emittitur.

(Tuomo Pekkanen)

Energia Europaeos sollicitat

27.01.2006, klo 10.35

Anno vergente, cum rixa de gaso inter Moscuam et Kioviam orta multas nationes Europaeas terruisset, ne de energia Russiae nimis dependerent, de novis electrificinis nuclearibus in Europa aedificandis cogitari coeptum est. José Manuel Barroso, praeses commissionis Europaeae, censuit nullam optionem energiae excludendam esse.

Franci, apud quos octoginta centesimae electricitatis vi nucleari producuntur, monuerunt electrificinas nucleares non tantum ex energia aliena independentiam augere sed etiam instrumenta esse, quibus contra mutationem climaticam pugnaretur.

(Tuomo Pekkanen)

Russi Britannos speculationis accusant

27.01.2006, klo 10.34

Servitium Securitatis Russiae (FSB) diplomaticos Britannos speculationis accusat.

Accusationem programma televisionis statalis palam fecit, in quo relatum est Britannos informationem clandestinam ab adiutore Russo per emistram electronicum in saxo absconditum accepisse.

Praeterea dictum est unum ex illis diplomaticis relationes cum compluribus ordinibus Russiae civilibus habere.

Ministerium a rebus exteris Britanniae omnes de speculatione accusationes negavit atque Britannos illis accusationibus improvisis sollicitari; constare quidem ordines civiles Russorum a regimine Britanniae adiutos esse, cum de iuribus humanis et rebus socialibus ageretur, sed illud auxilium datum esse aperte, ut societas civilis sano modo in Russia excoleretur.

(Tuomo Pekkanen)

Filii inter difficultates nati diutius vivunt

27.01.2006, klo 10.34

Filii temporibus difficilibus nati diutius vivunt quam illi, qui inter pacem et prosperitatem nascuntur.

Femina enim gravida condicionibus vitae opprimentibus saepius prolem masculinam quam femininam abortat.

Ex abortibus prolium masculinarum sequitur, ut filii debiliores eliminentur, fortiores sint superstites.

Haec investigatores Americani nuperrime rettulerunt.

(Tuomo Pekkanen)

Electiones praesidentiales

27.01.2006, klo 10.33

In Portugallia praesidens creatus est Anibal Cavaco Silva, qui post conversionem rerum anni millesimi nongentesimi septuagesimi quarti est primus praesidens factionis dextrae.

In Bolivia autem Evo Morales, primus praesidens ex populo indigena oriundus, munus suscepit. Apud Finnos altera suffragia comitiorum praesidentialium die Dominico (29.1.) fient.

(Tuomo Pekkanen)

De comitiis praesidentialibus

20.01.2006, klo 12.56

Die Dominico in Finnia comitia praesidentialia habita sunt. Suffragiis vesperi computatis apparuit praesidentem hodiernam Tarja Halonen, cui iterum eligendae partes sinistrae operam navaverant, sententiarum quadraginta sex centesimas (46%) accepisse.

Ab ea secundus evasit pristinus minister Sauli Niinistö, candidatus factionis conservativae, quippe qui votorum viginti quattuor centesimis (24%) potiretur.

Tertium locum obtinuit princeps minister Matti Vanhanen duodeviginti suffragiorum centesimas (18%) consecutus. Reliqui quinque ambitores successu parum prospero certaverunt.

Neque studium civium ad ius suffragii adhibendum laudaveris, nam eorum nonnisi septuaginta quattuor centesimae (74%) ad urnas adierunt. Quia autem nemo ex octo candidatis maiorem sententiarum partem sibi acquisivit, necesse est duabus septimanis interiectis sive die undetricesimo mensis Ianuarii (29.1) alterum suffragium ineatur.

Tum decernetur, uter ex duobus primae creationis victoribus praesidens rei publicae proximo sexennio futurus sit.

(Reijo Pitkäranta)

Merkel et Bush convenerunt

20.01.2006, klo 12.55

Angela Merkel, cancellaria foederalis Germaniae nuper electa, iter statale in Civitates Americae Unitas suscepit, ut relationes politicas cum Americanis intercedentes meliores redderet.

Eo cum venisset, in Aedibus Albis cum praesidente George Bush arbitris remotis per unam fere horam de variis rebus colloquebatur.

Sermone finito ambo moderatores diurnariis confirmabant se et capaces et paratos ad cooperandum esse. Quae quamvis ita essent, tamen dissentire videbantur, quid de ergastulo Guantanamo faciendum esset.

(Reijo Pitkäranta)

Snellman ante CC annos natus

20.01.2006, klo 12.53

Hoc anno ducenti anni acti sunt, cum Ioannes Guillelmus Snellman, qui philosophus Finniae nationalis appellari solet, natus est.

Haud mirum est memoriam eius bisaecularem apud nos multis sollemnitatibus per totum annum celebrari, si respicias, quantam vim ille vir ad historiam Finnorum habuerit.

Die Martis in Bibliotheca Finniae nationali expositio inaugurata est, quae inscribitur 'Ioannes Guillelmus Snellman ? cogitator Europaeus?'. Proximo autumnno haec eadem monstratio Berolinum transferetur in Instituto Germanico Finlandiae aperienda.

(Reijo Pitkäranta)

Novum lexicon Latinum editum

20.01.2006, klo 12.53

Die Iovis in urbe Helsinki novum dictionarium Latinum, cui nomen 'Lexicon hodiernae Latinitatis Finno-Latino-Finnicum', palam factum est.

Hunc librum sumptu Societatis Litterarum Finnicarum editum composuerunt Tuomo Pekkanen et Reijo Pitkäranta.

Prima glossarii parte continentur amplius decem milia vocum in sermone moderno Finnico obviarum cum interpretamentis earum Latinis.

In secunda autem voluminis parte haec eadem vocabula ordine verso exhibentur. Huc accedit index nominum geographicorum maximi momenti.

(Reijo Pitkäranta)

Fodinae in Sinis periculosae

13.01.2006, klo 11.55

Regimini Sinarum est propositum claudere quinque milia ducentas nonaginta fodinas carbonis.

Iam antea moderatores Sinenses praeceptis monitisque contenderunt, ut securitas fodinarum melior redderetur, sed haud multum effecerunt.

Fodinae Sinensium periculosissimae in toto orbe terrarum sedes operis adhuc sunt. Incendiis, explosionibus aliisque calamitatibus in fodinis factis plus quina milia operariorum singulis annis moriuntur.

Magistratus dicunt maiorem partem calamitatum in fodinis parvorum vicorum fieri. Nunc autem consilium captum est, ut condiciones securitatis plus duodecim milium fodinarum carbonis accuratius examinarentur et inspicerentur.

(Tuomo Pekkanen)

Morbus aviarius in Turcia vagatur

13.01.2006, klo 11.54

Grippa aviaria, quam efficit virus, cui nomen H5N1 (ha, quinque, en, unum), in Turcia vagatur.

Numerus hominum affectorum in dies crescit et casus morbi iam in quindecim ex una et octoginta provinciis Turciae occurrerunt.

Primae contagiones hominum anno ineunte in partibus Turciae orientalibus confirmatae sunt. Ibi enim gallinae contagionem ab avibus ex oriente comitantibus ceperant.

In homines morbus ex contactu gallinarum transiit, sed nullus casus est repertus, in quo contagio inter homines facta esset. Unio Europaea importationem plumarum, quae non sunt tractatae, ex terris Turciae orientali vicinis vetuit. Interdictio importationis spectat ad Armeniam, Azerbaidzaniam, Georgiam, Iraniam, Iraqiam Syriamque.

Turci ad morbum coercendum de lege ferenda deliberant, qua educatio altilium foris vetetur. Id enim causa principalis habetur, quae efficit, ut anseres gallinaeque morbo aviario per aves migratorias contaminentur.

(Tuomo Pekkanen)

In India partitio sexuum depravatur

13.01.2006, klo 11.53

In India his viginti annis circiter decem milia fetuum abortati sunt, ne filiae nascerentur.

Ex investigatione recens facta quingena fere milia abortuum propter selectionem sexus quotannis fiunt. Abortus selectivi sunt causa, cur pro singulis milibus puerorum septingenae sexagenae puellae in India nascentur.

(Tuomo Pekkanen)

Sharon in extremis

13.01.2006, klo 11.53

Ariel Sharon, minister primarius Israelis, ante decem dies propter haemorrhagiam cerebri in valetudinarium Hierosolymorum portatus est, in quo tres operationes passus adhuc est in comate.

Rarissimi sunt, qui credant illum ad ministerium reverti posse. Itaque moderatores politici Israelis tempus post-Sharonianum praeparare coeperunt.

(Tuomo Pekkanen)

Annus calidus 2005

13.01.2006, klo 11.52

Annus praeteritus 2005 fuit in Finnia unus ex omnium calidissimis.

Praesertim Finnia septentrionalis tempestatem insolitam habuit, nam ibi temperatura media mensibus Ianuario et Novembri fuit sex gradibus calidior quam assolet.

In orbe terrarum calor caeli octo decimis gradus Celsiusi (0,8) his centum annis auctus est.

(Tuomo Pekkanen)

Oratio praesidentis Halonen

05.01.2006, klo 17.12

Oratione Kalendis Ianuariis habita Tarja Halonen, praesidens Finnorum, monuit prosperitatem inter cives aequaliter divisam et dispertitam non esse; differentias redituum crescere coepisse et novum genus paupertatis cum exclusione sociali ortum esse; quaestus inopiam adhuc esse nimiam, etsi novae operis sedes creatae essent.

Structuram societatis civilis praesidens censebat rectam esse; curandum tamen esse, ut institutio publica, securitas socialis, cura valetudinis et circumiacentium efficaciter fungerentur; id non sufficere, ut Finni ad mutationes orbis terrarum se adaptarent, sed necesse esse, ut mutationibus dirigendis interessent.

Oratio, quam praesidens Halonen habuit, fuit ultima praesidentatus eius, nam comitia praesidentialia medio mense Ianuario fient.

De illis quidem Halonen, quae ad alterum praesidentatum est candidata, omnino tacuit, sed hortata est, ut Finni iure suffragii uterentur, quod centum annos habuissent.

(Tuomo Pekkanen)

Praesidium Unionis Europaeae

05.01.2006, klo 17.11

Anno vergente praesidium Unionis Europaeae ex Britannia in Austriam ad sex menses translatum est.

Res inter praesidium Austriae principales sunt lex fundamentalis, oeconomia, amplificatio Unionis. Colloquia de Turcia in Unionem asciscenda continuabuntur et de Bulgaria et Romania in societatem comprobandis constituetur.

Mense Iulio, cum praesidium in Finniam translatum erit, Finni operam dabunt, ut securitas, incrementum oeconomicum, facultates laborandi, iustitia socialis prosperitasque tam hominum quam naturae circumiacentis promoveantur.

Sicut Finnis anno undebismillesimo praesidentibus, ita etiam inter alterum praesidium Finnicum Conspectus rerum Europaearum Latinus ex Finnia septimanatim interretialiter transmittetur.

(Tuomo Pekkanen)

De pretio gasi discordia

05.01.2006, klo 17.10

Cum Gazprom, societas Russiae gasaria, pretium gasi Ucrainae vendendi quincuplicavisset, ut idem esset atque in mercatu mundiali, Ucraina recusavit, quominus tantum solveret.

Tum Gazprom gasi in Ucrainam translationem interrompere decrevit. Qua re nationes Europae occidentalis sollicitabantur, nam etiam illis gasum ex Russia per Ucrainam ducitur. Iamque pressio gasi in ductibus occidentis diminuebatur, cum Gazprom Ucrainenses accusavit, quod gasum alio destinatum furto abstulissent.

Tandem concordia in quinquennium restituta est: Ex Russia gasum Ucrainae ducenis tricenis dollaris, ex Kazakstania et Turkmenistania praeterea nonagenis quinque dollaris pro millenis metris cubicis suppeditabitur.

(Tuomo Pekkanen)

Memoria tsunami anniversaria

30.12.2005, klo 09.22

Die Lunae, id est die festo Stephani protomartyris (26.12.), unus annus praeterierat ex illa ingenti clade naMemoria hominum ea calamitate mortuorum, quorum numerus circiter ducentorum triginta milium esse existimatur, in diversis orbis terrarum partibus recalebatur candelis accensis, silentiis tristibus actis et precationibus effusis. Regimen Thailandiae magnam peregrinorum multitudinem in suam terram invitaverat ad caerimonias memoriales celebrandas. Hospites, qui ex Finnia venerant, officio divino in urbe Phuket habito interfuerunt.

(Reijo Pitkäranta)

Novae leges tabacariae

05.01.2006, klo 17.09

Apud Hispanos, qui acerrimi fumificatores sunt, lex lata est, quae fumificationem in sedibus operis et in cauponis vetat.

In Cechia fumificatio hoc anno in omnibus locis publicis vetita est.

Statim post mediam noctem Kalendarum Ianuariarum vir quidam Pragae deprehensus est, cum in statione autoraedarum fumificavisset.

(Tuomo Pekkanen)

De copiis Americanis in Iraquia

30.12.2005, klo 09.22

Americani copias suas in Iraquiam missas septem milibus militum anno proximo deminuturi sunt. De ea re narravit Donald Rumsfeld, minister defensionis, dum Iraquiam visitat.

"Praesidens Bush", inquit. "mihi auctoritatem dedit hoc consilium aperiendi, quo populo Iraquiano fidem tribuimus, quippe qui iam tanto successu suam rem publicam sibi administrandam suscepit."

Rumsfeld negavit Americanos in animo habere stationem militarem permanentem in Iraquia constituere.

(Reijo Pitkäranta)

Quid Benedictus XVI dixerit

30.12.2005, klo 09.21

Pontifex Romanus Benedictus XVI, cum suam primam salutationem nataliciam et benedictionem urbi et orbi daret, genus humanum praemonuit, ne moderno progressu tecnico et intellectuali ita occaecaretur, ut officia humanitatis oblivisceretur.

Vires colligeret et consociaret ad paupertatem, terrorismum et pollutionem naturae avertendam. In ea orationis parte, in qua de variis discriminibus orbis terrarum loquebatur, regionis Darfuriae mentionem fecit, ubi condicio humanitaria pessima esset.

(Reijo Pitkäranta)

Morales praesidens Boliviae

30.12.2005, klo 09.20

Novus praesidens Boliviae electus est Evo Morales, vir ex stirpe Indianorum oriundus, cum suffragiorum quinquaginta quattuor centesimas acciperet.

Quam manifesta victoria eius fuerit, vel inde apparet, quod praesidens hodiernus Jorge Quiroga, qui secundus ab eo erat, tantum undetriginta votorum centesimas sibi conciliavit. Morales, fautor partium sinistrarum, ius iurandum praesidentiale mense Ianuario dabit.

(Reijo Pitkäranta)

Militantes medicamentis utuntur

30.12.2005, klo 09.20

Iuvenes, qui in exercitu Finniae munus militiae faciunt, plura medicamenta consumere solent quam aequales eorum, ut ex dissertatione in Universitate Helsinkiensi conscripta patet.

Ex viris militantibus tres fere partes nuntiaverunt se duabus superioribus septimanis aliquod remedium sumpsisse. Tertia autem pars eorum aperuit se inter tres septimanas etiam trinis diversis pharmacis usam esse. Tantum materiae medicae usum admodum copiosum aestimaveris, si respicias de iuvenibus agi, quorum valetudo inspectione medicinali non ita pridem peracta bona reperta sit.

(Reijo Pitkäranta)

Quid praesidens Bush dixerit

23.12.2005, klo 00.30

Praesidens George Bush hac septimana ineunte nationi suae orationem televisificam habuit, qua suis persuadebat bellum Iraquicum nequaquam amissum esse, quamquam in eo gerendo etiam aliquot errores facti essent.

Cives Americanos appellavit, ut pro libertate pugnare pergerent neve propter res adversas in desperationem venirent.

Idem quidem praedixit evitari non posse, quin illa victoria Americanis multis sacrificiis staret.

(Reijo Pitkäranta)

Finnia et Nationes Unitae

23.12.2005, klo 00.29

Postridie Idus Decembres (14.12.) quinquaginta anni acti erant, cum Finnia ad societatem Nationum Unitarum accessit.

Ad memoriam huius rei historicae celebrandam Ministerium a rebus exteris et Societas Finniae a Nationibus Unitis in urbe Helsinki caerimoniam semisaecularem instituerunt, quam inauguravit Erkki Tuomioja, minister negotiorum exterorum.

Orationem autem sollemnem fecit praesidens Finniae Tarja Halonen.

(Reijo Pitkäranta)

Sigfridsson clavicen victor

23.12.2005, klo 00.28

Bonnae, in urbe Germaniae, certamen clavicinandi Beethovenianum positum est, cui amplius triginta iuvenes huius artis periti e diversis orbis terrarum partibus oriundi interfuerunt.

Victor huius certationis evasit Henricus Sigfridsson, clavicen Finnus unum et triginta annos natus.

Ille autem non solum palmam principalem e decreto celeberrimorum arbitrorum tulit, sed etiam praemium auditorum sibi paravit et remuneratione speciali pro musica camerali exhibita affectus est.

(Reijo Pitkäranta)

De moribus nataliciis Europaeis

23.12.2005, klo 00.25

Mores sollemnnia natalicia Christi celebrandi in diversis Europae terris aliquatenus inter se differunt. Germani calendaria antenatalicia in deliciis habent, in quibus viginti quattuor munuscula insunt.

Britannorum magni interest, ut, priusquam pace natalicia frui incipiant, orationem reginae decem minutis durantem audiant.

Quod ad Nederlandiam pertinet, multae familiae vigilia nativitatis Domini in ecclesiam proficiscuntur et die natali Christi ad cenam sollemnem congregantur.

In Italia, ubi tempus natalicium inde a die octavo mensis Decembris usque ad festum trium regum extenditur, maximum symbolum festi nativitatis Domini est praesepe, quod variis figuris manu factis refertur.

Puer in Bethlehem natus ibidem ultimus ponitur idque paulo post mediam noctem sacram fieri solet.

(Reijo Pitkäranta)

Gotovina deprehensus

16.12.2005, klo 18.25

Generalis Ante Gotovina, natione Croata, de criminibus belli accusatus, in insulis Canariis deprehensus et Hagam transportatus est, ubi iudicium exspectaret.

Suspectus est in Krajina ante decem annos minime centum quinquaginta Serbos interficiendos curavisse.

Conditio, sine qua consultationes de Croatia in Unionem Europaeam asciscenda non incoharentur, fuit, quod Gotovina deprehenderetur.

(Tuomo Pekkanen)

Erythrea tutores pacis expellit

16.12.2005, klo 18.24

Moderatores Erythraei decreverunt, ut tutores pacis occidentales, limitem inter Aethiopiam et Erythraeam custodientes, expellerentur. Kofi Annan, secretarius generalis Nationum Unitarum, hoc decretum damnavit et Consilium Securitatis flagitavit, ut aboleretur.

Sunt inter custodes limitis Americani, Canadenses Europaeique, qui intra decem dies abire debent.

Finni ex eis sunt septem.

Si tutores pacis abierint, verendum est, ne novum bellum inter Erythraeam et Aethiopiam exardescat. In illo bello, quod aliquot annis ante inter Aethiopiam et Erythraeam gestum est, circiter septuaginta milia hominum mortui esse aestimantur.

(Tuomo Pekkanen)

Reclamatores Sinenses interfecti

16.12.2005, klo 17.50

Testes oculati narrant custodes publicos in vico Dongzhou provinciae Guangdong Sinarum meridionalium contra turbam reclamantium sclopetavisse.

Secundum vici incolas, qui rem telephonice ordini cui nomen Amnestia Internationalis, palam fecerunt, viginti homines, secundum magistratus tantum tres, in illo conflictu mortui sunt.

Causa reclamationis erat, quod magistratus agricolas proprietate terrae spoliare volebant, in qua electrificinam pneumaticam aedificarent.

Sinenses conflictum in vico Dongzhou factum confessi de hominibus a custodibus publicis occisis inquisitionem agere constituerunt.

Custos, qui contra reclamatores sclopetare iusserat, comprehensus est.

(Tuomo Pekkanen)

Cursus electronicus crebrescit

16.12.2005, klo 17.49

Cursus electronicus magis magisque crebrescit et in dies diutius observatur.

Operarii et opifices apud eum in medio binas horas singulis diebus agunt atque trini ex quaternis aliquatenus cursui electronico addicti sunt.

In Finnia usus eius forsitan est etiam frequentior quam aliis in terris Europaeis.

(Tuomo Pekkanen)

Dies Sanctae Luciae

16.12.2005, klo 17.48

Sancta Lucia fuit femina Syracusana, quae inter persecutiones imperatoris Diocletiani anno trecentesimo quarto mortua est.

Dies eius festus est tertius decimus mensis Decembris, qui fuit ante Kalendarium Gregorianum brevissimus dies totius anni.

In terris septentrionalibus dies Sanctae Luciae duodevicesimo saeculo celebrari coeptus est. In Finnia ille dies praesertim a Finno-Suetis iam septuaginta annos observatur.

In urbe Helsinki puella, quae inter complures candidatas Sancta Lucia creatur, in ecclesia cathedrali coronatur atque veste candida vestita et coronam candelis ardentibus ornatam capite gerens processione sequente per urbem vehitur.

(Tuomo Pekkanen)

Dies independentiae Finniae

09.12.2005, klo 01.06

Die sexto mensis Decembris (6.12.) Finni duodenonagesimum anniversarium independentiae suae ritu sollemni et translaticio celebraverunt.

Sollemnitates iam primo diluculo initium ceperunt vexillo nationali publice proponendo. Pompa militaris, cui amplius mille milites et circiter centum vehicula et currus cataphracti interfuerunt, in urbe Lahti instituta est.

Meridie autem in ecclesia cathedrali Helsinkiensi officium divinum oecumenicum curabatur. Sub vesperum cives candelas domi suae accenderunt ad diem festum illuminandum, quo facto plerique in stibadio assederunt in televisione spectaturi, quos hospites praesidens Tarja Halonen in palatium praesidentiale diei insignis agendi causa invitasset.

(Reijo Pitkäranta)

Merkel Germanis acceptissima

09.12.2005, klo 01.05

Angela Merkel, cancellaria foederalis Germaniae nuper electa, brevi tempore admodum magnam

civium suorum gratiam inisse videtur.

Ex demoscopia enim recens facta patet undesexaginta centesimas Germanorum eam munere suo bene fungi putare.

Huc accedit, quod dimidia fere pars populi aestimat novam coalitionem administratricem, quae ex democratis Christianis et democratis socialibus constat, opus suum magna cum laude aggressam esse. (Reijo Pitkäranta)

De comitiis in Venetiola habitis

09.12.2005, klo 01.04

In Venetiola comitia parlamentaria habita sunt, quorum victores se professi sunt socii praesidentis Hugo Chavez.

Partes enim ei faventes nuntiaverunt sibi contigisse, ut omnibus centum sexaginta septem sedibus parlamenti nationalis potirentur.

Causa eius rei mirabilis videtur esse, quod factiones regimini oppositae recusaverunt, quominus comitiis interessent.

Censebant suffragari operae pretium non esse, quod omnes fere curatores electionum in asseclis praesidentis Chavez numerarentur.

(Reijo Pitkäranta)

Eventus certaminis fidicinandi

09.12.2005, klo 01.03

In urbe Helsinki septimana proxime praeterita certamen artis fidicinandi a Jean Sibelio appellatum ordine nonum institutum est.

Palmam eius tulit Alina Pogostkin, femina Russa viginti duos annos nata, quae hodie in Germania vivit.

Secundum locum obtinuit Jiafeng Chen, artifex Sinensis, cum praemium tertium duabus fidicinis ex aequo daretur; quarum una erat Hyun-Su Shin e Corea Meridionali oriunda, altera erat Wai Wen, violinista Sinensis.

Omnino octo fidicines in certamen finale approbati erant, et unusquisque eorum etiam praemio pecuniario ornatus est.

(Reijo Pitkäranta)

Optima pellicula cinematographica

09.12.2005, klo 00.52

Pellicula Francogallica tensionis psychologicae, quae Caché inscribitur, optima huius anni fabula cinematographica Europaea iudicata est.

De hac electione nuntiavit Academia artis cinematographicae Europaea sollemnitate Berolini die Saturni vesperi acta.

Eodem tempore Michael Haneke, vir Austriacus, quo duce illa taeniola victrix facta erat, statunculum moderatoris praestantissimi accepit.

(Reijo Pitkäranta)

Conventus Barcinonensis

02.12.2005, klo 01.03

Moderatores Unionis Europaeae et terrarum circa Mare Mediterraneum iacentium Barcinone conventum habuerunt, in quo de programme quinquennali et de cooperatione ad terrorismum arcendum consenserunt.

Praefuit conventui Tony Blair, minister Britanniae primarius. Praeter membra Unionis Europaeae,

affuerunt per delegatos Israel et octo terrae musulmanorum atque regimen Palaestinensium.

(Tuomo Pekkanen)

De carceribus clandestinis

02.12.2005, klo 01.02

Sunt, qui autument Americanis in Europa esse carceres clandestinos, in quibus homines de terrorismo suspecti interrogentur.

Condoleezza Rice, ministra Americana a rebus exteris, excitationem ex hac re ortam sedatura monuit Europaeos in communi contra terrorismum bello interesse; territorios capiendos esse, antequam ictus facerent, ne multa milia hominum innocentium perirent.

(Tuomo Pekkanen)

Ecclesia catholica homosexuales damnat

01.12.2005, klo 18.04

Civitas Vaticana documentum divulgavit, quo sacerdotes homosexuales officialiter damnantur: viros homosexuales sacerdotes fieri non posse; illis autem, qui inclinationem homosexualem tribus annis ante compescuerint, in sacerdotium procedere licere.

Documentum, die Martis datum, iam disputationes et intra et extra ecclesiam excitavit.

Conservativi censent sacerdotium per illud reformari, liberales autem timent, ne ecclesiastici homosexuales proclivitatem suam abscondant neve sacerdotes deficere incipiant.

Greges homosexualium dicunt ecclesiam catholicam propter ipsius scandala homosexualibus pro hostia succedanea usam esse.

(Tuomo Pekkanen)

Cimices Novum Eboracum invaserunt

02.12.2005, klo 01.00

Cimices lectularii urbem New York, etiam deversoria eius lautissima invaserunt.

Hodie tam frequentes etiam in asyilis liberorum, scholis domibusque privatis occurrunt, ut iam de vera epidemia agatur.

Causa invasionis cimicum esse putantur immigrationes ex nationibus egentioribus et peregrinationes hodie frequentiores quam ante atque prohibitiones recentes insecticidiorum efficacium.

(Tuomo Pekkanen)

Typhones anno proximo imminentes

02.12.2005, klo 00.58

Meteorologi Americani etiam in annum proximum feras tempestates praedicunt.

Tempore typhonum, quod mense Iunio iniit et hac septimana finiit, plures quam umquam ante, scilicet viginti sex, tempestates tropicales fuerunt.

Ex his tredecim in typhonas creverunt, inter quos tres summum sive quintum feritatis gradum consecuti sunt.

In urbe Montreal Canadae his diebus fit conventus meteorologicus Nationum Unitarum, in quo adsunt decem milia delegatorum centum undenonaginta nationum.

Propositum est deliberare, quid faciendum sit, postquam tempus tractatus Kiotensis anno bis millesimo duodecimo exierit.

(Tuomo Pekkanen)

De comitiis praesidentialibus

25.11.2005, klo 00.44

In Finnia anno proximo comitia praesidentialia habebuntur, quibus decernetur, quis rem publicam sexennio insequenti recturus aut rectura sit.

Factiones suos candidatos iam proposuerunt. Democratae sociales praesidentem hodiernam Tarja Halonen iterum in hoc munus creari volunt, cum factio centralis id agat, ut princeps minister Matti Vanhanen novus praesidens fiat.

Ambitor autem partium conservatarum est pristinus minister Sauli Niinistö. Huc accedunt quattuor petitores partium minorum.

(Reijo Pitkäranta)

Albertus II princeps Monoeci

25.11.2005, klo 00.43

Die Saturni princeps Albertus II patriae suae Monoeco officialiter praefectus est.

Caerimonia culminata est missa sollemni in ecclesia cathedrali Monoecensi habita, cui circiter nongenti hospites invitati interfuerunt.

Iuxta Albertum sollemnitati aderant sorores principissae Carolina et Stephania. Benedictionem pontificalem novo principi dedit nuntius specialis papae Benedicti XVI.

(Reijo Pitkäranta)

Bush iter in Sinas suscepit

25.11.2005, klo 00.42

Praesidens George Bush in Sinas iter suscepit, ubi cum collega suo Hu Jintao et principe ministro Wen Jiabao de variis rebus magni ponderis consultabat.

Bush, postquam moderatores utriusque civitatis in sessionem communem convenerunt, praesidentem Sinarum publice hortatus est, ut populo Sinarum maiores libertates politicae, sociales et religiosas concederentur.

Hu autem recusavit, quominus postulationem Taivaniae sui iuris faciendae approbaret, sed promisit renovationem in Sinis monetalem continuatum iri.

(Reijo Pitkäranta)

Gasiductus ex Russia in Italiam

25.11.2005, klo 00.41

Praesidens Russiae Vladimir Putin, princeps minister Italiae Silvio Berlusconi et praesidens Turciae Recep Erdogan nuper in Turcia inter se convenerunt, ut de communibus inceptis futuris colloquerentur. Eodem tempore ductum gasalem ex Russia per Pontum Euxinum in Turciam euntem sollemniter inauguraverunt.

Agitur de consilio energico, quod eo spectat, ut gasiductus ex Turcia aliquando usque ad Italiam continuetur.

(Reijo Pitkäranta)

Genum dyslexiae inventum

25.11.2005, klo 00.39

Grex investigatorius Finno-Sueticus in chromosomo tertio novum genus ad dyslexiam pertinens invenit.

Si hoc genus nomine ROBO1 aliqua ex causa aequo debilius fungitur, fieri non potest, quin dyslexia sequatur.

Qui erat eventus investigationis medicae, quam rerum periti Universitatis Helsinkiensis et Instituti Carolini Stockholmiensis opera consociata fecerunt.

(Reijo Pitkäranta)

Arbor natalicia omnium maxima

25.11.2005, klo 00.38

In oppido Ylivieska Finniae septentrionalis arbor natalicia omnium maxima apparata est.

Vice arboris autem fungitur malus telephonicus amplius centum metra altus, qui quadringentis lampadibus illuminatur.

In cacumine splendet stella natalicia, cuius partes seniorum metrorum sunt. Colores arboris, qui textibus telephonicis missis commutari possunt, inter rubrum, caeruleum et violaceum variant.

(Reijo Pitkäranta)

Tumultus Franciae rarescunt

18.11.2005, klo 09.46

Tumultus, qui in urbibus Franciae iam tres septimanas continuantur, rarescere coeperunt. Adhuc duo milia nongenta vehicula cremata sunt et centum fere aedificia damna ceperunt.

Duo milia octingenti homines deprehensi, sescenti in carcerem coniecti sunt. Maior pars horum, ut rettulit Nicolas Sarkozy, minister a rebus interioribus, custodibus publicis antea noti erant. Lex ante

quingenta annos lata apud Francos in usum recepta est, ex qua moderatores regionales commeatus hominum nocturnos et coetus multitudinum vetare atque perquisitiones in domiciliis suspectorum suscipere possunt.

Parlamentum Franciae illam legem hac septimana in tres menses prorogavit. Hodie in Francia circiter quinque miliones musulmanorum habitant, ex quibus tantum dimidia pars civitatem habet. Sunt, qui dicant musulmanorum numerum esse octo milionum, id est plus quam decimam partem totius populi. Pauperrimi eorum in suburbiis habitant, in quibus iam antea tumultus violenti haud raro occurrerunt. (Tuomo Pekkanen)

Bush apud suos minus gratus

18.11.2005, klo 09.45

Res in Iraquia male gestae efficiunt, ut praesidens George W. Bush apud cives suos minus minusque gratia valeat.

Ex interrogatione, quam periodicum Newsweek faciendam curavit, apparet tantum triginta sex centesimas Americanorum actiones eius sustinere. Duodeseptuaginta centesimae facta praesidentis indignantur atque tantum dimidia pars civium eum virum probum et sincerum habent.

(Tuomo Pekkanen)

Femina Liberiae praeest

18.11.2005, klo 09.37

Ellen Johnson-Sirleaf, oeconomista in Universitate Harvardiensi erudita, in comitiis praesidentialibus Liberiae victoriam reportavit.

Illa est in Africa prima femina, quam populus sibi moderatricem creavit. Consilium Securitatis Nationum Unitarum praecepit, ut Charles Taylor, pristinus Liberiae moderator belli criminibus accusatus, comprehenderetur, si in patriam revertisset.

(Tuomo Pekkanen)

Testudo vetustissima

18.11.2005, klo 09.36

Vetustissimum ex animalibus hodie viventibus est testudo elephantopus nomine Harriet, quae hac septimana diem natalem centesimum septuagesimum quintum egit.

Pondus centum quinquaginta chiliogrammatum habet et vivit in horto zoologico Australiano.

Charles Darwin, celeberrimus naturae investigator, illam anno millesimo octingentesimo tricesimo quinto ex insulis Galápagos secum tulisse dicitur.

(Tuomo Pekkanen)

In Finnia speculatores plurimi

18.11.2005, klo 09.35

Acta diurna Helsinkiensia (Helsingin Sanomat) nuperrime rettulerunt plures esse in Finnia hodie speculatores quam umquam ante. Homines ad speculationem institutos et eruditos esse circiter quinquaginta, ex quibus triginta Russiae servient.

Ita copiam speculatorum Russorum in eundem numerum revertisse, qui tempore belli frigidi fuisset.

Circiter triginta esse homines, qui maxime res civiles specularentur, viginti, qui de rebus militaribus notitiam inquirerent. Plerosque ex eis esse legatos diplomaticos, alios personam gerere investigatoris, redactoris, negotiatoris vel studentis. Actiones eorum omnium maximam partem in regionem Helsinkiensem conferri.

(Tuomo Pekkanen)

Quid Jacques Chirac dixerit

11.11.2005, klo 10.46

Jacques Chirac, praesidens Francogalliae, postquam diu expectatum est, ut aliquid de tumultibus Francogalliam iam per duas septimanas vexantibus publice diceret, tandem die Dominico orationem de illo gravi discrimine habuit.

Affirmavit regimen Francogalliae summo studio id acturum esse, ut suburbiis ordo et securitas restituerentur.

Fieri non posse, quin ei, quorum opera tantae clades conflatae essent, a magistratibus deprehenderentur et punirentur.

Flagitavit autem etiam iustitiam et aequalitatem in tumultibus coercendis servandas esse.

Quo diutius autem violentiae in Francogallia durant, eo minus cives regimini suo confidere videntur.

(Reijo Pitkäranta)

Status necessitatis Francogalliae

11.11.2005, klo 10.45

Die Martis praefectis Francogalliae regionalibus auctoritas data est interdictiones egrediendi in suis territoriis pronuntiare ad novos conflictus impediendos.

Illam legem extraordinariam perferendam curavit regimen civitatis in conventu necessitatis, cui praefuit praesidens Jacques Chirac.

Tum primum post bellum Algerianum abhinc quinquaginta fere annos gestum in Francogallia accidit, ut lex, quae cives domo sua proficisci vetat, in usum reciperetur.

(Reijo Pitkäranta)

Quid in Australia acciderit

11.11.2005, klo 10.45

Vigiles Australiae quindecim homines deprehenderunt incursionibus subitis in urbibus Sydneio et Melburno susceptis.

Hac actione, cui quingenti fere custodes publici armati interfuerunt, ictus terroristicus perniciosissimus praeventus est, ut magistratus civitatis nuntiaverunt.

Qui incarcerati sunt, sibi iam armamentarium eiusdem generis chemicalium fecerant, quae ad bombardationes Londinii mense Iulio effectas adhibita sunt.

Operatio peracta est paucis diebus post, quam lex in Australia ita mutata est, ut ei, qui in suspicionem impetus terroristici praeparati incidissent, facilius in ius vocarentur.

(Reijo Pitkäranta)

Novum programma a re viaria

11.11.2005, klo 10.44

Ministri Finniae securitatem viarum meliorem reddere conantur, cum opera trium ministeriorum consociata novum programma com meatui publico tuendo in quinquennium proxime futurum excogitaverunt.

Quod consilium Susanna Huovinen, recens ministra a re viaria Finniae, in conventu ministeriali Unionis Europaeae palam fecit.

In hoc incepto, cui peragendo novissima technica informatica magno usui erit, praecipue commoda et condiciones parvulorum et civium aetate provectorum respiciuntur.

(Reijo Pitkäranta)

Ecclesia vetus in Israele reperta

11.11.2005, klo 10.43

Archaeologi Israeliani prope urbem Haifam ruinas ecclesiae Christianae veteris invenerunt, quam ex quarto saeculo originem ducere creditur.

Archaeologa Jardena Alexandre censet illam effossionem in inventis maxime insignibus ad Christianitatem primaevam attinentibus in toto orbe numerari posse.

Parietinae ecclesiae repertae sunt, cum fundamenta ad carcerem quendam amplificandum muniri coepta essent.

(Reijo Pitkäranta)

Israellem esse delendum

04.11.2005, klo 00.07

In conventu studentium Teherani habito Mahmoud Ahmadinejad, praesidens Iraniae, Israellem maculam appellavit, quae ex charta geographica delenda esset.

Praeterea omnes moderatores islamicos, qui relationes cum Israele restituere conarentur et exsistentiam eius agnoscerent, vehementer vituperavit, quod orbis islamici deditionem et interitum confiterentur.

Sententia praesidentis Ahmadinejad a membris Unionis Europaeae et a Consilio Securitatis Nationum Unitarum damnata est.

Ahmadinejad autem verba sua non recantavit sed affirmavit se nomine nationis Iranianorum locutum esse.

Nihilo minus addidit Iraniam libro fundamentalis Nationum Unitarum obligari neque vim contra Israellem adhibituram esse.

(Tuomo Pekkanen)

Tumultus in suburbiis Parisiorum

04.11.2005, klo 00.06

In suburbiis Parisiorum adulescentes et custodes publici continuis noctibus inter se conflixerunt.

Tumultuosi vehicula et receptacula purgamentorum concremaverunt et lapides lagoenasque incendiarias contra vigiles coniecerunt.

Tumultus in regione Clichy-sous-Bois orti sunt, postquam duo iuvenes originis Africanae, qui a custodibus fugientes in transformatorio se abscondiderant, ictu electrico mortui sunt.

Ahtisaari conciliator nominatus

04.11.2005, klo 00.05

Martti Ahtisaari, pristinus praesidens Finniae, a Kofi Annan, secretario generali Nationum Unitarum, nominatus est, qui consultationibus de Kosovia praeesset.

Propositum est statum Kosoviae ex illa sententia definire, quam Consilium Securitatis Nationum Unitarum bello Kosoviensi confecto mense Iunio anni undebismillesimi comprobavit.

Kosovia, quae hodie a Nationibus Unitis administratur, plenam independentiam flagitat, quam Serbia vehementer repudiat. Itaque dubium non est, quin consultationes futurae sint difficillimae.

Ahtisaari, de conflictibus inter nationes componendis optime meritis, erit in Kosovia legatus specialis secretarii generalis, cui de processu colloquiorum referet.

(Tuomo Pekkanen)

Ecclesia B. Virginis Dresdensis inaugurata

04.11.2005, klo 00.05

Ecclesia Beatae Virginis Dresdensis, vulgo Frauenkirche appellata, quae impetibus aeriis foederatorum occidentalium sexaginta annis ante in ruinas redacta erat, die Dominico (30.10.) in usum inaugurata est.

Ecclesia illa baroca ante decem annos reaedificari coepta est. Complures centeni opifices sine mercede operi interfuerunt.

Ex Germania et nationibus peregrinis circiter centum miliones euronum ad ecclesiam restituendam collecti sunt.

Magna pars pecuniae ab Americanis et Britannis accepta est. Frauenkirche, egregium monumentum artis barocae, altitudinis est paene centum metrorum.

Post opera septendecim fere annorum perfecta est anno millesimo septingentesimo quadragésimo tertio.

(Tuomo Pekkanen)

Londinium in Europa carissimum

04.11.2005, klo 00.04

Pretiis mercedum et servitiorum comparatis, in actis, quibus titulus est Financial Times, Londinium carissima urbs Europaea nominata est.

Ibi enim pretia plus quinque centesimis maiora esse quam in medio aliis in terris Unionis Europaeae. Intra regionem, ubi eures in usu sunt, carissimos esse Parisios, ceteris vilius Matritum, extra illam regionem vilissimam Varsaviam

Ordo Nationum Unitarum sexagenarius

28.10.2005, klo 09.18

Ordo Nationum Unitarum post secundum bellum mundanum conditus est, ut pacem inter nationes sustineret.

Liber fundamentalis ordinis die vicesimo quarto mensis Octobris anno millesimo nongentesimo quadragesimo quinto (24.10.1945) valere coepit.

Initio ille ordo ex nationibus belli victricibus constabat, nunc sexagenarius membra centum nonaginta habet.

(Tuomo Pekkanen)

Kaczynski praesidens Poloniae designatus

28.10.2005, klo 09.17

Altera suffragia comitiorum praesidentialium die Dominico (23.10.) in Polonia facta sunt. Superior fuit Lech Kaczynski, candidatus factionis conservativae nomine "Lex et Iustitia", qui quinquaginta quattuor centesimas votorum accepit.

Illius factio etiam in comitiis parlamentariis ante unum mensem habitis victoriam reportavit. Donald Tusk, competitor eius ex factione liberali, quadraginta sex centesimas ex votis obtinuit.

Ad urnas una et quinquaginta centesimae civium accesserunt. Kaczynski, praesidens Poloniae designatus, censet de eures, apud Polonos anno bis millesimo decimo in usum accipiundo, suffragium populi faciendum esse.

(Tuomo Pekkanen)

Operistitium in Islandia feminarum

28.10.2005, klo 09.16

Die Lunae plus viginti milia feminarum ex sedibus operis in vias urbis Reykjavik egressae sunt, ut contra differentias inter mercedes feminarum et virorum reclamarent.

Feminae enim in Islandia in medio sexaginta quattuor centesimas ex illa mercede accipiunt, quae viris solvitur.

In Finnia mercedes feminarum circiter viginti centesimis minores sunt quam virorum. Primum operistitium pro paritate mercedum feminae Islandienses triginta annis ante fecerunt.

In politica quidem condiciones illarum his annis meliores factae sunt. Ex delegatis parlamentariis Islandiensibus tertia pars sunt feminae, cum anno millesimo nongentesimo septuagesimo quinto tantum quinque centesimae fuerint.

(Tuomo Pekkanen)

Bernanke moderator Argentariae Foederalis

28.10.2005, klo 09.15

Ben Bernanke, professor scientiae oeconomicae et proximus consiliarius oeconomicus praesidentis George W. Bush, novus moderator Argentariae Foederalis Americanorum (Federal Reserve) ab illo nominatus est.

Oportet autem senatus nominationem confirmet. Novus moderator a Kalendis Februariis Alano Greenspan succedet, qui duodeviginti annos Argentariae Foederali magna cum auctoritate praeest.

(Tuomo Pekkanen)

Hiems in Finnia init

28.10.2005, klo 09.15

His diebus primae nives in maiorem partem Finniae ceciderunt. In regionibus septentrionalibus clivi cum anabathris aperti sunt et semitae sunt iam in usu scridatorum.

Peregrini, qui Finnam petere solent, ut athleticam hibernam exerceant, plures fore aestimantur quam anno proxime praeterito, quo centum quindecim milia numerabantur.

Commeatus vehicularis fit apud Finnos mensibus hibernis lentior, nam a Kalendis Novembribus usque ad mensem Martium vel Aprilem velocitas maxima vehiculorum in viis publicis ad octogena, in viis autocineticis ad centena chiliometra horalia circumscripta est.

Praeterea illo tempore autocineta propter lubricitatem viarum canthis hiemalibus ornata esse debent.
(Tuomo Pekkanen)

Influentia avium diffunditur

21.10.2005, klo 10.54

Influentia avium iam ad portas Moscuæ advenisse videtur. Narratur enim magnam gallinarum, anatum et anserum copiam ex illo morbo virali in regione Tula ante Moscuam sita perisse.

Apparuit illud virus letale ex eo genere esse, quod ex animalibus in homines transire posset. Etiam medici Macedoniae de uno casu suspicioso nuntiaverunt. Huc accedit, quod aliquot aves ferae in Romania inventae symptomata illi epidemiae congruentia ostenderunt.
(Reijo Pitkäranta)

Pons in Freto Siculo fiet

21.10.2005, klo 10.53

Regimen Italiae decrevit in Freto Siculo pontem pensilem faciendum esse, quo continens Italia cum Sicilia coniungeretur.

Agitur de ponte in toto orbe maximo, quippe cuius longitudo plus trium chiliometrorum futura sit. Quae moles, si omnia prospere successerint, anno bismillesimo duodecimo (2012) in usu publico erit. Eo perfecto iter ex ima Italia in urbem Messanam decem minutis confici poterit, nam novus pons non solum viam stratam latissimam habebit, sed etiam celeri ferrivia instructus erit.

(Reijo Pitkäranta)

Filius regius in Dania natus

21.10.2005, klo 10.53

Mary, principissa hereditaria Daniae, postridie Idus Octobres (16.10) filium peperit coniuge Frederico in puerperio praesente.

Praeco aulicus, dum de nova re refert, et parvulum et matrem bene valere nuntiavit. Qui puer, primigenitus utriusque parentis, in ordine successionis regni secundus a patre suo numeratur.

Infans regius recens natus in Dania more translaticio celebrabatur classicis canentibus, vexillis publice propositis, ignibus ad signum accensis.

(Reijo Pitkäranta)

De lupis in Finnia viventibus

21.10.2005, klo 10.52

Plerique Finni censent in finibus suis iam satis luporum vagari, cum numerus eorum hodie circiter ducentorum sit. Benignissimo animo in has bestias sunt adulescentes viginti quinque annis minores, sed cives seniores, praesertim qui rude donati sunt, expansioni eorum vehementer adversantur.

Commissio Europaea nuper Finnos accusavit, quod lupos illegaliter occidissent. Sunt, qui putent Commissionem flagitare, ut in silvis Finniae etiam mille lupi vivere sinantur.

(Reijo Pitkäranta)

Autumnus in Finnia calidior

21.10.2005, klo 10.52

Mensis October in Finnia calidior et serenior fuit quam umquam ante, ut ex Instituto meteorologico confirmatur.

Quam peculiaris haec rerum condicio fuerit, vel inde patet, quod rosae in hortis denuo effloruerunt, item fraga in areolis, proinde ac si nova aestas adesset.

Huc pertinet, quod aves, quin etiam hirundines, solitam migrationem autumnalem in posterius tempus distulerunt. Arbores quidem iam flavescere coeperunt, sed mirum quam sero folia earum deciderunt.

(Reijo Pitkäranta)

Terrae motus in Pakistania

14.10.2005, klo 12.17

Die Saturni mane regiones in confinio Pakistaniae et Indiae sitae vehementi terrae motu concussae sunt.

Qua calamitate, cuius vis amplius septem graduum Richterianorum fuisse nuntiatur, triginta aut etiam

quadraginta milia hominum vitam amiserunt.

Testes oculati rettulerunt motu sismico factum esse, ut omnes fere scholae Pakistaniae, quae in zona calamitatis invenirentur, repentina ruina conciderent.

Ordines auxiliares internationales de clade certiores facti subsidium necessitatis in Asiam mittere coeperunt. Inter eos est Ordo Finniae a Cruce Rubra, qui una cum Norvegis valetudinarium campestre in Casmiriam deportandum curavit.

(Reijo Pitkäranta)

Angela Merkel nova cancellaria

14.10.2005, klo 12.17

Germani feminam cancellariam foederalem acceperunt, cum Angela Merkel, praeses factionis democratarum Christianorum ad hoc munus curandum electa est.

Qui magistratus tamen partibus eius magno stetisse videtur: apparet enim, nisi socialistis magna auctoritas in novo regimine concessa esset, futurum non fuisse, ut Angelae Merkel summus honor daretur.

Gerhard Schröder, pristinus cancellarius, recusavit, quominus novo consilio rei publicae administrandae interesset.

(Reijo Pitkäranta)

De praemio Nobeliano pacis

14.10.2005, klo 12.16

Praemio Nobeliano pacis afficiuntur hoc anno Ordo internationalis ab energia atomica (IAEA) et praeses eius Mohamed ElBaradei, vir Aegyptius sexaginta tres annos natus.

Consilium Nobelianum Norvegicum, dum de rationibus decreti sui publice argumentatur, monuit illum ordinem et moderatorem eius maxime nisos esse, ut energia nuclearis quam tutissime adhiberetur neve usus eius ad proposita militaria peragenda propagaretur.

(Reijo Pitkäranta)

Insulam Ulixis repertam esse

14.10.2005, klo 12.15

Ithaca sive insula, ubi Homerus Ulixem natum esse narrat, tandem reperta est, ut inter eos consentire videtur, qui antiquitati cognoscendae operam dant. Grex investigatorius, cui praeest Robert Bittlestone, nuntiavit se ad hanc conclusionem venisse, postquam analysim computatoriam fecisset ex materia litteraria, archaeologica et geographica in unum collata.

Ithacam eo difficiliorem inventu fuisse, quod terrae motus effecissent, ut illa insula cum quadam alia insula coalesceret.

(Reijo Pitkäranta)

De tabaco in Sinis consumendo

14.10.2005, klo 12.14

Constat consumptionem tabaci in Sinis omnium maximam esse, cum fumatorum numerus ibidem trecenta quinquaginta milionum efficiat.

Inde conici potest tertium quemque Sinensem fumificare. Quae cum ita essent, magistratus Sinarum, cum illum abusum in civitate sua coercere vellent, tractatui internationali subscripserunt, qui eo tendit, ut mortes e fumificatione secutae deminuerentur.

Continentur illo documento leges de tabaco commendando et vendendo. Huc accedit, quod omnia automata tabacaria ex Sinis amovebuntur.

(Reijo Pitkäranta)

De Turcia et Crotia in UE asciscendis

07.10.2005, klo 12.30

Post longas disputationes Unio Europaea die Lunae constituit, ut consultationes de Turcia in Unionem asciscenda incoharentur.

Putantur autem illae consultationes fore longae et minime decem annorum, cum necesse sit, ut Turci democratiam, iura humana legesque reveantur, antequam in Unionem accipiantur.

José Manuel Barroso, praeses Commissionis Europaeae, monuit Turciam animos civium Europaeorum sibi conciliare debere, nam illos imprimis de Turcis asciscendis decreturos esse; Turciam quidem

eodem modo tractandam esse quo ceteras nationes candidatas, sed consultationes cum illa severae et honestae essent.

Etiam cum Croatia de adhaesione consultari coeptum est. Mense Martio consultationes cum Croatis dilatae sunt, cum illi omnes suos de criminibus belli suspectos in tribunal Haagense non tradidissent. Nunc autem Carla del Ponte, accusatrix principalis, affirmavit Croatiam cum tribunali plene cooperari. (Tuomo Pekkanen)

UE et Russia cooperantur

07.10.2005, klo 12.29

Unio Europaea et Russia de cooperatione artiore et visis facilius concedendis inter se consenserunt. Russi promittunt se immigratores illegales, qui in Unionem Europaeam per Russiam transierint, recepturos esse; Unio Europaea visa legatis diplomaticis, studentibus negotiatoribusque Russis facilius quam ante datum iri pollicetur.

Pacto de his rebus adhuc hoc anno subscribetur. In eodem conventu Londinii habito praesidens Russiae Vladimir Putin affirmavit transmissionem energiae ex Russia in Unionem Europaeam fideliter continuatum iri.

Dimidium gasi terrestris et tertia fere pars petrolei, quibus Unio Europaea utitur, ex Russia aut per illam transmittuntur.

(Tuomo Pekkanen)

Praemium medicinae Nobelianum

07.10.2005, klo 12.28

Praemium Nobelianum medicinae duo investigatores Australiani, Barry Marshall et Robin Warren, accipient.

Illi primi erant, qui anno millesimo nongentesimo octogesimo secundo helicobacterium in ventre hominis invenerunt.

Idem animadverterunt homines, qui bacterium haberent, semper fere ulcere aut catarrho ventris affectos esse.

Bacterio reperto illi morbi magnam partem antibioticis curantur.

(Tuomo Pekkanen)

Obesi Americani

07.10.2005, klo 12.28

Periculum obesitatis Americanis imminet. Ex investigatione, in qua corporis pondus quattuor milium hominum per triginta annos observabatur, apparuit septuaginta centesimas feminarum et nonaginta centesimas virorum esse obesos.

Periculum in eo est, quod homines pingues magis quam ceteri morbis cardiovascularibus et diabetae atque quibusdam canceri generibus expositi sunt.

(Tuomo Pekkanen)

Sollemnia cervisiaria

07.10.2005, klo 12.27

Monaci, in urbe Bavariae, dies festi cervisiarii more translaticio celebrati sunt. Hoc anno plures festis diebus aderant quam umquam ante, sed minus cervisiae quam anno proximo potatum est.

Sex miliones hominum prope sex miliones litrarum cervisiae sumpserunt. Sollemnia hornotina fuerunt ordine centesima septuagesima secunda.

(Tuomo Pekkanen)

Res Proximaie Orientis

30.09.2005, klo 10.56

Circulus vitiosus violentiae in Oriente Proximo intactus fere remanere videtur. Nam regimen Israelis, cui praeest princeps minister Ariel Sharon, exercitui Israeliano plenam auctoritatem dedit omnes rationes in bello contra terroristas Palaestinenses gerendo adhibendi.

Itaque copiae Israelianae impetu aereo in Gazam facto non solum ducem ordinis militaris islamistarum cum adiutore eius interfecerunt, sed etiam regionem illam multis bombis verberaverunt.

(Reijo Pitkäranta)

Quid Bush dixerit

30.09.2005, klo 10.55

George Bush, praesidens Civitatum Americae Unitarum, concivibus suis suasit, ut energiae parcerent, usum autocinetorum privatorum deminuerent et commeatui vehiculari publico faverent.

"Utinam Americani", inquit, "talibus itineribus abstineant, quae necessaria omnino non sunt."

Quae consilia eam ob causam dedit, quod saevae tempestates regionibus petroleum producentibus magno detrimento fuerunt.

Monuit singulos cives in illa rerum condicione pro virili parte bono publico servire posse. Americani intellegerent procellis effectum esse, ut oeconomia nationalis in magnas difficultates vocaretur.

(Reijo Pitkäranta)

De influenza avium

30.09.2005, klo 10.55

Moderatores Nationum Unitarum magistratus Indonesiae hortati sunt, ut contra influentiam avium, qua illa civitas iam diu vexatur, multo efficacius agerent.

Constat quattuor homines post mensem Iulium hac epidemia mortuos et plus viginti symptomatis ei similibus affectos esse.

Rerum periti praemonent fieri posse, ut influenza avium, nisi Indonesiani maiorem severitatem in ea avertenda adhibuerint, in pandemiam globalem crescat.

(Reijo Pitkäranta)

De latronibus Suetiae

30.09.2005, klo 10.54

Numerus ordinum et gregum criminalium in Suetia his decem annis multiplicatus est, ut referunt acta diurna quibus nomen *Dagens Nyheter*.

Existimantur enim ibidem paene quinquaginta sodalicia nefaria esse, quae in viginti tribus diversis locis agunt.

Plerique socii eorum de vi et latrociniis varii generis condemnati sunt.

(Reijo Pitkäranta)

Lolligo gigantea reperta

30.09.2005, klo 10.53

Viris doctis Iaponiensibus primis omnium contigit, ut Architeuthim sive Loliginem giganteam, beluam marinam prope fabulosam, in aquis suis nationalibus photographice imprimerent.

Monstrum illud, cuius longitudo octo metrorum erat, in profunditate maris nongenta metra alta in suo ambitu naturali vivens repertum est.

(Reijo Pitkäranta)

De venatione alcium

30.09.2005, klo 10.53

Die Saturni sive die vicesimo quarto mensis Septembris (24.9) venatores Finniae, quorum apud nos circiter centum milia esse aestimantur, ad alces sternendas profecti sunt.

Copia horum cornigerorum in silvis nostris iam tantopere crevit, ut venatoribus hoc anno licentia sexaginta milia alcium occidendi daretur, qui numerus decima parte maior est quam anno proxime praeterito.

Tempus alcium venandarum usque ad medium mensem Decembrem durabit.

(Reijo Pitkäranta)

Comitia Germanorum

23.09.2005, klo 09.35

Apud Germanos die Dominico comitia parlamentaria facta sunt, ex quibus factiones principales aequo Marte discesserunt, nam et Democratae Christiani et Democratae Sociales tertiam fere partem suffragiorum obtinuerunt.

Illi in novo parlamento ducentos viginti quinque, hi ducentos viginti duos delegatos habebunt.

Eventus quidem comitiorum usque ad diem mensis Octobris secundum incertus manebit, quo die in regione urbis Dresdae suffragia dabuntur.

Ibi enim comitia procrastinata sunt, quia unus ex candidatis paulo ante electiones mortuus est.

Factionibus principalibus inter se litigantibus consultationes de novo regimine constituendo sunt difficiles. Et Gerhardus Schröder, cancellarius foederalis hodiernus, et Angela Merkel, dux oppositionis conservativa, cancellariatum sibi flagitant.

José Manuel Barroso, praeses Commissionis Europaeae, ait se sperare, ut novum regimen Germanorum quam primum constitueretur; Germaniam esse motrum Europaeorum, sine quo Europa non recrearetur.

(Tuomo Pekkanen)

Corea Septentrionalis ambigua

23.09.2005, klo 09.34

Coreani Septentrionales polliciti sunt se nuclearibus armis et electrificinis renuntiuros et ad tractatum internationalem de proliferatione nucleari vetanda accessuros esse.

Consultationibus multilateralibus, quae ultra biennium duraverunt, intererant Coreani Meridionales, Americani, Iapones, Russi, Sinenses, qui contra Coreanis Septentrionalibus petroleum et energiam promiserunt.

Praeterea nationes consultationum participes ad relationes diplomaticas cum Coreanis

Septentrionalibus restituendas iam paratae erant.

At postridie eius diei, quo concordia constituta est, Coreani Septentrionales nuntiaverunt se programmata nuclearia non esse deposituros, antequam ab Americanis reactiva acceperint, quibus vis nuclearis ad usus civiles apta pararetur.

Tuomo Pekkanen

Americani in lunam reversuri

23.09.2005, klo 09.33

Administratio aeronautica et spatialis Americanorum de novo in lunam volatu consilium cepit, qui anno bis millesimo duodevicesimo fiet.

Novum navigium spatiale maius erit prioribus, quibus duodecim homines inter annos millesimum nongentesimum duodeseptuagesimum et septuagesimum secundum (1968-72) lunam obierunt.

Sex astronautas capiet, ex quibus quattuor in lunam descendent.

(Tuomo Pekkanen)

Simon Wiesenthal obiit

23.09.2005, klo 09.32

Simon Wiesenthal, pertinax persecutor nazistarum nefariorum, annos natus nonaginta sex Vindobonae diem supremum obiit.

Confecto secundo bello mundano Wiesenthal plus mille centum apparitores et satellites Adolphi Hitler, inter quos notissimus erat Adolphus Eichmann, in iudicium arcessendos et damnandos curavit.

Quattuor annos et dimidium in campo concentrationis fuerat, unde cum coniuge vivus evasit, etsi prope nonaginta propinquos amisit.

Tarja Halonen, praesidens Finniae, res a Wiesenthal gestas laudavit et monuit magni esse ad conscientiam generis humani, quod atrocia scelera in abscondito non manerent.

(Tuomo Pekkanen)

Mubarak electionum victor

16.09.2005, klo 00.54

Hosni Mubarak, praesidens Aegypti septuaginta septem annos natus, moderator civitatis suae in quintum sexennium electus est.

Qui exitus comitiorum in Aegypto habitorem expectatissimus erat, quamquam hoc anno primum accidit, ut populo facultas daretur praesidentem e pluribus candidatis creandi.

Votis computatis Mubarak victor manifestissimus repertus est, quippe qui e suffragiis duodenonaginta centesimis (88%) potitus esset.

Id tamen dolendum est, quod nonnisi quartus quisque civis iure suffragandi usus est.

(Reijo Pitkäranta)

Comitia in Norvegia habita

16.09.2005, klo 00.53

In Norvegia die Lunae comitia parlamentaria legatis in commune Norvegorum concilium creandis instituta sunt.

Post certamen de principatu politico pari Marte consertum apparuit coalitionem partium mediarum et sinistrarum electionibus superiorem discessisse.

Ex ea re sequitur, ut Jens Stoltenberg, praeses factionis operariorum, novus princeps minister Norvegiae fiat et Kjell Magne Bondevik, qui civitati quadriennio proxime praeterito praefuit, locum suum relinquere cogatur.

Inter ambitum maxime id quaerebatur, utrum uberiores petrolei reditus potius ad tributa minuenda an ad ministeria publica melioranda adhiberentur.

Eventus comitiorum ostendit posteriorem optionem civibus gratiorem fuisse.

(Reijo Pitkäranta)

Sessio Nationum Unitarum**16.09.2005, klo 00.52**

Principes centum septuaginta fere civitatum postridie Idus Septembres (14.9.) Novum Eboracum sive in urbem New York concurrerunt, ut sexagesimum Nationum Unitarum annum conventu sollemni celebrarent.

Ex Finnia huc venit praesidens Tarja Halonen. Qua in sessione participes documentum amplissimum comprobaverunt, quod rerum periti e diversis nationibus oriundi ante conventum generalem conscripserant.

Agitur in hoc libello de summis rebus ad totum globum terrestrem pertinentibus, quarum in numero sunt progressus, iura humana et rationes ad periculum terrorismi avertendum.

Restabant tamen aliquot themata, de quibus non convenerat, ut dearmatio nuclearis et quaestio, quomodo notio terrorismi definiretur.

Neque impedimenta mercaturae internationalis amoveri potuerunt, quamquam tale consilium iam diu in votis populorum egentiorum est.

Rerum in Guantanamo status**16.09.2005, klo 00.51**

Quarta fere pars captivorum, qui in statione navali Guantanamo de terrorismo accusati tenentur, inediam voluntariam suscepit.

Illa actio, cui centum duodetriginta homines intersunt, die octavo mensis Augusti (8.8.) initium cepit, et res iam eo gravitatis venit, ut duodeviginti captivi in nosocomium deportati per vim nutriantur.

Cum cibum sumere recusant, de ea iniuria sibi allata queri volunt, quod in vinculis iam per multos annos esse cogantur occasione causam dicendi nondum data et ne accusatione quidem ad iudices delata.

(Reijo Pitkäranta)

Calamitas Novaurelianensis**09.09.2005, klo 09.04**

Tempestas verticosa nomine Katrina regionibus circa fauces fluminis Mississippi iacentibus calamitatem ambitalem attulit, quae maxima in historia Americae septentrionalis esse iudicatur.

Perruptis vi tempestatis aggeribus, quibus urbs Nova Aurelia munebatur, regiones infra superficiem maris sitae diluvio coopertae sunt. Minora erant damna in parte urbis altiore, a Francogallis condita.

Greges latronum armati, qui per urbem grassabantur, anxietatem et metum hominum auxerunt. Iam plus decies centena milia hominum ex regione calamitosa in alias civitates Americae septentrionalis confugerunt aut evacuati sunt.

(Tuomo Pekkanen)

Novae tempestates imminet**09.09.2005, klo 09.03**

Investigatores Universitatis Coloratensis censeant verisimile esse, ut altera verticosa tempestas magnae ferocitatis in oram orientalem Americae septentrionalis mense Septembri aut Octobri incidat: cum tempus, quo vertices ventorum ferorum oriri soleant, nondum ad finem appropinquaverit, verisimilitudinem novae tempestatis verticosae quadraginta trium centesimarum esse.

Frequentia turbinum exceptionalium ab eo originem habet, quod Oceanus solito calidior est neque venti mitiores et variationes temperaturae, quibus vires tempestatum leniuntur, his mensibus occurrerunt.

Sunt, qui arbitrentur insolitas proximorum annorum tempestates, diluvia siccitatesque calefactioni climatis longinquae deberi, quam actiones hominum effecerint.

(Tuomo Pekkanen)

Pretium petrolei maximum

09.09.2005, klo 09.02

Cum insulae terebratoriae Sinus Mexicani tempestate Katrina damna gravissima cepissent et ita productio petrolei Americanorum deminuta esset, petrolei pretium ubique auctum est.

Gasioleum et benzinum nunc pluris constant quam umquam ante, quod sumptus calefactionis et commeatus notabiliter auxit. Ideo homines, quorum condiciones vitae auctis pretiis artiores fiunt, in variis orbis terrarum partibus reclamitaverunt. In Gallia vectores autocarrorum stationes petrolearias obsidentes distributionem benzini et gasiolei impedire conabantur. In Nigeria sodalicia opificum longas reclamationum series fore minitantur.

(Tuomo Pekkanen)

Saddam crimina commissa confitetur

09.09.2005, klo 09.01

Jalal Talabani, praesidens Iraquiae hodiernus, rettulit pristinum dictatorem Saddamum Hussein, de actis suis interrogatum, multa crimina confessum esse, quae commisisset, cum patriam moderaretur; quin etiam eum concessisse se suppliciorum sumendorum participem fuisse. Talabani censet Saddamum dignum esse, qui vices singulis diebus laqueo suspendatur.

(Tuomo Pekkanen)

Societates aeriae dubiae

09.09.2005, klo 08.58

Parlamentum Europaeum flagitat, ut in Unione Europea index omnium illarum societatum aeriarum componatur, quae fidem non meruerint.

Regulae strictiores praecipue illis societatibus postuluntur, quae itinera pretiis vilioribus venditant.

Hodie nationes Unionis Europaeae argumentis inter se differentibus utuntur, quibus negotia societatum dubiarum vetant.

(Tuomo Pekkanen)

Clades naturae Americana

02.09.2005, klo 11.31

Civitates Americae Septentrionalis prope oram Sinus Mexicani sitae septimana ineunte tempestate horribili, cui nomen Katrina inditum, gravissime afflictae sunt.

Quot homines illa clade interierint, nondum exacte constat, sed numerus mortuorum iam multorum centenorum esse existimatur.

Regio calamitate pessime vastata ab Ludoviciana usque ad Floridam extenditur.

Nova Aurelia, urbs maritima, quae iam ante tempestatis ortum iussu magistratuum tota fere incolis evacuata erat, etiam maiora detrimenta cepisset, nisi procella cursu mutato eam paululum praeterisset.

Biduo post tamen novum periculum apparuit: aggeres enim, qui ad tutelam Novae Aureliae infra superficiem maris iacentis exstructi erant, vi ventorum multis locis fracti sunt, quo factum est, ut massae aquarum e lacu Pontchartrain in urbem influerent et quattuor huius partes obruerent.

Ita cives, qui ibidem remanserant, fluctibus circumdati in tecta domuum et in alia loca editiora confugere coacti sunt.

Multitudo autem hominum circiter viginti milium in magnam palaestram constipata est, ubi inopia omnium rerum necessariarum laborans auxilium exspectat.

Reijo Pitkäranta

Lex fundamentalis Iraquiae

02.09.2005, klo 11.30

Praesidens Iraquiae Jalal Talabani nuntiavit novam legem fundamentalem Iraquiae iam ita praeparatam esse, ut ad suffragium populi, quod Idibus Octobribus (15.10.) institueretur, deferri posset.

Textus legis promulgatae, de cuius forma per multas septimanas acerrime disceptatum erat, coram parlamento tandem recitatus est, quamquam legati Sunnitarum etiamtum recusaverunt, quominus rogationem approbarent.

Metuunt enim, ne expertes copiarum petrolei reddantur, cum hae opes maximam partem in finibus Curdorum et Shiitarum inveniantur.

Reijo Pitkäranta

Proventus in Finnia malorum

02.09.2005, klo 11.29

Proventus malorum in Finnia cultorum hoc autumno tertia fere parte uberior fore exspectatur quam fieri solet.

Quam rerum condicionem non mireris, si respicias hanc aetatem pluviis et serenitatibus variantem horticulturae admodum idoneam fuisse.

Corbes iam pleni sunt malorum rubrorum, quae celerius quam reliqua horum pomorum genera maturuerunt. Species autem hiemales non ante quam mense Septembri exeunte de arboribus in vasa colligentur.

Reijo Pitkäranta

Novum culmen mundanum

02.09.2005, klo 11.29

Denique res quaedam athletica. Kenenisa Bekele, cursor Aethiops viginti tres annos natus, in cursu decem milium metrorum novum culmen mundanum fecit.

Certaminibus enim in stadio Bruxellensi positus illud spatium viginti sex minutis, septendecim secundis et quinquaginta tribus centesimis (26,17,53) percurrit.

Qua egregia re cum maximo spectantium gaudio gesta pristinum primatum, quem ipse antea consecutus erat, tribus fere secundis meliorem reddidit.

Reijo Pitkäranta

Coloniae Gazenses vacuefactae

26.08.2005, klo 00.45

Regio litoralis, qui tractus Gazae appellatur, a militibus Israelianis evacuata est.

Fuerunt ibi omnino una et viginti coloniae Iudaeorum, quae post bellum sex dierum conditae erant. Hac evacuatione occupatio regionis duodequadragesima annorum finita est.

Coloniae ab Israelianis ita relictas Palaestinensibus post unum fere mensem tradentur.

Milites Israeliani etiam duas colonias in ripa occidentali fluminis Iordanis sitas vacuefecerunt, etsi coloni nationalistae saepimentis tumultuariis et filis ferreis aculeatis eos aditu prohibere conabantur.

Duas alias colonias ibidem conditas incolae sponte sua antea reliquerant. Restant in ripa occidentali adhuc centum viginti coloniae.

(Tuomo Pekkanen)

Portugallia incendiis vastatur

26.08.2005, klo 00.44

Portugallia ab Unione Europaea auxilium petivit, ut incendia silvarum et camporum passim vagantia coercerentur.

Post mensem Ianuarium nullae fere pluviae in Portugallia ceciderunt et praeterea ventis vehementer flantibus labor siphonariorum difficilior redditus est.

Hac aestate incendia iam centum quadraginta milia hectarearum ex silvis fruticetisque Portugalliae vastaverunt.

Nebula densa die Mercurii orta aliquid auxilii laborantibus attulit, sed illo die adhuc circiter mille quingenti siphonarii et plus sescenti milites incendiis exstinguendis operam dederunt.

Franci, Germani, Italiani, Hispani Nederlandiensesque aeroplana, helioptera aliaque ad ignes coercendos necessaria Portugallis auxilio miserunt.

(Tuomo Pekkanen)

Alibi diluvia et tempestates

26.08.2005, klo 00.42

Eodem tempore, quo siccitas in Portugallia perseverat, Europa media et orientalis tempestatibus et diluviis laborat.

Imbres continui labinas in terris montuosis effecerunt, lineas electricas, vias stratas ferratasque diruperunt, vicos secluserunt.

Magistratus Germaniae et Austriae aestimant iacturas iam maiores esse quam in diluviis anni

undebismillesimi.

Maxima damna diluviis totam per aestatem durantibus facta sunt in Romania et Bulgaria, in quibus moles aquarum plus quinquaginta homines secum abstulerunt et multa domorum milia deleverunt. In quibusdam partibus Austriae occidentalis, in Helvetia media et orientali et Croatia status necessitatis edictus est.

(Tuomo Pekkanen)

De Carelia recuperanda

26.08.2005, klo 00.41

Finito bello mundano secundo magna pars Careliae Finnicae ad Unionem Sovieticam annexa est.

Unione Sovietica dissoluta de illa regione recuperanda apud Finnos diu multumque disceptatum est, praesertim cum praesidens Boris Jeltsin confessus esset bellum, quod dicitur hiemale, iniuria Stalini contra Finnam commissum esse.

Hodie, cum plerique ex eis circiter quadringentis milibus hominum, qui domibus relictis ex Carelia evacuati sunt, iam diem obierint, pauciores inveniuntur, qui illam velint recuperare.

Ex demoscopia nuper facta patet vix tertiam partem civium adhuc desiderare, ut Carelia a Russis occupata Finnis restituatur.

(Tuomo Pekkanen)

Remissio aeris alieni

17.06.2005, klo 00.48

Inter ministros octo civitatum industrialium convenit, ut duodeviginti nationes in maxima paupertate viventes aere alieno liberarentur.

Remissio debitorum, quae auspiciis Britannorum approbata est, speciatim ad terras in Africa meridionali sitas spectat.

Quo facto nihil iam impedit, quin hi populi pecuniam suam debitam in curam valetudinis provehendam et in scholas condendas impendant.

Gordon Brown, minister Britannus ait: "Iam non est tempus ignaviae sed fortitudinis neque operae pretium est secundaria sequi sed ad maiora contendere."

Linguae in UE officiales

17.06.2005, klo 00.46

Unio Europaea in praesenti unam et viginti linguas officiales habet.

Ad hunc numerum perventum est, cum conventui Unionis in Luxemburgo habito placuit, ut etiam linguae Hibernicae ille status officialis concederetur.

Eodem tempore tres sermones in Hispania minores, inter eos lingua Vasconica, condicionem semiofficialem acceperunt.

De statu fluminis Flavi

17.06.2005, klo 00.45

Maior pars aquae fluminis Flavi, quod longitudine secundum ab omnibus Sinarum fluviis esse constat, tam male inquinata est, ut neque ad natandum neque ad potandum idonea sit.

Ita rettulit Xinhua, sedes officialis nuntiis divulgandis.

In causa dicuntur esse laetamina, eiectionamenta industrialia et ingentes sordium eluvies.

Vaccae Delia amovebuntur

17.06.2005, klo 00.44

Iudicium Indicum edicto sanxit, ut vaccae a media Nova Delia amoverentur.

Existimantur earum circiter triginta quinque milia in viis et plateis urbis principis Indiae vagari ibique quotannis complures calamitates viarias efficere.

Idem decretum a summo iudicio Indiae iam abhinc duos annos factum est, sed illa lex apud populum non valuisse videtur.

Constat Hinduistas vaccis tantam sanctitatem tribuere, ut multi homines ad iura earum defendenda etiam vim adhibere parati sint.

Novum culmen mundanum

17.06.2005, klo 00.43

Die Martis (14.6.) in cursu centum metrorum novum culmen mundanum ortum est: Asafa Powell, iuvenis Iamaicanus viginti duos annos natus, certamine internationali in stadio Athenarum posito hoc spatium novem secundis cum septuaginta septem centesimis (9.77) cucurrit. Pristinus primatus, quem Tim Montgomery Americanus tribus annis ante praestiterat, centesima parte unius secundae deterior erat.

Nuntii Latini ferias agunt

17.06.2005, klo 00.42

Nuntii Latini, qui ex urbe Helsinki iam paene sedecim annos singulis septimanis eduntur, ob ferias aestivas ad decem septimanas intermittuntur.

Quapropter auscultatores nostros certiores facimus proximos Nuntios Latinos non ante quam die vicesimo sexto mensis Augusti (26.8.) emissum iri. Restat, ut vobis omnibus gratias quam maximas agamus et aestatem optimam exoptemus.

Discrimen Unionis Europaeae

10.06.2005, klo 11.08

Postquam Francogalli et Nederlandienses suffragio populari legem Unionis Europaeae fundamentalem reiecerunt, etiam in aliis terris adversarii constitutionis novas vires recuperaverunt.

In Dania, ubi suffragium die vicesimo septimo mensis Septembris futurum est, ex demoscopiis recens factis apparet maiorem partem civium legi obsistere. Poloni suffragium in mensem Octobrem constitutum different, si in conventu moderatorum Unionis mense Iulio nullum certum consilium de lege captum erit. Britanni de suffragio in posterum differendo iam decreverunt. In Norvegia maior pars civium votum adversarium ferrent, si nunc de patria ad Unionem Europaeam adiungenda interrogarentur.

Dinosauri politici

10.06.2005, klo 11.07

Cum praesidens Jacques Chirac et cancellarius Gerhard Schröder adhuc ratificationem constitutionis membris Unionis commendavissent, Liam Fox, politicus Britannus factionis conservativae, illos dinosaurus politicos appellavit, qui una cum exercitu eurocratarum se gerere pergerent, tamquam nihil accidisset. Idem flagitavit, ut constitutio, quae et Britanniae et Europae mala esset, pro mortua haberetur.

Helvetia tractatum Schengeniensem accepit

10.06.2005, klo 11.06

In Helvetia cives sententiam rogati sunt, an patriam ad tractatum Schengeniensem adiungere vellent. Maior pars tractatum probavit, ex quo sequitur, ut incolae ceterarum nationum Schengeniensium liberum per Helvetiam commeatum habeant. Tractatus ille septem nationum factus est in oppido Schengen Luxemburgi anno millesimo nongentesimo octogesimo quinto. Aliis nationibus postea additis, terrae Schengenienses sunt quindecim, scilicet Austria, Belgicum, Dania, Finnia, Francia, Germania, Hispania, Islandia, Italia, Graecia, Luxemburgum, Nederlandia, Norvegia, Portugallia, Suetia. Adiunctis Helvetiis numerus est sedecim. Exceptis Norvegia, Islandia Helvetiaque, omnes sunt terrae Unionis Europaeae.

Saddam Hussein in iudicium

10.06.2005, klo 11.04

Saddam Hussein, pristinus dictator Iraquianorum, cum suis adiutoribus duodecim criminibus accusabitur. Delegatus regiminis Iraquiae rettulit crimina quidem plus quingenta fuisse, sed ut res accelerarentur, iudices tantum in gravissima ex eis inquisituros esse. Iudicium, in quo poena capitis Saddamo imminebit, post aliquot menses fiet.

Daniil Simkin optimus ballator

10.06.2005, klo 11.03

In certamine internationali ballationis scaenicae, quod in urbe Helsinki iam quintum factum est, optimus omnium saltator evasit Daniil Simkin, iuvenis septendecim annorum, natione Germanus sed origine Russus, qui praemio decem milium euronum affectus est. Inter feminas palmam reportavit Iana Salenko Ucraina.

Feriae aestivae inierunt

10.06.2005, klo 11.02

In Finnia feriae aestivae scholarum pridie Nonas Iunias inierunt. Novus annus scholasticus medio mense Augusto incohatur.

Magistratus quidam nuper flagitaverant, ut initium feriarum duabus septimanis ulterius differretur, sed propositum eorum repudiatum est. Mensis enim Iunius in terris septentrionalibus vel ideo ad ferias agendas videtur aptissimus, quod lux solis tum abundat et natura est amoenissima.

Francogalli "non" dixerunt

03.06.2005, klo 10.27

Die Dominico populus Francogallicus suffragatum iit de quaestione, utrum lex Unionis Europaeae fundamentalis approbaretur necne.

Tabellis perspectis repertum est sententias 'non' dicentium manifeste praevalere, cum amplius quinquaginta quinque centesimas omnium votorum efficerent.

Qui eventus praesidenti Jacques Chirac magnam auctoritatis cladem paravit: is enim, cum illam legem sine dubio comprobatum iri confideret, de suffragio populi ineundo decreverat.

Chirac de victoria adversariorum certior factus oratione televisifice habita se voluntati populi morem gesturum esse pollicitus est.

"Fieri tamen non potest", inquit, "quin Francogallis iam difficilius sit sua commoda in Unione Europaea provehere."

Raffarin munus deposuit

03.06.2005, klo 10.25

Quantam vim exitus suffragii in politicam Francogalliae domesticam habuerit, inde quoque elucet, quod primus minister Jean-Pierre Raffarin iam biduo post se magistratu abdicare coactus est.

In locum eius successit Dominique de Villepin, vir quinquaginta duos annos natus et in re publica iam diu versatus

Quid moderatores dixerint

03.06.2005, klo 10.25

Plebiscitum Francogallorum moderatores Unionis Europaeae et ministros civitatum eius sociarum ad sententiam de nova rerum condicione proferendam elicit.

Jose Manuel Barroso, praeses commissionis Unionis: "Unio Europaea", inquit, "in praesenti quidem magnis difficultatibus implicata est, sed hanc rem adversam aequo animo accipiamus oportet."

Jean-Claude Juncker, minister princeps Luxemburgi, negavit fieri posse, ut novae consultationes de lege fundamentali instituerentur.

Matti Vanhanen, minister primarius Finniae, cum eventum suffragii graviter ferret, tamen ait eum miserari nihil prodesse.

Nomen Praetoriae mutatur

03.06.2005, klo 10.23

Magistratus Rei publicae Africae Australis propositum approbavit, ex quo Praetoria, caput civitatis, cum nova appellatione Tshwane mutaretur.

Incolae albicolores, qui mutationi adversantur, illud consilium per quandam damnationem memoriae captum esse censent.

Praetoria enim nomen accepit ex Andrea Praetorio, qui bello Burano saeculo undevicesimo mediante in Africa gesto praefectus exercitus erat.

Mark Felt "Gula profunda"

03.06.2005, klo 10.22

Iam plus triginta annos quaesitum erat, quisnam fuisset vir, "Gula profunda" appellata, qui duos redactores Americanos Bob Woodward et Charles Bernstein adiuvaret ad scandalum Watergate palam faciendum.

Quod aenigma Kalendis Iuniis solutum est, cum Mark Felt, olim director adiunctus Officii Foederatorum Vestigatorii (FBI), in publicum prodiit confitens se illum delatorem esse. Res Watergate, e parvis initiis exorta, ad extremum eo adducta est, ut praesidenti Richard Nixon mense Augusto anno millesimo nongentesimo septuagesimo quarto (1974) munus deponendum esset

Spatium Finniae aerium violatum

27.05.2005, klo 00.31

Aeroplana Russiae speculatoria et oneraria, inter Russiam et Kaliningradum per Sinum Finnicum commeantia, hoc anno iterum iterumque in spatium Finniae aerium penetraverunt.

Matti Vanhanen, minister Finniae primarius, censet illos volatus vix fuisse provocatorios; necesse tamen esse, ut Russi de spatio Finniae ita violato rationem reddant.

Omnes casus, in quibus aeroplana Russica in partem Finnorum declinaverunt, per instrumenta radioelectrica et photographemata confirmati sunt.

Urbs Kaliningrad, olim Königsberg, post secundum bellum mundanum ad Unionem Sovieticam cum regionibus circumiacentibus annexa est et illa dissoluta pars Russiae separata mansit.

Reaedificatio Iraqiae laboriosa

27.05.2005, klo 00.30

Incepta Iraqiam reaedificandi retardata sunt, quia ictus terroristici contra structuram terrae inferiorem et operarios officialesque cotidie fere fiunt.

Securitas identidem in discrimen vocata carissime constat, nam quindecim centesimae ex pecuniis ad incepta praestitis in mercedibus custodum aliisque rationibus tutelaribus consumuntur.

Condicionibus laboris dubiis, quas ictus usque repetiti creaverunt, effectum est, ut praestitores pecuniarum peregrini ab Iraqia deficerent.

Uno anno paene trecenti operarii aut custodes publici in Iraqia occisi sunt. Haec relata sunt a magistratu Americano, qui de securitate operum in Iraqia est responsalis.

Feminis Saudianis licentia gubernandi?

27.05.2005, klo 00.26

In Arabia Saudiana feminis autoraeda vehentibus necesse est secum et virum familiarem et autoraedarium habere.

Nuperrime autem lex in parlamentum Saudianum lata est, ex qua feminis licentia vehiculum gubernandi concederetur.

Lator illius legis propositum suum eo argumento firmat, quod feminae iure gubernandi carentes autoraedarium magno pretio conducere cogantur.

Graecia in cantionibus victrix

27.05.2005, klo 00.22

Annum certamen cantionum ab Eurovisione institutum Kioviae, in capite Ucrainae, sero vespere Sabbati factum est.

Transmissionem televisificam certaminis, quae tres horas et dimidium duravit, centum quinquaginta miliones spectatorum vidisse aestimantur.

Victrix exstitit Elena Paparizou, cantatrix Graeca. Cantor Finnorum iam in certamine eliminatorio exclusus est.

ALF Latinitas Aestiva

27.05.2005, klo 00.18

Seminaria aestiva ad usum linguae Latinae vivum discendum et exercendum etiam hoc anno in variis terris fient.

Academia Latinitati Fovendae (ALF) suum seminarium a die vicesimo quinto usque ad diem duodetricesimum mensis Iulii in oppido Hispaniae Segoviensi La Grania de San Ildefonso habebit. (<http://academialatina.org/seminaria.htm>).

In programme illius seminarii, quod omnino Latine fiet, erunt colloquia de variis argumentis,

exercitia scripta et oralia, interpretationes auctorum, carmina Latina et acroamata.
Auspiciis eiusdem Academiae Melissa, fundatio Bruxellensis (<http://users.skynet.be/Melissalatina>),
Symposium Latinum in promunturio Leucadis in extrema Italia eisdem diebus instituet.

Tumultus in Usbekistania orti

20.05.2005, klo 09.16

In urbe Andizan Usbekistaniae orti sunt tumultus, in quibus complures centeni homines vitam amiserunt, cum milites regiminis turbas reclamantium sclopetando dispergerent.
Unio Europaea et confoederatio Nato regimen Usbekistaniae reclamatoresque monuerunt, ut stragem evitarent et modo pacifico rem restituerent. Islam Karimov, praesidens Usbekistaniae, greges extremistarum musulmanorum de tumultibus accusat, sed sunt qui censeant vim contra reclamatores adhibitam esse, ut Usbekistaniani, quorum sunt viginti sex miliones, intellexerent, quae futura esset sors eorum, qui potestati praesidentis resistere auderent. Illa autem ratio valere non videtur. Tumultus enim in novas regiones, quae sunt prope fines Kirgisiae, iam extensi esse dicuntur. Testes oculati narrant in illud confinium circiter quinque milia hominum violentiam timentium confluisse. Status rerum et Russos et Americanos sollicitat, nam utrique volunt, ut stabilitas in Usbekistania maneat.

Norvegia centenaria

20.05.2005, klo 09.10

In Norvegia die septimo decimo mensis currentis (17.5.) fuit dies festus nationalis, quo independentia centenaria celebrabatur. Sollemnia per totum annum, maxime autem mense Iunio, fient.
Norvegi sui iuris facti sunt, cum unio, quam cum Suetis habebant, post suffragium populi anno millesimo nongentesimo quinto (1905) dissolveretur. Nationalis dies festus a Norvegis illo mensis Mai die celebratur, quia patria eorum abhinc centum nonaginta unum annos, id est die septimo decimo mensis Mai anno millesimo octingentesimo quarto decimo (17.5.1814), suam constitutionem accepit et unione cum Suetia iuncta a Dania separata est.

De aequalitate feminarum

20.05.2005, klo 09.09

Forum Mundi Oeconomicum (WEF) aequalitatem feminarum et virorum in duodesexaginta terris comparavit. Ex eventu investigationis patet aequalitatem esse maximam in terris septentrionalibus, quae primos quinque locos occupaverunt.
Minimae enim sunt differentiae aequalitatis virorum et feminarum in Suetia, Norvegia, Islandia, Dania, Finnia. Respiciebantur in illa investigatione stipendia, cursus honorum, vita politica, educatio, cura valetudinis aliaque servitia publica, atque quaesitum est, quales in eis essent differentiae sexuum. Pro materia adhibebantur tam statistica quam colloquia interrogatoria. Longissimae ab aequalitate aberant feminae Turcae et Aegyptiae. Terrae septentrionales a Foro Mundi Oeconomico ceteris pro exemplo commendabantur.

Conventus Alcanitiensis

20.05.2005, klo 09.08

Alcanitii, in urbe Aragoniae, conventus internationalis nuper celebratus est, in quo moderante Iosepho Maria Maestre de humanismo et cultura classica superstite agebatur.
In eadem urbe ultima mensis Iulii septimana anni proximi initium habebit XI Conventus Academiae Latinitati Fovendae, cuius praecipuum argumentum erit activa linguae Latinae institutio.

Memoria belli II mundani

13.05.2005, klo 09.30

Septimana vergente sexagesimus dies anniversarius alterius belli mundani compositi in diversis orbis terrarum partibus actus est.
Berolini cancellarius foederalis Gerhard Schröder et praesidens Germaniae Horst Köhler officio divino memoriali interfuerunt, et legati parlamentares finem belli recordabantur. In Austria autem pueri et puellae e variis nationibus oriundi centum milia candelarum accenderunt ad memoriam eorum colendam, qui in campo carcerali Mauthausen interierant.
George Bush, praesidens Civitatum Americae Unitarum, dum in itinere suo Europaeo in Hollandiam devertitur, die Dominico coemeterium militare Margraten adiit, ubi octo milia militum Americanorum altero bello mundano in Europa caducorum sepulti iacent. "Hae albae cruces marmoreae", inquit, "et stellae Davidis nobis documento sunt, quam ingenti pretio libertas nostra redempta sit."

(Reijo Pitkäranta)

Pompa militaris Moscuae

13.05.2005, klo 09.28

Die nono mensis Maii (9.5.), qui dies victoriae nuncupari solet, amplius quinquaginta principes civitatum Moscuam congregati sunt, ut pacem sexaginta annis ante in Europa factam celebrarent. Caerimoniis praefuit Vladimir Putin, praesidens Russiae. Sollemnitates inauguratae sunt pompa militari in Area Rubra instituta, cui septem milia militum et duo milia septingenti veterani adfuerunt. Ex Finnia ad diem festum agendum venerat praesidens Tarja Halonen.

Tony Blair electionum victor

13.05.2005, klo 09.27

Comitiis parlamentariis in Britannia habitis factio laboristarum, quamquam multa dena sedium parlamentarium amisit, tantam tamen victoriam reportavit, ut civitatem administrare pergeret. Quae cum ita essent, Tony Blair, vir politicus quinquaginta duos annos natus, primus minister Britanniae iam tertium factus est. Conservativi quidem in iisdem electionibus bene successerunt numerum legatorum suorum triginta tribus augendo, sed ille progressus eis non satis erat ad laboristas a summa potestate amovendos. Etiam tertia factio, scilicet democratae liberales, quodam modo victrix comitiorum exstitit, quippe quae sibi undecim novas sedes pararet. Quam ob rem Charles Kennedy, praeses factionis, ait iam in eo esse, ut Britannia ad systema trium factionum transiret.

Mensis Aprilis mitis et siccus

13.05.2005, klo 09.26

Mensis Aprilis in Finnia hoc anno uno duobusve gradibus Celsiusianis mitior erat quam fieri solet, ut ex Instituto meteorologico nuntiatur.

Temperatura enim media in Finnia inter occasum solis et meridiem sita amplius quattuor graduum erat, cum thermometer in Lapponia septentrionali circa zerum fere remaneret. Idem mensis etiam solito siccior repertus est copia pluviarum nonnisi decem aut summum viginti millimetra efficiente.

<http://www.yleradio1.fi/nuntii/id684.shtml>